

நமோ தஸ்ஸ ப⁴க³வதோ அரஹதோ ஸம்மாஸம்பு³த⁴ஸ்ஸ

வினயவினிச்ச²யோ

க³ந்தா²ரம்ப⁴கதா²

1. வந்தி³த்வா ஸிரஸா ஸெட்ட²ங், பு³த³த⁴மப்படிபுக்³லங்;
ப⁴வாபா⁴வகரங் த⁴ம்மங், க³ணஞ்சேவ நிரங்க³ணங்.
2. பி⁴க்க²னங் பி⁴க்கு²னீனஞ்ச, ஹிதத்தா²ய ஸமாஹிதோ;
பவக்கா²மி ஸமாளேஸன, வினயஸ்ஸவினிச்ச²யங்.
3. அனாகுலமஸங்கிண்ணங், மது⁴ரத்த²பத³க்கமங்;
படுபா⁴வகரங் ஏதங், பரமங் வினயக்கமே.
4. அபாரங் ஓதரந்தானங், ஸாரங் வினயஸாக³ரங்;
பி⁴க்க²னங் பி⁴க்கு²னீனஞ்ச, நாவாபூ⁴தங் மனோரமங்.
5. தஸ்மா வினயனூபாயங், வினயஸ்ஸவினிச்ச²யங்;
அவிக்கி²த்தேன சித்தேன, வத³தோ மே நிபோ³த⁴த².

பி⁴க்கு²விப⁴ங்கோ³

பாராஜிககதா²

பட²மபாராஜிககதா²

6. திவிதே⁴ திலமத்தம்பி, மக்³கே³ ஸேவனசேதனோ;
அங்க³ஜாதங் பவேஸெந்தோ, அல்லோகாஸே பராஜிதோ.
7. பவேஸனங் பவிட்ட²ங் வா, டி²தமுத்³த⁴ரணம்பி வா;
ஸஸிக்கோ² ஸாதி³யந்தோ ஸோ, ட²பெத்வா கிரியங் சுதோ.
8. ஸந்த²தேனங்க³ஜாதேன, ஸந்த²தங் வா அஸந்த²தங்;
மக்³கங் பன பவேஸெந்தோ, ததே²வாஸந்த²தேன ச.
9. உபாதி³ன்னேனுபாதி³ன்னே, அனுபாதி³ன்னகேன வா;
க⁴ட்டிதே அனுபாதி³ன்னே, ஸசே ஸாதி³யதெத்த² ஸோ.
10. ஹோதி பாராஜிகக்கெ²த்தே, பவிட்டே² து பராஜிதோ;
கெ²த்தே து²ல்லச்சயங் தஸ்ஸ, து³க்கடஞ்ச வினித்³தி³ஸே.
11. மதே அக்கா²யிதே சாபி, யேபு⁴ய்யக்கா²யிதேபி ச;
மேது²னங் படிஸேவந்தோ, ஹோதி பாராஜிகோ நரோ.
12. யேபு⁴ய்யக்கா²யிதே சாபி, உபட்³ட⁴க்கா²யிதேபி ச;
ஹோதி து²ல்லச்சயாபத்தி, ஸேஸே ஆபத்தி து³க்கடங்.
13. நிமித்தமத்தங் ஸேஸெத்வா, கா²யிதேபி ஸரீரகே;
நிமித்தே மேது²னங் தஸ்மிங், ஸேவதோபி பராஜியோ.
14. உத்³து⁴மாதாதி³ஸம்பத்தே, ஸப்³ப³த்தா²பி ச து³க்கடங்;
கா²யிதாக்கா²யிதங் நாம, ஸப்³ப³ங் மதஸரீரகே.
15. சி²ந்தி³த்வா பன தச்செ²த்வா, நிமித்துப்பாடிதே பன;
வணஸங்கே²பதோ தஸ்மிங், ஸேவங் து²ல்லச்சயங் பு²ஸே.
16. ததோ மேது²னராகே³ன, பதிதாய நிமித்ததோ;
தாயங் உபக்கமந்தஸ்ஸ, து³க்கடங் மங்ஸபேஸியங்.

17. நக²பிட்டி²ப்பமானேபி, மங்ஸே நஹாரும்ஹி வா ஸதி;
மேது²னங் படிஸேவந்தோ, ஜீவமானே பராஜிதோ.
18. கண்ணச்சி²த்³த³க்கி²னாஸாஸு, வத்தி²கோஸே வணேஸு வா;
அங்க³ஜாதங் பவேஸெந்தோ, ராகா³ து²ல்லச்சயங் பு²ஸே.
19. அவஸேஸஸரீரஸ்மிங், உபகச்சு²ருகாதி³ஸு;
வஸா மேது²னராக³ஸ்ஸ, ஸேவமானஸ்ஸ து³க்கடங்.
20. அஸ்ஸகோ³மஹிஸாதீ³னங், ஒட்ட²க³த்³ரப⁴த³ந்தினங்;
நாஸாஸு வத்தி²கோஸேஸு, ஸேவங் து²ல்லச்சயங் பு²ஸே.
21. ததா² ஸப்³ப³திரச்சா²னங், அக்கி²கண்ணவணேஸுபி;
அவஸேஸஸரீரேஸு, ஸேவமானஸ்ஸ து³க்கடங்.
22. தேஸங் அல்லஸரீரேஸு, மதானங் ஸேவதோ பன;
திவிதா⁴பி ஸியாபத்தி, கெ²த்தஸ்மிங் திவிதே⁴ ஸதி.
23. ப³ஹி மேது²னராகே³ன, நிமித்தங் இத்தி²யா பன;
நிமித்தேன சு²பந்தஸ்ஸ, தஸ்ஸ து²ல்லச்சயங் ஸியா.
24. காயஸங்ஸக்³க³ராகே³ன, நிமித்தேன முகே²ன வா;
நிமித்தங் இத்தி²யா தஸ்ஸ, சு²பதோ க³ருகங் ஸியா.
25. ததே²வோப⁴யராகே³ன, நிமித்தங் புரிஸஸ்ஸபி;
நிமித்தேன சு²பந்தஸ்ஸ, ஹோதி ஆபத்தி து³க்கடங்.
26. நிமித்தேன நிமித்தங் து, திரச்சா²னக³தித்தி²யா;
து²ல்லச்சயங் சு²பந்தஸ்ஸ, ஹோதி மேது²னராக³தோ.
27. காயஸங்ஸக்³க³ராகே³ன, திரச்சா²னக³தித்தி²யா;
நிமித்தேன நிமித்தஸ்ஸ, சு²பனே து³க்கடங் மதங்.
28. அங்க³ஜாதங் பவேஸெத்வா, தமாவட்டகதே முகே²;
தத்தா²காஸக³தங் கத்வா, நீஹரந்தஸ்ஸ து³க்கடங்.
29. ததா² சதூஹி பஸ்ஸேஹி, இத்தி²யா ஹெட்டி²மத்தலங்;
அசு²பந்தங் பவேஸெத்வா, நீஹரந்தஸ்ஸ து³க்கடங்.

30. உப்பாடிதொட்ட²மங்ஸேஸு , ப³ஹி நிக்க²ந்தகேஸு வா;
த³ந்தேஸு வாயமந்தஸ்ஸ, தஸ்ஸ து²ல்லச்சயங் ஸியா.
31. அட்டி²ஸங்க⁴ட்டனங் கத்வா, மக்³கே³ து³வித⁴ராக³தோ;
ஸுக்கே முத்தேபி வாமுத்தே, வாயமந்தஸ்ஸ து³க்கடங்.
32. இத்தி²ங் மேது²னராகே³ன, ஆலிங்க³ந்தஸ்ஸ து³க்கடங்;
ஹத்த²க்³கா³ஹபராமாஸ-சும்ப³னாதீ³ஸ்வயங் நயோ.
33. அபதே³ அஹயோ மச்சா², கபோதா த்³விபதே³பி ச;
கோ³தா⁴ சதுப்பதே³ ஹெட்டா², வத்து² பாராஜிகஸ்ஸிமே.
34. ஸேவேதுகாமதாசித்தங், மக்³கே³ மக்³க³ப்பவேஸனங்;
இத³மங்க³த்³வயங் வுத்தங், பட²மந்திமவத்து²னோ.
35. து³க்கடங் பட²மஸ்ஸேவ, ஸாமந்தமிதி வண்ணிதங்;
ஸேஸானங் பன திண்ணம்பி, து²ல்லச்சயமுதீ³ரிதங்.
36. “அனாபத்தீ”தி ஞாதப்³பங், அஜானந்தஸ்ஸ பி⁴க்கு²னோ;
ததே²வாஸாதி³யந்தஸ்ஸ, ஜானந்தஸ்ஸாதி³கம்மினோ.
37. வினயே அனயுபரமே பரமே;
ஸுஜனஸ்ஸ ஸுகா²னயனே நயனே;
படு ஹோதி பதா⁴னரதோ ந ரதோ;
இத⁴ யோ பன ஸாரமதே ரமதே.
38. இமங் ஹிதவிபா⁴வனங் பா⁴வனங்;
அவேதி³ ஸுரஸம்ப⁴வங் ஸம்ப⁴வங்;
ஸ மாரப³ளிஸாஸனே ஸாஸனே;
ஸமோ ப⁴வதுபாலினா பாலினா.

இதி வினயவினிச்ச²யே பட²மபாராஜிககதா² நிட்டி²தா.

து³தியபாராஜிககதா²

39. ஆதி³யந்தோ ஹரந்தோவ-ஹரந்தோ இரியாபத²ங்;
விகோபெந்தோ ததா² டா²னா, சாவெந்தோபி பராஜிதோ.
40. தத்த² நானேகப⁴ண்டா³னங், பஞ்சகானங் வஸா பன;

அவஹாரா த³ஸேவேதே, விஞ்ஞாதப்³பா³ விபா⁴வினா.

41. ஸாஹத்தா²ணத்திகோ சேவ, நிஸ்ஸக்³கோ³ அத்த²ஸாத⁴கோ;
து⁴ரனிக்கே²பனஞ்சாதி, இத³ங் ஸாஹத்த²பஞ்சகங்.
42. புப்³பு³ஸஹபயோகோ³ ச, ஸங்விதா³ஹரணம்பி ச;
ஸங்கேதகம்மங் நேமித்தங், புப்³பு³யோகா³தி³பஞ்சகங்.
43. தெ²ய்யபஸய்ஹபரிகப்ப-படிச்ச²ன்னகுஸாதி³கா;
அவஹாரா இமே பஞ்ச, வேதி³தப்³பா³வ விஞ்ஞனா.
44. வத்து²காலக்³க⁴தே³ஸே ச, பரிபோ⁴க³ஞ்ச பஞ்சபி;
ஞத்வா ஏதானி காதப்³போ³, பண்டி³தேன வினிச்ச²யோ.
45. து³தியங் வாபி குத்³தா³லங், பிடகங் பரியேஸதோ;
க³ச்ச²தோ தெ²ய்யசித்தேன, து³க்கடங் புப்³பு³யோக³தோ.
46. தத்த²ஜாதககட்ட²ங் வா, லதங் வா சி²ந்த³தோ பன;
து³க்கடங் உப⁴யத்தா²பி, வுத்தங் ஸஹபயோக³தோ.
47. பத²விங் க²ணதோ வாபி, ப்யுஹதோ பங்ஸுமேவ வா;
ஆமஸந்தஸ்ஸ வா கும்பி⁴ங், ஹோதி ஆபத்தி து³க்கடங்.
48. முகே² பாஸங் பவேஸெத்வா, கா²ணுகே ப³த்³த⁴கும்பி⁴யா;
ப³ந்த⁴னானங் வஸா ஞெய்யோ, டா²னபே⁴தோ³ விஜானதா.
49. த³வே டா²னானி பனேகஸ்மிங், கா²ணுகே ப³த்³த⁴கும்பி⁴யா;
வலயங் ருக்க²மூலஸ்மிங், பவேஸெத்வா கதாய வா.
50. உத்³த⁴ரந்தஸ்ஸ கா²ணுங் வா, சி²ந்த³தோ ஸங்க²லிம்பி வா;
து²ல்லச்சயங் ததோ கும்பி⁴ங், டா²னா சாவேதி சே சுதோ.
51. பட²மங் பன கும்பி⁴ங் வா, உத்³த⁴ரித்வா ததா² புன;
டா²னா சாவேதி கா²ணுங் வா, ஸங்க²லிங் வாபி ஸோ நயோ.
52. இதோ சிதோ ச க⁴ங்ஸந்தோ, மூலே ஸாரேதி ரக்க²தி;
வலயங் கே²க³தங் தத்த², கரொந்தோவ பராஜிதோ.

53.

ஐாதங் சி²ந்த³தி சே ருக்க²ங், து³க்கடங் கும்பி⁴மத்த²கே;
ஸமீபே சி²ந்த³தோ தஸ்ஸ, பாசித்தியமதத்த²ஜங்.

54. அந்தோகும்பி⁴க³தங் ப⁴ண்ட³ங், ப²ந்தா³பேதி ஸசே பன;
அபப்³யூஹேதி தத்தே²வ, தஸ்ஸ து²ல்லச்சயங் ஸியா.
55. ஹரந்தோ கும்பி⁴யா ப⁴ண்ட³ங், முட்டி²ங் சி²ந்த³தி அத்தனோ;
பா⁴ஜனே வா க³தங் கத்வா, ஹோதி பி⁴க்கு² பராஜிதோ.
56. ஹாரங் வா பன பாமங்க³ங், ஸுத்தாருள்ஹங் து கும்பி⁴யா;
ப²ந்தா³பேதி யதா²வத்து²ங், டா²னா சாவேதி சே சுதோ.
57. ஸப்பிஆதீ³ஸு யங் கிஞ்சி, பிவதோ பாத³பூரணங்;
ஏகேனேவ பயோகே³ன, பீதமத்தே பராஜயோ.
58. கத்வாவ து⁴ரனிக்கே²பங், பிவந்தஸ்ஸ புனப்புனங்;
ஸகலம்பி ச தங் கும்பி⁴ங், பிவதோ ந பராஜயோ.
59. ஸசே கி²பதி யங் கிஞ்சி, ப⁴ண்ட³கங் தேலகும்பி⁴யங்;
தங் பாத³க்³க⁴னகங் தேலங், து⁴வங் பிவதி தாவதே³.
60. ஹத்த²தோ முத்தமத்தேவ, தெ²ய்யசித்தோ வினஸ்ஸதி;
ஆவிஞ்ஜெத்வாபி வா கும்பி⁴ங், தேலங் கா³ளேதி சே ததா².
61. தேலஸ்ஸாகிரணங் ஞத்வா, கி²த்தங் ரித்தாய கும்பி⁴யா;
பீதங் தேலஞ்ச தங் ப⁴ண்ட³ங், உத்³த⁴ரந்தோவ த⁴ங்ஸிதோ.
62. தத்தே²வ பி⁴ந்த³தோ தேலங், ச²ட்³டெ³ந்தஸ்ஸ ததே²வ ச;
ஜா²பெந்தஸ்ஸ அபோ⁴க³ங் வா, கரொந்தஸ்ஸ ச து³க்கடங்.

பூ⁴மட்ட²கதா².

63. ட²பிதங் பத்த²ரித்வா ச, ஸாடகத்த²ரணாதி³கங்;
வேடெ²த்வா உத்³த⁴ரந்தஸ்ஸ, முத்தே டா²னா பராப⁴வோ.
64. ஓரிமந்தேன வா பு²ட்ட²-மோகாஸங் பாரிமந்ததோ;
பாராஜிகமதிக்கந்தே, கட்³ட⁴தோ உஜுகம்பி வா.

த²லட்ட²கதா².

65. புரதோ முக²துண்ட³ஞ்ச, கலாபக்³க³ஞ்ச பச்ச²தோ;
த்³வீஸு பஸ்ஸேஸு பக்க²ந்தோ, ஹெட்டா² பாத³னகா² ததா².
66. உத்³த்⁴ஞ்சாபி ஸிக²க்³க³ந்தி, க³க³னே க³ச்ச²தோ பன;
மோரஸ்ஸ ச² பரிச்சே²தா³, வேதி³தப்³பா³ விபா⁴வினா.
67. பி⁴க்கு² “ஸஸ்ஸாமிகங் மோரங், க³ஹெஸ்ஸாமீ”தி கே²க³தங்;
ஹத்த²ங் வாபி பஸாரேதி, புரதோ வாஸ்ஸ திட்ட²தி.
68. மோரோபி க³க³னே பக்கே², சாரேதி ந ச க³ச்ச²தி;
து³க்கடங் க³மனச்சே²தே³, ஆமஸந்தஸ்ஸ சேவ தங்.
69. டா²னா மோரமமோசெந்தோ, ப²ந்தா³பேதி ஸசே பன;
ஏவங் ப²ந்தா³பனே தஸ்ஸ, து²ல்லச்சயமுதீ³ரிதங்.
70. அக்³க³ஹெத்வா க³ஹெத்வா வா, ஹத்தே²ன பன அத்தனோ;
டா²னா சாவேதி சே மோரங், ஸயங் டா²னா சுதோ ஸியா.
71. பு²ட்டோ²காஸங் முக²க்³கே³ன, கலாபக்³கே³ன வா பன;
கலாபக்³கே³ன வா பு²ட்ட²ங், முக²துண்டே³ன பி⁴க்கு² சே.
72. அதிக்³காமெய்ய யோ மோரங், டா²னா சாவேதி நாம ஸோ;
ஏஸேவ ச நயோ பாத³-ஸிகா²பக்கே²ஸு தீ³பிதோ.
73. க³க³னே பன க³ச்ச²ந்தோ, கரே மோரோ நிலீயதி;
தங் கரேனேவ சாரெந்தோ, ப²ந்தா³பேதீதி வச்சதி.
74. ஸசே க³ண்ஹாதி தங் மோரங், இதரேன கரேன ஸோ;
சாவிதத்தா பன டா²னா, பி⁴க்கு² டா²னா சுதோ ஸியா.
75. இதரங் பன மோரஸ்ஸ, உபனேதி ஸசே கரங்;
ந தோ³ஸோ தத்த² உட்³டெ³த்வா, ஸயமேவ நிலீயதி.
76. தி³ஸ்வா அங்கே³ நிலீனங் தங், தெ²ய்யசித்தேன க³ச்ச²தோ;
பாதே³ து²ல்லச்சயங் ஹோதி, து³தியே ச பராஜயோ.
77. பூ⁴மியங் டி²தமோரஸ்ஸ, தீணி டா²னானி பண்டி³தோ;
பாதா³னஞ்ச கலாபஸ்ஸ, வஸேன பரிதீ³பயே.

78. ததோ கேஸக்³மத்தம்பி, மோரங் பத²விதோ பன;
ஹோதி பாராஜிகங் தஸ்ஸ, உக்கி²பந்தஸ்ஸ பி⁴க்கு²னோ.

79. சி²ஜ்ஜமானங் ஸுவண்ணாதி³ங், பத்தே பததி சே பன;
ஹத்தே²ன உத்³த⁴ரந்தஸ்ஸ, தஸ்ஸ பாராஜிகங் ஸியா.

80. ஸசே அனுத்³த⁴ரித்வாவ, தெ²ய்யசித்தேன க³ச்ச²தி;
து³தியே பத³வாரஸ்மிங், பாராஜிகமுதீ³ரயே.

81. ஏஸேவ ச நயோ ஞெய்யோ, ஹத்தே² வத்தே²வ மத்த²கே;
தங் தங் தஸ்ஸ ப⁴வே டா²னங், யத்த² யத்த² பதிட்டி²தங்.

ஆகாஸட்ட²கதா².

82. தெ²ய்யசித்தேன யங் கிஞ்சி, மஞ்சபீடா²தி³ஸுட்டி²தங்;
ஆமாஸம்பி அனாமாஸங், ஆமஸந்தஸ்ஸ து³க்கடங்.

83. ஸங்ஹரித்வா ஸசே வங்ஸே, ட²பிதங் ஹோதி சீவரங்;
கத்வா புனோரதோ போ⁴கங், ததா² அந்தஞ்ச பாரதோ.

84. சீவரேன புட்டோ²காஸோ, டா²னங் தஸ்ஸ பவுச்சதி;
ந து சீவரவங்ஸோ ஸோ, ஹோதீதி ஸகலோ மதோ.

85. ஓரிமந்தேன ஓகாஸங், புட்ட²ங் தமிழரேன வா;
இதரேனபி வா புட்ட²ங், ஓரிமந்தேன வா புன.

86. த³க்கி²ணந்தேன புட்ட²ங் வா, வாமந்தேனிதரேன வா;
வாமந்தேன புட்ட²ட்டா²னங், அதிகாமயதோ சுதி.

87. உத்³த⁴ங் வா உக்கி²பந்தஸ்ஸ, சீவரங் பன வங்ஸதோ;
கேஸக்³மத்தே உக்கி²த்தே, தஸ்ஸ பாராஜிகங் ப⁴வே.

88. ரஜ்ஜுகேன ச ப³ந்தி⁴த்வா, ட²பிதங் பன சீவரங்;
து²ல்லச்சயங் விமோசெந்தோ, முத்தே பாராஜிகங் பு²ஸே.

89. வேடெ²த்வா ட²பிதங் வங்ஸே, நிப்³பே³டெ²ந்தஸ்ஸ பி⁴க்கு²னோ;
வலயங் சி²ந்த³தோ வாபி, மோசெந்தஸ்ஸப்யயங் நயோ.

90.

சீவரஸ்ஸ பஸாரெத்வா, ட²பிதஸ்ஸ ஹி வங்ஸகே;
ஸங்ஹரித்வா து நிக்கித்தே, சீவரே விய நிச்ச²யோ.

91. ஸிக்காய பக்கி²பித்வா யங், லக்³கி³தங் ஹோதி ப்⁴ண்ட³கங்;
ஸிக்காதோ தங் ஹரந்தோ வா, ஸஹ ஸிக்காய வா சுதோ.
92. குந்தாதி³ங் நாக³த³ந்தேஸு, டி²தேஸு படிபாடியா;
அக்³கே³ வா பன பு³ந்தே³ வா, க³ஹெத்வா பரிகட்³ட⁴தோ.
93. பாராஜிகங் பு²ட்டோ²காஸங், அதிக்³காமயதோ ஸியா;
உஜுகங் உக்³கி²பந்தஸ்ஸ, கேஸக்³கே³ன பராஜயோ.
94. பாகாராபி⁴முகோ² ட²த்வா, ஆகட்³ட⁴தி ஸசே பன;
ஓரிமந்தபு²ட்டோ²காஸ-மிதரந்தச்சயே சுதோ.
95. ததே²வ பரதோ தஸ்ஸ, பேல்லைந்தஸ்ஸாபி பி⁴க்கு²னோ;
பி⁴த்திங் பன ச நிஸ்ஸாய, ட²பிதேபி அயங் நயோ.
96. சாலெந்தஸ்ஸ ச தாலஸ்ஸ, ப²லங் வத்து² ஹி பூரதி;
யேனஸ்ஸ ப³ந்த⁴னா முத்தே, தஸ்மிங் பாராஜிகங் ப்⁴வே.
97. பிண்டி³ங் சி²ந்த³தி தாலஸ்ஸ, ஸசே பாராஜிகங் ஸியா;
ஏஸேவ ச நயோ ஸேஸ-ருக்க²புப்ப²ப²லேஸுபி.

வேஹாஸட்ட²கதா².

98. க³ச்ச²தோ ஹி நிதி⁴ட்டா²னங், பத³வாரேன து³க்கடங்;
உத³கே பன க³ம்பீ⁴ரே, ததா² நிமுஜ்ஜனாதி³ஸு.
99. தத்த²ஜாதகபுப்பே²ஸு, யேன புப்பே²ன பூரதி;
வத்து² தங் சி²ந்த³தோ புப்ப²ங், தஸ்ஸ பாராஜிகங் வதே³.
100. ஏகனாஸஸ்ஸ வா பஸ்ஸே, வாகோ உப்பலஜாதியா;
ந சி²ஜ்ஜதி ததோ யாவ, தாவ நங் பரிரக்க²தி.
101. ஸாமிகேஹேவ புப்பே²ஸு, சி²ந்தி³த்வா ட²பிதேஸுபி;
புப்³பே³ வுத்தனயேனேவ, வேதி³தப்³போ³ வினிச்ச²யோ.
102. பா⁴ரப³த்த³தா⁴னி புப்பா²னி, ச²ஸ்வாகாரேஸு கேனசி;

ஆகாரேன ஸசே தானி, டா²னா சாவேதி நஸ்ஸதி.

103. ட²பிதங் பன புப்பா²னங், கலாபங் ஜலபிட்டி²யங்;
சாலெத்வா உத³கங் புப்ப²-ட்டா²னா சாவேதி சே சுதோ.
104. பரிகப்பேதி சே “எத்த², க³ஹெஸ்ஸாமீ”தி ரக்க²தி;
உத்³த⁴ரந்தோ க³தட்டா²னா, ப⁴ட்டோ² நாம பவுச்சதி.
105. அச்சுக்க³தஸ்ஸ தங் டா²னங், ஜலதோ ஸகலங் ஜலங்;
உப்பாடெத்வா ததோ புப்ப²ங், உஜுமுத்³த⁴ரதோ பன.
106. நாளந்தே ஜலதோ முத்த-மத்தே பாராஜிகங் ப⁴வே;
அமுத்தே ஜலதோ தஸ்மிங், து²ல்லச்சயமுதீ³ரிதங்.
107. புப்பே² க³ஹெத்வா நாமெத்வா, உப்பாடேதி ஸசே பன;
ந தஸ்ஸ உத³கங் டா²னங், நட்⁴டோ² உப்பாடிதக்க²ணே.
108. யோ ஹி ஸஸ்ஸாமிகே மச்சே², தெ²ய்யசித்தேன க³ண்ஹதி;
ப³ளிஸேனபி ஜாலேன, ஹத்தே²ன குமினேன வா.
109. தஸ்ஸேவங் க³ண்ஹதோ வத்து², யேன மச்சே²ன பூரதி;
தஸ்மிங் உத்³த⁴டமத்தஸ்மிங், ஜலா ஹோதி பராஜயோ.
110. டா²னங் ஸலிலஜானஞ்ஹி, கேவலங் ஸகலங் ஜலங்;
ஸலிலட்ட²ங் விமோசெந்தோ, ஜலா பாராஜிகோ ப⁴வே.
111. நீரதோ உப்பதித்வா யோ, தீரே பததி வாரிஜோ;
க³ண்ஹதோ தங் பனாபத்திங், ப⁴ண்ட³க்கே⁴ன வினித்³தி³ஸே.
112. மாரணத்தா²ய மச்சா²னங், தளாகே நதி³யாபி வா;
நின்னே மச்ச²விஸங் நாம, பக்கி²பித்வா க³தே பன.
113. பச்சா² மச்ச²விஸங் மச்சா², கா²தி³த்வா பிலவந்தி சே;
பாராஜிகங் மதே மச்சே², தெ²ய்யசித்தேன க³ண்ஹதோ.
114. பங்ஸுகூலிகஸஞ்ஞாய, ந தோ³ஸோ கோசி க³ண்ஹதோ;
ஸாமிகெஸ்வாஹரந்தேஸு, ப⁴ண்ட³தெ³ய்யமுதீ³ரிதங்.

115.

க³ஹெத்வா ஸாமிகா மச்சே², ஸசே யந்தி நிராலயா;
க³ண்ஹதோ பன தே ஸேஸே, தெ²ய்யசித்தேன து³க்கடங்.

116. அமதேஸு அனாபத்திங், வத³ந்தி வினயஞ்ஞனோ;
ஏஸேவ ச நயோ ஸேஸே, கச்ச²பாதி³ம்ஹி வாரிஜே.

உத³கட்ட²கதா².

117. “நாவங் நாவட்ட²ங் வா ப⁴ண்ட³ங், தே²னெத்வா க³ண்ஹிஸ்ஸாமீ”தி;
பாது³த்தா⁴ரே தோ³ஸா வுத்தா, பி⁴க்கு²ஸ்ஸேவங் கச்ச²ந்தஸ்ஸ.

118. ப³த்தா⁴ய நாவாய ஹி சண்ட³ஸோதே;
டா²னங் மதங் ப³ந்த⁴னமேகமேவ;
பி⁴க்கு²ஸ்ஸ தஸ்மிங் முத்தமத்தே;
பாராஜிகங் தஸ்ஸ வத³ந்தி தீ⁴ரா.

119. நிச்சலே உத³கே நாவ-மப³ந்த⁴னமவட்டி²தங்;
புரதோ பச்ச²தோ வாபி, பஸ்ஸதோ வாபி கட்ட³ட⁴தோ.

120. ஏகேனந்தேன ஸம்புட்ட²-மோகாஸமிதரேன தங்;
அதிக்காமயதோ நாவங், தஸ்ஸ பாராஜிகங் ஸியா.

121. ததா² -

உத³த⁴ங் கேஸக்க³மத்தம்பி, உத³கம்ஹா விமோசிதே;
அதோ⁴னாவாதலங் தேன, புட்ட²ஞ்ச முக²வட்டியா.

122. ப³ந்தி⁴த்வா பன யா தீரே, ட²பிதா நிச்சலே ஜலே;
ப³ந்த⁴னஞ்ச டி²தோகாஸோ, டா²னங் தஸ்ஸா த்³விதா⁴ மதங்.

123. ஹோதி து²ல்லச்சயங் புப்³பங், ப³ந்த⁴னஸ்ஸ விமோசனே;
பச்சா² கேனசுபாயேன, டா²னா சாவேதி சே சுதோ.

124. சாவெத்வா பட²மங் டா²னா, பச்சா² ப³ந்த⁴னமோசனே;
ஏஸேவ ச நயோ வுத்தோ, தெ²ய்யசித்தஸ்ஸ பி⁴க்கு²னோ.

125. உஸ்ஸாரெத்வா நிகுஜ்ஜித்வா, ட²பிதாய த²லே பன;
புட்டோ²காஸோவ ஹி டா²னங், நாவாய முக²வட்டியா.

- 126.

ஞெய்யோ டா²னபரிச்சே²தோ³;
ஆகாரேஹேவ பஞ்சஹி;
யதோ குதோசி சாவெந்தோ;
ஹோதி பாராஜிகோ நரோ.

127. ஏஸேவ ச நயோ ஞெய்யோ, நாவாயுக்குஜ்ஜிதாயபி;
ட²பிதாயபி நாவாய, க⁴டிகானங் தது²பரி.
128. தெ²ய்யா தித்தே² டி²தங் நாவங், ஆருஹித்வா ஸசே பன;
அரித்தேன பி²யேனாபி, பாஜெந்தஸ்ஸ பராஜயோ.
129. ஸசே ச²த்தங் பணாமெத்வா, உஸ்ஸாபெத்வாவ சீவரங்;
லங்காரஸதி³ஸங் கத்வா, க³ண்ஹாபேதி ஸமீரணங்.
130. ஆக³ம்ம ப³லவா வாதோ, நாவங் ஹரதி சே பன;
வாதேனேவ ஹடா நாவா, ந தோ³ஸோ கோசி விஜ்ஜதி.
131. ஸயமேவ ச யங் கிஞ்சி, கா³மதித்த²முபாக³தங்;
அசாவெந்தோவ தங் டா²னா, கிணித்வா சே பலாயதி.
132. அவஹாரோ ந பி⁴க்கு²ஸ்ஸ, ப⁴ண்ட³தெ³ய்யமுதீ³ரிதங்;
ஸயமேவ ச க³ச்ச²ந்திங், டா²னா சாவேதி சே சுதோ.

நாவட்ட²கதா².

133. யானங் நாம ரதோ² வய்ஹங், ஸகடங் ஸந்த³மானிகா;
யானங் அவஹரிஸ்ஸாமி, யானட்ட²மிதி வா பன.
134. க³ச்ச²தோ து³க்கடங் வுத்தங், து³தியங் பரியேஸதோ;
டா²னா சாவனயோக³ஸ்மிங், விஜ்ஜமானே பராஜயோ.
135. யானஸ்ஸ து³கயுத்தஸ்ஸ, த³ஸ டா²னானி தீ³பயே;
யானங் பாஜயதோ தஸ்ஸ, நிஸீதி³த்வா து⁴ரே பன.
136. து²ல்லச்சயங் து கோ³ணானங், பாது³த்தா⁴ரே வினித்தி³ஸே;
சக்கானஞ்ஹி டி²தோகாஸ-மதிக்கந்தே பராப⁴வோ.
137. அயுத்தகஸ்ஸாபி ச யானகஸ்ஸ, து⁴ரேனுபத்த²ம்ப⁴னியங் டி²தஸ்ஸ;
வஸேனுபத்த²ம்ப⁴னிசக்ககானங், டா²னானி தீ³ணேவ ப⁴வந்தி தஸ்ஸ.

138. ததா² து⁴ரேன தா³ருனங், உபரிட்ட²பிதஸ்ஸ ச;
பூ⁴மியம்பி து⁴ரேனேவ, ததே²வ ட²பிதஸ்ஸ ச.
139. புரதோ பச்ச²தோ வாபி, டா²னா சாவேதி சே பன;
து²ல்லச்சயங் து திண்ணம்பி, டா²னா சாவே பராஜயோ.
140. அபனெத்வான சக்கானி, அக்கா²னங் ஸீஸகேஹி து;
டி²தஸ்ஸுபரி தா³ருனங், டா²னானி த்³வே வினித்³தி³ஸே.
141. கட்³ட⁴ந்தோ உக்கி²பந்தோ வா, புட்டோ²காஸச்சயே சுதோ;
ட²பிதஸ்ஸ பனஞ்ஞஸ்ஸ, பூ⁴மியங் யஸ்ஸ கஸ்ஸசி.
142. அக்கு²த்³தீ⁴னங் து⁴ரஸ்ஸாதி, பஞ்ச டா²னானி தீ³பயே;
உத்³தீ⁴ஸு வா க³ஹெத்வா தங், டா²னா சாவேதி சே சுதோ.
143. ட²பிதஸ்ஸ ஹி சக்கஸ்ஸ, நாபி⁴யா பன பூ⁴மியங்;
ஏகமேவ ஸியா டா²னங், பரிச்சே²தோ³பி பஞ்சதா⁴.
144. புஸித்வா யங் டி²தங் பூ⁴மிங், நேமிபஸ்ஸேன நாபி⁴யா;
டா²னானி த்³வே ப⁴வந்தஸ்ஸ, நட்²டோ² தேஸமதிக்கமே.
145. தி³ஸ்வா யானமனாரக்க²ங், படிபன்னங் மஹாபதே²;
ஆருஹித்வா அசோதெ³த்வா, கிணித்வா யாதி வட்டதி.

யானட்ட²கதா².

146. ஸீஸக்க²ந்த⁴கடோலம்ப³-வஸா பா⁴ரோ சதுப்³பி³தோ⁴;
தத்த² ஸீஸக³தங் பா⁴ரங், ஆமஸந்தஸ்ஸ து³க்கடங்.
147. இதோ சிதோ ச க⁴ங்ஸந்தோ, தெ²ய்யசித்தேன யோ பன;
ஸிரஸ்மிங்யேவ ஸாரேதி, தஸ்ஸ து²ல்லச்சயங் ஸியா.
148. க²ந்த⁴ங் ஓரோபிதே பா⁴ரே, தஸ்ஸ பாராஜிகங் மதங்;
ஸீஸதோ கேஸமத்தம்பி, மோசெந்தோபி பராஜிதோ.
149. பா⁴ரங் பத²வியங் கிஞ்சி, ட²பெத்வா ஸுத்³த⁴மானஸோ;
பச்சா² தங் தெ²ய்யசித்தேன, உத்³த⁴ரந்தோ பராஜிதோ.522

எத்த² வுத்தனயேனேவ, ஸேஸேஸுபி அஸேஸதோ;
பா⁴ரேஸு மதிஸாரேன, வேதி³தப்³போ³ வினிச்ச²யோ.

பா⁴ரட்ட²கதா².

151. து³க்கடங் முனினா வுத்தங், ஆராமங் அபி⁴யுஞ்ஜதோ;
பராஜேதி பரங் த⁴ம்மங், சரந்தோ சே பராஜிதோ.522
152. விமதிங் ஜனயந்தஸ்ஸ, தஸ்ஸ து²ல்லச்சயங் ஸியா;
பரஜ்ஜதி ஸயங் த⁴ம்மங், சரந்தோ யோபி தஸ்ஸ ச.
153. ஸாமினோ து⁴ரனிக்கே²பே, “ந த³ஸ்ஸாமீ”தி சத்தனோ;
பாராஜிகங் ப⁴வே தஸ்ஸ, ஸப்³பே³ஸங் கூடஸக்கி²னங்.

ஆராமட்ட²கதா².

154. விஹாரங் ஸங்கி⁴கங் கிஞ்சி, அச்சி²ந்தி³த்வான க³ண்ஹிதுங்;
ஸப்³பே³ஸங் து⁴ரனிக்கே²பா-பா⁴வதோவ ந ஸிஜ்ஜ²தி.

விஹாரட்ட²கதா².

155. ஸீஸானி ஸாலிஆதீ³னங், நிரும்பி⁴த்வான க³ண்ஹதோ;
அஸிதேன ச லாயித்வா, சி²ந்தி³த்வா வா கரேன ச.
156. யஸ்மிங் பீ³ஜேபி வா வத்து², ஸீஸே பூரேதி முட்டி²யங்;
ப³ந்த⁴னா மோசிதே தஸ்மிங், தஸ்ஸ பாராஜிகங் ப⁴வே.
157. அச்சி²ன்னோ பன த³ண்டோ³ வா, தசோ வா அப்பமத்தகோ;
வீஹினாளம்பி வா தீ³க⁴ங், அனிக்க²ந்தோவ ரக்க²தி.
158. ஸசே ஸோ பரிகப்பேதி, “மத்³தி³த்வா பனித³ங் அஹங்;
பப்போ²டெத்வா இதோ ஸாரங், க³ண்ஹிஸ்ஸாமீ”தி ரக்க²தி.
159. மத்³த³னுத்³த⁴ரணே நத்தி², தோ³ஸோ பப்போ²டனேபி வா;
அத்தனோ பா⁴ஜனக³தங், கரொந்தஸ்ஸ பராஜயோ.
160. ஜானங் கேஸக்³மத்தம்பி, பத²விங் பரஸந்தகங்;
தெ²ய்யசித்தேன சே கீ²லங், ஸங்காமேதி பராஜயோ.

161.

தஞ்ச கோ² ஸாமிகானங் து, து⁴ரனிக்கே²பனே ஸதி;
அனக்³கா⁴ பூ⁴மி நாமேஸா, தஸ்மா ஏவமுதீ³ரிதங்.

162. க³ஹேதப்³பா³ ஸசே ஹோதி, த்³வீஹி கீ²லேஹி யா பன;
ஆதோ³ து²ல்லச்சயங் தேஸு, து³தியேவ பராஜயோ.

163. ஞாபேதுகாமோ யோ பி⁴க்கு², “மமேத³ங் ஸந்தக”ந்தி ச;
ரஜ்ஜங் வாபி பஸாரேதி, யட்டி²ங் பாதேதி து³க்கடங்.

164. யேஹி த்³வீஹி பயோகே³ஹி, அத்தனோ ஸந்தகங் ஸியா;
ஆதோ³ து²ல்லச்சயங் தேஸு, து³தியே ச பராஜயோ.

கெ²த்தட்ட²கதா².

165. கெ²த்தே வுத்தனயேனேவ, வத்து²ட்ட²ஸ்ஸ வினிச்ச²யோ;
கா³மட்டே²பி ச வத்தப்³பங், அபுப்³பங் நத்தி² கிஞ்சிபி.

வத்து²ட்ட²கா³மட்ட²கதா².

166. திணங் வா பன பண்ணங் வா, லதங் வா கட்ட²மேவ வா;
ப⁴ண்ட³க்³கே⁴னேவ காதப்³போ³, க³ண்ஹந்தோ தத்த²ஜாதகங்.

167. மஹக்³கே⁴ பன ருக்க²ஸ்மிங், சி²ன்னமத்தேபி நஸ்ஸதி;
தச்செ²த்வா ட²பிதோ ருக்கோ², க³ஹேதப்³போ³ ந கோசிபி.

168. சி²ந்தி³த்வா ட²பிதங் மூலே, ருக்க²மத்³த⁴க³தங் பன;
“ச²ட்³டி³தோ ஸாமிகேஹி”தி, க³ஹேதுங் பன வட்டதி.

169. லக்க²ணே ச²ல்லியோனத்³தே⁴, ந தோ³ஸோ கோசி க³ண்ஹதோ;
அஜ்ஜா²வுத்த²ங் கதங் வாபி, வினஸ்ஸந்தஞ்ச க³ண்ஹதோ.

170. யோ சார்க்க²ட்டா²னங் பத்வா, கத்வா கம்மட்டா²னாதீ³னி;
சித்தே சிந்தெந்தோ வா அஞ்ஞங், ப⁴ண்ட³தெ³ய்யங் ஹோதேவஸ்ஸ.

171. வராஹப்³யக்³க⁴ச்ச²தரச்ச²காதி³தோ;
உபத்³த³வா முச்சிதுகாமதாய யோ;
ததே²வ தங் டா²னமதிக்கமேதி சே;
ந கோசி தோ³ஸோ பன ப⁴ண்ட³தெ³ய்யகங்.

172. இது³மார்க்க²ண்ட்டா²னங், க³ருகங் ஸுங்ககா⁴ததோ;
தஸ்மா து³க்கடமுத்தி³ட்ட²ங், தமனோக்கம்ம க³ச்ச²தோ.

173. ஏதங் பரிஹரந்தஸ்ஸ, தெ²ய்யசித்தேன ஸத்து²னா;
பாராஜிகமனுத்தி³ட்ட²ங், ஆகாஸேனாபி க³ச்ச²தோ.

174. தஸ்மா எத்த² விஸேஸேன, ஸதிஸம்பன்னசேதஸா;
அப்பமத்தேன ஹோதப்³பங், பியஸீலேன பி⁴க்கு²னா.

அரஞ்ஞட்ட²கதா².

175. தோயது³ல்லப⁴காலஸ்மிங், பா⁴ஜனே கோ³பிதங் ஜலங்;
ஆவிஞ்ஜித்வா பவேஸெத்வா, சி²த்த³ங் கத்வாபி வா ததா².

176. வாபியங் வா தளாகே வா, பா⁴ஜனங் அத்தனோ பன;
க³ண்ஹந்தஸ்ஸ பவேஸெத்வா, ப⁴ண்ட³க்கே⁴ன வினித்தி³ஸே.

177. சி²ந்த³தோ மரியாத³ங் து, அதி³ன்னாதா³னபுப்³தோ;
பூ⁴தகா³மேன ஸத்தி⁴ம்பி, து³க்கடங் பரிதீ³பிதங்.

178. அந்தோ ட²த்வா ப³ஹி ட²த்வா, சி²ந்த³ந்தோ உப⁴யத்த²பி;
ப³ஹிஅந்தேன காதப்³போ³, அந்தோஅந்தேன மஜ்ஜ²தோ.

உத³ககதா².

179. வாரேன ஸாமணேரா யங், த³ந்தகட்ட²மரஞ்ஞதோ;
ஆனெத்வாசரியானம்பி, ஆஹரந்தி ஸசே பன.

180. சி²ந்தி³த்வா யாவ ஸங்க⁴ஸ்ஸ, ந நிய்யாதெ³ந்தி தே பன;
ஆப⁴தங் தாவ தங் ஸப்³பங், தேஸமேவ ச ஸந்தகங்.

181. தஸ்மா தங் தெ²ய்யசித்தேன, க³ண்ஹந்தஸ்ஸ ச பி⁴க்கு²னோ;
க³ருப⁴ண்ட³ஞ்ச ஸங்க⁴ஸ்ஸ, ப⁴ண்ட³க்கே⁴ன பராப⁴வோ.

182. யதா³ நிய்யாதி³தங் தேஹி, ததோ பட்டா²ய ஸங்கி⁴கங்;
க³ண்ஹந்தஸ்ஸாபி தெ²ய்யாய, அவஹாரோ ந விஜ்ஜதி.

183. அரக்க²த்தா யதா²வுட்³ட⁴-மபா⁴ஜேதப்³தோபி ச;
ஸப்³பஸாதா⁴ரணத்தா ச, அஞ்ஞங் விய ந ஹோதித³ங்.

த³ந்தகட்ட²கதா².

184. அக்³கி³ங் வா தே³தி ஸத்தே²ன, ஆகோடேதி ஸமந்ததோ;
ஆகோடேதி விஸங் வாபி, மண்டு³கண்டகனாமகங்.
185. யேன வா தேன வா ருக்கோ², வினஸ்ஸதி ச ட³ய்ஹதி;
ஸப்³புத்த² பி⁴க்கு²னோ தஸ்ஸ, ப⁴ண்ட³தெ³ய்யங் பகாஸிதங்.

வனப்பதிகதா².

186. ஸீஸதோ கண்ணதோ வாபி, கீ³வதோ ஹத்த²தோபி வா;
சி²ந்தி³த்வா வாபி மோசெத்வா, க³ண்ஹதோ தெ²ய்யசேதஸா.
187. ஹோதி மோசிதமத்தஸ்மிங், ஸீஸாதீ³ஹி பராஜயோ;
து²ல்லச்சயங் கரொந்தஸ்ஸ, ஆகட்³ட⁴னவிகட்³ட⁴னங்.
188. ஹத்தா² அனீஹரித்வாவ, வலயங் கடகம்பி வா;
அக்³க³பா³ஹுஞ்ச க⁴ங்ஸந்தோ, சாரேதி அபராபரங்.
189. தமாகாஸக³தங் சோரோ, கரோதி யதி³ ரக்க²தி;
ஸவிஞ்ஞாணகதோ மூலே, வலயங்வ ந ஹோதித³ங்.
190. நிவத்த²ங் பன வத்த²ங் யோ, அச்சி²ந்த³தி பரஸ்ஸ சே;
பரோபி பன லஜ்ஜாய, ஸஹஸா தங் ந முஞ்சதி.
191. ஆகட்³ட⁴தி ச சோரோபி, ஸோ பரோ தாவ ரக்க²தி;
பரஸ்ஸ ஹத்த²தோ வத்தே², முத்தமத்தே பராஜயோ.
192. ஸப⁴ண்ட³ஹாரகங் ப⁴ண்ட³ங், நெந்தஸ்ஸ பட²மே பதே³;
து²ல்லச்சயமதிக்கந்தே, து³தியேவ சுதோ ஸியா.
193. பாதாபேதி ஸசே ப⁴ண்ட³ங், தஜ்ஜெத்வா தெ²ய்யசேதனோ;
பரஸ்ஸ ஹத்த²தோ ப⁴ண்டே³, முத்தமத்தே பராஜயோ.
194. அதா²பி பரிகப்பெத்வா, பாதாபேதி வ யோ பன;
தஸ்ஸ பாதாபனே வுத்தங், து³க்கடாமஸனேபி ச.
195. ப²ந்தா³பேதி யதா²வத்து²ங், டா²னா சாவேதி சே சுதோ;
“திட்ட² திட்டா²”தி வத³தோ, ந தோ³ஸோ ச²ட்³டி³தேபி ச.

196. ஆக³ந்த்வா தெ²ய்யசித்தேன, பச்சா² தங் க³ண்ஹதோ ஸியா;
பாராஜிகங் தது³த்தா⁴ரே, ஸாலயே ஸாமிகே க³தே.
197. க³ண்ஹதோ ஸகஸஞ்ஞாய, க³ஹணே பன ரக்க²தி;
ப⁴ண்ட³தெ³ய்யங் ததா² பங்ஸு-கூலஸஞ்ஞாய க³ண்ஹதோ.
198. “திட்ட² திட்டா²”தி வுத்தோ ச, ச²ட்³டெ³த்வா பன ப⁴ண்ட³கங்;
கத்வாவ து⁴ரனிக்கே²பங், பீ⁴தோ சோரா பலாயதி.
199. க³ண்ஹதோ தெ²ய்யசித்தேன, உத்³தா⁴ரே து³க்கடங் புன;
தா³தப்³மாஹராபெந்தே, அதெ³ந்தஸ்ஸ பராஜயோ.
200. “கஸ்மா? தஸ்ஸ பயோகே³ன, ச²ட்³டி³தத்தா”தி ஸாத³ரங்;
மஹாஅட்ட²கதா²யங் து, வுத்தமஞ்ஞாஸு நாக³தங்.

ஹரணகதா².

201. ஸம்பஜானமுஸாவாத³ங், “ந க³ண்ஹாமீ”தி பா⁴ஸதோ;
அதி³ன்னாதா³னபுப்³த்தா, து³க்கடங் ஹோதி பி⁴க்கு²னோ.
202. “ரஹோ மயா பனேதஸ்ஸ, ட²பிதங் கிங் நு த³ஸ்ஸதி”;
இச்சேவங் விமதுப்பாதே³, தஸ்ஸ து²ல்லச்சயங் ஸியா.
203. தஸ்மிங் தா³னே நிருஸ்ஸாஹே, பரோ சே நிக்கி²பே து⁴ரங்;
உபி⁴ன்னங் து⁴ரனிக்கே²பே, பி⁴க்கு² ஹோதி பராஜிதோ.
204. சித்தேனாதா³துகாமோவ, “த³ஸ்ஸாமீ”தி முகே²ன சே;
வத³தோ து⁴ரனிக்கே²பே, ஸாமினோ ஹி பராஜயோ.

உபனிதி⁴கதா².

205. ஸுங்ககா⁴தஸ்ஸ அந்தோவ, ட²த்வா பாதேதி சே ப³ஹி;
து⁴வங் பததி சே ஹத்தா², முத்தமத்தே பராஜயோ.
206. தங் ருக்கே² கா²ணுகே வாபி, ஹுத்வா படிஹதங் புன;
வாதுக்கி²த்தம்பி வா அந்தோ, ஸசே பததி ரக்க²தி.
207. பதித்வா பூ⁴மியங் பச்சா², வட்டந்தங் பன ப⁴ண்ட³கங்;
ஸசே பவிஸத்யந்தோவ, தஸ்ஸ பாராஜிகங் ஸியா.

208. ட²த்வா ட²த்வா பவட்டந்தங், பவிட்ட²ங் சே பராஜயோ;
அதிட்ட²மானங் வட்டித்வா, பவிட்ட²ங் பன ரக்க²தி.
209. இதி வுத்தங் த³ஹ்ங் கத்வா, குருந்த³ட்ட²கதா²தி³ஸு;
ஸாரதோ தங் க³ஹேதப்³ப³ங், யுத்தங் விய ச தி³ஸ்ஸதி.
210. ஸயங் வா யதி³ வட்டேதி, வட்டாபேதி பரேன வா;
அட்ட²த்வா வட்டமானங் தங், க³தங் நாஸகரங் ஸியா.
211. ட²த்வா ட²த்வா ஸசே அந்தோ, ப³ஹி க³ச்ச²தி ரக்க²தி;
ட²பிதே ஸுத்³த⁴சித்தேன, ஸயங் வட்டதி வட்டதி.
212. க³ச்ச²ந்தே பன யானே வா, க³ஜே வா தங் ட²பேதி சே;
ப³ஹி நீஹரணத்தா²ய, நாவஹாரோபி நீஹடே.
213. ட²பிதே டி²தயானே வா, பயோகே³ன வினா க³தே;
ஸதிபி தெ²ய்யசித்தஸ்மிங், அவஹாரோ ந விஜ்ஜதி.
214. ஸசே பாஜேதி தங் யானங், ட²பெத்வா யானகே மணிங்;
ஸியா பாராஜிகங் தஸ்ஸ, ஸீமாதிக்கமனே பன.
215. ஸுங்கட்டா²னே மதங் ஸுங்கங், க³ந்துங் த³த்வாவ வட்டதி;
ஸேஸோ இத⁴ கதா²மக்³கோ³, அரஞ்ஞுட்ட²கதா²ஸமோ.
- ஸுங்ககா⁴தகதா².
216. அந்தோஜாதங் த⁴னக்கீதங், தி³ன்னங் வா பன கேனசி;
தா³ஸங் கரமரானீதங், ஹரந்தஸ்ஸ பராஜயோ.
217. பு⁴ஜிஸ்ஸங் வா ஹரந்தஸ்ஸ, மானுஸங் மாதராபி வா;
பிதராட²பிதங் வாபி, அவஹாரோ ந விஜ்ஜதி.
218. தங் பலாபேதுகாமோவ, உக்கி²பித்வா பு⁴ஜேஹி வா;
தங் டி²தட்டா²னதோ கிஞ்சி, ஸங்காமேதி பராஜயோ.
219. தஜ்ஜெத்வா பத³ஸா தா³ஸங், நெந்தஸ்ஸ பத³வாரதோ;
ஹொந்தி ஆபத்தியோ வுத்தா, தஸ்ஸ து²ல்லச்சயாத³யோ.

ஹத்தா²தீ³ஸு க³ஹெத்வா தங், கட்³ட⁴தோபி பராஜயோ;
“க³ச்ச² யாஹி பலாயா”தி, வத்³தோபி அயங் நயோ.

221. வேக³ஸாவ பலாயந்தங், “பலாயா”தி ச பா⁴ஸதோ;
ஹோதி பாராஜிகேனஸ்ஸ, அனாபத்தி ஹி பி⁴க்கு²னோ.

222. ஸணிகங் பன க³ச்ச²ந்தங், ஸசே வத்³தி ஸோபி ச;
ஸீக⁴ங் க³ச்ச²தி சே தஸ்ஸ, வசனேன பராஜயோ.

223. பலாயித்வா ஸசே அஞ்ஞங், கா³மங் வா நிக³மம்பி வா;
க³தங் தி³ஸ்வா ததோ தஞ்சே, பலாபேதி பராஜயோ.

பாணகதா².

224. தெ²ய்யா ஸப்பகரண்ட³ங் சே, பராமஸதி து³க்கடங்;
ப²ந்தா³பேதி யதா²வத்து²ங், டா²னதோ சாவனே சுதோ.

225. உக்³கா⁴டெத்வா கரண்ட³ங் து, ஸப்பமுத்³த⁴ரதோ பன;
கரண்ட³தலதோ முத்தே, நங்கு³ட்டே² து பராஜயோ.

226. க⁴ங்ஸித்வா கட்³ட⁴தோ ஸப்பங், நங்கு³ட்டே² முக²வட்டிதோ;
தஸ்ஸ ஸப்பகரண்ட³ஸ்ஸ, முத்தமத்தே பராஜயோ.

227. கரண்ட³ங் விவரித்வா சே, பக்கோஸந்தஸ்ஸ நாமதோ;
ஸோ நிக்க²மதி சே ஸப்போ, தஸ்ஸ பாராஜிகங் ஸியா.

228. ததா² கத்வா து மண்டு³க-முஸிகானங் ரவம்பி வா;
பக்கோஸந்தஸ்ஸ நாமேன, நிக்க²ந்தேபி பராஜயோ.

229. முக²ங் அவிவரித்வாவ, கரொந்தஸ்ஸேவமேவ ச;
யேன கேனசி நிக்க²ந்தே, ஸப்பே பாராஜிகங் ஸியா.

230. முகே² விவரிதே ஸப்போ, ஸயமேவ பலாயதி;
ந பக்கோஸதி சே தஸ்ஸ, ப⁴ண்ட³தெ³ய்யமுதீ³ரிதங்.

அபத³கதா².

231. தெ²ய்யசித்தேன யோ ஹத்தி²ங், கரோதாமஸனாத³யோ;
ஹாந்தி ஆபத்தியோ தஸ்ஸ, திவிதா⁴ து³க்கடாத³யோ.

232. ஸாலாயங் டி²தஹத்தி²ஸ்ஸ, அந்தோவத்த²ங்க³ணேஸுபி;
டா²னங் ஸாலா ச வத்து² ச, அங்க³ணங் ஸகலங் ஸியா.
233. அப³த்³த⁴ஸ்ஸ ஹி ப³த்³த⁴ஸ்ஸ, டி²தட்டா²னஞ்ச ப³ந்த⁴னங்;
தஸ்மா தேஸங் வஸா ஹத்தி²ங், ஹரதோ காரயே பு³தோ⁴.
234. நக³ரஸ்ஸ ப³ஹித்³தா⁴ து, டி²தஸ்ஸ பன ஹத்தி²னோ;
டி²தட்டா²னங் ப⁴வே டா²னங், பத³வாரேன காரயே.
235. நிபன்னஸ்ஸ க³ஜஸ்ஸேகங், டா²னங் தங் உட்ட²பேதி சே;
தஸ்மிங் உட்டி²தமத்தே து, தஸ்ஸ பாராஜிகங் ஸியா.
236. ஏஸேவ ச நயோ ஞெய்யோ, துரங்க³மஹிஸாதி³ஸு;
நத்தி² கிஞ்சிபி வத்தப்³ப³ங், த்³விபதே³பி ப³ஹுப்பதே³.

சதுப்பத³கதா².

237. பரேஸந்தி விஜானித்வா, பரேஸங் ஸந்தகங் த⁴னங்;
க³ருகங் தெ²ய்யசித்தேன, டா²னா சாவேதி சே சுதோ.
238. அனாபத்தி ஸஸஞ்ஞிஸ்ஸ, திரச்சா²னபரிக்க³ஹே;
தாவகாலிகவிஸ்ஸாஸ-க்³கா³ஹே பேதபரிக்க³ஹே.
239. யோ பனெத்த² ச வத்தப்³போ³, பாளிமுத்தவினிச்ச²யோ;
தங் மயங் பரதோயேவ, ப⁴ணிஸ்ஸாம பகிண்ணகே.
240. பராஜிதானேகமலேன வுத்தங்;
பாராஜிகங் யங் து³தியங் ஜினேன;
வுத்தோ ஸமாளேன மயஸ்ஸ சத்தோ²;
வத்துங் அஸேஸேன ஹி கோ ஸமத்தோ².

இதி வினயவினிச்ச²யே து³தியபாராஜிககதா² நிட்டி²தா.

ததியபாராஜிககதா²

241. மனுஸ்ஸஜாதிங் ஜானந்தோ, ஜீவிதா யோ வியோஜயே;
நிக்கி²பெய்யஸ்ஸ ஸத்த²ங் வா, வதெ³ய்ய மரணே கு³ணங்.
242. தே³ஸெய்ய மரணூபாயங், ஹோதாயம்பி பராஜிதோ;

அஸந்தெ⁴ய்யோவ ஸோ ஞெய்யோ, த்³வேதா⁴ பி⁴ன்னஸிலா விய.

243. வுத்தா பாணாதிபாதஸ்ஸ, பயோகா³ ச² மஹேஸினா;
ஸாஹத்தி²கோ ததா²ணத்தி-நிஸ்ஸக்³கி³தா²வராத³யோ.

244. தத்த² காயேன வா காய-படிப³த்³தே⁴ன வா ஸயங்;
மாரெந்தஸ்ஸ பரங் கா⁴தோ, அயங் ஸாஹத்தி²கோ மதோ.

245. “ஏவங் த்வங் பஹரித்வா தங், மாரேஹி”தி ச பி⁴க்கு²னோ;
பரஸ்ஸாணாபனங் நாம, அயமாணத்திகோ நயோ.

246. தூ³ரங் மாரேதுகாமஸ்ஸ, உஸுஆதி³னிபாதனங்;
காயேன படிப³த்³தே⁴ன, அயங் நிஸ்ஸக்³கி³யோ விதி⁴.

247. அஸஞ்சாரிமுபாயேன, மாரணத்த²ங் பரஸ்ஸ ச;
ஓபாதாதி³விதா⁴னங் து, பயோகோ³ தா²வரோ அயங்.

248. பரங் மாரேதுகாமஸ்ஸ, விஜ்ஜாய ஜப்பனங் பன;
அயங் விஜ்ஜாமயோ நாம, பயோகோ³ பஞ்சமோ மதோ.

249. ஸமத்தா² மாரணே யா ச, இத்³தி⁴ கம்மவிபாகஜா;
அயமித்³தி⁴மயோ நாம, பயோகோ³ ஸமுதீ³ரிதோ.

250. ஏகேகோ து³விதோ⁴ தத்த², ஹோதீதி பரிதீ³பிதோ;
உத்³தே³ஸோபி அனுத்³தே³ஸோ, பே⁴தோ³ தேஸமயங் பன.

251. ப³ஹுஸ்வபி யமுத்³தி³ஸ்ஸ, பஹாரங் தே³தி சே பன;
மரணேன ச தஸ்ஸேவ, கம்முனா தேன ப³ஜ்ஜ²தி.

252. அனுத்³தி³ஸ்ஸ பஹாரேபி, யஸ்ஸ கஸ்ஸசி தே³ஹினோ;
பஹாரப்பச்சயா தஸ்ஸ, மரணங் சே பராஜயோ.

253. மதே பஹடமத்தே வா, பச்சா² முப⁴யதா²பி ச;
ஹந்தா பஹடமத்தஸ்மிங், கம்முனா தேன ப³ஜ்ஜ²தி.

254. ஏவங் ஸாஹத்தி²கோ ஞெய்யோ, ததா² ஆணத்திகோபி ச;
எத்தாவதா ஸமாஸேன, த்³வே பயோகா³ ஹி த³ஸ்ஸிதா.

255.

வத்து² காலோ ச தே³ஸோ ச, ஸத்த²ஞ்ச இரியாபதோ²;
கரணஸ்ஸ விஸேஸோதி, ச² ஆணத்தினியாமகா.

256. மாரேதப்³போ³ ஹி யோ தத்த², ஸோ “வத்தூ²”தி பவுச்சதி;
புப்³புண்ணஹாதி³ ஸியா காலோ, ஸத்தானங் யொப்³புனாதி³ ச.

257. தே³ஸோ கா³மாதி³ விஞ்ஞெய்யோ, ஸத்த²ங் தங் ஸத்தமாரணங்;
மாரேதப்³புஸ்ஸ ஸத்தஸ்ஸ, நிஸஜ்ஜாதி³ரியாபதோ².

258. விஜ்ஜ²னங் பே⁴த³னஞ்சாபி, சே²த³னங் தாளனம்பி வா;
ஏவமாதி³விதோ⁴னேகோ, விஸேஸோ கரணஸ்ஸ து.

259. “யங் மாரேஹீ”தி ஆணத்தோ, அஞ்ஞங் மாரேதி சே ததோ;
“புரதோ பஹரித்வான, மாரேஹீ”தி ச பா⁴ஸிதோ.

260. பச்ச²தோ பஸ்ஸதோ வாபி, பஹரித்வான மாரிதே;
வத்தா²ணத்தி விஸங்கேதா, மூலட்டோ² பன முச்சதி.

261. வத்து²ங் தங் அவிரஜ்ஜி²த்வா, யதா²ணத்திஞ்ச மாரிதே;
உப⁴யேஸங் யதா²காலங், கம்மப³த்³தோ⁴ உதீ³ரிதோ.

262. ஆணத்தோ “அஜ்ஜ புப்³புண்ணஹே, மாரேஹீ”தி ச யோ பன;
ஸோ சே மாரேதி ஸாயன்ஹே, மூலட்டோ² பரிமுச்சதி.

263. ஆணத்தஸ்ஸேவ ஸோ வுத்தோ;
கம்மப³த்³தோ⁴ மஹேஸினா;
காலஸ்ஸ ஹி விஸங்கேதா;
தோ³ஸோ நாணாபகஸ்ஸ ஸோ.

264. “அஜ்ஜ மாரேஹி புப்³புண்ணஹே, ஸ்வேவா”தி அனியாமிதே;
யதா³ கதா³சி புப்³புண்ணஹே, விஸங்கேதோ ந மாரிதே.

265. ஏதேனேவ உபாயேன, காலபே⁴தே³ஸு ஸப்³புஸோ;
ஸங்கேதோ ச விஸங்கேதோ, வேதி³தப்³போ³ விபா⁴வினா.

266. “இமங் கா³மே டி²தங் வேரிங், மாரேஹீ”தி ச பா⁴ஸிதோ;
ஸசே ஸோ பன மாரேதி, டி²தங் தங் யத்த² கத்த²சி.

267.

நத்தி² தஸ்ஸ விஸங்கேதோ, உபோ⁴ ப³ஜ்ஜ²ந்தி கம்முனா;
“கா³மேயேவா”தி ஆணத்தோ, வனே வா ஸாவதா⁴ரணங்.

268. “வனேயேவா”தி வா வுத்தோ, கா³மே மாரேதி சேபி வா;
விஸங்கேதோ விஞ்ஞாதப்³போ³, மூலட்டோ² பரிமுச்சதி.

269. ஏதேனேவ உபாயேன, ஸப்³ப³தே³ஸேஸு பே⁴த³தோ;
ஸங்கேதோ ச விஸங்கேதோ, வேதி³தப்³போ³வ விஞ்ஞனா.

270. “ஸத்தே²ன பன மாரேஹி, ஆணத்தோ”தி ச கேனசி;
யேன கேனசி ஸத்தே²ன, விஸங்கேதோ ந மாரிதே.

271. “இமினா வாஸினா ஹி”தி, வுத்தோ அஞ்ஞேன வாஸினா;
“இமஸ்ஸாஸிஸ்ஸ வாபி த்வங், தா⁴ராயேதாய மாரய”.

272. இதி வுத்தோ ஸசே வேரிங், தா⁴ராய இதராய வா;
த²ருனா வாபி துண்டே³ன, விஸங்கேதோவ மாரிதே.

273. ஏதேனேவ உபாயேன, ஸப்³பா³வுத⁴கஜாதிஸு;
ஸங்கேதோ ச விஸங்கேதோ, வேதி³தப்³போ³ விஸேஸதோ.

274. “க³ச்ச²ந்தமேனங் மாரேஹி”, இதி வுத்தோ பரேன ஸோ;
மாரேதி நங் நிஸின்னங் சே, விஸங்கேதோ ந விஜ்ஜதி.

275. “நிஸின்னங்யேவ மாரேஹி”, “க³ச்ச²ந்தங்யேவ வா”தி ச;
வுத்தோ மாரேதி க³ச்ச²ந்தங், நிஸின்னங் வா யதா²க்கமங்.

276. விஸங்கேதந்தி ஞாதப்³பங், பி⁴க்கு²னா வினயஞ்ஞனா;
ஏஸேவ ச நயோ ஞெய்யோ, ஸப்³பி³ரியாபதே²ஸு ச.

277. “மாரேஹி”தி ச விஜ்ஜி²த்வா, ஆணத்தோ ஹி பரேன ஸோ;
விஜ்ஜி²த்வாவ தமாரேதி, விஸங்கேதோ ந விஜ்ஜதி.

278. “மாரேஹி”தி ச விஜ்ஜி²த்வா, ஆணத்தோ ஹி பரேன ஸோ;
சி²ந்தி³த்வா யதி³ மாரேதி, விஸங்கேதோவ ஹோதி ஸோ.

279. ஏதேனேவ உபாயேன, ஸப்³பே³ஸு கரணேஸுபி;
ஸங்கேதே ச விஸங்கேதே, வேதி³தப்³போ³ வினிச்ச²யோ.

280. தீ³க⁴ங் ரஸ்ஸங் கிஸங் து²லங், காளங் ஓதா³தமேவ வா;
ஆணத்தோ அனியாமெத்வா, மா²ரேஹீதி ச கேனசி.
281. ஸோபி யங் கிஞ்சி ஆணத்தோ, ஸசே மா²ரேதி தாதி³ஸங்;
நத்தி² தத்த² விஸங்கேதோ, உபி⁴ன்னம்பி பராஜயோ.
282. மனுஸ்ஸங் கிஞ்சி உத்³தி³ஸ்ஸ, ஸசே க²ணதிவாடகங்;
க²ணந்தஸ்ஸ ச ஓபாதங், ஹோதி ஆபத்தி து³க்கடங்.
283. து³க்க²ஸ்ஸுப்பத்தியா தத்த², தஸ்ஸ து²ல்லச்சயங் ஸியா;
பதித்வா ச மதே தஸ்மிங், தஸ்ஸ பாராஜிகங் ப⁴வே.
284. நிபதித்வா பனஞ்ஞஸ்மிங், மதே தோ³ஸோ ந விஜ்ஜதி;
அனுத்³தி³ஸ்ஸகமோபாதோ, க²தோ ஹோதி ஸசே பன.
285. “பதித்வா எத்த² யோ கோசி, மரது”தி ஹி யத்தகா;
மரந்தி நிபதித்வா சே, தோ³ஸா ஹொந்திஸ்ஸ தத்தகா.
286. ஆனந்தரியவத்து²ஸ்மிங், ஆனந்தரியகங் வதே³;
ததா² து²ல்லச்சயாதீ³னங், ஹொந்தி து²ல்லச்சயாத³யோ.
287. பதித்வா க³ப்³பி⁴னீ தஸ்மிங், ஸக³ப்³பா⁴ சே மரிஸ்ஸதி;
ஹொந்தி பாணாதிபாதா த்³வே, ஏகோவேகேகத⁴ங்ஸனே.
288. அனுப³ந்தெ⁴த்த² சோ²ரேஹி, பதித்வா சே மரிஸ்ஸதி;
ஓபாதக²ணகஸ்ஸேவ, ஹோதி பாராஜிகங் கிர.
289. வேரினோ தத்த² பாதெத்வா, ஸசே மா²ரெந்தி வேரினோ;
பதிதங் தத்த² மா²ரெந்தி, நீஹரித்வா ஸசே ப³ஹி.
290. நிப்³ப³த்தித்வா ஹி ஓபாதே, மதா சே ஓபபாதிகா;
அஸக்கொந்தா ச நிக்க²ந்துங், ஸப்³ப³த்த² ச பராஜயோ.
291. யக்கா²த³யோ பனுத்³தி³ஸ்ஸ, க²ணனே து³க்க²ஸம்ப⁴வே;
து³க்கடங் மரணே வத்து²-வஸா து²ல்லச்சயாத³யோ.
292. மனுஸ்ஸேயேவ உத்³தி³ஸ்ஸ, க²தே ஓபாதகே பன;
அனாபத்தி பதித்வா ஹி, யக்கா²தீ³ஸு மதேஸுபி.

293. ததா² யக்கா²த³யோ பாணே, க²தே உத்³தி³ஸ்ஸ பி⁴க்கு²னா;
நிபதித்வா மரந்தேஸு, மனுஸ்ஸேஸுப்யயங் நயோ.
294. “பாணினோ எத்த² ப³ஜ்ஜி²த்வா, மரந்தா”தி அனுத்³தி³ஸங்;
பாஸங் ஒட்³டே³தி யோ தத்த², ஸசே ப³ஜ்ஜ²ந்தி பாணினோ.
295. ஹத்த²தோ முத்தமத்தஸ்மிங், தஸ்ஸ பாராஜிகங் ஸியா;
ஆனந்தரியவத்து²ஸ்மிங், ஆனந்தரியமேவ ச.
296. உத்³தி³ஸ்ஸ ஹி கதே பாஸே, யங் பனுத்³தி³ஸ்ஸ ஒட்³டி³தோ;
ப³ந்த⁴னேஸு தத³ஞ்ஞேஸங், அனாபத்தி பகாஸிதா.
297. மூலேன வா முதா⁴ வாபி, தி³ன்னே பாஸே பரஸ்ஸ ஹி;
மூலட்ட²ஸ்ஸேவ ஹோதீதி, கம்மப³த்³தோ⁴ நியாமிதோ.
298. யேன லத்³தோ⁴ ஸசே லோபி, பாஸமுக்³க்³ளிதம்பி வா;
தி²ரங் வாபி கரோதேவங், உபி⁴ன்னங் கம்மப³ந்த⁴னங்.
299. யோ பாஸங் உக்³க்³ளாபெத்வா, யாதி பாபப⁴யா ஸசே;
தங் தி³ஸ்வா புன அஞ்ஞோபி, ஸண்ட²பேதி ஹி தத்த² ச.
300. ப³த்தா⁴ ப³த்தா⁴ மரந்தி சே, மூலட்டோ² ந ச முச்சதி;
ட²பெத்வா க³ஹிதட்டா²னே, பாஸயட்டி²ங் விமுச்சதி.
301. கோ³பெத்வாபி ந மொக்கோ² ஹி, பாஸயட்டி²ங் ஸயங்கதங்;
தமஞ்ஞோ புன க³ண்ஹித்வா, ஸண்ட²பேதி ஸசே பன.
302. தப்பச்சயா மரந்தேஸு, மூலட்டோ² ந ச முச்சதி;
நாஸெத்வா ஸப்³ப³ஸோ வா தங், ஜா²பெத்வா வா விமுச்சதி.
303. ரோபெந்தஸ்ஸ ச ஸூலங் வா, ஸஜ்ஜெந்தஸ்ஸ அதூ³ஹலங்;
ஓபாதேன ச பாஸேன, ஸதி³ஸோவ வினிச்ச²யோ.
304. அனாபத்தி அஸஞ்சிச்ச, அஜானந்தஸ்ஸ பி⁴க்கு²னோ;
ததா²மரணசித்தஸ்ஸ, மதெப்யும்மத்தகாதி³னோ.
305. மனுஸ்ஸபாணிம்ஹி ச பாணஸஞ்ஞிதா;
ஸசஸ்ஸ சித்தங் மரணூபஸங்ஹிதங்;

உபக்கமோ தேன ச தஸ்ஸ நாஸோ;
பஞ்செத்த² அங்கா³னி மனுஸ்ஸகா⁴தே.

இதி வினயவினிச்ச²யே ததியபாராஜிககதா² நிட்டி²தா.

சதுத்த²பாராஜிககதா²

306. அஸந்தமத்தஸ்ஸிதமேவ கத்வா;
ப⁴வங் அதி⁴ட்டா²ய ச வத்தமானங்;
அஞ்ஞாபதே³ஸஞ்ச வினாதி⁴மானங்;
ஜா²னாதி³பே⁴த³ங் ஸமுதா³சரெய்ய.
307. காயேன வாசாயபி வா தத³த்தே²;
ஞாதேவ விஞ்ஞத்திபதே² அப⁴ப்³போ³;
யதே²வ தாலோ பன மத்த²கஸ்மிங்;
சி²ன்னோ அப⁴ப்³போ³ புன ருள்ஹிபா⁴வே.
308. அஸந்தமேவத்தனி யோ பரஸ்ஸ;
தீ³பேதி ஜா²னாதி³மனந்தரங் ஸோ;
ஜானாதி சே ஹோதி சுதோ ஹி நோ சே;
ஜானாதி து²ல்லச்சயமஸ்ஸ ஹோதி.
309. “யோ தே விஹாரே வஸதீத⁴ பி⁴க்கு²;
ஸோ ஜா²னலாபீ⁴”தி ச தீ³பிதே சே;
ஜானாதி து²ல்லச்சயமஸ்ஸ நோ சே;
ஜானாதி தங் து³க்கடமேவ ஹோதி.
310. அஸந்தமேவத்தனி த⁴ம்மமேதங்;
அத்தீ²தி கத்வா வத³தோதி⁴மானா;
வுத்தோ அனாபத்தினயோ பனேவங்;
அவத்துகாமஸ்ஸ ததா²தி³கஸ்ஸ.
311. பாபிச்ச²தா தஸ்ஸ அஸந்தபா⁴வோ;
ஆரோசனஞ்சேவ மனுஸ்ஸகஸ்ஸ;
நஞ்ஞாபதே³ஸேன ததே³வ ஞாணங்;
பஞ்செத்த² அங்கா³னி வத³ந்தி தீ⁴ரா.
312. பட²மே து³தியே சந்தே, பரியாயோ ந விஜ்ஜதி;
து³தியே ததியேயேவ, ஆணத்தி ந பனேதரே.

313. ஆதி³ மேகஸமுட்டா²னங், து³வங்க³ங் காயசித்ததோ;
ஸேஸா ச திஸமுட்டா²னா, தேஸமங்கா³னி ஸத்த து.
314. ஸுகோ²பெக்கா²யுதங் ஆதி³, ததியங் து³க்க²வேத³னங்;
து³தியஞ்ச சதுத்த²ஞ்ச, திவேத³னமுதீ³ரிதங்.
315. பட²மஸ்ஸட்ட² சித்தானி, ததியஸ்ஸ து³வே பன;
து³தியஸ்ஸ சதுத்த²ஸ்ஸ, து³ஸ சித்தானி லப்ப⁴ரே.
316. தஸ்மா ஸசித்தகங் வுத்தங், ஸப்ப³மேதங் சதுப்பி³த⁴ங்;
க்ரியா ஸஞ்ஞாவிமொக்க²ஞ்ச, லோகவஜ்ஜந்தி தீ³பிதங்.
317. இத³மாபத்தியங்யேவ, விதா⁴னங் பன யுஜ்ஜதி;
தஸ்மா ஆபத்தியங்யேவ, க³ஹேதப்ப³ங் விபா⁴வினா.
318. முது³பிட்டி² ச லம்பீ³ ச, முக²க்கா³ஹீ நிஸீத³கோ;
பாராஜிகா இமே தேஸங், சத்தாரோ அனுலோமிகா.
319. பி⁴க்கு²னீனஞ்ச சத்தாரி, விப்ப⁴ந்தா பி⁴க்கு²னீ ஸயங்;
ததா² ஏகாத³ஸாப⁴ப்பா³, ஸப்பே³தே சதுவீஸதி.
320. இமே பாராஜிகா வுத்தா, சதுவீஸதி புக³க³லா;
அப⁴ப்பா³ பி⁴க்கு²பா⁴வாய, ஸீஸச்சி²ன்னோவ ஜீவிதுங்.
321. பண்ட³கோ ச திரச்சா²னோ, உப⁴தொப்யஞ்ஜனோபி ச;
தயோ வத்து²விபன்னா ஹி, அஹேதுபடிஸந்தி⁴கா.
322. பஞ்சானந்தரிகா தெ²ய்ய-ஸங்வாஸோபி ச து³ஸகோ;
தித்தி²பக்கந்தகோ சேதி, க்ரியானட்டா² பனட்ட² தே.
323. வினிச்ச²யோ யோ பன ஸாரபூ⁴தோ;
பாராஜிகானங் கதி²தோ மயாயங்;
தஸ்ஸானுஸாரேன பு³தே⁴ன ஞாதுங்;
ஸக்கா ஹி ஸேஸோபி அஸேஸதோவ.
324. பிடகே படுபா⁴வகரே பரமே;
வினயே விவிதே⁴ஹி நயேஹி யுதே;
பரமத்த²னயங் அபி⁴பத்த²யதா;

பரியாபுணிதப்³ப³மயங் ஸததங்.

இதி வினயவினிச்ச²யே சதுத்த²பாராஜிககதா² நி²டி²தா.

ஸங்கா⁴தி³ஸேஸகதா²

325. மோசேதுகாமதாசித்தங், வாயாமோ ஸுக்கமோசனங்;
அஞ்ஞத்ர ஸுபினந்தேன, ஹோதி ஸங்கா⁴தி³ஸேஸதா.
326. பரேனுபக்கமாபெத்வா, அங்க³ஜாதங் பனத்தனோ;
ஸுக்கங் யதி³ விமோசேதி, க³ருகங் தஸ்ஸ நித்³தி³ஸே.
327. ஸஞ்சிச்சபக்கமந்தஸ்ஸ, அங்க³ஜாதங் பனத்தனோ;
து²ல்லச்சயங் ஸமுத்³தி³ட்ட²ங், ஸசே ஸுக்கங் ந முச்சதி.
328. ஸஞ்சிச்சபக்கமந்தஸ்ஸ , ஆகாஸே கம்பனேனபி;
ஹோதி து²ல்லச்சயங் தஸ்ஸ, யதி³ ஸுக்கங் ந முச்சதி.
329. வத்தி²ங் கீளாய பூரெத்வா, பஸ்ஸாவேதுங் ந வட்டதி;
நிமித்தங் பன ஹத்தே²ன, கீளாபெந்தஸ்ஸ து³க்கடங்.
330. திஸ்ஸன்னங் பன இத்தீ²னங், நிமித்தங் ரத்தசேதஸா;
புரதோ பச்ச²தோ வாபி, ஓலோகெந்தஸ்ஸ து³க்கடங்.
331. ஏகேனேகங் பயோகே³ன, தி³வஸம்பி ச பஸ்ஸதோ;
நாபத்தியா ப⁴வே அங்க³ங், உம்மீலனநிமீலனங்.
332. அமோசனாதி⁴ப்பாயஸ்ஸ, அனுபக்கமதோபி ச;
ஸுபினந்தேன முத்தஸ்மிங், அனாபத்தி பகாஸிதா.

ஸுக்கவிஸட்டி²கதா².

333. ஆமஸந்தோ மனுஸ்ஸித்தி²ங், காயஸங்ஸக்³க³ராக³தோ;
“மனுஸ்ஸித்தீ²”தி ஸஞ்ஞாய, ஹோதி ஸங்கா⁴தி³ஸேஸிகோ.
334. லோமேனந்தமஸோ லோமங், பு²ஸந்தஸ்ஸாபி இத்தி²யா;
காயஸங்ஸக்³க³ராகே³ன, ஹோதி ஆபத்தி பி⁴க்கு²னோ.
335. இத்தி²யா யதி³ ஸம்பு²ட்டோ², ப²ஸ்ஸங் ஸேவனசேதனோ;

வாயமித்வாதி⁴வாஸேதி, ஹோதி ஸங்கா⁴தி³ஸேஸதா.

336. ஏகேன பன ஹத்தே²ன, க³ஹெத்வா து³தியேன வா;
தத்த² தத்த² பு²ஸந்தஸ்ஸ, ஏகாவாபத்தி தீ³பிதா.
337. அக்³க³ஹெத்வா பு²ஸந்தஸ்ஸ, யாவ பாத³ஞ்ச ஸீஸதோ;
காயா ஹத்த²மமோசெத்வா, ஏகாவ தி³வஸம்பி ச.
338. அங்கு³லீனங் து பஞ்சன்னங், க³ஹணே ஏகதோ பன;
ஏகாயேவ ஸியாபத்தி, ந ஹி கொட்டா²ஸதோ ஸியா.
339. நானித்தீ²னங் ஸசே பஞ்ச, க³ண்ஹாத்யங்கு³லியோ பன;
ஏகதோ பஞ்ச ஸங்கா⁴தி³-ஸேஸா ஹொந்திஸ்ஸ பி⁴க்கு²னோ.
340. இத்தி²யா விமதிஸ்ஸாபி, பண்ட³காதி³கஸஞ்ஞினோ;
காயேன இத்தி²யா காய-ஸம்ப³த்த⁴ங் பு²ஸதோபி வா.
341. பண்ட³கே யக்கி²பேதீஸு, தஸ்ஸ து²ல்லச்சயங் ஸியா;
து³க்கடங் காயஸங்ஸக்³கே³, திரச்சா²னக³தித்தி²யா.
342. பி⁴க்கு²னோ படிப³த்தே⁴ன, காயேன பன இத்தி²யா;
காயேன படிப³த்த⁴ஞ்ச, பு²ஸந்தஸ்ஸபி து³க்கடங்.
343. இத்தீ²னங் இத்தி²ருபஞ்ச, தா³ருலோஹமயாதி³கங்;
தாஸங் வத்த²மலங்காரங், ஆமஸந்தஸ்ஸ து³க்கடங்.
344. தத்த²ஜாதப²லங் க²ஜ்ஜங், முக்³கா³தி³ங் தத்த²ஜாதகங்;
த⁴ஞ்ஞானி பன ஸப்³பா³னி, ஆமஸந்தஸ்ஸ து³க்கடங்.
345. ஸப்³பங் த⁴மனஸங்கா²தி³ங், பஞ்சங்க³துரியம்பி ச;
ரதனானி ச ஸப்³பா³னி, ஆமஸந்தஸ்ஸ து³க்கடங்.
346. ஸப்³பமாவுத⁴ப⁴ண்ட³ஞ்ச, ஜியா ச த⁴னுத³ண்ட³கோ;
அனாமாஸமித³ங் ஸப்³பங், ஜாலஞ்ச ஸரவாரணங்.
347. ஸுவண்ணபடிபி³ம்பா³தி³, சேதியங் ஆரகூடகங்;
அனாமாஸந்தி நித்தி³ட்ட²ங், குருந்த³ட்ட²கதா²ய ஹி.

348.

ஸப்³பங் ஓனஹிதுங் வாபி, ஓனஹாபேதுமேவ வா;
வாதா³பேதுஞ்ச வாதே³துங், வாதி³தங் ந ச வட்டதி.

349. “கரிஸ்ஸாமுபஹார”ந்தி, வுத்தேன பன பி⁴க்கு²னா;
பூஜா பு³த³த⁴ஸ்ஸ காதப்³பா³, வத்தப்³பா³தி ச விஞ்ஞனா.

350. ஸயங் பு²ஸியமானஸ்ஸ, இத்தி²யா பன து⁴த்தியா;
அவாயமித்வா காயேன, ப²ஸ்ஸங் படிவிஜானதோ.

351. அனாபத்தி அஸஞ்சிச்ச, அஜானந்தஸ்ஸ பி⁴க்கு²னோ;
மொக்கா²தி⁴ப்பாயினோ சேவ, ததா² உம்மத்தகாதி³னோ.

352. பட²மேன ஸமானாவ, ஸமுட்டா²னாத³யோ பன;
காயஸங்ஸக்³க³ராக³ஸ்ஸ, ததா² ஸுக்கவிஸட்டி²யா.

காயஸங்ஸக்³க³தா².

353. து³ட்டு²ல்லவாசஸ்ஸாதே³ன, இத்தி²யா இத்தி²ஸஞ்ஞினோ;
த்³வின்னஞ்ச பன மக்³கா³னங், வண்ணாவண்ணவஸேன ச.

354. மேது²னயாசனாதீ³ஹி , ஓபா⁴ஸந்தஸ்ஸ பி⁴க்கு²னோ;
விஞ்ஞங் அந்தமஸோ ஹத்த²-முத்³தா³யபி க³ருங் ஸியா.

355. “ஸிக²ரணீஸி , ஸம்பி⁴ன்னா, உப⁴தொப்³யஞ்ஜனா”தி ச;
அக்கோஸவசனேனாபி, க³ருகங் து ஸுணந்தியா.

356. புனப்புனோபா⁴ஸந்தஸ்ஸ, ஏகவாசாய வா ப³ஹு;
க³ணனாய ச வாசானங், இத்தீ²னங் க³ருகா ஸியுங்.

357. ஸா சே நப்படிஜானாதி, தஸ்ஸ து²ல்லச்சயங் ஸியா;
ஆதி³ஸ்ஸ ப⁴ணனே சாபி, உப்³ப⁴ஜாணுமத⁴க்க²கங்.

358. உப்³ப⁴க்க²கமதோ⁴ஜாணு-மண்ட³லங் பன உத்³தி³ஸங்;
வண்ணாதி³ப⁴ணனே காய-படிப³த்³தே⁴ ச து³க்கடங்.

359. து²ல்லச்சயங் ப⁴வே தஸ்ஸ, பண்ட³கே யக்கி²பேதிஸு;
அத⁴க்க²கொப்³ப⁴ஜாணும்ஹி, து³க்கடங் பண்ட³காதி³ஸு.

360. உப்³ப⁴க்க²கமதோ⁴ஜாணு-மண்ட³லேபி அயங் நயோ;

ஸப்³புத்த² து³க்கடங் வுத்தங், திரச்சா²னக³தித்தி²யா.

361. அத்த²த⁴ம்மபுரெக்கா²ரங், கத்வா ஓபா⁴ஸதோபி ச;
வத³தோபி அனாபத்தி, புரக்க²த்வானுஸாஸனிங்.

362. ததா² உம்மத்தகாதீ³னங், ஸமுட்டா²னாத³யோ நயா;
அதி³ன்னாதா³னதுல்யாவ, வேத³னெத்த² த்³விதா⁴ மதா.

து³ட்டு²ல்லவாசாகதா².

363. வண்ணங் பனத்தனோ காம-பாரிசரியாய பா⁴ஸதோ;
தஸ்மிங்யேவ க²ணே ஸா சே, ஜானாதி க³ருகங் ஸியா.

364. நோ சே ஜானாதி ஸா யக்கி²-பேதிதே³வீஸு பண்ட³கே;
ஹோதி து²ல்லச்சயங் தஸ்ஸ, ஸேஸே ஆபத்தி து³க்கடங்.

365. சீவராதீ³ஹி அஞ்ஞேஹி, வத்து²காமேஹி அத்தனோ;
நத்தி² தோ³ஸோ ப⁴ணந்தஸ்ஸ, பாரிசரியாய வண்ணனங்.

366. இத்தி²ஸஞ்ஞா மனுஸ்ஸித்தீ², பாரிசரியாய ராகி³தா;
ஓபா⁴ஸோ தேன ராகே³ன, க²ணே தஸ்மிங் விஜானநங்.

367. பஞ்சங்கா³னி இமானெத்த², வேதி³தப்³பா³னி விஞ்ஞனா;
ஸமுட்டா²னாத³யொப்யஸ்ஸ, அனந்தரஸமா மதா.

அத்தகாமபாரிசரியகதா².

368. படிக்க³ண்ஹாதி ஸந்தே³ஸங், புரிஸஸ்ஸித்தி²யாபி வா;
வீமங்ஸதி க³ரு ஹோதி, பச்சாஹரதி சே பன.

369. “யஸ்ஸா ஹி ஸந்திகங் க³ந்த்வா, ஆரோசேஹி”தி பேஸிதோ;
தமதி³ஸ்வா தத³ஞ்ஞஸ்ஸ, அவஸ்ஸாரோசகஸ்ஸ ஸோ.

370. “ஆரோசேஹி”தி வத்வா தங், பச்சாஹரதி சே பன;
பி⁴க்கு² ஸங்கா⁴தி³ஸேஸம்ஹா, ஸஞ்சரித்தா ந முச்சதி.

371. “மாதரா ரக்கி²தங் இத்தி²ங், க³ச்ச² ப்³ருஹி”தி பேஸிதோ;
பிதுரக்கி²தமஞ்ஞங் வா, விஸங்கேதோவ பா⁴ஸதோ.

372. படிக்க³ண்ணுனதாதீ³ஹி, தீ³ஹி அங்கே³ஹி ஸங்யுதே;
ஸஞ்சரித்தே ஸமாபன்னே, க³ருகாபத்திமாதீ³ஸே.
373. த்³வீஹி து²ல்லச்சயங் வுத்தங், பண்ட³காதீ³ஸு தீஹிபி;
ஏகேனேவ ச ஸப்³ப்த்த², ஹோதி ஆபத்தி து³க்கடங்.
374. சேதியஸ்ஸ ச ஸங்க⁴ஸ்ஸ, கி³லானஸ்ஸ ச பி⁴க்கு²னோ;
க³ச்ச²தோ பன கிச்சேன, அனாபத்தி பகாஸிதா.
375. மனுஸ்ஸத்தங் ததா² தஸ்ஸா, நனாலங்வசனீயதா;
படிக்க³ண்ணுனதாதீ³னங், வஸா பஞ்சங்கி³கங் மதங்.
376. இத³ஞ்ஹி ச²ஸமுட்டா²னங், அசித்தகமுதீ³ரிதங்;
அலங்வசனீயத்தங் வா, பண்ணத்திங் வா அஜானதோ.
377. க³ஹெத்வா ஸாஸனங் காய-விகாரேனுபக³ம்ம தங்;
வீமங்ஸித்வா ஹரந்தஸ்ஸ, க³ருகங் காயதோ ஸியா.
378. ஸுத்வா யதா²னிஸின்னோவ, வசனங் இத்தி²யா புன;
தங் தத்தே²வாக³தஸ்ஸேவ, ஆரோசெந்தஸ்ஸ வாசதோ.
379. அஜானந்தஸ்ஸ பண்ணத்திங், காயவாசாஹி தங் விதி⁴ங்;
கரோதோ ஹரதோ வாபி, க³ருகங் காயவாசதோ.
380. ஜானித்வாபி கரொந்தஸ்ஸ, க³ருகாபத்தியோ ததா²;
ஸசித்தகேஹி தீஹேவ, ஸமுட்டா²னேஹி ஜாயரே.

ஸஞ்சரித்தகதா².

381. ஸயங்யாசிதகேஹேவ, குடிகங் அப்பமாணிகங்;
அத்துத்³தே³ஸங் கரொந்தஸ்ஸ, ததா²தே³ஸிதவத்து²கங்.
382. ஹொந்தி ஸங்கா⁴தி³ஸேஸா த்³வே, ஸாரம்பா⁴தீ³ஸு து³க்கடங்;
ஸசே ஏகவிபன்னா ஸா, க³ருகங் ஏககங் ஸியா.
383. புரிஸங் யாசிதுங் கம்ம-ஸஹாயத்தா²ய வட்டதி;
மூலச்சே²ஜ்ஜவஸேனேவ, யாசமானஸ்ஸ து³க்கடங்.

384.

அவஜ்ஜங் ஹத்த²கம்மம்பி, யாசிதுங் பன வட்டதி;
ஹத்த²கம்மம்பி நாமேதங், கிஞ்சி வத்து² ந ஹோதி ஹி.

385. கோ³ணமாயாசமானஸ்ஸ, ட²பெத்வா ஞாதகாதி³கே;
து³க்கடங் தஸ்ஸ நித்³தி³ட்ட²ங், மூலச்சே²ஜ்ஜேன தேஸுபி.

386. “கோ³ணங் தே³மா”தி வுத்தேபி, க³ஹேதுங் ந ச வட்டதி;
ஸகடங் தா³ருப⁴ண்ட³த்தா, க³ஹேதுங் பன வட்டதி.

387. வாஸிப²ரஸுகுத்த³தா³ல-குடா²ராதி³ஸ்வயங் நயோ;
அனஜ்ஜா²வுத்த²கங் ஸப்³ப³ங், ஹராபேதும்பி வட்டதி.

388. வல்லிஆதி³ம்ஹி ஸப்³ப³ஸ்மிங், க³ருப⁴ண்ட³ப்பஹோனகே;
பரேஸங் ஸந்தகேயேவ, ஹோதி ஆபத்தி து³க்கடங்.

389. பச்சயேஸு ஹி தீஸ்வேவ, விஞ்ஞத்தி ந ச வட்டதி;
ததியே பரிகதோ²பா⁴ஸ-நிமித்தானி ச லப்³ப⁴ரே.

390. “அதே³ஸிதே ச வத்து²ஸ்மிங், பமானேனாதி⁴கங் குடிங்;
கரிஸ்ஸாமீ”தி சிந்தெத்வா, அரஞ்ஞங் க³ச்ச²தோபி ச.

391. ப²ரஸுங் வாபி வாஸிங் வா, நிஸெந்தஸ்ஸாபி து³க்கடங்;
சி²ந்த³தோ து³க்கடங் ருக்க²ங், தஸ்ஸ பாசித்தியா ஸஹ.

392. ஏவங் புப்³ப³பயோக³ஸ்மிங், குடிகாரகபி⁴க்கு²னோ;
யதா²பயோக³மாபத்திங், வினயஞ்ஞா வினித்³தி³ஸே.

393. யா பன த்³வீஹி பிண்டே³ஹி, நிட்டா²னங் து க³மிஸ்ஸதி;
ஹோதி து²ல்லச்சயங் தேஸு, பட²மே து³தியே க³ரு.

394. அனாபத்தி ஸசஞ்ஞஸ்ஸ, தே³தி விப்பகதங் குடிங்;
ததா² பூ⁴மிங் ஸமங் கத்வா, பி⁴ந்த³தோபி ச தங் குடிங்.

395. கு³ஹங் லேணங் கரொந்தஸ்ஸ, திணபண்ணச்ச²த³ம்பி வா;
வாஸாகா³ரங் ட²பெத்வான, அஞ்ஞஸ்ஸத்தா²ய வா ததா².

396. தே³ஸாபெத்வாவ பி⁴க்க²ஹி, வத்து²ங் பன ச பி⁴க்கு²னோ;
க்ரியதோவ ஸமுட்டா²தி, கரோதோ அப்பமாணிகங்.

397. அதே³ஸெத்வா கரொந்தஸ்ஸ, தங் க்ரியாக்ரியதோ ஸியா;
ஸமுட்டா²னாத³யோ ஸேஸா, ஸஞ்சரித்தஸமா மதா.

குடிகாரஸிக்கா²பத³கதா².

398. அதே³ஸெத்வா ஸசே வத்து²ங், யோ கரெய்ய மஹல்லகங்;
விஹாரங் அத்தவாஸத்த²ங், க³ருகங் தஸ்ஸ நித்³தி³ஸே.

399. பமாணாதிக்கமேனாபி , தோ³ஸோ நத்தி² மஹல்லகே;
தஸ்மா க்ரியஸமுட்டா²னா-பா⁴வங் ஸமுபலக்க²யே.

400. பமாணனியமாபா⁴வா, ஏகஸங்கா⁴தி³ஸேஸதா;
ஸமுட்டா²னாதி³கங் ஸேஸங், அனந்தரஸமங் மதங்.

மஹல்லககதா².

401. பாராஜிகானி வுத்தானி, சதுவீஸதி ஸத்து²னா;
பி⁴க்கு²னோ அனுருபானி, தேஸு ஏகனவீஸதி.

402. அமுலகேன சோதே³தி, ஹுத்வா சாவனசேதனோ;
ஸுத்³த⁴ங் வா யதி³ வாஸுத்³த⁴ங், தேஸு அஞ்ஞதரேன யோ.

403. க³ருகங் தஸ்ஸ ஆபத்திங், கதோகாஸம்ஹி நித்³தி³ஸே;
ததே²வ அகதோகாஸே, து³க்கடாபத்தியா ஸஹ.

404. “கொண்டோ²ஸி ச நிக³ண்டோ²ஸி;
ஸாமணேரோஸி தாபஸோ;
க³ஹட்டோ²ஸி ததா² ஜெட்ட²;-
ப்³புதி³கோஸி உபாஸகோ.

405. து³ஸ்ஸீலோ பாபத⁴ம்மோஸி, அந்தோபூதி அவஸ்ஸுதோ”;
இச்சேவம்பி வத³ந்தஸ்ஸ, க³ருகங் தஸ்ஸ நித்³தி³ஸே.

406. ஸம்முகா² ஹத்த²முத்³தா³ய, சோதெ³ந்தஸ்ஸபி தங்க²ணே;
தங் சே பரோ விஜானாதி, ஹோதி ஆபத்தி பி⁴க்கு²னோ.

407. க³ருகங் ஸம்முகே² ட²த்வா, சோதா³பெந்தஸ்ஸ கேனசி;
தஸ்ஸ வாசாய வாசாய, சோதா³பெந்தஸ்ஸ நித்³தி³ஸே.

408. அத² ஸோபி “மயா தி³ட்ட²ங், ஸுதங் வா”தி ச பா⁴ஸதி;
தேஸங் த்³வின்னம்பி ஸங்கா⁴தி³-ஸேஸோ ஹோதி ந ஸங்ஸயோ.
409. து³தங் வா பன பேஸெத்வா, பண்ணங் வா பன ஸாஸனங்;
சோதா³பெந்தஸ்ஸ ஆபத்தி, ந ஹோதீதி பகாஸிதா.
410. ததா² ஸங்கா⁴தி³ஸேஸேஹி, வுத்தே சாவனஸஞ்ஞினோ;
ஹோதி பாசித்தியாபத்தி, ஸேஸாபத்தீஹி து³க்கடங்.
411. அக்கோஸனாதி⁴ப்பாயஸ்ஸ, அகதோகாஸமத்தனா;
ஸஹ பாசித்தியேனஸ்ஸ, வத³ந்தஸ்ஸ ச து³க்கடங்.
412. அஸம்முகா² வத³ந்தஸ்ஸ, ஆபத்தீஹிபி ஸத்தஹி;
ததா² கம்மங் கரொந்தஸ்ஸ, ஹோதி ஆபத்தி து³க்கடங்.
413. ந தோ³ஸும்மத்தகாதீ³னங், ஹோதி பஞ்சங்க³ஸங்யுதங்;
உபஸம்பன்னதா தஸ்மிங், புக்³கலே ஸுத்³த⁴ஸஞ்ஞிதா.
414. பாராஜிகேன சோதே³தி, யேன தஸ்ஸ அமூலதா;
ஸம்முகா² சோத³னா சேவ, தஸ்ஸ சாவனஸஞ்ஞினோ.
415. தங்க²ணே ஜானநஞ்சேவ, பஞ்சங்கா³னி ப⁴வந்தி ஹி;
இத³ங் து திஸமுட்டா²னங், ஸசித்தங் து³க்க²வேத³னங்.

து³ட்ட²தோ³ஸகதா².

416. லேஸமத்தமுபாதா³ய, பி⁴க்கு²மந்திமவத்து²னா;
சோதெ³ய்ய க³ருகாபத்தி, ஸசே சாவனசேதனோ.
417. சோதே³தி வா ததா²ஸஞ்ஞீ, சோதா³பேதி பரேன வா;
அனாபத்தி ஸியா ஸேஸோ, அனந்தரஸமோ மதோ.

து³தியது³ட்ட²தோ³ஸகதா².

418. ஸமக்³ஸஸ்ஸ ச ஸங்க⁴ஸ்ஸ, பே⁴த³த்த²ங் வாயமெய்ய யோ;
பே⁴த³ஹேதுங் க³ஹெத்வா வா, திட்டெ²ய்ய பரிதீ³பயங்.
419. ஸோ ஹி பி⁴க்க²ஹி வத்தப்³போ³, “பே⁴த³த்த²ங் மா பரக்கம”;
இதி “ஸங்க⁴ஸ்ஸ மா திட்ட², க³ஹெத்வா பே⁴த³காரணங்”.

420. வுச்சமானோ ஹி தேஹேவ, நிஸ்ஸஜ்ஜெய்ய ந சேவ யங்;
ஸமனுபா⁴ஸிதப்³போ³ தங், அச்சஜங் க³ருகங் பு²ஸே.
421. பரக்கமந்தங் ஸங்க⁴ஸ்ஸ, பி⁴க்கு²ங் பே⁴தா³ய பி⁴க்கு²னோ;
தி³ஸ்வா ஸுத்வா ஹி ஞத்வா வா, அவத³ந்தஸ்ஸ து³க்கடங்.
422. க³ந்த்வா ச பன வத்தப்³போ³, அத்³த⁴யோஜனதாதி³கங்;
தூ³ரம்பி பன க³ந்தப்³பங், ஸசே ஸக்கோதி தாவதே³.
423. திக்க²த்துங் பன வுத்தஸ்ஸ, அபரிச்சஜதோபி தங்;
தூ³தங் வா பன பண்ணங் வா, பேஸதோபி ச து³க்கடங்.
424. ஞத்தியா பரியோஸானே, து³க்கடங் பரிதீ³பிதங்;
கம்மவாசாஹி ச த்³வீஹி, ஹோதி து²ல்லச்சயங் த்³வயங்.
425. ய்ய-காரே பன ஸம்பத்தே, க³ருகேயேவ திட்ட²தி;
பஸ்ஸம்ப⁴ந்தி ஹி திஸ்ஸோபி, பி⁴க்கு²னோ து³க்கடாத³யோ.
426. அகதே பன கம்மஸ்மிங், அபரிச்சஜதோபி ச;
தஸ்ஸ ஸங்கா⁴தி³ஸேஸேன, அனாபத்தி பகாஸிதா.
427. ஞத்திதோ பன புப்³பே³ வா, பச்சா² வா தங்க²ணேபி வா;
அஸம்பத்தே ய்ய-காரஸ்மிங், படினிஸ்ஸஜ்ஜதோபி ச.
428. படினிஸ்ஸஜ்ஜதோ வாபி, தங் வா ஸமனுபா⁴ஸதோ;
ததே²வும்மத்தகாதீ³னங், அனாபத்தி பகாஸிதா.
429. யஞ்ஹி பி⁴க்கு²மனுத்³தி³ஸ்ஸ, மச்ச²மங்ஸங் கதங் ப⁴வே;
யஸ்மிஞ்ச நிப்³பே³மதிகோ, தங் ஸப்³பங் தஸ்ஸ வட்டதி.
430. ஸமுத்³தி³ஸ்ஸ கதங் ஞத்வா, பு⁴ஞ்ஜந்தஸ்ஸேவ து³க்கடங்;
ததா² அகப்பியங் மங்ஸங், அஜானித்வாபி கா²த³தோ.
431. ஹத்து²ஸ்ஸச்ச²மனுஸ்ஸானங் , அஹிகுக்குரதீ³பினங்;
ஸீஹப்³யக்³க⁴தரச்சா²னங், மங்ஸங் ஹோதி அகப்பியங்.
432. து²ல்லச்சயங் மனுஸ்ஸானங், மங்ஸே ஸேஸேஸு து³க்கடங்;
ஸசித்தகங் ஸமுத்³தி³ஸ்ஸ-கதங் ஸேஸமசித்தகங்.

433. புச்சி²த்வாயேவ மங்ஸானங், பி⁴க்²னங் க³ஹணங் பன;
ஏதங் வத்தந்தி வத்தட்டா², வத³ந்தி வினயஞ்ஞனோ.

434. இத³மேகஸமுட்டா²னங், வுத்தங் ஸமனுபா⁴ஸனங்;
காயகம்மங் வசீகம்மங், அக்ரியங் து³க்க²வேத³னங்.

ஸங்க⁴பே⁴த³கதா².

435. து³தியே ஸங்க⁴பே⁴த³ஸ்மிங், வத்தப்³ப³ங் நத்தி² கிஞ்சிபி;
ஸமுட்டா²னாத³யோபிஸ்ஸ, பட²மேன ஸமா மதா.

து³தியஸங்க⁴பே⁴த³கதா².

436. உத்³தே³ஸபரியாபன்னே, பி⁴க்² து³ப்³ப³சஜாதிகோ;
அவசனீயமத்தானங், கரோதி க³ருகங் ஸியா.

437. து³ப்³ப³சேபி பனேதஸ்மிங், ஸங்க⁴பே⁴த³கவண்ணனே;
ஸப்³போ³ வுத்தனயேனேவ, வேதி³தப்³போ³ வினிச்ச²யோ.

து³ப்³ப³சகதா².

438. யோ ச²ந்த³கா³மிதாதீ³ஹி, பாபெந்தோ குலதூ³ஸகோ.
கம்மே கரியமானே தங், அச்சஜங் க³ருகங் பு²ஸே.

439. சுண்ணங் பண்ணங் ப²லங் புப்ப²ங், வேளுங் கட்ட²ஞ்ச மத்திகங்;
குலஸங்க³ஹணத்தா²ய, அத்தனோ வா பரஸ்ஸ வா.

440. ஸந்தகங் த³த³தோ ஹோதி, குலதூ³ஸனது³க்கடங்;
ப⁴ண்ட³க்³கே⁴ன ச காதப்³போ³, தெ²ய்யா ஸங்க⁴ஞ்ஞஸந்தகே.

441. ஸங்கி⁴கங் க³ருப⁴ண்ட³ங் வா, ஸேனாஸனநியாமிதங்;
யோபிஸ்ஸரவதாயேவ, தெ³ந்தோ து²ல்லச்சயங் பு²ஸே.

442. ஹரித்வா வா ஹராபெத்வா, பக்கோஸித்வாக³தஸ்ஸ வா;
குலஸங்க³ஹணத்தா²ய, புப்ப²ங் தெ³ந்தஸ்ஸ து³க்கடங்.

443. ஹரித்வா வா ஹராபெத்வா, பிதூனங் பன வட்டதி;
தா³துங் புப்ப²ங் பனஞ்ஞஸ்ஸ, ஆக³தஸ்ஸேவ ஞாதினோ.

444. தஞ்ச கோ² வத்து²புஜத்த²ங், தா³தப்³ப³ங் ந பனஞ்ஞதா²;
ஸிவாதி³புஜனத்த²ங் வா, மண்ட³னத்த²ங் ந வட்டதி.
445. ப²லாதீ³ஸுபி ஸேஸேஸு, பி⁴க்கு²னா வினயஞ்ஞனா;
புப்பே² வுத்தனயேனேவ, வேதி³தப்³போ³ வினிச்ச²யோ.
446. புப்பா²தி³பா⁴ஜனே கோசி, ஆக³ச்ச²தி ஸசே பன;
ஸம்மதேனஸ்ஸ தா³தப்³ப³ங், ஞாபெத்வா இதரேன து.
447. உபட்³ட⁴பா⁴க³ங் தா³தப்³ப³ங், இதி வுத்தங் குருந்தி³யங்;
“தோ²கங் தோ²க”ந்தி நித்³தி³ட்ட²ங், மஹாபச்சரியங் பன.
448. கி³லானானங் மனுஸ்ஸானங், தா³தப்³ப³ங் து ஸகங் ப²லங்;
பரிப்³ப³யவிஹீனஸ்ஸ, ஸம்பத்திஸ்ஸரியஸ்ஸபி.
449. ஸங்கா⁴ராமே யதா² யத்ர, ஸங்கே⁴ன கதிகா கதா;
ப²லருக்க²பரிச்சே²த³ங், கத்வா தத்ராக³தஸ்ஸபி.
450. ப²லங் யதா²பரிச்சே²த³ங், த³த³தோ பன வட்டதி;
“த³ஸ்ஸேதப்³பா³பி வா ருக்கா²”, “இதோ க³ண்ஹ ப²ல”ந்தி ச.
451. ஸயங் க²ணித்வா பத²விங், மாலாக³ச்சா²தி³ரோபனே;
ஹோதி பாசித்தியேனஸ்ஸ, து³க்கடங் குலதூ³ஸனே.
452. அகப்பியேன வாக்யேன, ததா² ரோபாபனேபி ச;
ஸப்³ப³த்த² து³க்கடங் வுத்தங், பி⁴க்கு²னோ குலதூ³ஸனே.
453. ரோபனே து³க்கடங்யேவ, ஹோதி கப்பியபூ⁴மியங்;
ததா² ரோபாபனே வுத்தங், உப⁴யத்த² ச பி⁴க்கு²னோ.
454. ஸகிங் ஆணத்தியா தஸ்ஸ, ப³ஹுனங் ரோபனே பன;
ஸது³க்கடா து பாசித்தி, ஸுத்³த⁴ங் வா து³க்கடங் ஸியா.
455. கப்பியேனேவ வாக்யேன, உப⁴யத்த² ச பூ⁴மியா;
ரோபனே பரிபோ⁴க³த்த²ங், ந தோ³ஸோ கோசி விஜ்ஜதி.
456. கப்பியபூ⁴மி சே ஹோதி, ஸயங் ரோபேதுமேவ ச;
வட்டதீதி ச நித்³தி³ட்ட²ங், மஹாபச்சரியங் பன.

457. ஆராமாதீ³னமத்தா²ய, ஸயங் ஸங்ரோபிதஸ்ஸ வா;
வட்டதேவ ச பி⁴க்கூ²னங், தங் ப²லங் பரிபு⁴ஞ்ஜிதுங்.
458. ஸிஞ்சனே பன ஸப்³புத்த², ஸயங் ஸிஞ்சாபனேபி ச;
அகப்பியோத³கேனேவ, ஹோதி பாசித்தி பி⁴க்கு²னோ.
459. குலஸங்க³ஹணத்த²ஞ்ச, பரிபோ⁴க³த்த²மேவ வா;
ஸத்³தி⁴ங் பாசித்தியேனஸ்ஸ, ஸிஞ்சதோ ஹோதி து³க்கடங்.
460. தேஸங்யேவ பனத்தா²ய, த்³வின்னங் கப்பியவாரினா;
ஸிஞ்சனே து³க்கடங் வுத்தங், ததா² ஸிஞ்சாபனேபி ச.
461. குலஸங்க³ஹணத்தா²ய, புப்பா²னங் ஓசினாபனே;
ஸயமோசினநே சாபி, ஸபாசித்தியது³க்கடங்.
462. புப்பா²னங் க³ணனாயஸ்ஸ, புப்ப²மோசினதோ பன;
ஹோதி பாசித்தியாபத்தி, குலத்த²ங் சே ஸது³க்கடா.
463. க³ந்தி²மங் கொ³ப்பி²மங் நாம, வேதி⁴மங் வேடி²மம்பி ச;
பூரிமங் வாயிமங் சேதி, ச²ப்³பி³தோ⁴ புப்ப²ஸங்க³ஹோ.
464. தத்த² த³ண்டே³ன த³ண்ட³ங் வா, வண்டேனபி ச வண்டகங்;
க³ந்தி²த்வா கரணங் ஸப்³புங், “க³ந்தி²ம”ந்தி பவுச்சதி.
465. கொ³ப்பி²மங் நாம கொ³ப்பெ²த்வா, ஸுத்தாதீ³ஹி கரீயதி;
ஏகதோவண்டிகா மாலா, உப⁴தோவண்டிகா ச தங்.
466. வேதி⁴மங் நாம விஜ்ஜி²த்வா, புந்தே³ஸு மகுலாதி³கங்;
ஆவுதா ஸுசிஆதீ³ஹி, மாலாவிகதி வுச்சதி.
467. வேடி²மங் நாம வேடெ²த்வா, கதங் மாலாகு³ணேஹி வா;
வாகாதீ³ஹி ச ப³த்த⁴ங் வா, “வேடி²ம”ந்தி பவுச்சதி.
468. பூரிமங் பன த³ட்ட²ப்³புங், புப்ப²மாலாஹி பூரணே;
போ³தி⁴ங் புப்ப²படாதி³னங், பரிக்கே²பேஸு லப்³ப⁴தி.
469. வாயிமங் நாம த³ட்ட²ப்³புங், புப்ப²ரூபபடாதி³ஸு;
புப்ப²மாலாகு³ணேஹேவ, வாயித்வா கரணே பன.

470. ஸப்³ப³மேதங் ஸயங் காதுங், காராபேதுங் பரேஹி வா;
பி⁴க்²னங் பி⁴க்²னீனஞ்ச, பு³த்³த்⁴ஸ்ஸபி ந வட்டதி.
471. ததா² கலம்ப³கங் காதுங், அட்³ட்⁴சந்த³கமேவ வா;
அஞ்ஞேஹி பூரிதங் புப்ப²-படங் வா வாயிதும்பி ச.
472. பிட்ட²காசமயங் தா³மங், கெ³ண்டு³புப்ப²மயம்பி ச;
க²ரபத்தமயங் மாலங், ஸப்³ப³ங் காதுங் ந வட்டதி.
473. கணிகாராதி³புப்பா²னி, விதானே ப³த்³த்⁴கண்டகே;
ஹீராதி³ஹி படாகத்த²ங், விஜ்ஜ²ந்தஸ்ஸபி து³க்கடங்.
474. கண்டகாதி³ஹி பி⁴க்²ஸ்ஸ, ஏகபுப்ப²ம்பி விஜ்ஜி²துங்;
புப்பே²ஸுயேவ வா புப்ப²ங், பவேஸேதுங் ந வட்டதி.
475. அஸோகபிண்டி³ஆதி³னங், அந்தரே த⁴ம்மரஜ்ஜுயா;
பவேஸேந்தஸ்ஸ புப்பா²னி, ந தோ³ஸோ கோசி விஜ்ஜதி.
476. ட²பிதேஸு பவேஸேத்வா, கத³லிச்ச²த்தபி⁴த்திஸு;
கண்டகேஸுபி புப்பா²னி, விஜ்ஜ²ந்தஸ்ஸபி து³க்கடங்.
477. கப்பியங் பன வத்தப்³ப³ங், வசனங் வத்து²பூஜனே;
நிமித்தோபா⁴ஸபரியா, வட்டந்தீதி பகாஸிதா.
478. ந கேவலமகத்தப்³ப³ங், குலதூ³ஸனமேவ ச;
அத² கோ² வேஜ்ஜகம்மாதி³, ந கத்தப்³ப³ங் குதா³சனங்.
479. காதப்³ப³ங் பன பே⁴ஸஜ்ஜங், பஞ்சன்னங் ஸஹத⁴ம்மினங்;
கத்வாப்யகதவிஞ்ஞுத்திங், கா கதா² அத்தனோ த⁴னே.
480. ததா² மாதாபிதூனம்பி, தது³பட்டா²கஜந்துனோ;
ப⁴ண்டு³கஸ்ஸத்தனோ சேவ, வெய்யாவச்சகரஸ்ஸபி.
481. ஜெட்ட²பா⁴தா கனிட்டோ² ச, ததா² ப⁴கி³னியோ து³வே;
சூளமாதா சூளபிதா, மஹாமாதா மஹாபிதா.
482. பிதுச்சா² மாதுலோ சாதி, த³ஸிமே ஞாதயோ மதா;
இமேஸம்பி த³ஸன்னஞ்ச, காதுங் வட்டதி பி⁴க்²னோ.

483. ஸசே பே⁴ஸஜ்ஜமேதேஸங், நப்பஹோதி ந ஹோதி வா;
யாசந்திபி ச தங் பி⁴க்கு²ங், தா³தப்³புங் தாவகாலிகங்.
484. ஸசே தே ந ச யாசந்தி, தா³தப்³புங் தாவகாலிகங்;
ஆபோ⁴க³ங் பன கத்வா வா, “த³ஸ்ஸந்தி புன மே இமே”.
485. ஏதேஸங் து குலா யாவ, ஸத்தமா குலதூ³ஸனங்;
பே⁴ஸஜ்ஜகரணாபத்தி, விஞ்ஞத்தி வா ந ரூஹதி.
486. பா⁴துஜாயாபி வா ஹோதி, ஸசே ப⁴கி³னிஸாமிகோ;
ஸசே தே ஞாதகா ஹொந்தி, காதுங் தேஸம்பி வட்டதி.
487. அஞ்ஞாதகா ஸசே ஹொந்தி, பா⁴துனோ அனுஜாய வா;
“தும்ஹாகங் ஜக்³க³னட்டா²னே, தே³தா²”தி ச வதே³ பு³தோ⁴.
488. அத² தேஸம்பி புத்தானங், கத்வா தா³தப்³புமேவ வா;
“மாதாபிதூனங் தும்ஹாகங், தே³தா²”தி வினயஞ்ஞனா.
489. அஞ்ஞோபி யோ கோசி பனிஸ்ஸரோ வா;
சோரோபி வா யுத்³த⁴பராஜிதோ வா;
ஆக³ந்துகோ கீ²ணபரிப்³புயோ வா;
அகல்லகோ ஞாதிஜனுஜ்ஜி²தோ வா.
490. ஏதேஸங் பன ஸப்³பே³ஸங், அபச்சாஸீஸதா ஸதா;
காதப்³போ³ படிஸந்தா²ரோ, பி⁴க்கு²னா ஸாது⁴னாது⁴னா.
491. பரித்தோத³கஸுத்தானி, வுத்தே தே³தா²தி கேனசி;
ஜலங் ஹத்தே²ன சாலெத்வா, மத்³தி³த்வா பன ஸுத்தகங்.
492. தா³தப்³புங் பி⁴க்கு²னா கத்வா, தேஸமேவ ச ஸந்தகங்;
அத்தனோ உத³கங் தேஸங், ஸுத்தங் வா தே³தி து³க்கடங்.
493. அனாமட்டோ²பி தா³தப்³போ³, பிண்ட³பாதோ விஜானதா;
த்³வின்னங் மாதாபிதூனம்பி, தது³பட்டா²யகஸ்ஸ ச.
494. இஸ்ஸரஸ்ஸாபி தா³தப்³போ³, சோரதா³மரிகஸ்ஸ ச;
ப⁴ண்டு³கஸ்ஸத்தனோ சேவ, வெய்யாவச்சகரஸ்ஸபி.

495. தா³துங் பண்டு³பலாஸஸ்ஸ, தா²லகேபி ச வட்டதி;
 ட²பெத்வா தங் பனஞ்ஞஸ்ஸ, பிதுனோபி ந வட்டதி.
496. கி³ஹீனங் பன து³தெய்யங், ஜங்க⁴பேஸனியம்பி ச;
 ஸத்து²னா து³க்கடங் வுத்தங், கரொந்தஸ்ஸ பதே³ பதே³.
497. ப⁴ண்டு³மாதாபிதுனம்பி, வெய்யாவச்சகரஸ்ஸ ச;
 ஸாஸனங் ஸஹத⁴ம்மீனங், ஹரிதுங் பன வட்டதி.
498. குலது³ஸனகம்மேன, லத்³த⁴ங் அட்ட²விதே⁴னபி;
 பஞ்சன்னங் ஸஹத⁴ம்மீனங், ந ச வட்டதி பு⁴ஞ்ஜிதுங்.
499. அஜ்ஜோ²ஹாரேஸு ஸப்³பத்த², து³க்கடங் பரிதீ³பிதங்;
 பரிபோ⁴க³வஸேனேவ, ஸேஸேஸுபி அயங் நயோ.
500. கத்வா ரூபியவோஹாரங், அபு⁴தாரோசனேன ச;
 உப்பன்னபச்சயா ஸப்³பே³, ஸமானாதி பகாஸிதா.
501. விஞ்ஞத்தினுப்பதா³னஞ்ச, வேஜ்ஜகம்மமனேஸனங்;
 பாரிப⁴டுகதங் முக்³க³-ஸுபதங் வத்து²விஜ்ஜகங்.
502. ஜங்க⁴பேஸனியங் து³த-கம்மஞ்ச குலது³ஸனங்;
 அபு⁴தாரோசனங் பு³த்த⁴-படிகுட்ட²ங் விவஜ்ஜயே.
503. ந தோ³ஸும்மத்தகாதீ³னங், படினிஸ்ஸஜ்ஜதோபி தங்;
 ஸமுட்டா²னாதி³கங் ஸப்³பங், ஸங்க⁴பே⁴த³ஸமங் மதங்.

குலது³ஸனகதா².

504. ஜானங் யாவதிஹங் யேன, சா²தி³தாபத்தி பி⁴க்கு²னா;
 அகாமா பரிவத்த²ப்³பங், தேன தாவதிஹங் பன.
505. ஆபத்தி ச அனுக்கி²த்தோ, பஹு சானந்தராயிகோ;
 சதுஸ்வபி ச தங்ஸஞ்ஞீ, தஸ்ஸ சா²தே³துகாமதா.
506. சா²த³னந்தி பனேதேஹி, த³ஸஹங்கே³ஹி பி⁴க்கு²னா;
 ச²ன்னா நாம ஸியாபத்தி, அருணுக்³க³மனேன ஸா.

த்³வே பா⁴ணவாரா நிட்டி²தா.

507. திவிதோ⁴ பரிவாஸோ ஹி, திவிதா⁴பேதசேதஸா;
படிச்ச²ன்னோ ச ஸுத்த³த⁴ந்தோ, ஸமோதா⁴னோதி தீ³பிதோ.
508. தத்ராயங் து படிச்ச²ன்ன-பரிவாஸோ பகாஸிதோ;
படிச்ச²ன்னாய தா³தப்³போ³, வஸேனாபத்தியாதி ச.
509. வத்து²கொ³த்தவஸேனாபி, நாமாபத்திவஸேன வா;
கம்மவாசா ஹி காதப்³பா³, தா³தப்³போ³ தஸ்ஸ தேன ச.
510. “வத்தங் ஸமாதி³யாமீ”தி, “பரிவாஸ”ந்தி வா புன;
ஸமாதி³யித்வா ஸங்க⁴ஸ்ஸ, ஆரோசேதப்³ப³மாதி³தோ.
511. புனப்புனாக³தானம்பி, ஆரோசெந்தோவ ரத்தியா;
சே²த³ங் வா வத்தபே⁴த³ங் வா, அகத்வாவ ஸதா³ வஸே.
512. பரிவாஸோ விஸோதே⁴துங், ந ஸக்கா தத்த² சே பன;
நிக்கி²பித்வான தங் வத்தங், வத்த²ப்³ப³ங் தேன பி⁴க்கு²னா.
513. தத்தே²வ ஸங்க⁴மஜ்ஜே² வா, புக்³க³லே வாபி நிக்கி²பே;
நிக்கி²பாமீதி வத்தங் வா, பரிவாஸந்தி வா ததா².
514. ஏவமேகபதே³னாபி, பதே³ஹி த்³வீஹி வா பன;
வத்தங் நிக்கி²பிதப்³ப³ங் தங், ஸமாதா³னெப்யயங் நயோ.
515. நிக்கி²த்தகாலதோ உத்³த⁴ங், பகதத்தோதி வுச்சதி;
புன பச்சுஸகாலஸ்மிங், ஸத்தி³தி⁴மேகேன பி⁴க்கு²னா.
516. பரிக்கி²த்தவிஹாரஸ்ஸ, த்³வே பரிக்கே²பதோ ப³ஹி;
பரிக்கே²பாரஹட்டா²னா, அபரிக்கி²த்ததோ ப³ஹி.
517. லெட்³டு³பாதே அதிக்கம்ம, ஓக்கமித்வா ச மக்³க³தோ;
கு³ம்பே³ன வதியா வாபி, ச²ன்னட்டா²னே டி²தேன து.
518. தேன அந்தோருணேயேவ, வத்தமாதா³ய விஞ்ஞனா;
ஆரோசெத்வாருணே தஸ்மிங், வுட்டி²தே தஸ்ஸ ஸந்திகே.
519. நிக்கி²பித்வா ததோ வத்தங், க³ந்தப்³ப³ங் து யதா²ஸுக²ங்;
அந்தோயேவாருணே பி⁴க்கு², க³தோ சே யஸ்ஸ கஸ்ஸசி.

520. ஆரோசெத்வாவ தங் வத்தங், நிக்கி²பே புன பண்டி³தோ;
ஸேஸங் ஸமுச்சயஸ்ஸட்ட²-கதா²ய ச விபா⁴வயே.
521. ஆபத்தீனஞ்ச ரத்தீனங், பரிச்சே²த³ங் ந ஜானதி;
யோ தஸ்ஸ பன தா³தப்³போ³, “ஸுத்³த⁴ந்தோ”தி பவுச்சதி.
522. ஏஸேவ பரிஸுத்³தே⁴ஹி, ஸுத்³த⁴ந்தோ து³விதோ⁴ மதோ;
சூளஸுத்³த⁴ந்தனாமோ ச, மஹாஸுத்³த⁴ந்தனாமகோ.
523. து³விதோ⁴பி அயங் ரத்தி-பரிச்சே²த³ங் அஜானதோ;
ஏகச்சங் ஸகலங் வாபி, தா³தப்³போ³ விமதிஸ்ஸ வா.
524. இதரோபி ஸமோதா⁴ன-பரிவாஸோ திதா⁴ மதோ;
ஸோ ஒதா⁴னஸமோதா⁴னோ, அக்³க⁴மிஸ்ஸகபுப்³ப³கோ.
525. ஆபஜ்ஜித்வாந்தராபத்திங், சா²தெ³ந்தஸ்ஸ ஹி பி⁴க்கு²னோ;
தி³வஸே பரிவுத்தே² து, ஒது⁴னித்வா பதீ³யதே.
526. புரிமாபத்தியா மூல-தி³வஸே து வினிச்சி²தே;
பச்சா² ஆபன்னமாபத்திங், ஸமோதா⁴ய விதா⁴னதோ.
527. யாசமானஸ்ஸ ஸங்கே⁴ன, தா³தப்³போ³ பன பி⁴க்கு²னோ;
ஏஸோதா⁴னஸமோதா⁴ன-பரிவாஸோ பகாஸிதோ.
528. ததா² ஸம்ப³ஹுலாஸ்வேகா, த்³வே வா ஸம்ப³ஹுலாபி வா;
யா யா சிரபடிச்ச²ன்னா, தாஸங் அக்³க⁴வஸேன ஹி.
529. ஆபத்தீனங் ததோ ஊன-படிச்ச²ன்னானமேவ யோ;
ஸமோதா⁴ய பதா³தப்³போ³, பரிவாஸோதி வுச்சதி.
530. நானாவத்து²கஸஞ்ஞாயோ, ஸப்³பா³ ஆபத்தியோ பன;
ஸப்³பா³தா ஏகதோ கத்வா, தா³தப்³போ³ மிஸ்ஸகோ மதோ.
531. பரிவுத்த²பரிவாஸஸ்ஸ, மானத்தங் தெ³ய்யமுத்தரி;
ச² ரத்தியோ படிச்ச²ன்னா-படிச்ச²ன்னவஸா து³வே.
532. தத்த² யா அபடிச்ச²ன்னா, ஹோதி ஆபத்தி யஸ்ஸ து;
தஸ்ஸ தா³தப்³ப³மானத்தங், அபடிச்ச²ன்னநாமகங்.

533. யஸ்ஸாபத்தி படிச்ச²ன்னா, பரிவாஸாவஸானகே;
தஸ்ஸ தா³தப்³ப³மானத்தங், “படிச்ச²ன்ன”ந்தி வுச்சதி.
534. க³ந்த்வா சதூஹி பி⁴க்கூ²ஹி, பசுதுஸஸமயே ஸஹ;
பரிவாஸே வினித்³தி³ட்ட²-ப்பகாரங் தே³ஸமேவ ச.
535. “வத்தங் ஸமாதி³யாமீ”தி, “மானத்த”மிதி வா பன;
ஆதி³யித்வான தங் தேஸங், ஆரோசெத்வா விஸாரதோ³.
536. நிக்கி²பே ஸந்திகே தேஸங், வத்தங் தேஸு க³தேஸு வா;
பி⁴க்கு²ஸ்ஸ புப்³ப³தி³ட்ட²ஸ்ஸ, ஆரோசெத்வான நிக்கி²பே.
537. தஸ்ஸ தா³னவிதா⁴னஞ்ச, ரத்திச்சே²தா³தி³கோ நயோ;
ஞெய்யோ ஸமுச்சயஸ்ஸட்ட²-கதா²பாளிவஸேன து.
538. புன தங் சிண்ணமானத்தங், ஸங்கோ⁴ வீஸதிவக்³கி³கோ;
அப்³பெ⁴ய்ய விதி⁴னா பி⁴க்கு², பகதத்தோ புனப்³பி⁴தோ.
539. சா²தெ³ந்தியாபி ஆபத்திங், பரிவாஸோ ந விஜ்ஜதி;
ந ச பி⁴க்கு²னியாபத்தி, அத்தனோ சா²த³யந்தியா.
540. சா²தெ³த்வா வாபி ஆபத்திங், அச்சா²தெ³த்வாபி வா பன;
கேவலங் சரிதப்³ப³ந்தி, பக்க²மானத்தமேவ து.
541. வினயனயமதிபுத்³தி⁴தீ³பனங்;
வினயவினிச்ச²யமேதமுத்தமங்;
விவித⁴னயனயுதங் உபெந்தி யே;
வினயனயே படுதங் உபெந்தி தே.

இதி வினயவினிச்ச²யே ஸங்கா⁴தி³ஸேஸகதா² நிட்டி²தா.

அனியதகதா²

542. ரஹோ நிஸஜ்ஜஸ்ஸாதே³ன, மாதுகா³மஸ்ஸ ஸந்திகங்;
க³ந்துகாமோ நிவாஸேதி, அக்கி²ங் அஞ்ஜேதி பு⁴ஞ்ஜதி.
543. பயோகே³ ச பயோகே³ ச, ஹோதி ஸப்³ப³த்த² து³க்கடங்;
க³ச்ச²தோ பத³வாரேன, க³ந்த்வா சஸ்ஸ நிஸீத³தோ.

544. நிஸஜ்ஜாய உபி⁴ன்னம்பி, பயோக³க³ணனாய ச;
ஹோதி பாசித்தியங் தஸ்ஸ, ப³ஹுகானி ப³ஹுஸ்வபி.
545. ஸமீபேபி டி²தோ அந்தோ⁴, அந்தொத்³வாத³ஸஹத்த²கே;
ந கரோதி அனாபத்திங், இத்தீ²னங் து ஸதம்பி ச.
546. சக்கு²மாபி நிபஜ்ஜித்வா, நித்³தா³யந்தோபி கேவலங்;
த்³வாரே பிஹிதக³ப³ப⁴ஸ்ஸ, நிஸின்னோபி ந ரக்க²தி.
547. அனந்தே⁴ ஸதி விஞ்ஞஸ்மிங், டி²தஸ்ஸாரஹஸஞ்ஞினோ;
நிஸஜ்ஜபச்சயா தோ³ஸோ, நத்தி² விக்கி²த்தசேதஸோ.
548. ந தோ³ஸும்மத்தகாதீ³னங், ஆபத்தீஹிபி தீஹிபி;
ஸமுட்டா²னாத³யோ துல்யா, பட²மந்திமவத்து²னா.

பட²மானியதகதா².

549. அனந்தா⁴ப³தி⁴ரோ விஞ்ஞா, இத்தீ² வா புரிஸோபி வா;
அந்தொத்³வாத³ஸஹத்த²ட்டோ², அனாபத்திகரோ ஸியா.
550. அந்தோ⁴ அப³தி⁴ரோ வாபி, ப³தி⁴ரோ வாபி சக்கு²மா;
ந கரோதி அனாபத்திங், திஸமுட்டா²னமேவித³ங்.

து³தியானியதகதா².

இதி வினயவினிச்ச²யே அனியதகதா² நி²ட்டி²தா.

நிஸ்ஸக்³கி³யகதா²

551. கோ²மங் கப்பாஸகோஸெய்யங், ஸாணங் ப⁴ங்க³ஞ்ச கம்ப³லங்;
சீவரங் ச²ப³பி³த⁴ங் வுத்தங், ஜாதிதோ பன கப்பியங்.
552. து³கூலஞ்சேவ பத்துண்ணங், சினங் ஸோமாரபட்டகங்;
இத்³தி⁴ஜங் தே³வதி³ன்னஞ்ச, தஸ்ஸேதங் அனுலோமிகங்.
553. திசீவரங் பரிக்கா²ர-சோளஞ்ச முக²புஞ்ச²னங்;
நிஸீத³னமதி⁴ட்டெ²ய்ய, பச்சத்த²ரணமேவ ச.
554. ஏகாஹம்பி வினா பி⁴க்கு², ந வஸெய்ய திசீவரங்;

ந வஸெய்ய ததா²தி⁴ட்டா², சாதுமாஸங் நிஸீத³னங்.

555. ரஜித்வா கப்பியங் பி³ந்து³ங், த³த்வா தத்த² திசீவரங்;
உபபன்னங் பமானேன, அதி⁴ட்டா²தப்³ப³மேவ தங்.
556. பச்சி²மந்தேன ஸங்கா⁴டி, தீ³க⁴ஸோ முட்டி²பஞ்சகா;
முட்டி²த்திகா ச திரியங், உத்தமந்தேன ஸா பன.
557. ஸத்து²னோ சீவருனாபி, வட்டதீதி பகாஸிதா;
இத³மேவுத்தராஸங்கே³, பமாணங் பரிதீ³பிதங்.
558. முட்டி²பஞ்சகங் தீ³க⁴ந்தங், பமாணங் திரியந்ததோ;
அட்³ட⁴தெய்யங் த்³விஹத்த²ங் வா, ஸேஸே அந்தரவாஸகே.
559. அஹதாஹதகப்பானங், ஸங்கா⁴டி தி³கு³ணா மதா;
ஏகபட்டுத்தராஸங்கோ³, ஏவமந்தரவாஸகோ.
560. உதுத்³த⁴டானங் பன சீவரானங்;
ஸங்கா⁴டி பி⁴க்கு²ஸ்ஸ சதுக்³கு³ணா வா;
து³வேபி ஸேஸா தி³கு³ணாவ வுத்தா;
யதா²ஸுக²ங் வட்டதி பங்ஸுகூலங்.
561. தீணிபி த்³வேபி சேகங் வா, சி²ந்தி³தப்³ப³ங் பஹோதி சே;
ஸப்³பே³ஸு அப்பஹாந்தேஸு, தெ³ய்யமன்வாதி⁴கம்பி வா.
562. அச்சி²ன்னங் வா அனாதி³ன்னங், தா⁴ரெந்தஸ்ஸ திசீவரங்;
பி⁴க்கு²னோ து³க்கடங் வுத்தங், து³ப்³போ⁴கே³ன ச ஸேவதோ.
563. குஸிங் அட்³ட⁴குஸிஞ்சாபி, மண்ட³லங் அட்³ட⁴மண்ட³லங்;
விவட்டங் அனுவிவட்டங், பா³ஹந்தம்பி ச பி⁴க்கு²னோ.
564. த³ஸ்ஸெத்வாவ விதி⁴ங் ஸப்³ப³ங், பஞ்சகாதி³ப்பபே⁴த³கங்;
சி²ன்னங் ஸமணஸாருப்பங், காதப்³ப³ங் து திசீவரங்.
565. தா³னேனச்சி²ஜ்ஜகா³ஹேன, விஸ்ஸாஸக்³க³ஹணேன ச;
ஹீனாயாவத்தனேனாபி, ஸிக்கா²ய ச பஹானதோ.
566. பச்சுத்³தா⁴ரவினாஸேஹி, லிங்க³ஸ்ஸ பரிவத்தனா;

ஸப்³ப³ங் பி்⁴ஜ்ஜதிதி்⁴ட்டா²னங், சி²த்³த³பா்⁴வே திசீவரங்.

567. கனிட்ட²ஸ்ஸங்³கு³லஸ்ஸேவ , நக²பிட்டி²ப்பமாணகங்;
வினிவித்³த்⁴ங் பனச்சி²த்³த³-மதி்⁴ட்டா²னவினாஸனங்.

568. ஏகோ தந்துபி அச்சி²ன்னோ, அதி்⁴ட்டா²னங் ந பி்⁴ந்த³தி;
ஸேதபா்⁴வங் கரொந்தேன, தோ்⁴தம்பி ரஜகேன வா.

569. பட²மங் அக்³க³ளங் த³த்வா, பச்சா² சி²ந்த³தி ரக்க²தி;
க்⁴டெத்வா கோடியோ த்³வே வா, பச்சா² சி²ந்த³தி ரக்க²தி.

570. சதுரட்ட²ங்³லா ஓரங், ஏகத்³வின்னங் திரீயதோ;
திண்ணம்பி தீ³க்⁴தோ சி²த்³த³ங், பி்⁴ந்த³தேவ வித³த்தி²யா.

571. நிஸீத³னஸ்ஸ தீ³கே்⁴ன, ப்⁴வந்தி த்³வே வித³த்தி²யோ;
வித்தா²ரேன தி³யட்³டா்⁴ ச, ஸுக³தஸ்ஸ வித³த்தி²யா.

572. ஹொந்தி கண்டு³ப்படிச்சா²தி³, திரியங் த்³வே வித³த்தி²யோ;
தீ³க்⁴தோபி சதஸ்ஸோவ, ஸுக³தஸ்ஸ வித³த்தி²யா.

573. தீ³க்⁴தோ ஸுக³தஸ்ஸேவ, ப்⁴வந்தி ச² வித³த்தி²யோ;
வித்தா²ரேனட்³ட்⁴தெய்யாவ, ஸியா வஸ்ஸிகஸாடிகா.

574. முனினா தீஸு ஏதேஸு, கரொந்தஸ்ஸ தது³த்தரிங்;
அதி்⁴கச்சே²த³னங் தஸ்ஸ, பாசித்தியமுதீ³ரிதங்.

575. முக²புஞ்ச²னசோளஸ்ஸ, பச்சத்த²ரணகஸ்ஸ வா;
பமாணங் அப்பமானேன, ந சேவ பரிதீ³பிதங்.

576. ஸத³ஸங் அத³ஸங் ஸப்³ப³ங், பச்சத்த²ரணசீவரங்;
மஹந்தங் கு²த்³த³கங் ஏக-மனேகம்பி ச வட்டதி.

577. முக²புஞ்ச²னசோளேகங், த்³வேபி வட்டந்தி ஸப்³ப³தா²;
ஸத³ஸங் அத³ஸங் வாபி, ஸத³ஸங்வ நிஸீத³னங்.

578. அத³ஸா ரஜிதாயேவ, வட்டதாதி³ன்னகப்பகா;
வுத்தா கண்டு³ப்படிச்சா²தி³, ததா² வஸ்ஸிகஸாடிகா.

579.

க³ணனங் வா பமாணங் வா, ந பரிக்கா²ரசோளகே;
பமாணக³ணனாதீதி, ப⁴ணந்தி பகதஞ்ஞனோ.

580. ஸுக³தட்ட²ங்கு³லாயாமங், சதுரங்கு³லவித்த²தங்;
விகப்பனுபக³ங் ஹோதி, பச்சி²மங் நாம சீவரங்.

581. பரிஸ்ஸாவபடங் பத்த-பொத்த²கத்த²விகாதி³கங்;
அதி⁴ட்டெ²ய்ய பரிக்கா²ர-சோளங் பச்சி²மசீவரங்.

582. ப³ஹுனி ஏகதோ கத்வா, அதி⁴ட்டா²தும்பி வட்டதி;
மாதுஆதீ³னமத்தா²ய, ட²பிதே நத்தி² தோ³ஸதா.

583. வஸ்ஸமாஸே அதி⁴ட்டெ²ய்ய, சதுரோ வஸ்ஸஸாடிகங்;
புன பச்சுத்³த⁴ரித்வா தங், விகப்பெய்ய ததோ பரங்.

584. தாவ கண்டு³ப்படிச்சா²தி³ங், யாவ ரோகோ³ ந ஸம்மதி;
அதி⁴ட்ட²ஹித்வா ததோ உத்³த⁴ங், உத்³த⁴ரித்வா விகப்பயே.

585. “இமங் கண்டு³ப்படிச்சா²தி³ங், இமமந்தரவாஸகங்;
அதி⁴ட்டா²மீ”திதி⁴ட்டெ²ய்ய, ஸேஸேஸுபி அயங் நயோ.

586. “இமங் கண்டு³ப்படிச்சா²தி³ங், ஏத”ந்தி ச அஸம்முகே²;
வத்வா பச்சுத்³த⁴ரெய்யேவங், ஸேஸேஸுபி விசக்க²ணோ.

587. ஆபோ⁴கங் மனஸா கத்வா, காயேன பு²ஸனாகதங்;
வசஸாதி⁴ட்டி²தஞ்சாதி, அதி⁴ட்டா²னங் த்³விதா⁴ மதங்.

588. இதி ஸப்³பமித³ங் வுத்தங், தேசீவரிகபி⁴க்கு²னோ;
ததா² வத்வாவதி⁴ட்டெ²ய்ய, தங் பரிக்கா²ரசோளிகோ.

589. திசீவரங் பரிக்கா²ர-சோளங் காதும்பி வட்டதி;
ஏவங் சுதோ³ஸிதே வுத்தோ, பரிஹாரோ நிரத்த²கோ.

590. ந, தேசீவரிகஸ்ஸேவ, வுத்தத்தா தத்த² ஸத்து²னா;
தங் பரிக்கா²ரசோளஸ்ஸ, தஸ்மா ஸப்³பம்பி வட்டதி.

591. “அதி⁴ட்டே²தி விகப்பேதி, அனாபத்தீ”தி எத்த² ச;
அதி⁴ட்டா²தப்³புகஸ்ஸேவ, விகப்பனவிதா⁴னதோ.

592. பி⁴க்கு²ஸ்ஸேவங் கரொந்தஸ்ஸ, ந தோ³ஸோ உபலப்³ப⁴தி;
ஏவஞ்ச ந ஸியா கஸ்மா, முக²புஞ்ச²னகாதி³கங்.
593. முக²புஞ்ச²னகாதீ³னங், தேஸங் கிச்சவிதா⁴னதோ;
அகிச்சஸ்ஸாமிகஸ்ஸஸ்ஸ, அதி⁴ட்டா²னங் து யஜ்ஜதி.
594. நிதா⁴னமுக²மேதந்தி, மஹாபச்சரியங் பன;
வுத்தத்தா ச நிலேதே⁴துங், ந ஸக்கா வினயஞ்ஞனா.
595. சீவரங் பரிபுண்ணந்தி, நிதா³னுப்பத்திதோபி ச;
நிதா⁴னமுக²மேதந்தி, வேதி³தப்³ப³ங் விபா⁴வினா.
596. குஸவாகாதி³சீரானி, கம்ப³லங் கேஸவாலஜங்;
து²ல்லச்சயங் தா⁴ரயதோ-லூகபக்கா²ஜினக்கி²பே.
597. கத³லேரகது³ஸ்ஸேஸு, அக்கது³ஸ்ஸே ச பொத்த²கே;
து³க்கடங் திரிடே வாபி, வேட²னே கஞ்சகேபி ச.
598. ஸப்³ப³னீலகமஞ்ஜெட்ட²-கண்ஹலோஹிதபீதகே ;
மஹானாமமஹாரங்க³-ரத்தேஸுபி ச து³க்கடங்.
599. அச்சி²ன்னத³ஸகே தீ³க⁴-ப²லபுப்ப²த³ஸேஸு ச;
அச்சி²ன்னசீவரஸ்ஸெத்த², நத்தி² கிஞ்சி அகப்பியங்.
600. அதி⁴ட்டே²தி விகப்பேதி, விஸ்ஸஜ்ஜேதி வினஸ்ஸதி;
அந்தோத³ஸாஹங் விஸ்ஸாஸே, அனாபத்தி பகாஸிதா.
601. கதி²னங் நாம நாமேன, ஸமுட்டா²னமித³ங் பன;
அசித்தமக்ரியங் வுத்தங், திசித்தஞ்ச திவேத³னங்.
- பட²மகதி²னகதா².
602. கா³மாதீ³ஸு பதே³ஸேஸு, திபஞ்சஸு திசீவரங்;
ட²பெத்வா ஏகரத்தம்பி, ஸங்க⁴ஸம்முதியா வினா.
603. பி⁴க்கு²னோ பன தேனஸ்ஸ, விப்பவத்து²ங் ந வட்டதி;
ஹோதி நிஸ்ஸக்³கியங் விப்ப-வஸதோ அருணுக்³க³மே.
- 604.

சீவரங் நிக்கி²பித்வான, நஹாயந்தஸ்ஸேவ ரத்தியங்;
அருணே உட்டி²தே கிங் நு, காதப்³பங் தேன பி⁴க்கு²னா.

605. து³க்கடங் முனினா வுத்தங், நிஸ்ஸக்³கியனிவாஸனே;
தப்³ப⁴யா பன ஸோ பி⁴க்கு², நக்³கோ³ கச்ச²தி து³க்கடங்.
606. அச்சி²ன்னசீவரட்டா²னே, டி²தத்தா பன பி⁴க்கு²னோ;
ந தஸ்ஸாகப்பியங் நாம, சீவரங் அத்தி² கிஞ்சிபி.
607. நிகா³ஸெத்வா க³ஹெத்வா ச, க³ந்த்வா பி⁴க்கு²ஸ்ஸ ஸந்திகங்;
நிஸ்ஸஜ்ஜித்வா பனாபத்தி, தே³ஸேதப்³பா³வ விஞ்ஞனா.
608. பரஸ்ஸ நிஸ்ஸஜ்ஜித்வா தங், து³க்கடங் பரிபு⁴ஞ்ஜதோ;
பயோகே³ ச பயோகே³ ச, ஹோதி பாருபனாதி³ஸு.
609. அனாபத்தி தமஞ்ஞஸ்ஸ, பி⁴க்கு²னோ பரிபு⁴ஞ்ஜதோ;
அதெ³ந்தஸ்ஸ ச நிஸ்ஸட்ட²ங், து³க்கடங் பரியாபுதங்.
610. தே²ரே ச த³ஹரே மக்³கங், கச்ச²ந்தேஸு உபோ⁴ஸுபி;
பத்தசீவரமாதா³ய, ஓஹீனே த³ஹரே பன.
611. அஸம்பத்தே க³ருங் தஸ்மிங், உக்³கச்ச²த்யருணோ யதி³;
ஹோதி நிஸ்ஸக்³கியங் வத்த²ங், ந பஸ்ஸம்ப⁴தி நிஸ்ஸயோ.
612. முஹுத்தங் விஸ்ஸமித்வான, கச்ச²ந்தே த³ஹரே பன;
ஹோதி நிஸ்ஸக்³கியங் வத்த²ங், பஸ்ஸம்ப⁴தி ச நிஸ்ஸயோ.
613. ஸுதா த⁴ம்மகதா² யஸ்மிங், உக்³கச்ச²த்யருணோ யதி³;
ஹோதி நிஸ்ஸக்³கியங் வத்த²ங், பஸ்ஸம்ப⁴தி ச நிஸ்ஸயோ.
614. பச்சுத்தா⁴ரே அனாபத்தி, லத்த³த⁴ஸம்முதிகஸ்ஸபி;
அந்தோயேவாருணே தங் வா, விஸ்ஸஜ்ஜேதி வினஸ்ஸதி.
615. பட²மேன ஸமானாவ, ஸமுட்டா²னாத³யோ நயா;
அபச்சுத்த³த⁴ரணங் எத்த², அக்ரியாதி விஸேஸிதங்.

து³தியகதி²னகதா².

616. அகாலசீவரங் மாஸ-பரமங் நிக்கி²பே ஸதி;

பச்சாஸாய ததோ உத்³த⁴ங், ட²பேதுங் ந ச வட்டதி.

617. த³ஸாஹாதிக்கமோயேவ;
பட²மே கதி²னே இத⁴;
மாஸஸ்ஸாதிக்கமோ வுத்தோ;
ஸேஸோ தேன ஸமோ மதோ.

ததியகதி²னகதா².

618. பி⁴க்கு² பி⁴க்கு²னியா பு⁴த்தங், வத்த²ங் அஞ்ஞாதிகாய யோ;
தோ⁴வாபேதி ரஜாபேதி, ஆகோடாபேதி சே ததோ.
619. தஸ்ஸ நிஸ்ஸக்³கியாபத்தி, பட²மேன பகாஸிதா;
ததா² ஸேஸேஹி ச த்³வீஹி, தீ³பிதங் து³க்கடத்³வயங்.
620. ஸிக்க²மானாய வா ஹத்தே², தோ⁴வனத்தா²ய தே³தி சே;
ஸா ஹுத்வா உபஸம்பன்னா, பச்சா² தோ⁴வதி ஸோ நயோ.
621. ஸாமணேரனித்³தே³ஸேபி, லிங்க³ங் சே பரிவத்ததி;
பி⁴க்கு²னீஸுபஸம்பஜ்ஜ, தோ⁴தே நிஸ்ஸக்³கியங் ஸியா.
622. த்³ஹரானஞ்ச பி⁴க்க²னங், ஹத்தே² வத்தே² நிய்யாதி³தே;
பரிவத்திதலிங்கே³ஸு, தேஸுபேஸ நயோ மதோ.
623. ததா² பி⁴க்கு²னியா ஹத்தே², தின்னே “தோ⁴வா”தி சீவரே;
பரிவத்தே து லிங்க³ஸ்மிங், ஸசே தோ⁴வதி வட்டதி.
624. “தோ⁴வா”தி பி⁴க்கு²னீ வுத்தா, ஸசே ஸப்³பங் கரோதி ஸா;
தோ⁴வனப்பச்சயாயேவ, தஸ்ஸ நிஸ்ஸக்³கியங் ஸியா.
625. “இமஸ்மிங் சீவரே ஸப்³பங், கத்தப்³பங் த்வங் கரோஹி”தி;
ஹோதி நிஸ்ஸக்³கியஞ்சேவ, வத்³தோ து³க்கடத்³வயங்.
626. ஞாதிகாஞாதிஸஞ்ஞிஸ்ஸ, பச்சத்த²ரனிஸீத³னங்;
அஞ்ஞஸ்ஸ ஸந்தகங் வாபி, தோ⁴வாபெந்தஸ்ஸ து³க்கடங்.
627. ஏகதோஉபஸம்பன்னா, பி⁴க்கு²னீனங் வஸேன யா;
தாய தோ⁴வாபனே வாபி, ஹோதி ஆபத்தி து³க்கடங்.

628. அவுத்தா பரிபு⁴த்தங் வா, அஞ்ஞங் வா யதி³ தோ⁴வதி;
ந தோ³ஸோ, ஸஞ்சரித்தேன, ஸமுட்டா²னாத³யோ ஸமா.

புராணசீவரதோ⁴வாபனகதா².

629. விகப்பனுபக³ங் கிஞ்சி, பச்சி²மங் பன சீவரங்;
க³ண்ஹதோ ஹோதி ஆபத்தி, ட²பெத்வா பாரிவத்தகங்.

630. பயோகே³ க³ஹணத்தா²ய, து³க்கடங் பரியாபுதங்;
தஸ்ஸ நிஸ்ஸக்³கியாபத்தி, க³ஹணேன பகாஸிதா.

631. ஸசே அனுபஸம்பன்ன-ஹத்தே² பேஸேதி சீவரங்;
அஞ்ஞத்ர பாரிவத்தாபி, க³ஹேதுங் பன வட்டதி.

632. ஞாதிகாயபி அஞ்ஞாதி-ஸஞ்ஞிஸ்ஸ விமதிஸ்ஸ வா;
ஏகதோஉபஸம்பன்ன-ஹத்தா² க³ண்ஹாதி து³க்கடங்.

633. “த³ஸ்ஸாமீ”தி ச ஆபோ⁴க³ங், கத்வா வா பாரிவத்தகங்;
தாவகாலிகவிஸ்ஸாஸ-க்³கா³ஹே தோ³ஸோ ந விஜ்ஜதி.

634. அஞ்ஞங் பன பரிக்கா²ரங், ந தோ³ஸோ ஹோதி க³ண்ஹதோ;
ஸஞ்சரித்தஸமுட்டா²னங், இத³ங் வுத்தங் க்ரியாக்ரியங்.

சீவரபடிக்க³ஹணகதா².

635. சீவரங் விஞ்ஞாபெந்தஸ்ஸ, அஞ்ஞாதகாப்பவாரிதங்;
ஹோதி நிஸ்ஸக்³கியாபத்தி, அஞ்ஞத்ர ஸமயா பன.

636. திகபாசித்தியங் வுத்தங், ததே²வ த்³விகது³க்கடங்;
ஞாதகேஞாதிஸஞ்ஞிஸ்ஸ, தத்த² வேமதிகஸ்ஸ ச.

637. ஸமயே விஞ்ஞாபெந்தஸ்ஸ, ஞாதகே வா பவாரிதே;
அஞ்ஞஸ்ஸத்தா²ய வா தஸ்ஸ, ஞாதகே வா பவாரிதே.

638. அனாபத்தீதி ஞாதப்³ப³ங், ததா² உம்மத்தகாதி³னோ;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

அஞ்ஞாதகவிஞ்ஞத்திகதா².

639. அப்பவாரிதமஞ்ஞாதிங் , சீவரங் து தது³த்தரிங்;
ஹோதி நிஸ்ஸக்³கியாபத்தி, விஞ்ஞாபெந்தஸ்ஸ பி⁴க்கு²னோ.
640. யஸ்ஸ தீணிபி நட்டா²னி, த்³வே வா ஏகம்பி வா பன;
த்³வே வா ஏகம்பி வா தேன, ஸாதி³தப்³பங் ந கிஞ்சிபி.
641. ஸேஸகங் ஆஹரந்தஸ்ஸ, தி³ன்னே நச்சி²ன்னகாரணா;
ஸந்தகே ஞாதகாதீ³னங், அத்தனோபி த⁴னேன வா.
642. அனாபத்தீதி ஞாதப்³பங், ததா² உம்மத்தகாதி³னோ;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

ததுத்தரிகதா².

643. கல்யாணகம்யதாஹேது , ஆபஜ்ஜதி விகப்பனங்;
சீவரே பன யோ தஸ்ஸ, லாபா⁴ நிஸ்ஸக்³கியங் ப⁴வே.
644. மஹக்³க⁴ங் தா³துகாமம்ஹி, அப்பக்³க⁴ங் விஞ்ஞாபேதி யோ;
ஸந்தகே ஞாதகாதீ³னங், அனாபத்தி பகாஸிதா.
645. ஞாதகேஞ்ஞாதிஸஞ்ஞிஸ்ஸ, து³க்கடங் விமதிஸ்ஸ ச;
ஸஞ்சரித்தஸமா வுத்தா, ஸமுட்டா²னாத³யோ நயா.

பட²மோபக்க²டகதா².

646. து³தியோபக்க²டே யஸ்மா, வத்தப்³பங் நத்தி² கிஞ்சிபி;
தஸ்மா அனந்தரேனஸ்ஸ, ஸதி³ஸோவ வினிச்ச²யோ.

து³தியோபக்க²டகதா².

647. ரஞ்ஞா வா ராஜபொ⁴க்³கே³ன, பி⁴க்கு²முத்³தி³ஸ்ஸமாப⁴தங்;
அகப்பியங் ஸுவண்ணாதி³ங், க³ஹேதுங் ந ச வட்டதி.
648. ரஜதங் ஜாதருபங் வா, அத்தனோ வா பரஸ்ஸ வா;
அத்தா²ய க³ண்ஹிதுங் கிஞ்சி, தீ³யமானங் ந வட்டதி.
649. அஞ்ஞஸ்ஸத்தா²ய நித்³தி³ட்ட²ங், பி⁴க்கு²னோ படிக்க³ண்ஹதோ;
து³க்கடங் தஸ்ஸ ஹோதீதி, மஹாபச்சரியங் பன.

650. நெத்வா அகப்பியங் ப⁴ண்ட³ங், இத்த²ங் கோசி ஸசே வதே³;
“இத³ங் ஸங்க⁴ஸ்ஸ த³ம்மீதி, புக³க³லஸ்ஸ க³ணஸ்ஸ வா.
651. ஆராமங் வா விஹாரங் வா, சேதியங் வா கரோஹி”தி;
ந ச வட்டதி தங் வத்து²ங், ஸப்³பே³ஸங் ஸம்படிச்சி²துங்.
652. அனாமஸித்வா ஸங்க⁴ங் வா, க³ணங் வா புக³க³லம்பி வா;
“சேதியஸ்ஸ விஹாரஸ்ஸ, தே³மா”திபி வத³ந்தி சே.
653. தங் ஹிரஞ்ஞங் ஸுவண்ணங் வா, நிலேதே⁴துங் ந வட்டதி;
ஆராமிகானங் வத்தப்³ப³ங், “வத³ந்தேவமிமே”தி ச.
654. ரஜதங் ஜாதருபங் வா, ஸங்க⁴ஸ்ஸ படிக்க³ண்ஹதோ;
ஹோதி நிஸ்ஸக்க³கியாபத்தி, பரிபோ⁴கே³ ச து³க்கடங்.
655. தளாகஸ்ஸ ச கெ²த்தத்தா, ஸஸ்ஸுப்பத்தினிதா³னதோ;
க³ஹணங் பரிபோ⁴கே³ வா, ந ச வட்டதி பி⁴க்கு²னோ.
656. “சத்தாரோ பச்சயே ஸங்கோ⁴, க³ணோ வா பரிபு⁴ஞ்ஜது”;
இச்சேவங் பன வத்வா சே, தே³தி ஸப்³ப³ம்பி வட்டதி.
657. காராபேதி ச கேதா³ரே, சி²ந்தா³பெத்வா வனங் பன;
கேதா³ரேஸு புராணேஸு, அதிரேகம்பி க³ண்ஹதி.
658. அபரிச்சி²ன்னபா⁴க³ஸ்மிங், நவஸஸ்ஸேபி “எத்தகங்;
பா⁴க³ங் தே³தா²”தி வத்வா சே, உட்டா²பேதி கஹாபணே.
659. வத்வா அகப்பியங் வாசங், “கஸத² வபதா²”தி ச;
உப்பாதி³தஞ்ச ஸப்³பே³ஸங், ஹோதி ஸப்³ப³மகப்பியங்.
660. “எத்தகோ நாம பா⁴கோ³தி, எத்திகாய ச பூ⁴மியா”;
பதிட்டா²பேதி யோ பூ⁴மிங், அவத்வா கஸதா²தி³கங்.
661. ஸயமேவ பமாணஸ்ஸ, ஜானந்த²ங் து பூ⁴மியா;
ரஜ்ஜயா வாபி த³ண்டே³ன, கெ²த்தங் மினாதி யோ பன.
662. க²லே வா ரக்க²தி ட²த்வா, க²லதோபி ததோ புன;
நீஹராபேதி வா வீஹீ, தஸ்ஸேவேதமகப்பியங்.

663. “எத்தகேஹி ச வீஹீஹி, இத³ங் ஆஹரதா²”தி ச;
ஆஹரந்தி ஸசே வுத்தா, தஸ்ஸேவேதமகப்பியங்.
664. “எத்தகேன ஹிரஞ்ஞேன, இத³மாஹரதா²”தி ச;
ஆஹரந்தி ச யங் வுத்தா, ஸப்³பே³ஸங் தமகப்பியங்.
665. பேஸகாரகதா³ஸங் வா, அஞ்ஞங் வா ரஜகாதி³ஸு;
ஆராமிகானங் நாமேன, தெ³ந்தே வட்டதி க³ண்ஹிதுங்.
666. “கா³வோ தே³மா”தி வுத்தேபி, க³ஹேதுங் ந ச வட்டதி;
பஞ்சகோ³ரஸபோ⁴க³த்த²ங், வுத்தே தே³மாதி வட்டதி.
667. அஜிகாதீ³ஸு ஏஸேவ, நயோ ஞெய்யோ விபா⁴வினா;
கப்பியேன ச வாக்யேன, ஸப்³ப³ங் வட்டதி க³ண்ஹிதுங்.
668. ஹத்தி²ங் வா மஹிஸங் அஸ்ஸங், கோ³ணங் குக்குடஸூகரங்;
தெ³ந்தேஸு ச மனுஸ்ஸேஸு, ந ச வட்டதி க³ண்ஹிதுங்.
669. படிஸித்³தே⁴பி ஸங்க⁴ஸ்ஸ, த³த்வா க³ச்ச²தி சே பன;
மூலங் த³த்வா ச ஸங்க⁴ஸ்ஸ, கேசி க³ண்ஹந்தி வட்டதி.
670. “கெ²த்தங் வத்து²ங் தளாகங் வா, தே³ம கோ³அஜிகாதி³கங்;
விஹாரஸ்ஸா”தி வுத்தேபி, நிஸேதே⁴துங் ந வட்டதி.
671. திக்க²த்துங் சோத³னா வுத்தா, ச²க்க²த்துங் டா²னமப்³ரவி;
யதி³ சோதே³தியேவ ச², சோத³னா தி³கு³ணா டி²தி.
672. அனாபத்தி அசோதெ³த்வா, லத்³தே⁴ உம்மத்தகாதி³னோ;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

ராஜஸிக்கா²பத³கதா².

சீவரவக்³கோ³ பட²மோ.

673. ஏகேனாபி ச மிஸ்ஸெத்வா, ஸந்த²தங் கோஸியங்ஸுனா;
ஹோதி நிஸ்ஸக்³கி³யாபத்தி, காராபெந்தஸ்ஸ பி⁴க்கு²னோ.
674. பரத்தா²ய கரொந்தஸ்ஸ, காராபெந்தஸ்ஸ ஸந்த²தங்;
அஞ்ஞேன ச கதங் லத்³தா⁴, ஸேவமானஸ்ஸ து³க்கடங்.

675. அனாபத்தி விதானங் வா, பூ⁴மத்த²ரணமேவ வா;
பி⁴ஸி பி³பு³போ³ஹனங் வாபி, கரொந்தஸ்ஸாதி³கம்மினோ.

கோஸியகதா².

676. காளகேளகலோமானங், ஸுத்³தா⁴னங் ஸந்த²தங் ஸசே;
கரெய்யாபத்தி ஹோதிஸ்ஸ, ஸேஸங் து பட²மூபமங்.

ஸுத்³த⁴காளககதா².

677. அனாபத்தி துலங் வாபி, ப³ஹுங் வா ஸப்³ப³மேவ வா;
கரொந்தஸ்ஸ க³ஹெத்வான, ஓதா³தங் கபிலம்பி வா.

678. அனுக்கமேன ஏதானி, ஸந்த²தானி ச தீணிபி;
நிஸ்ஸஜ்ஜித்வாபி லத்³தா⁴னி, ஸேவமானஸ்ஸ து³க்கடங்.

679. ஸமுட்டா²னாத³யோ ஸப்³பே³, ஸஞ்சரித்தஸமா மதா;
இமேஸங் பன திண்ணம்பி, ததியங் து க்ரியாக்ரியங்.

த்³வேபா⁴க³கதா².

680. ச²ன்னங் ஓரேன வஸ்ஸானங், கரொந்தஸ்ஸ ச ஸந்த²தங்;
ஹோதி நிஸ்ஸக்³கி³யாபத்தி, ட²பெத்வா பி⁴க்கு²ஸம்முதிங்.

681. அனாபத்தி பரத்தா²ய, காராபேதி கரோதி வா;
கதங் வா பன அஞ்ஞேன, லபி⁴த்வா பரிபு⁴ஞ்ஜதோ.

682. ச²ப்³ப³ஸ்ஸானி கரொந்தஸ்ஸ, தது³த்³த⁴ம்பி ச ஸந்த²தங்;
விதானே ஸாணிபாகாரே, நிஸ்ஸஜ்ஜித்வா கதேபி ச.

ச²ப்³ப³ஸ்ஸகதா².

683. அனாபத்தி அனாதா³ய, அஸந்தே ஸந்த²தே பன;
அஞ்ஞஸ்ஸத்தா²ய காரேதுங், கதஞ்ச பரிபு⁴ஞ்ஜிதுங்.

684. அனாதா³னவஸேனஸ்ஸ, ஸுக³தஸ்ஸ வித³த்தி²யா;
கரணேன ச ஸத்தா²ரா, வுத்தமேதங் க்ரியாக்ரியங்.

685. ஸமுட்டா²னாத³யோ ஸப்³பே³, ஸஞ்சரித்தஸமா மதா;

அனந்தரஸ்ஸிமஸ்ஸாபி, விஸேஸோ நுபலப்³ப⁴தி.

நிஸீத³னஸந்த²தகதா².

686. க³ச்ச²ந்தே பன யானே வா, ஹத்தி²அஸ்ஸாதி³கேஸு வா;
ட²பேதி யதி³ லோமானி, ஸாமிகஸ்ஸ அஜானதோ.
687. தியோஜனமதீதேஸு, தேஸு ஆபத்தி பி⁴க்கு²னோ;
அக³ச்ச²ந்தேஸு தெஸ்வேவ, ட²பிதேஸுப்யயங் நயோ.
688. யானே பன அக³ச்ச²ந்தே, அஸ்ஸே வா ஹத்தி²பிட்டி²யங்;
ட²பெத்வா அபி⁴ருஹித்வா, ஸசே ஸாரேதி வட்டதி.
689. ந வட்டதீதி நித்³தி³ட்ட²ங், குருந்த³ட்ட²கதா²ய ஹி;
தங் பனஞ்ஞங் ஹராபேதி, வசனேன விருஜ்ஜ²தி.
690. கண்ணச்சித்³தே³ஸு லோமானி, பக்கி²பித்வாபி க³ச்ச²தோ;
ஹோதியேவ கிராபத்தி, லோமானங் க³ணனாவஸா.
691. ஸுத்தகேன ச ப³ந்தி⁴த்வா, ட²பிதங் பன வட்டதி;
வேணிங் கத்வா ஹரந்தஸ்ஸ, ஆபத்தி பரிதீ³பிதா.
692. ஸுங்ககா⁴தங் அனுப்பத்வா, சோராதி³ஹி உபத்³து³தோ;
யோ சஞ்ஞவிஹிதோ வாபி, ஆபத்தி யதி³ க³ச்ச²தி.
693. தியோஜனங் ஹரந்தஸ்ஸ, ஊனகங் வா தியோஜனங்;
ததா² பச்சாஹரந்தஸ்ஸ, தானியேவ தியோஜனங்.
694. நிவாஸத்தா²ய வா க³ந்த்வா, ஹரந்தஸ்ஸ ததோ பரங்;
அச்சி²ன்னங் வாபி நிஸ்ஸட்ட²ங், லபி⁴த்வா ஹரதோபி ச.
695. ஹராபெந்தஸ்ஸ அஞ்ஞேன, ஹரதோ கதப⁴ண்ட³கங்;
ததா² உம்மத்தகாதி³னங், அனாபத்தி பகாஸிதா.
696. இத³ங் பன ஸமுட்டா²னங், காயதோ காயசித்ததோ;
அசித்தங் காயகம்மஞ்ச, திசித்தஞ்ச திவேத³னங்.

ஏளகலோமகதா².

697. ஸமுட்டா²னாதி³னா ஸத்³தி⁴ங், லோமதோ⁴வாபனம்பி ச;
சீவரஸ்ஸ புராணஸ்ஸ, தோ⁴வாபனஸமங் மதங்.

ஏளகலோமதோ⁴வாபனகதா².

698. க³ண்ஹெய்ய வா க³ண்ஹாபெய்ய, ரஜதங் ஜாதருபகங்;
நிஸ்ஸஜ்ஜித்வா பனாபத்தி, தே³ஸேதப்³பா³வ பி⁴க்கு²னா.

699. ரஜதங் ஜாதருபஞ்ச, உபி⁴ன்னங் மாஸகோபி ச;
ஏதங் சதுப்³பி³த⁴ங் வத்து², ஹோதி நிஸ்ஸக்³கியாவஹங்.

700. முத்தா மணி ஸிலா ஸங்கோ², பவாளங் லோஹிதங்ககோ;
மஸாரக³ல்லங் த⁴ஞ்ஞானி, ஸத்த கோ³மஹிஸாதி³கங்.

701. கெ²த்தங் வத்து²ங் தளாகஞ்ச, தா³ஸிதா³ஸாதி³கங் பன;
து³க்கடஸ்ஸேவ வத்து²னி, தீ³பிதானி மஹேஸினா.

702. முக்³மாஸாதி³கங் ஸப்³பங், ஸப்பிஆதீ³னி தண்டு³லா;
ஸுத்தங் வத்த²ங் ஹலங் பா³லங், கப்பியங் ஏவமாதி³கங்.

703. தத்த²த்தனோ பனத்தா²ய, வத்து²ங் நிஸ்ஸக்³கியஸ்ஸ ஹி;
ஸம்படிச்ச²தி யோ பி⁴க்கு², தஸ்ஸ நிஸ்ஸக்³கியங் ஸியா.

704. ஸங்கா⁴தீ³னங் தமத்தா²ய, க³ண்ஹதோ து³க்கடங் ததா²;
து³க்கடஸ்ஸ ச வத்து²ம்பி, ஸப்³பத்தா²ய ச து³க்கடங்.

705. ஸசே கஹாபணாதீ³னங், ஸஹஸ்ஸங் படிக³ண்ஹதி;
வத்து²னங் க³ணனாயஸ்ஸ, ஆபத்திக³ணனா ஸியா.

706. ததா² ஸிதி²லபத்³தே⁴ஸு, த²விகாதீ³ஸு ரூபதோ;
ஆபத்திக³ணனா வுத்தா, மஹாபச்சரியங் பன.

707. “இத³ங் அய்யஸ்ஸ ஹோதூ”தி, வுத்தே வா பன கேனசி;
ஸசே க³ண்ஹிதுகாமோபி, நிஸேதே⁴தப்³பமேவ ச.

708. படிக்கி²த்தேபி தங் வத்து²ங், ட²பெத்வா யதி³ க³ச்ச²தி;
ததா² கோ³பாயிதப்³பங் தங், யதா² தங் ந வினஸ்ஸதி.

709.

“ஆஹரேத³மித³ங் க³ண்ஹ, இத³ங் தே³ஹீத⁴ நிக்கி²ப”;
இச்சேவங் பி⁴க்கு²னோ வத்துங், ந வட்டதி அகப்பியங்.

710. ட²பெத்வா ரூபியக்³கா³ஹங், நிஸ்ஸட்ட²பரிவத்திதங்;
ஸப்³பே³ஹி பரிபொ⁴த்தப்³பங், பா⁴ஜெத்வா ஸப்பிஆதி³கங்.
711. அத்தனோ பத்தபா⁴க³ம்பி, படிக்கா³ஹகபி⁴க்கு²னோ;
க³ஹேதுங் அஞ்ஞதோ லத்³த⁴ங், பு⁴ஞ்ஜிதுங் வா ந வட்டதி.
712. யங் கிஞ்சி பன ஸம்பூ⁴தங், பச்சயங் வத்து²தோ ததோ;
பி⁴க்கு²னோ ஸேவமானஸ்ஸ, ஹோதி ஆபத்தி து³க்கடங்.
713. அஜ்ஜா²ராமே அனாபத்தி, தமஜ்ஜா²வஸதே²பி வா;
க³ஹேத்வா வா க³ஹாபெத்வா, நிக்கி²பந்தஸ்ஸ பி⁴க்கு²னோ.
714. திகபாசித்தியங் வுத்தங், ரூபியந்தி அரூபியே;
ஸஞ்ஞினோ விமதிஸ்ஸாபி, ஹோதி ஆபத்தி து³க்கடங்.
715. ஸமுட்டா²னாத³யோ ஸப்³பே³, ஸஞ்சரித்தஸமா மதா;
க்ரியாக்ரியமித³ங் வுத்தங், அயமேவ விஸேஸதா.

ரூபியபடிக்க³ஹணகதா².

716. வத்து²ங் நிஸ்ஸக்³கியஸ்ஸாபி, வத்து²ங் வா து³க்கடஸ்ஸ ச;
கப்பியஸ்ஸ ச வத்து²ங் வா, யோ நிஸ்ஸக்³கியவத்து²னா.
717. வத்து²னா து³க்கடஸ்ஸாபி, வத்து²ங் நிஸ்ஸக்³கியஸ்ஸ வா;
பரிவத்தேதி ஆபத்தி, கப்பியேன ச வத்து²னா.
718. து³க்கடஸ்ஸ ச வத்து²ங் வா, வத்து²ங் வா கப்பியஸ்ஸ ச;
வத்து²னா து³க்கடஸ்ஸேவ, பரிவத்தேதி து³க்கடங்.
719. வத்து²னா கப்பியஸ்ஸாபி, ததா² து³க்கடவத்து²கங்;
பரிவத்தேதி யோ தஸ்ஸ, ஹோதி ஆபத்தி து³க்கடங்.
720. வத்து²னோ து³க்கடஸ்ஸாபி, ததா² நிஸ்ஸக்³கியஸ்ஸ ச;
க³ஹணங் வாரிதங் புப்³பே³, இமினா பரிவத்தனங்.
721. ரூபியந்தி ச ஸஞ்ஞிஸ்ஸ, விமதிஸ்ஸ அரூபியே;

தேன த்வே துக்கடா ஹொந்தி, சேதாபெந்தஸ்ஸ ரூபியங்.

722. அருபியந்தி ஸஞ்ஞிஸ்ஸ, அனாபத்தி அருபியே;
“இதங் க்ஹெத்வா தேஹீ”தி, வததோபி ச பஞ்சஹி.

723. ஸேஸங் அனந்தரேனேவ, ஸமுட்டாநாதி³கங் ஸமங்;
இதங் க்ரியஸமுட்டாநங், அயமேவ விஸேஸதா.

ரூபியஸங்ஹொஹாரகதா².

724. கப்பியங் கப்பியேனேவ, பரிவத்தயதோ பன;
ஹொதி நிஸ்ஸக்³கியாபத்தி, ட²பெத்வா ஸஹத⁴ம்மிகே.

725. அகப்பியஸ்ஸ வத்து²ஸ்ஸ, தேனேவ பரிவத்தனங்;
ந கச்ச²தீதி நித்தி³ட்ட²ங், கயவிக்கயஸங்க³ஹங்.

726. தஸ்மா மாதாபிதூனம்பி, வத்து²ங் யங் கிஞ்சி கப்பியங்;
“இமங் தேஹிமினா ஹீ”தி, வததோ பன துக்கடங்.

727. ஸகங் வா தேதி சே ப⁴ண்ட³ங், ஏவங் வத்வான மாதுயா;
மாதுயா வா ததா² ப⁴ண்ட³ங், ஸயங் க்ணஹொதி துக்கடங்.

728. ஸஹத்த²ங் பரப⁴ண்ட³ஸ்மிங், பரஹத்த²ஞ்ச அத்தனோ;
ப⁴ண்ட³கே பன ஸம்பத்தே, நிஸ்ஸக்³கியமுதீ³ரிதங்.

729. “க்ஹெத்வா வா இதங் நாம, பு⁴ஞ்ஜித்வா ஓத³னங் இமங்;
இதங் நாம கரோஹீ”தி, வத்துங் பன ந வட்டதி.

730. விகா⁴ஸாத³மத²ஞ்ஞங் வா, “பு⁴ஞ்ஜித்வா ஓத³னங் இமங்;
ச²ல்லிங் வா பன வல்லிங் வா, கட்ட²ங் வா தா³ருமேவ வா.

731. ஆஹரா”தி வத³ந்தஸ்ஸ, வத்து²னங் க்ணனாவஸா;
ஹொந்தி ஆபத்தியோ தஸ்ஸ, பி⁴க்கு²னோ கயவிக்கயே.

732. “இமஞ்ச யாகு³ங் பிவ பு⁴ஞ்ஜ ப⁴த்தங்;
பு⁴த்தோஸி பு⁴ஞ்ஜிஸ்ஸஸி பு⁴ஞ்ஜஸீத³ங்;
ப⁴த்தங், இமங் நாம கரோஹி கம்மங்”;
இச்சேவ வத்துங் பன வட்டதேவ.

733. பூ⁴மியா ஸோத⁴னே வாபி, லிம்பனே வத்த²தோ⁴வனே;
எத்த² கிஞ்சாபி நத்த²ஞ்ஞங், ப⁴ண்ட³ங் நிஸ்ஸஜ்ஜிதப்³பகங்.

734. நிஸ்ஸக்³கியே ச வத்து²ம்ஹி, நட்²டே² பு⁴த்தேபி வா யதா²;
தே³ஸேதப்³பாவ ஆபத்தி, தே³ஸேதப்³பா³ ததா² அயங்.

735. “இமினாவ இமங் நாம, க³ஹேத்வா தே³ஹி மே”இதி;
ஆசிக்க²தி அனாபத்தி, ட²பெத்வா ப⁴ண்ட³ஸாமிகங்.

736. “இத³ங் மமத்தி² அத்தோ² மே, இமினா”தி ச பா⁴ஸதோ;
ஸேஸங் அனந்தரேனேவ, ஸமுட்டா²னாதி³கங் ஸமங்.

கயவிக்கயகதா².

கோஸியவக்³கோ³ து³தியோ.

737. மத்திகாயோமயா பத்தா, கப்பியா ஜாதிதோ து³வே;
தயோ பத்தஸ்ஸ வண்ணா து, உக்கட்டோ² மஜ்ஜி²மோமகோ.

738. த்³வின்னங் தண்டு³லனாளீனங், ப⁴த்தங் மக³த⁴னாளியா;
கா²த³னஞ்ச சதுப்³பா⁴கங், ப்³யஞ்ஜனஞ்ச தது³பியங்.

739. உக்கட்டோ² நாம ஸோ பத்தோ, யோ தங் ஸப்³பங் து க³ண்ணுதி;
மஜ்ஜி²மோ தஸ்ஸுபட்³டோ⁴ ச, தது³பட்³டோ⁴ ச ஓமகோ.

740. உக்கட்ட²ஸ்ஸ ச உக்கட்டோ², தஸ்ஸேவோமகமஜ்ஜி²மா;
ஏவங் மஜ்ஜி²மஓமேஸு, நவ பத்தா ப⁴வந்தி ஹி.

741. உக்கட்டு²க்கட்ட²கோ தேஸு, அபத்தோ ஓமகோமகோ;
தஸ்மா நாபி அதி⁴ட்டா²னங், ந க³ச்ச²ந்தி விகப்பனங்.

742. ஸேஸங் ஸத்தவித⁴ங் பத்தங், பத்தலக்க²ணஸங்யுதங்;
அதி⁴ட்டா²ய விகப்பெத்வா, பரிபு⁴ஞ்ஜெய்ய பண்டி³தோ.

743. த³ஸாஹபரமங் காலங், தா⁴ரெய்ய அதிரேகதோ;
அதிக்கமயதோ பத்தங், தஞ்ஹி நிஸ்ஸக்³கியங் ஸியா.

744. யங் பத்தங் ந விகப்பேதி, யங் நாதி⁴ட்டே²தி வா பன;
வினயஞ்ஞாஹி ஸோ பத்தோ, அதிரேகோதி வண்ணிதோ.

745. வத்தப்³ப³ங் து “இமங் பத்தங், அதி⁴ட்டா²மீ”தி ஸம்முகே²;
“ஏதங் பத்த”ந்தி தூ³ரஸ்மிங், பச்சுத்தா⁴ரெப்யயங் நயோ.
746. ஆபோ⁴க³ங் மனஸா கத்வா, கத்வா காயவிகாரகங்;
காயேனபி ச பத்தஸ்ஸ, அதி⁴ட்டா²னங் பகாஸிதங்.
747. பத்தோ ஜஹதிதி⁴ட்டா²னங், தா³னபே⁴த³கனாஸதோ;
விப்³ப⁴முத்தா⁴ரபச்சக்க²-பரிவத்தனகா³ஹதோ.
748. கங்கு³ஸித்த²ப்பமானேன, கே²னாதி⁴ட்டா²னமுஜ்ஜ²தி;
பித³ஹித்வா அதி⁴ட்டெ²ய்ய, அயோசண்ணேன வாணியா.
749. யோ ஹி நிஸ்ஸக்³கியங் பத்தங், அனிஸ்ஸஜ்ஜேவ பு⁴ஞ்ஜதி;
து³க்கடங் தஸ்ஸ நித³தி³ட்ட²ங், பு⁴த்வா தோ⁴வனதோ⁴வனே.
750. ஸுவண்ணமணிபத்தோ ச, வேஞ்ரியப²லிகுப்³ப⁴வோ;
கங்ஸகாசமயோ பத்தோ, திபுஸ்ஸமயோபி ச.
751. ததா² தா³ருமயோ பத்தோ, தம்ப³ஸஜ்ஜ²மயோபி ச;
ஏகாத³ஸவிதோ⁴ பத்தோ, வுத்தோ து³க்கடவத்து²கோ.
752. க⁴டஸீஸகடாஹோ ச, தும்ப³ங் சஸ்ஸானுலோமிகங்;
தம்ப³லோஹமயங் தத்த², தா²லகங் பன வட்டதி.
753. ப²லிககாசகங்ஸானங், தட்டிகாதீ³னி கானிசி;
புக்³க³லஸ்ஸ ந வட்டந்தி, வட்டந்தி கி³ஹிஸங்கி⁴கா.
754. யங் கிஞ்சி ஸோத³கங் பத்தங், படிஸாமெய்ய து³க்கடங்;
ஸாது⁴கங் வோத³கங் கத்வா, படிஸாமெய்ய பண்டி³தோ.
755. பி⁴க்கு²னோ ஸோத³கங் பத்தங், ஓதாபேதுங் ந வட்டதி;
உண்ணே ந நித³ஹேதப்³போ³, நித³ஹந்தஸ்ஸ து³க்கடங்.
756. மிட்³ட⁴ந்தே பரிப⁴ண்ட³ந்தே, ட²பேதுங் ந ச வட்டதி;
மிட்³டி⁴யா பரிப⁴ண்டே³ வா, வித்தி²ண்ணே பன வட்டதி.
757. தா³ருஆதா⁴ரகே பத்தே, த்³வே ட²பேதும்பி வட்டதி;
அயமேவ நயோ த³ண்ட³-பூ⁴மிஆதா⁴ரகேஸுபி.

758. தட்டிகாயபி சோளே வா, பொத்த²கே கடஸாரகே;
பரிப⁴ண்ட³கதாயாபி, பூ⁴மியங் வாலுகாஸு வா.
759. ததா²ருபாஸு ஸுத்தா⁴ஸு, ட²பேதுங் பன வட்டதி;
ஸரஜாய ட²பெந்தஸ்ஸ, து³க்கடங் க²ரபூ⁴மியா.
760. த³ண்டே³ வா நாக³த³ந்தே வா, லக்³கே³தும்பி ந வட்டதி;
ச²த்தங்க³மஞ்சபீடே²ஸு, ட²பெந்தஸ்ஸ ச து³க்கடங்.
761. அடனீஸு ஹி ப³ந்தி⁴த்வா, ஓலம்பே³தும்பி வட்டதி;
ப³ந்தி⁴த்வா பன மஞ்சஸ்ஸ, ட²பேதுங்பரி வட்டதி.
762. மஞ்சபீட²ட்டகே பத்தங், ட²பேதுங் பன வட்டதி;
ப⁴த்தபூரோபி வா ச²த்தே, ட²பேதுங் ந ச வட்டதி.

தயோ பா⁴ணவாரா நிட்டி²தா.

763. கவாடங் ந பணாமெய்ய, பத்தஹத்தோ² ஸசே பன;
யேன கேனசி அங்கே³ன, பணாமெய்யஸ்ஸ து³க்கடங்.
764. ந நீஹரெய்ய பத்தேன, சலகானட்டி²கானி வா;
உச்சி²ட்ட²முத³கங் வாபி, நீஹரந்தஸ்ஸ து³க்கடங்.
765. பத்தங் படிக்க³ஹங் கத்வா, தோ⁴விதுங் ஹத்த²மேவ வா;
முக²தோ நீஹடங் பத்தே, ட²பேதுங் ந ச வட்டதி.
766. அனாபத்தி த³ஸாஹஸ்ஸ, அந்தோயேவ ச யோ பன;
அதி⁴ட்டே²தி விகப்பேதி, விஸ்ஸஜ்ஜேதி வினஸ்ஸதி.
767. பட²மஸ்ஸ ஹி பத்தஸ்ஸ, பட²மேன மஹேஸினா;
ஸமுட்டா²னாத³யோ ஸப்³பே³, கதி²னேன ஸமா மதா.

பட²மபத்தகதா².

768. பஞ்சப³ந்த⁴னஹஸ்மிங், பத்தே ஸதி ச யோ பன;
விஞ்ஞாபெய்ய நவங் பத்தங், தஸ்ஸ நிஸ்ஸக்³கியங் ஸியா.
769. ப³ந்த⁴னங் ஏகமுத்தி³ட்ட²ங், த³வங்கு³லாய ச ராஜியா;
ப³ந்த⁴னானி ச சத்தாரி, ததா²ட்ட²ங்கு³லராஜியா.

770. பஞ்ச வா ராஜியோ யஸ்ஸ, ஏகா வாபி த³ஸங்கு³லா;
அபத்தோ நாமயங் பத்தோ, விஞ்ஞாபெய்ய ததோ பரங்.
771. அயோபத்தோ அனேகேஹி, லோஹமண்ட³லகேஹி வா;
ப³த்³தோ⁴ வட்டதி மட்டோ² சே, அயோசுண்ணேன வாணியா.
772. பத்தங் ஸங்க⁴ஸ்ஸ நிஸ்ஸட்ட²ங், தஸ்ஸ நிஸ்ஸக்³கியங் பன;
அனுக்ம்பாய தங் தஸ்மிங், அக்³ணஹந்தஸ்ஸ து³க்கடங்.
773. தீ³யமானே து பத்தஸ்மிங், யஸ்ஸ ஸோ ந ச ருச்சதி;
அப்பிச்ச²தாய வா பத்தங், தங் ந க³ணஹாதி வட்டதி.
774. அபத்தஸ்ஸ து பி⁴க்கு²ஸ்ஸ;
ந தா³தப்³போ³தி தீ³பிதோ;
தத்த² யோ பத்தபரியந்தோ;
ஸோ தெ³ய்யோ தஸ்ஸ பி⁴க்கு²னோ.
775. ஸசே ஸோ தங் ஜிகு³ச்ச²ந்தோ, அப்பதே³ஸே ட²பேதி வா;
விஸ்ஸஜ்ஜேதி அபோ⁴கே³ன, பரிபு⁴ஞ்ஜதி து³க்கடங்.
776. நட²டே² பி⁴ன்னேபி வா பத்தே, அனாபத்தி பகாஸிதா;
அத்தனோ ஞாதகாதீ³னங், க³ணஹதோ வா த⁴னேன வா.
777. ஸஞ்சரித்தஸமுட்டா²னங் , க்ரியங் பண்ணத்திவஜ்ஜகங்;
காயகம்மங் வசீகம்மங், திசித்தஞ்ச திவேத³னங்.

து³தியபத்தகதா².

778. ஸப்பிஆதிங் புரேப⁴த்தங், பே⁴ஸஜ்ஜங் படிக³ய்ஹ ஹி;
ஸாமிஸம்பி புரேப⁴த்தங், பரிபு⁴ஞ்ஜதி வட்டதி.
779. ததோ பட்டா²ய ஸத்தாஹங், தங் வட்டதி நிராமிஸங்;
ஸத்தாஹாதிக்கமே தஸ்ஸ, நிஸ்ஸக்³கியமுதீ³ரிதங்.
780. பச்சா²ப⁴த்தம்பி க³ணஹித்வா, கத்வா ஸன்னிதி⁴காரகங்;
ஸாயதோ பன ஸத்தாஹங், வட்டதேவ நிராமிஸங்.
781. புரேப⁴த்தம்பி பச்சா² வா, ஸயமுக்³க³ஹிதங் பன;

ஸரீரபோ⁴கே³ நேதப்³பங், ஸாயிதுங் ந ச வட்டதி.

782. நவனீதங் புரேப⁴த்தங், பி⁴க்கு²னா க³ஹிதங் ஸசே;
தாபெத்வானுபஸம்பன்னோ, தே³தி வட்டதி ஸாமிஸங்.
783. ஸயங் தாபேதி சே பி⁴க்கு², ஸத்தாஹம்பி நிராமிஸங்;
தாபனங் நவனீதஸ்ஸ, ஸாமபாகோ ந ஹோதி ஸோ.
784. பச்சா²ப⁴த்தங் க³ஹெத்வா சே, யேன கேனசி தாபிதங்;
வட்டதேவ ச தங் ஸப்பி, ஸத்தாஹம்பி நிராமிஸங்.
785. கீ²ரங் த³தி⁴ங் சாபி படிக்க³ஹெத்வா;
ஸயங் புரேப⁴த்தமதோ² கரோதி;
ஸப்பிங் புரேப⁴த்தகமேவ தஸ்ஸ;
நிராமிஸங் வட்டதி பி⁴க்கு²னோ தங்.
786. பச்சா²ப⁴த்தகதோ உத்³த⁴ங், தங் ந வட்டதி ஸாயிதுங்;
ஸவத்து²கஸ்ஸ ஸப்பிஸ்ஸ, க³ஹிதத்தாவ பி⁴க்கு²னோ.
787. ஸத்தாஹாதிக்கமேபிஸ்ஸ , ந தோ³ஸோ கோசி விஜ்ஜதி;
“படிக்க³ஹெத்வா தானீ”தி, வுத்தத்தா ஹி மஹேஸினா.
788. யதா² கப்பியஸப்பிம்ஹி, நிஸ்ஸக்³கியமுதீ³ரிதங்;
ததா²கப்பியஸப்பிம்ஹி, து³க்கடங் பரிதீ³பிதங்.
789. ஸப்³பா³கப்பியமங்ஸானங் , வஜ்ஜெத்வா மங்ஸமேவ ச;
கீ²ரங் த³தி⁴ ச ஸப்பி ச, நவனீதஞ்ச வட்டதி.
790. “யேஸங் கப்பதி மங்ஸஞ்ஹி, தேஸங் ஸப்பீ”தி கிங் இத³ங்?
பணீதபோ⁴ஜனஸ்ஸாபி, ததா² ஸத்தாஹகாலிகே.
791. நிஸ்ஸக்³கியஸ்ஸ வத்து²னங், பரிச்சே²த³னியாமனங்;
ந சாகப்பியமங்ஸானங், ஸப்பிஆதி³ நிவாரிதங்.
792. நவனீதேபி ஸப்பிம்ஹி, க³ஹிதுக்க³ஹிதாதி³கே;
ஸப்³போ³ வுத்தனயேனேவ, வேதி³தப்³போ³ வினிச்ச²யோ.
793. தேலபி⁴க்கா²ய பி⁴க்க²னங், பவிட்டா²னங் உபாஸகா;

தேலங் வா நவனீதங் வா, ஸப்பிங் வா ஆகிரந்தி ஹி.

794. ப⁴த்தஸித்தா²னி வா தத்த², தண்டு³லா வா ப⁴வந்தி சே;
ஆதி³ச்சபக்கஸங்ஸட்ட²ங், ஹோதி ஸத்தாஹகாலிகங்.

795. திலஸாஸபதேலங் வா, மது⁴கேரண்ட³தேலகங்;
க³ஹிதங் து புரேப⁴த்தங், ஸாமிஸம்பி நிராமிஸங்.

796. பச்சா²ப⁴த்தகதோ உத்³த⁴ங், ஸாயிதப்³ப³ங் நிராமிஸங்;
ஸத்தாஹாதிக்கமே தேஸங், வஸா நிஸ்ஸக்³கியங் ஸியா.

797. ஏரண்ட³மது⁴கட்ட²னி, ஸாஸபாதீ³னி சத்தனா;
க³ஹெத்வா கததேலம்பி, ஹோதி ஸத்தாஹகாலிகங்.

798. யாவஜீவிகவத்து²த்தா, தேஸங் திண்ணம்பி பி⁴க்கு²னோ;
ஸவத்து²க³ஹனே தஸ்ஸ, காசாபத்தி ந விஜ்ஜதி.

799. அத்தனா யங் கதங் தேலங், தங் வட்டதி நிராமிஸங்;
ஸத்தாஹாதிக்கமேனஸ்ஸ, ஹோதி நிஸ்ஸக்³கியங் பன.

800. து³க்கடங் ஸாஸபாதீ³னங், தேலத்தா²யேவ பி⁴க்கு²னா;
க³ஹெத்வா ட²பிதானங் து, ஸத்தாஹாதிக்கமே ஸியா.

801. நாளிகேரகரஞ்ஜானங், தேலங் குருவகஸ்ஸ ச;
நிம்ப³கோஸம்ப³கானஞ்ச, தேலங் ப⁴ல்லாதகஸ்ஸ ச.

802. இச்சேவமாதீ³கங் ஸப்³ப³ங், அவுத்தங் பாளியங் பன;
க³ஹெத்வா நிக்கி²பந்தஸ்ஸ, து³க்கடங் ஸமயச்சயே.

803. யாவகாலிகபே⁴த³ஞ்ச , யாவஜீவகமேவ ச;
விதி³த்வா ஸேஸமெத்தா²பி, ஸப்பினா ஸதி³ஸோ நயோ.

804. அச்ச²மச்ச²வராஹானங், ஸுஸுகாக³த்³ரப⁴ஸ்ஸ ச;
வஸானங் பன பஞ்சன்னங், தேலங் பஞ்சவித⁴ங் ப⁴வே.

805. ஸப்³ப³மேவ வஸாதேலங், கப்பியாகப்பியஸ்ஸ ச;
மனுஸ்ஸானங் வஸாதேலங், ட²பெத்வா பன வட்டதி.

806.

வஸங் படிக்க³ஹெத்வான, புரேப⁴த்தங் பனத்தனா;
பக்கங் வட்டதி ஸங்ஸட்ட²ங், ஸத்தாஹம்பி நிராமிஸங்.

807. ஸசே அனுபஸம்பன்னோ, கத்வா தங் தே³தி வட்டதி;
ஸாமிஸம்பி புரேப⁴த்தங், ததோ உத்³த⁴ங் நிராமிஸங்.

808. படிக்க³ஹேதுங் காதுங் வா, பச்சா²ப⁴த்தங் ந வட்டதி;
ஸேஸோ வுத்தனயேனேவ, வேதி³தப்³போ³ விபா⁴வினா.

809. க³ஹிதஞ்ஹி புரேப⁴த்தங், மது⁴ங் மது⁴கரீகதங்;
வட்டதேவ புரேப⁴த்தங், ஸாமிஸம்பி நிராமிஸங்.

810. பச்சா²ப⁴த்தகதோ உத்³த⁴ங், ஸத்தாஹம்பி நிராமிஸங்;
ஸத்தாஹாதிக்கமே தோ³ஸோ, வத்தூ²னங் க³ணனாவஸா.

811. உச்ச²ம்ஹா பன நிப்³ப³த்தங், பக்காபக்கங் க⁴னாக⁴னங்;
ரஸாதி³ பன தங் ஸப்³ப³ங், “பா²ணித”ந்தி பவுச்சதி.

812. பா²ணிதங் து புரேப⁴த்தங், க³ஹிதங் பன வட்டதி;
ஸாமிஸம்பி புரேப⁴த்தங், ததோ உத்³த⁴ங் நிராமிஸங்.

813. அஸங்ஸட்டே²ன உச்ச²ஸ்ஸ, ரஸேன கதபா²ணிதங்;
க³ஹிதேன புரேப⁴த்தங், தத³ஹேவ நிராமிஸங்.

814. உச்ச²ங் படிக்க³ஹெத்வான, கதேபேஸ நயோ மதோ;
பச்சா²ப⁴த்தகதோ உத்³த⁴ங், தங் ந வட்டதி ஸாயிதுங்.

815. க³ஹிதத்தா ஸவத்து²ஸ்ஸ, ஸத்தாஹாதிக்கமேபி ச;
ஹோதி தஸ்ஸ அனாபத்தி, பச்சா²ப⁴த்தங் கதேபி ச.

816. ஸங்ஸட்ட²ஞ்ச புரேப⁴த்தங், க³ஹிதங் தமுபாஸகோ;
தத³ஹே தே³தி சே கத்வா, ஸாமிஸம்பி ச வட்டதி.

817. ஸங்ஸட்டே²ன புரேப⁴த்தங், க³ஹிதேன ஸயங்கதங்;
பச்சா²ப⁴த்தங் கதஞ்சாபி, ஸத்தாஹம்பி நிராமிஸங்.

818. கதங் மது⁴கபப்பா²னங், பா²ணிதங் ஸீதவாரினா;
ஸாமிஸம்பி புரேப⁴த்தங், ததோ உத்³த⁴ங் நிராமிஸங்.

819. ஸத்தாஹாதிக்கமேபிஸ்ஸ, து³க்கடங் பரிதீ³பிதங்;
பக்கி²பித்வா கதங் கீ²ரங், ஹோதி தங் யாவகாலிகங்.
820. ப²லானங் பன ஸப்³பே³ஸங், யாவகாலிகஸஞ்ஞினங்;
யாவகாலிகமிச்சேவ, பா²ணிதங் பரிதீ³பிதங்.
821. பச்சா²ப⁴த்தம்பி பி⁴க்கு²ஸ்ஸ, பச்சயே ஸதி கேவலங்;
காலிகா பன வட்டந்தி, புரேப⁴த்தங் யதா²ஸுக²ங்.
822. லபி⁴த்வா பன நிஸ்ஸட்ட²ங், தங் து ஸத்தாஹகாலிகங்;
அருஆதீ³னி மக்கே²துங், ஸாயிதுங் வா ந வட்டதி.
823. அஞ்ஞஸ்ஸ பன பி⁴க்கு²ஸ்ஸ, காயபோ⁴கே³ ச வட்டதி;
சஜித்வா நிரபெக்கோ²வ, லபி⁴த்வா புன ஸாயிதுங்.
824. அனாபத்தி அதி⁴ட்டே²தி, விஸ்ஸஜ்ஜேதி வினஸ்ஸதி;
அச்சி³ந்தி³த்வா ச விஸ்ஸாஸங், க³ண்ஹதும்மத்தகாதி³னோ.
825. ஸமுட்டா²னாத³யோ ஸப்³பே³, கதி²னேன ஸமா மதா;
ஸதா³கதி²னசித்தேன, பட²மேனேவ ஸத்து²னா.
- பே⁴ஸஜ்ஜஸிக்கா²பத³கதா².
826. மாஸோ ஸேஸோதி கி³ம்ஹானங், பரியேஸெய்ய ஸாடிகங்;
அத்³த⁴மாஸோவ ஸேஸோதி, கத்வா பரித³ஹே பு³தோ⁴.
827. கத்வா பன ஸதுப்பாத³ங், வஸ்ஸஸாடிகசீவரங்;
நிப்பா²தெ³ந்தஸ்ஸ பி⁴க்கு²ஸ்ஸ, ஸமயே பிட்டி²ஸம்மதே.
828. ஹோதி நிஸ்ஸக்³கி³யாபத்தி, ஞாதகாஞ்ஞாதகாதி³னோ;
தேஸுயேவ ச விஞ்ஞத்திங், கத்வா நிப்பா²த³னே ததா².
829. கத்வா பன ஸதுப்பாத³ங், ஸமயே குச்சி²ஸஞ்ஞிதே;
நிப்பா²தெ³ந்தஸ்ஸ பி⁴க்கு²ஸ்ஸ, வத்த²மஞ்ஞாதகாதி³னோ.
830. தஸ்ஸாதி³ன்னகபுப்³பே³ஸு , வத்தபே⁴தே³ன து³க்கடங்;
கரோதோ தத்ர விஞ்ஞத்திங், நிஸ்ஸக்³கி³யமுதீ³ரிதங்.
- 831.

ஓவஸ்ஸாபேதி சே காயங், நக்³கோ³ ஸதிபி சீவரே;
ந்ஹானஸ்ஸ பரியோஸானே, து³க்கடங் விவடங்க³ணே.

832. ஊனகே பன மாஸஸ்மிங், அதிரேகோதி ஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

833. அச்சி²ன்னசீவரஸ்ஸாபி, அனாபத்தாபதா³ஸுபி;
ந்ஹானகொட்ட²கவாபீஸு, ந்ஹாயந்தஸ்ஸ ச பி⁴க்கு²னோ.

834. ஸஞ்சரித்தஸமுட்டா²னங் , க்ரியங் பண்ணத்திவஜ்ஜகங்;
காயகம்மங் வசீகம்மங், திசித்தஞ்ச திவேத³னங்.

வஸ்ஸிகஸாடிககதா².

835. ஸாமங் து சீவரங் த³த்வா, அச்சி²ந்த³ந்தஸ்ஸ தங் புன;
ஸகஸஞ்ஞாய பி⁴க்கு²ஸ்ஸ, தஸ்ஸ நிஸ்ஸக்³கியங் ஸியா.

836. ஏகாயேவ பனாபத்தி, ஏகமச்சி²ந்த³தோ ஸியா;
ப³ஹுனி ஏகப³த்³தா⁴னி, அச்சி²ந்த³ந்தஸ்ஸ வா ததா².

837. விஸுங் டி²தானி ஏகேக-மாஹராபயதோ பன;
வத்தா²னங் க³ணனாயஸ்ஸ, ஆபத்திக³ணனா ஸியா.

838. “மயா தி³ன்னானி ஸப்³பா³னி, ஆஹரா”தி ச பா⁴ஸதோ;
ஏகேன வசனேனேவ, ஹொந்தி ஆபத்தியோ ப³ஹு.

839. ஆணாபேதி ஸசே அஞ்ஞங், பி⁴க்கு²ங் க³ண்ஹாதி சீவரங்;
ப³ஹுனி க³ண்ஹதாணத்தோ, ஏகங் பாசித்தியங் ஸியா.

840. “மயா தி³ன்னானி ஸப்³பா³னி, க³ண்ஹா”தி வத³தோ பன;
ஏகாயஸ்ஸ ச வாசாய, ஹொந்தி ஆபத்தியோ ப³ஹு.

841. “ஸங்கா⁴டிமுத்தராஸங்க³ங், க³ண்ஹ க³ண்ஹா”தி பா⁴ஸதோ;
ஹோதி வாசாய வாசாய, ஆணாபெந்தஸ்ஸ து³க்கடங்.

842. விகப்பனுபக³ங் கிஞ்சி, ட²பெத்வா பச்சி²மங் பரங்;
அஞ்ஞங் பன பரிக்கா²ரங், சி²ந்தா³பெந்தஸ்ஸ து³க்கடங்.

843. ட²பெத்வா உபஸம்பன்னங், அஞ்ஞேஸங் சீவராதி³கங்;

அச்சி²ந்த³தோபி பி⁴க்கு²ஸ்ஸ, ஹோதி ஆபத்தி து³க்கடங்.

844. ஏவங் அனுபஸம்பன்னே, உபஸம்பன்னஸஞ்ஞினோ;
தத்த² வேமதிகஸ்ஸாபி, அச்சி²ந்த³ந்தஸ்ஸ து³க்கடங்.

845. ஸோ வா தே³தி ஸசே துட்டோ², துட்டோ² விஸ்ஸாஸமேவ வா;
க³ண்ணுதோபி அனாபத்தி, ததா² உம்மத்தகாதி³னோ.

846. அதி³ன்னாதா³னதுல்யாவ, ஸமுட்டா²னாத³யோ நயா;
அஞ்ஞத்ர வேத³னாயெத்த², ஹோதி ஸா து³க்க²வேத³னா.

சீவரச்சி²ந்த³னகதா².

847. விஞ்ஞாபெத்வா ஸசே ஸுத்தங், ச²ப்³பி³த⁴ங் ஸாணுலோமிகங்;
சீவரங் தந்தவாயேஹி, வாயாபேதி ந வட்டதி.

848. ஸாமங் விஞ்ஞாபிதங் ஸுத்தங், அகப்பியமுதீ³ரிதங்;
தந்தவாயோபி விஞ்ஞத்தோ, ததா² அஞ்ஞாதகாதி³கோ.

849. விஞ்ஞத்தந்தவாயேன, ஸுத்தேனாகப்பியேன ச;
சீவரங் வாயாபெந்தஸ்ஸ, நிஸ்ஸக்³கியமுதீ³ரிதங்.

850. வித³த்தி²மத்தே தீ³கே⁴ன, ஹத்த²மத்தே திரீயதோ;
வீதே நிஸ்ஸக்³கியங் வுத்தங், ப²லகே ப²லகேபி ச.

851. தேனேவ கப்பியங் ஸுத்தங், வாயாபெந்தஸ்ஸ து³க்கடங்;
ததே²வ தந்தவாயேன, கப்பியேன அகப்பியங்.

852. ஏகந்தரிகதோ வாபி, தீ³க⁴தோ வா திரீயதோ;
கப்பியாகப்பியேஹேவ, வீதே ஸுத்தேஹி து³க்கடங்.

853. கப்பியாகப்பியேஹேவ, தந்தவாயேஹி வே கதே;
கப்பியாகப்பியங் ஸுத்தங், மிஸ்ஸெத்வா தஸ்ஸ து³க்கடங்.

854. ஸசே அகப்பியங் ஸுத்தங், வாரேனேவ வினந்தி தே;
த³ஸ்ஸெத்வாவ பரிச்சே²த³ங், அகப்பியவிதே பன.

855. பாசித்தியங் பமாணஸ்மிங், ததூ³னே து³க்கடங் ஸியா;
இதரேன விதே வத்தே², உப⁴யத்தே²வ து³க்கடங்.

856. த்³வேபி வேமங் க்³ஹெத்வா வா, ஏகதோ வா வினந்தி சே;
ப²லகே ப²லகே தஸ்ஸ, து³க்கடங் பரிதீ³பிதங்.
857. ஏதேனேவ உபாயேன, பே⁴தே³ ஸப்³ப்த்த² ஸாது⁴கங்;
ஆபத்திபே⁴தோ³ விஞ்ஞெய்யோ, விஞ்ஞுனா வினயஞ்ஞுனா.
858. கப்பியோ தந்தவாயோபி, ஸசே ஸுத்தம்பி கப்பியங்;
சீவரங் வாயாபெந்தஸ்ஸ, அனாபத்தி பகாஸிதா.
859. அனாபத்தி பரிஸ்ஸாவே, ஆயோகே³ அங்ஸப³த்³த⁴கே;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

ஸுத்தவிஞ்ஞுத்திகதா².

860. அப்பவாரிதஞாதீனங், தந்தவாயே ஸமேச்ச சே;
விகப்பங் சீவரே பி⁴க்கு², ஆபஜ்ஜதி ந வட்டதி.
861. தீ³கா⁴யதப்பிதத்தா²ய, ஸுத்தவட்³ட⁴னகே கதே;
பி⁴க்கு² நிஸ்ஸக்³கியாபத்திங், ஆபஜ்ஜதி ந ஸங்ஸயோ.
862. பி⁴க்கு²னோ ஞாதகாதீனங், தந்தவாயேஸு அத்தனோ;
த⁴னேனஞ்ஞுஸ்ஸ சத்தா²ய, அனாபத்திங் வினித்³தி³ஸே.
863. வாயாபெந்தஸ்ஸ அப்பக்³க⁴ங், மஹக்³க⁴ங் கத்துகாமினோ;
ததா² உம்மத்தகாதீனங், ஸேஸங் வுத்தமனந்தரே.

பேஸகாரகதா².

864. வஸ்ஸங்வுட்டே² யமுத்³தி³ஸ்ஸ, பி⁴க்க² தீ³யதி சீவரங்;
பவாரணாய புப்³பே³வ, தங் ஹோதச்சேகசீவரங்.
865. புரே பவாரணாயேவ, பா⁴ஜெத்வா யதி³ க³ய்ஹதி;
வஸ்ஸச்சே²தோ³ ந காதப்³போ³, ஸங்கி⁴கங் தங் கரோதி சே.
866. அனாபத்தி அதி⁴ட்டே²தி, அந்தோஸமயமேவ தங்;
விஸ்ஸஜ்ஜேதி விகப்பேதி, வினஸ்ஸதி ச ட³ய்ஹதி.
867. தஸ்ஸச்சாயிகவத்த²ஸ்ஸ, கதி²னே து அனத்த²தே;
பரிஹாரேகமாலோவ, த³ஸாஹபரமோ மதோ.

868. அத்த²தே கதி²னே தஸ்ஸ, பஞ்ச மாஸா பகாஸிதா;
பரிஹாரோ முனிந்தே³ன, த³ஸாஹபரமா பன.

869. ஸமுட்டா²னாத³யோ ஸப்³பே³, கதி²னேன ஸமா மதா;
பட²மேனாக்ரியாசித்தங், திசித்தஞ்ச திவேத³னங்.

அச்சேகசீவரகதா².

870. வஸித்வா பன சே பி⁴க்கு², புப்³ப³கத்திகபுண்ணமங்;
ட²பெத்வா சீவரங் கா³மே, பச்சயே ஸதி தாதி³ஸே.

871. சா²ரத்தபரமங் தேன, வஸிதப்³ப³ங் வினா ததோ;
உத்தரிங் வஸதோ தோ³ஸோ, வினா ஸங்க⁴ஸ்ஸ ஸம்முதிங்.

872. கத்திகேயேவ மாஸஸ்மிங், பட²மாய பவாரிதோ;
பச்சி²மேன பமாணேன, யுத்தே ஸாஸங்கஸம்மதே.

873. ஸேனாஸனே வஸந்தோவ, ட²பேதுங் ஏகசீவரங்;
சதுரங்க³ஸமாயோகே³, லப⁴தீதி பகாஸிதோ.

874. யங் கா³மங் கோ³சரங் கத்வா, பி⁴க்கு² ஆரஞ்ஞகே வஸே;
தஸ்மிங் கா³மே ட²பேதுங் தங், மாஸமேகங் து வட்டதி.

875. அஞ்ஞத்தே²வ வஸந்தஸ்ஸ, சா²ரத்தபரமங் மதங்;
அயமஸ்ஸ அதி⁴ப்பாயோ, படிச்ச²ன்னோ பகாஸிதோ.

876. ஸேனாஸனமதா²க³ந்த்வா, ஸத்தமங் அருணங் பன;
உட்டா²பேதுங் விதூ³ரத்தா, அஸக்கொந்தஸ்ஸ பி⁴க்கு²னோ.

877. கா³மஸீமம்பி வா க³ந்த்வா, வஸித்வா யத்த² கத்த²சி;
சீவரஸ்ஸ பவத்திங் ஸோ, ஞத்வா க³ச்ச²தி வட்டதி.

878. ஏவஞ்சாபி அஸக்கொந்தோ, ஞத்வா தத்தே²வ பண்டி³தோ;
கி²ப்பங் பச்சத்³த⁴ரே டா²னே, அதிரேகே ஹி திட்ட²தி.

879. விஸ்ஸஜ்ஜேதி அனாபத்தி, வினஸ்ஸதி ச ட³ய்ஹதி;
அச்சி²ந்த³னே ச விஸ்ஸாஸே, பி⁴க்கு²ஸம்முதியாபி வா.

880.

ஸமுட்டா²னாத³யோ ஸப்³பே³, கதி²னேன ஸமா மதா;
து³தியேன, முனிந்தே³ன, தேன ஸாஸங்கஸம்மதே.

ஸாஸங்ககதா².

881. ஜானங் பரிணதங் லாப⁴ங், பி⁴க்கு²ஸங்க⁴ஸ்ஸ யோ பன;
அத்தனோ பரிணாமெய்ய, தஸ்ஸ நிஸ்ஸக்³கியங் ஸியா.
882. ஸசே “அஞ்ஞஸ்ஸ தே³ஹி”தி, பரிணாமேதி பி⁴க்கு²னோ;
ஸுத்³தி⁴கங் ஸுத்³த⁴சித்தேன, பாசித்தியமுதீ³ரிதங்.
883. சீவரங் வா பரஸ்ஸேக-மேகங் வா பன அத்தனோ;
பரிணாமெய்ய சே ஸத்³தி⁴ங், த்³வே பாசித்தியோ ஸியுங்.
884. ஸங்க⁴ஸ்ஸ பன யங் தி³ன்னங், தங் க³ஹேதுங் ந வட்டதி;
ஸங்க⁴ஸ்ஸேவ பதா³தப்³போ³, அதெ³ந்தஸ்ஸ பராஜயோ.
885. சேதியஸ்ஸ ச ஸங்க⁴ஸ்ஸ, புக்³க³லஸ்ஸபி வா பன;
அஞ்ஞஸ்ஸ போணமஞ்ஞஸ்ஸ, பரிணாமெய்ய து³க்கடங்.
886. யோ பனந்தமஸோ பி⁴க்கு², ஸுனக²ஸ்ஸபி ஓணதங்;
ஸுனக²ஸ்ஸ பனஞ்ஞஸ்ஸ, பரிணாமெய்ய து³க்கடங்.
887. இத³ஞ்ஹி திஸமுட்டா²னங், க்ரியங் ஸஞ்ஞாவிமொக்க²கங்;
காயகம்மங் வசீகம்மங், திசித்தஞ்ச திவேத³னங்.

பரிணதகதா².

பத்தவக்³கோ³ ததியோ.

888. தேனேகவத்து²க்³க³தரங்க³மாலங்;
ஸீலந்தமாபத்திவிபத்திகா³ஹங்;
தரந்தி பஞ்ஞத்திமஹாஸமுத்³த³ங்;
வினிச்ச²யங் யே பனிமங் தரந்தி.

இதி வினயவினிச்ச²யே நிஸ்ஸக்³கியகதா² நிட்டி²தா.

பாசித்தியகதா²

889. ஸம்பஜானமுஸாவாதே³ , பாசித்தியமுதீ³ரிதங்;

த³வா ரவா ப⁴ணந்தஸ்ஸ, ந தோ³ஸும்மத்தகாதி³னோ.

890. அஞ்ஞத்தா²பத்தியோ பஞ்ச, முஸாவாத³ஸ்ஸ காரணா;
ஸமுட்டா²னாத³யோ ஸப்³பே³, அதி³ன்னாதா³னதுல்யகா.

ஸம்பஜானமுஸாவாத³கதா².

891. ஜாதிஆதீ³ஸு வுத்தேஸு, த³ஸஸ்வக்கோஸவத்து²ஸு;
பூ⁴தேன வா அபூ⁴தேன, யேன கேனசி வத்து²னா.
892. யாய காயசி பா⁴ஸாய, ஹத்த²முத்தா³ய வா பன;
பாராஜிகமனாபன்னங், பி⁴க்கு²மாபன்னமேவ வா.
893. அஞ்ஞத்ரஞ்ஞாபதே³ஸேன, ஓமஸந்தஸ்ஸ பி⁴க்கு²னோ;
தத்த² பாசித்தியாபத்தி, ஸம்புத்த³தே⁴ன பகாஸிதா.
894. தேஹேவஞ்ஞாபதே³ஸேன , பாளிமுத்தபதே³ஹிபி;
ஸப்³புத்தா²னுபஸம்பன்னங், அக்கோஸந்தஸ்ஸ து³க்கடங்.
895. அனக்கோஸிதுகாமஸ்ஸ, கேவலங் த³வகம்யதா;
வத³தோ பன ஸப்³புத்த², து³ப்பா⁴ஸிதமுதீ³ரிதங்.
896. பவிட்டா²னுபஸம்பன்ன-ட்டா²னே இத⁴ ச பி⁴க்கு²னீ;
அனாபத்தி புரக்க²த்வா, அத்த²த⁴ம்மானுஸாஸனிங்.
897. வத³தோ பன பி⁴க்கு²ஸ்ஸ, ஸமுட்டா²னாத³யோ நயா;
அனந்தரஸமா வுத்தா, து³க்கா² ஹோதெத்த² வேத³னா.

ஓமஸவாத³கதா².

898. ஆபத்தி பி⁴க்கு²பேஸுஞ்ஞே, து³விதா⁴காரதோ ஸியா;
அத்தனோ பியகாமஸ்ஸ, பரபே⁴த³த்தி²னோபி வா.
899. அக்கோஸந்தஸ்ஸ பரியாய-பாளிமுத்தனயேஹி ச;
வசனஸ்ஸுபஸங்ஹாரே, ஹோதி ஆபத்தி து³க்கடங்.
900. ததா² அனுபஸம்பன்ன-அக்கோஸங் ஹரதோபி ச;
டி²தா அனுபஸம்பன்ன-ட்டா²னே இத⁴ ச பி⁴க்கு²னீ.

901. ந சேவ பியகாமஸ்ஸ, ந ச பே⁴த³த்தி²னோபி வா;
பாபானங் க³ரஹத்தா²ய, வத³ந்தஸ்ஸ ச பி⁴க்கு²னோ.

902. ததா² உம்மத்தகாதீ³னங், அனாபத்தீதி தீ³பிதா;
ஸமுட்டா²னாத³யோ ஸப்³பே³, அதி³ன்னாதா³னஸாதி³ஸா.

பேஸுஞ்ஞகதா².

903. ட²பெத்வா பி⁴க்கு²னிங் பி⁴க்கு²ங், அஞ்ஞேன பிடகத்தயங்;
த⁴ம்மங் ஸஹ ப⁴ணந்தஸ்ஸ, தஸ்ஸ பாசித்தியங் ஸியா.

904. ராஜோவாதா³த³யோ வுத்தா, மஹாபச்சரியாதி³ஸு;
அனாருள்ஹேஸு ஸங்கீ³திங், ஆபத்திஜனகாதி ஹி.

905. து³க்கடங் ஹோதி பி⁴க்கு²ஸ்மிங், ததா² பி⁴க்கு²னியாபி ச;
பி⁴க்கு²ஸ்ஸானுபஸம்பன்ன-ஸஞ்ஞினோ விமதிஸ்ஸ வா.

906. ஏகதோ உத்³தி³ஸாபேதி, ஸஜ்ஜா²யங் வா கரோதி யோ;
ப⁴ணந்தங் பகு³ணங் க³ந்த²ங், ஒபாதேதி ச யோ பன.

907. தஸ்ஸ சானுபஸம்பன்ன-ஸந்திகே க³ண்ஹதோபி ச;
உத்³தே³ஸங் து அனாபத்தி, ப⁴ணனே தேன ஏகதோ.

908. வாசதோ ச ஸமுட்டா²தி, வாசாசித்தத்³வயாபி ச;
ஸமுட்டா²னமித³ங் வுத்தங், பத³ஸோத⁴ம்மஸஞ்ஞிதங்.

பத³ஸோத⁴ம்மகதா².

909. ஸப்³ப³ச்ச²ன்னபரிச்ச²ன்னே, நிபஜ்ஜெய்ய ஸசே பன;
யேபு⁴ய்யேன பரிச்ச²ன்னே, ச²ன்னே ஸேனாஸனேபி வா.

910. திஸ்ஸன்னங் பன ரத்தீனங், உத்³த⁴ங் யோ பன ரத்தியங்;
ட²பெத்வா பி⁴க்கு²ங் அஞ்ஞேன, தஸ்ஸ பாசித்தியங் ஸியா.

911. வத்து²ங் யங் பன நித்³தி³ட்ட²ங், மேது²னஸ்ஸ பஹோனகங்;
ஆபத்யந்தமஸோ தேன, திரச்சா²னக³தேனபி.

912. நிபன்னே உபஸம்பன்னே, இதரோ சே நிபஜ்ஜதி;
இதரஸ்மிங் நிபன்னே வா, ஸசே பி⁴க்கு² நிபஜ்ஜதி.

913. உபி⁴ன்னங் உட்ட²ஹித்வா வா, நிபஜ்ஜனபயோக³தோ;
ஆபத்தானுபஸம்பன்ன-க³ணனாயபி வா ஸியா.

914. ஸசே பிதா⁴ய வா க³ப்ப⁴ங், நிபஜ்ஜதிபிதா⁴ய வா;
ஆபத்தத்த²ங்க³தே ஸூரியே, சதுத்த²தி³வஸே ஸியா.

915. தி³யட்³ட்⁴ஹத்து²ப்பே³தே⁴ன , பாகாரசயனாதி³னா;
பரிக்கி²த்தம்பி தங் ஸப்³பங், பரிக்கி²த்தந்தி வுச்சதி.

916. பி⁴க்கு²ஸ்ஸந்தமஸோ து³ஸ்ஸ-குடியங் வஸதோபி ச;
ஸஹஸெய்யாய ஆபத்தி, ஹோதீதி பரிதீ³பிதோ.

917. ஸப்³பச்ச²ன்னபரிச்ச²ன்ன-யேபு⁴ய்யாதி³ப்பே⁴த³தோ;
ஸத்த பாசித்தியானெத்த², த³ட்ட²ப்பா³னி ஸுபு³த்தி⁴னா.

918. அட்³ட்⁴ச்ச²ன்னபரிச்ச²ன்னே, து³க்கடங் பரிதீ³பிதங்;
ஸப்³பசூளபரிச்ச²ன்ன-ச²ன்னாதீ³ஹிபி பஞ்சதா⁴.

919. அனாபத்தி தி³ரத்தங் வா, திரத்தங் வஸதோ ஸஹ;
அருணஸ்ஸ புரேயேவ, ததியாய ச ரத்தியா.

920. நிக்க²மித்வா வஸந்தஸ்ஸ, புன ஸத்³தி⁴ஞ்ச பி⁴க்கு²னோ;
ததா² ஸப்³பபரிச்ச²ன்ன-ஸப்³பச்ச²ன்னாதி³கேபி ச.

921. ஏவங் அனுபஸம்பன்னே, நிபன்னேபி நிஸீத³தோ;
ஸேஸா ஏளகலோமேன, ஸமுட்டா²னாத³யோ ஸமா.

ஸஹஸெய்யகதா².

922. ஸசே தத³ஹுஜாதாய, அபி யோ மானுஸித்தி²யா;
ஸஹஸெய்யங் பகப்பெய்ய, தஸ்ஸ பாசித்தியங் ஸியா.

923. தி³ஸ்ஸமானகரூபாய, யக்கி²யா பேதியா ஸஹ;
ரத்தியங் யோ நிபஜ்ஜெய்ய, தே³வியா பண்ட³கேன வா.

924. மேது²னவத்து²பூ⁴தாய, திரச்சா²னக³தித்தி²யா;
வத்து²னங் க³ணனாயஸ்ஸ, ஹோதி ஆபத்தி து³க்கடங்.

925.

இதே⁴கதி³வஸேனேவ , ஆபத்தி பரிதீ³பிதா;
ஸேஸோ அனந்தரே வுத்த-ஸதி³ஸோவ வினிச்ச²யோ.

து³தியஸஹஸெய்யகதா².

926. உத்³த⁴ங் ச²ப்பஞ்சவாசாஹி, விஞ்ஞங் புரிஸவிக்³க³ஹங்;
வினா த⁴ம்மங் ப⁴ணந்தஸ்ஸ, ஹோதி பாசித்தி இத்தி²யா.

927. கா³தா²பாதோ³ பனேகோவ, ஏகவாசாதி ஸஞ்ஞிதோ;
பத³ஸோத⁴ம்மங் நித்³தி³ட்ட²ங், த⁴ம்மமட்ட²கத²ம்பி வா.

928. ச²ன்னங் உபரி வாசானங், பதா³தீ³னங் வஸா பன;
தே³ஸெந்தஸ்ஸ ஸியாபத்தி, பதா³தி³க³ணனாய ச.

929. நிம்மினித்வா டி²தேனாபி, ஸத்³தி⁴ங் புரிஸவிக்³க³ஹங்;
யக்கே²னபி ச பேதேன, திரச்சா²னக³தேனபி.

930. டி²தஸ்ஸ மாதுகா³மஸ்ஸ, த⁴ம்மங் யோ பன பா⁴ஸதி;
ச²ன்னங் உபரி வாசானங், தஸ்ஸ பாசித்தியங் ஸியா.

931. புரிஸே இத்தி²ஸஞ்ஞிஸ்ஸ, விமதிஸ்ஸ ச பண்ட³கே;
உத்தரி ச²ஹி வாசாஹி, வத³தோ ஹோதி து³க்கடங்.

932. இத்தி²ருபங் க³ஹெத்வான, டி²தானங் பா⁴ஸதோபி ச;
து³க்கடங் யக்கி²பேதீனங், திரச்சா²னக³தித்தி²யா.

933. புரிஸே ஸதி விஞ்ஞஸ்மிங், ஸயங் உட்டா²ய வா புன;
தே³ஸெந்தஸ்ஸ நிஸீதி³த்வா, மாதுகா³மஸ்ஸ வா ததா².

934. அஞ்ஞிஸ்ஸா புன அஞ்ஞிஸ்ஸா, இத்தி²யா ப⁴ணதோபி ச;
ச²ஹி பஞ்சஹி வாசாஹி, அனாபத்தி பகாஸிதா.

935. பத³ஸோத⁴ம்மதுல்யாவ, ஸமுட்டா²னாத³யோ மதா;
அயமேவ விஸேஸோதி, க்ரியாக்ரியமித³ங் பன.

த⁴ம்மதே³ஸனாகதா².

936. மஹக்³தங் பணீதங் வா, ஆரோசெந்தஸ்ஸ பி⁴க்கு²னோ;
ட²பெத்வா பி⁴க்கு²னிங் பி⁴க்கு²ங், பூ⁴தே பாசித்தியங் ஸியா.

937. நோ சே ஜானாதி ஸோ வுத்தங், ஆரோசெந்தஸ்ஸ பி⁴க்கு²னோ;
பரியாயவசனே சஸ்ஸ, ஹோதி ஆபத்தி து³க்கடங்.

938. அனாபத்தி ததா²ருபே, காரணே ஸதி பா⁴ஸதோ;
ஸப்³பு³ஸ்ஸபி ச ஸீலாதி³ங், வத³தோ ஆதி³கம்மினோ.

939. உம்மத்தகபத³ங் எத்த², ந வுத்தங் தத³ஸம்ப⁴வா;
பூ⁴தாரோசனகங் நாம, ஸமுட்டா²னமித³ங் மதங்.

940. காயதோ வாசதோ காய-வாசதோ ச திதா⁴ ஸியா;
குஸலாப்³யாகதேஹேவ, த்³விசித்தஞ்ச த்³விவேத³னங்.

பூ⁴தாரோசனகதா².

941. ஆபத்திங் பன து³ட்டு²ல்லங், ஆரோசெந்தஸ்ஸ பி⁴க்கு²னோ;
ஆபத்தானுபஸம்பன்னே, ட²பெத்வா பி⁴க்கு²ஸம்முதிங்.

942. ஸங்கா⁴தி³ஸேஸமாபன்னோ, மோசெத்வா அஸுசிங் அயங்;
க⁴டெத்வா வத்து²னாபத்திங், வத³ந்தஸ்ஸேவ வஜ்ஜதா.

943. இத⁴ ஸங்கா⁴தி³ஸேஸாவ, து³ட்டு²ல்லாபத்தியோ மதா;
தஸ்மா ஸுத்³த⁴ஸ்ஸ து³ட்டு²ல்லங், வத³ங் பாசித்தியங் பு²ஸே.

944. அது³ட்டு²ல்லாய து³ட்டு²ல்ல-ஸஞ்ஞினோ விமதிஸ்ஸ வா;
ஆபத்தியோபி வா ஸேஸா, ஆரோசெந்தஸ்ஸ து³க்கடங்.

945. ததா² அனுபஸம்பன்னே, து³ட்டு²ல்லங் பஞ்சதா⁴ மதங்;
அஜ்ஜா²சாரமது³ட்டு²ல்லங், ஆரோசேதுங் ந வட்டதி.

946. வத்து²ங் வா பன ஆபத்திங், ஆரோசெந்தஸ்ஸ கேவலங்;
அனாபத்தீதி ஞாதப்³பங், பி⁴க்கு²ஸம்முதியா ததா².

947. ஏவமும்மத்தகாதீ³னங், ஸமுட்டா²னாத³யோ நயா;
அதி³ன்னாதா³னதுல்யாவ, வேத³னா து³க்க²வேத³னா.

து³ட்டு²ல்லாரோசனகதா².

948. க²ணெய்ய வா க²ணாபெய்ய, பத²விங் யோ அகப்பியங்;
பே⁴தா³பெய்ய ச பி⁴ந்தெ³ய்ய, தஸ்ஸ பாசித்தியங் ஸியா.

949. ஸயமேவ க²ணந்தஸ்ஸ, பத²விங் பன பி⁴க்கு²னோ;
பஹாரஸ்மிங் பஹாரஸ்மிங், பாசித்தியமுதீ³ரிதங்.
950. ஆணாபெந்தஸ்ஸ ஏகாவ, தி³வஸங் க²ணதோபி ச;
புனப்புணாணாபெந்தஸ்ஸ, வாசதோ வாசதோ ஸியா.
951. “க²ண பொக்க²ரணிங் வாபிங், ஆவாடங் க²ண கூபகங்”;
இச்சேவங் து வத³ந்தஸ்ஸ, கோசி தோ³ஸோ ந விஜ்ஜதி.
952. “இமங் க²ண ச ஓகாஸங், இத⁴ பொக்க²ரணிங் க²ண;
இமஸ்மிங் க²ண ஓகாஸே”, வத்துமேவங் ந வட்டதி.
953. “கந்த³ங் க²ண குருந்த³ங் வா, தூ²ணங் க²ண ச கா²ணுகங்;
மூலங் க²ண ச தாலங் வா”, ஏவங் வத³தி வட்டதி.
954. “இமங் மூலங் இமங் வல்லிங், இமங் தாலங் இமங் நளங்;
க²ணா”தி நியமெத்வான, வத்துங் பன ந வட்டதி.
955. உஸ்ஸிஞ்சிதுங் ஸசே ஸக்கா, க⁴டேஹி தணுகத்³த³மோ;
பி⁴க்கு²னா அபனேதப்³போ³, ப³ஹலங் ந ச வட்டதி.
956. பி⁴ஜ்ஜித்வா நதி³யாதீ³னங், பதிதங் தோயஸந்திகே;
தடங் வட்ட²ங் விகோபேதுங், சாதுமாஸம்பி வட்டதி.
957. ஸசே பததி தோயஸ்மிங், தே³வே வுட்டே²பி வட்டதி;
சாதுமாஸமதிக்கந்தே, தோயே தே³வோ ஹி வஸ்ஸதி.
958. பாஸாணபிட்டி²யங் ஸொண்டி³ங், க²ணந்தி யதி³ தத்த² து;
ரஜங் பததி சே புப்³ப³ங், பச்சா² தே³வோபி⁴வஸ்ஸதி.
959. ஸோதே⁴துங் பி⁴ந்தி³துங் அந்தோ-சாதுமாஸங் து வட்டதி;
சாதுமாஸகதோ உத்³த⁴ங், விகோபேதுங் ந வட்டதி.
960. வாரினா பட²மங் புண்ணே, பச்சா² பததி சே ரஜங்;
தங் வட்டதி விகோபேதுங், தோயே தே³வோ ஹி வஸ்ஸதி.
961. அல்லீயதி பு²ஸாயந்தே, பிட்டி²பாஸாணகே ரஜங்;
சாதுமாஸச்சயே தம்பி, விகோபேதுங் ந வட்டதி.

962. ஸசே அகதபப்³பா⁴ரே, வம்மிகோ பன உட்டி²தோ;
யதா²ஸுக²ங் விகோபெய்ய, சாதுமாஸச்சயேபி ச.
963. அப்³போ⁴காஸே ஸசே வட்டோ², சாதுமாஸங் து வட்டதி;
ருக்கே² உபசிகாதீ³னங், மத்திகாயபி ஸோ நயோ.
964. மூஸிகுக்கர கோ³கண்ட-க³ண்டு³ப்பாத³மலேஸுபி;
அயமேவ நயோ வுத்தோ, அஸம்ப³த்³தே⁴ஸு பூ⁴மியா.
965. தேஹேவ ஸதி³ஸா ஹொந்தி, கஸினங்க³லமத்திகா;
அச்சி²ன்னா பூ⁴மிஸம்ப³ந்தா⁴, ஸா ஜாதபத்²வீ ஸியா.
966. ஸேனாஸனம்பி அச்ச²ன்னங், வினட்ட²ச²த³னம்பி வா;
சாதுமாஸகதோ உத்³த⁴ங், ஓவட்ட²ங் ந விகோபயே.
967. ததோ “கோ³பானஸிங் பி⁴த்திங், த²ம்ப⁴ங் வா பத்³ரத்த²ரங்;
க³ண்ஹிஸ்ஸாமீ”தி ஸஞ்ஞாய, க³ஹேதுங் பன வட்டதி.
968. க³ண்ஹந்தஸ்ஸிட்ட²காதீ³னி, ஸசே பததி மத்திகா;
அனாபத்தி ஸியாபத்தி, மத்திகங் யதி³ க³ண்ஹதி.
969. அதிந்தோ மத்திகாபுஞ்ஜோ, அந்தோகே³ஹே ஸசே ஸியா;
அனோவட்டோ² ச பி⁴க்கூ²னங், ஸப்³ப³தா³ ஹொதி கப்பியோ.
970. வுட்டே² புன ச கே³ஹஸ்மிங், கே³ஹங் சா²தெ³ந்தி தங் ஸசே;
சாதுமாஸச்சயே ஸப்³போ³, திந்தோ ஹொதி அகப்பியோ.
971. யத்தகங் தத்த² திந்தங் து, தத்தகங் ஹொத்யகப்பியங்;
அதிந்தங் தத்த² யங் யங் து, தங் தங் ஹொதி ஹி கப்பியங்.
972. தேமிதோ வாரினா ஸோ சே, ஏகாப³த்³தோ⁴வ பூ⁴மியா;
பத்²வீ சேவ ஸா ஜாதா, ந வட்டதி ததோ பரங்.
973. அப்³போ⁴காஸே ச பாகாரோ, ஓவட்டோ² மத்திகாமயோ;
சாதுமாஸச்சயே “ஜாதா, பத்²வீ”தி பவுச்சதி.
974. தத்த² லக்³க³ங் ரஜங் ஸண்ஹங், அக⁴ங்ஸந்தோவ மத்தஸோ;
சு²பித்வா அல்லஹத்தே²ன, ஸசே க³ண்ஹொதி வட்டதி.

975. ஸசே இட்ட²கபாகாரோ, யேபு⁴ய்யகத²லே பன;
டா²னே திட்ட²தி ஸோ தஸ்மா, விகோபெய்ய யதா²ஸுக²ங்.
976. அப³போ⁴காஸே டி²தங் த²ம்ப⁴ங், சாலெத்வா பனிதோ சிதோ;
பத²விங் து விகோபெத்வா, க³ஹேதுங் ந ச வட்டதி.
977. அஞ்ஞம்பி ஸுக்க²ருக்க²ங் வா, கா²ணுகங் வாபி க³ண்ஹதோ;
அயமேவ நயோ தோ³ஸோ, உஜுமுத்³த⁴ரதோ ந ச.
978. பாஸாணங் யதி³ வா ருக்க²ங், உச்சாலெத்வா பவட்டதி;
ந தோ³ஸோ ஸுத்³த⁴சித்தஸ்ஸ, ஸசே பத²வி பி⁴ஜ்ஜதி.
979. பா²லெந்தானம்பி தா³ருனி, ஸாகா²தீ³னி ச கட்³ட⁴தோ;
அயமேவ நயோ வுத்தோ, பூ⁴மியங் ஸுத்³த⁴சேதஸோ.
980. கண்டகங் ஸுசிமட்டி²ங் வா, கி²லங் வா பூ⁴மியங் பன;
ஆகோடேதுங் பவேஸேதுங், பி⁴க்கு²னோ ந ச வட்டதி.
981. “அஹங் பஸ்ஸாவதா⁴ராய, பி⁴ந்தி³ஸ்ஸாமீ”தி மேதி³னிங்;
பி⁴க்கு²ஸ்ஸ பன பஸ்ஸாவ-மேவங் காதுங் ந வட்டதி.
982. அனாபத்தி கரொந்தஸ்ஸ, ஸசே பி⁴ஜ்ஜதி மேதி³னீ;
ஸமஜ்ஜதோ ஸமங் காதுங், க⁴ங்ஸிதுங் ந ச வட்டதி.
983. பாத³ங்கு³ட்டே²ன வா பூ⁴மிங், லிகி²தும்பி ந வட்டதி;
பி⁴ந்த³ந்தேன ச பாதே³ஹி, ததா² சங்கமிதும்பி வா.
984. பத²விங் அல்லஹத்தே²ன, சு²பித்வா ஸுகு²மங் ரஜங்;
அக⁴ங்ஸந்தோ க³ஹெத்வா சே, ஹத்த²ங் தோ⁴வதி வட்டதி.
985. ஸயங் த³ஹதி சே பூ⁴மிங், த³ஹாபேதி பரேஹி வா;
ஆபத்தந்தமஸோ பத்தங், த³ஹந்தஸ்ஸாபி பி⁴க்கு²னோ.
986. டா²னேஸு யத்தகெஸ்வக்³கி³ங், தே³தி தா³பேதி வா பன;
தத்தகானேவ பி⁴க்கு²ஸ்ஸ, ஹொந்தி பாசித்தியானிபி.
987. ட²பேதுங் பி⁴க்கு²னோ அக்³கி³ங், பூ⁴மியங் ந ச வட்டதி;
கபாலே பத்தபசனே, ட²பேதுங் பன வட்டதி.

988. அக்³கி³ங் உபரி தா³ருனங், ட²பேதுங் ந ச வட்டதி;
த³ஹந்தோ தானி க³ந்த்வா ஸோ, பூ⁴மிங் த³ஹதி சே பன.
989. ஏஸேவ ச நயோ வுத்தோ, இட்ட²காவாஸகாதி³ஸு;
ட²பேதுங் இட்ட²காதீ³னங், மத்த²கெஸ்வேவ வட்டதி.
990. கஸ்மா பனாதி சே? தேஸ-மனுபாதா³னபா⁴வதோ;
கா²ணுகே ஸுக்க²ருக்கே² வா, அக்³கி³ங் தா³துங் ந வட்டதி.
991. அனாபத்தி திணுக்கங் து, க³ஹெத்வா பன க³ச்ச²தோ;
ட³ய்ஹமானே து ஹத்த²ஸ்மிங், ஸசே பாதேதி பூ⁴மியங்.
992. புன தங் பதிதட்டா²னே, த³த்வா தஸ்ஸ பனிந்த⁴னங்;
அக்³கி³ங் வட்டதி காதுந்தி, மஹாபச்சரியங் ருதங்.
993. தஸ்ஸாபத²வியங்யேவ, பத²வீதி ச ஸஞ்ஞினோ;
விமதிஸ்ஸுப⁴யத்தா²பி, து³க்கடங் பரியாபுதங்.
994. அனாபத்தி “இமங் ஜான, இமமாஹர தே³ஹி”தி;
வத³ந்தஸ்ஸ, ஸசித்தஞ்ச, திஸமுட்டா²னமேவ ச.

பத²வீக²ணனகதா².

முஸாவாத³வக்³கோ³ பட²மோ.

995. ப⁴வந்தஸ்ஸ ச பூ⁴தஸ்ஸ, பூ⁴தகா³மஸ்ஸ பி⁴க்கு²னோ;
பாதப்³யதானிமித்தங் து, பாசித்தியமுதீ³ரிதங்.
996. உத³கட்டோ² த²லட்டோ²தி, து³விதோ⁴ ஹோதி ஸோ பன;
திலபீ³ஜாதி³கோ தத்த², ஸபண்ணோபி அபண்ணகோ.
997. உத³கட்டோ²தி விஞ்ஞெய்யோ, ஸப்³போ³ ஸேவாலஜாதி³கோ;
விகோபெந்தஸ்ஸ தங் ஸப்³பங், தஸ்ஸ பாசித்தியங் ஸியா.
998. வியூஹித்வா து ஹத்தே²ன, ந்ஹாயிதுங் பன வட்டதி;
ஹோதி தஸ்ஸ ச ஸப்³பம்பி, டா²னஞ்ஹி ஸகலங் ஜலங்.
999. உத³கேன வினா சேச்ச, தங் பனுத்³த⁴ரிதுங் ஜலா;
ந ச வட்டதி பி⁴க்கு²ஸ்ஸ, டா²னஸங்கமனஞ்ஹி தங்.

1000 உத³கேனுக்கி²பித்வா தங், பக்கி²பந்தஸ்ஸ வாரிஸு;
வட்டதீதி ச நித்³தி³ட்ட²ங், ஸப்³ப³அட்ட²கதா²ஸுபி.

1001 ஜலே வல்லிதிணாதீ³னி, உத்³த⁴ரந்தஸ்ஸ தோயதோ;
விகோபெந்தஸ்ஸ வா தத்த², ஹோதி பாசித்தி பி⁴க்கு²னோ.

1002 பரேஹுப்பாடிதானெத்த², விகோபெந்தஸ்ஸ து³க்கடங்;
கச்ச²ந்தி ஹி யதோ தானி, பீ³ஜகா³மேன ஸங்க³ஹங்.

1003 த²லட்டே² சி²ன்னருக்கா²னங், டி²தோ ஹரிதகா²ணுகோ;
உத்³த⁴ங் வட்³ட⁴னகோ தஸ்ஸ, பூ⁴தகா³மேன ஸங்க³ஹோ.

1004 நாளிகேராதி³கானம்பி, கா²ணு உத்³த⁴ங் ந வட்³ட⁴தி;
தஸ்மா தஸ்ஸ கதோ ஹோதி, பீ³ஜகா³மேன ஸங்க³ஹோ.

1005 ததா² கத³லியா கா²ணு, ப²லிதாய பகாஸிதோ;
அப²லிதாய யோ கா²ணு, பூ⁴தகா³மேன ஸோ மதோ.

1006 ப²லிதா கத³லீ யாவ, நீலபண்ணா ச தாவ ஸா;
நளவேளுதிணாதீ³ன-மயமேவ வினிச்ச²யோ.

1007 அக்³க³தோ பன பட்டா²ய, யதா³யங் வேளு ஸுஸ்ஸதி;
ததா³ ஸங்க³ஹிதோ ஹோதி, பீ³ஜகா³மேன நாமஸோ.

1008 இந்த³ஸாலாதி³ருக்கா²னங், பீ³ஜகா³மேன ஸங்க³ஹோ;
சி²ந்தி³த்வா ட²பிதானங் து, விஞ்ஞெய்யோ வினயஞ்ஞனா.

1009 மண்ட³பாதீ³னமத்தா²ய, நிக்க²ணந்தி ச தே ஸசே;
நிக்³க³தே மூலபண்ணஸ்மிங், பூ⁴தகா³மேன ஸங்க³ஹோ.

1010 மூலமத்தேபி வா யேஸங், பண்ணமத்தேபி வா பன;
நிக்³க³தேபி கதோ தேஸங், பீ³ஜகா³மேன ஸங்க³ஹோ.

1011 ஸகந்தா³ பன தாலட்டி², பீ³ஜகா³மோதி வச்சதி;
பத்தவட்டி யதா³ நீலா, நிக்³க³ச்ச²தி ததா³ ந ச.

1012 நாளிகேரதசங் பி⁴த்வா, த³ந்தஸுசீவ அங்குரோ;
நிக்³க³ச்ச²தி ததா³ ஸோபி, பீ³ஜகா³மோதி வச்சதி.

1013 மிக³ஸிங்க³ஸமானாய, ஸதியா பத்தவட்டியா;
அனிக்³க³தேபி மூலஸ்மிங், பூ⁴தகா³மோதி வுச்சதி.

1014 ந ஹொந்தி ஹரிதா யாவ, வீஹிஆதீ³னமங்குரா;
நிக்³க³தேஸுபி பண்ணேஸு, பீ³ஜகா³மேன ஸங்க³ஹொ.

சத்தாரோ பா⁴ணவாரா நிட்டி²தா.

1015 அம்ப³ஜம்புட்டி²காதீ³ன-மேஸேவ ச வினிச்ச²யோ;
வந்தா³கா வாபி அஞ்ஞங் வா, ருக்கே² ஜாயதி யங் பன.

1016 ருக்கோ²வஸ்ஸ ஸியா டா²னங், விகோபேதுங் ந வட்டதி;
அமூலவல்லிஆதீ³ன-மயமேவ வினிச்ச²யோ.

1017 பாகாராதீ³ஸு ஸேவாலோ, அக்³க³பீ³ஜந்தி வுச்சதி;
யாவ த³வே தீணி பத்தானி, ந ஸஞ்ஜாயந்தி தாவ ஸோ.

1018 பத்தேஸு பன ஜாதேஸு, வத்து² பாசித்தியஸ்ஸ ஸோ;
க⁴ங்ஸித்வா பன தங் தஸ்மா, அபனேதுங் ந வட்டதி.

1019 ஸேவாலே ப³ஹி பானீய-க⁴டாதீ³னங் து து³க்கடங்;
அப்³போ³ஹாரோவ ஸோ அந்தோ, புவாதீ³ஸுபி கண்ணகங்.

1020 பாஸாணத³த்து³ஸேவால-ஸேலெய்யப்பபு⁴தீனி ச;
ஹொந்தி து³க்கடவத்து²னி, அபத்தானீதி நித்³தி³ஸே.

1021 புப்பி²தங் து அஹிச்ச²த்தங், அப்³போ³ஹாரிகதங் க³தங்;
ஸசே தங் மகுளங் ஹொதி, ஹொதி து³க்கடவத்து²கங்.

1022 ருக்கே² தசங் விகோபேத்வா, ததா² பப்படிகம்பி ச;
நிய்யாஸம்பி பனல்லஸ்மிங், க³ஹேதுங் ந ச வட்டதி.

1023 நுஹிஆதீ³ஸு ருக்கே²ஸு, தாலபண்ணாதி³கேஸு வா;
லிக²தோ தத்த²ஜாதேஸு, பாசித்தியமுதீ³ரயே.

1024 புப்ப²ங் பண்டு³பலாஸங் வா, ப²லங் வா பக்கமேவ வா;
பாதெந்தஸ்ஸ ச சாலெத்வா, பாசித்தியமுதீ³ரிதங்.

1025.

நாமெத்வா ப²லினிங் ஸாக²ங், தா³துங் வட்டதி க³ண்ஹதோ;
ஸயங் கா²தி³துகாமோ சே, தா³துமேவங் ந வட்டதி.

1026 உக்கி²பித்வா பரங் கஞ்சி, கா³ஹாபேதும்பி வட்டதி;
புப்பா²னி ஓசினந்தேஸு, அயமேவ வினிச்ச²யோ.

1027 யேஸங் ருஹதி ருக்கா²னங், ஸாகா² தேஸம்பி ஸாகி²னங்;
கப்பியங் தமகாரெத்வா, விகோபெந்தஸ்ஸ து³க்கடங்.

1028 அயமேவ நயோ அல்ல-ஸிங்கி³வேராதி³கேஸுபி;
து³க்கடங் பீ³ஜகா³மேஸு, நித்³தி³ட்ட²த்தா மஹேஸினா.

1029 “ருக்க²ங் சி²ந்த³ லதங் சி²ந்த³, கந்த³ங் மூலம்பி உத்³த⁴ர;
உப்பாடேஹீ”தி வத்தும்பி, வட்டதேவானியாமதோ.

1030 “அம்ப³ங் ஜம்பு³ம்பி நிம்ப³ங் வா, சி²ந்த³ பி⁴ந்து³த்³த⁴ரா”தி வா;
க³ஹெத்வா பன நாமம்பி, வட்டதேவானியாமதோ.

1031 “இமங் ருக்க²ங் இமங் வல்லிங், இமங் ச²ல்லிங் இமங் லதங்;
சி²ந்த³ பி⁴ந்தா³”தி வா வத்துங், நியமெத்வா ந வட்டதி.

1032 பூரெத்வா உச்ச²க²ண்டா³னங், பச்சி²யோ ஆஹரந்தி சே;
ஸப்³ப³மேவ கதங் ஹோதி, ஏகஸ்மிங் கப்பியே கதே.

1033 ஏகதோ பன ப³த்³தா⁴னி, உச்ச²தா³ருனி ஹொந்தி சே;
கப்பியங் கரொந்தோ பன, தா³ருங் விஜ்ஜ²தி வட்டதி.

1034 வல்லியா ரஜ்ஜுயா வாபி, யாய ப³த்³தா⁴னி தானி ஹி;
பா⁴ஜனேன ஸமானத்தா, தங் விஜ்ஜ²தி ந வட்டதி.

1035 ப⁴த்தங் மரிசபக்கேஹி, மிஸ்ஸெத்வா ஆஹரந்தி சே;
ஏகஸித்தே²பி ப⁴த்தஸ்ஸ, ஸசே விஜ்ஜ²தி வட்டதி.

1036 அயமேவ நயோ வத்தோ, திலதண்டு³லகாதி³ஸு;
ஏகாப³த்³தே⁴ கபித்தே²பி, கடாஹே கப்பியங் கரே.

1037 கடாஹங் யதி³ முஞ்சித்வா, அந்தோ சரதி மிஞ்ஜகங்;
பி⁴ந்தா³பெத்வா கபித்த²ங் தங், காரேதப்³ப³ங் து கப்பியங்.

1038. அபூ⁴தகா³மபீ³ஜேஸு, பூ⁴தகா³மாதி³ஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1039. அததா²ஸஞ்ஞினோ தத்த², அஸஞ்சிச்சாஸதிஸ்ஸ ச;
உம்மத்தகாதி³கானஞ்ச, அனாபத்தி பகாஸிதா.

1040. இத³ஞ்ச திஸமுட்டா²னங், க்ரியங் ஸஞ்ஞாவிமொக்க²கங்;
காயகம்மங் வசீகம்மங், திசித்தஞ்ச திவேத³னங்.

பூ⁴தகா³மகதா².

1041. கதே ஸங்கே⁴ன கம்மஸ்மிங், அஞ்ஞவாத³விஹேஸகே;
ததா² புன கரொந்தஸ்ஸ, ஹோதி பாசித்தியத்³வயங்.

1042. திகபாசித்தியங் த⁴ம்மே, அத⁴ம்மே திகது³க்கடங்;
கம்மே அரோபிதே சேவங், வத³ந்தஸ்ஸ ச து³க்கடங்.

1043. ஆபத்திங் வாபி ஆபன்னங், அஜானந்தஸ்ஸ, “ப⁴ண்ட³னங்;
ப⁴விஸ்ஸதீ”தி ஸஞ்ஞிஸ்ஸ, கி³லானஸ்ஸ ந தோ³ஸதா.

1044. அதி³ன்னாதா³னதுல்யாவ, ஸமுட்டா²னாத³யோ நயா;
க்ரியாக்ரியமித³ங் வுத்தங், வேத³னா து³க்க²வேத³னா.

அஞ்ஞவாத³கதா².

1045. அயஸங் கத்துகாமோவ, ஸம்மதஸ்ஸ ஹி பி⁴க்கு²னோ;
வத³ந்தோ உபஸம்பன்னே, உஜ்ஜா²பேதி ச கீ²யதி.

1046. தஸ்மிங் வத்து²த்³வயே தஸ்ஸ, ஹோதி பாசித்தியத்³வயங்;
திகபாசித்தியங் த⁴ம்மே, அத⁴ம்மே திகது³க்கடங்.

1047. அவண்ணங்னுபஸம்பன்ன-ஸந்திகே பன பி⁴க்கு²னோ;
அஸம்மதஸ்ஸ பி⁴க்கு²ஸ்ஸ, பா⁴ஸதோ யஸ்ஸ கஸ்ஸசி.

1048. ஸாமணேரஸ்ஸ வா வண்ணங், ஸம்மதாஸம்மதஸ்ஸபி;
வத³தோ து³க்கடங் ஹோதி, யஸ்ஸ கஸ்ஸசி ஸந்திகே.

1049. ச²ந்தா³தீ³னங் வஸேனேவ, கரொந்தங் ப⁴ணதோ பன;
அனாபத்தி க்ரியாஸேஸ-மனந்தரஸமங் மதங்.

- 1050 அஜ்ஜோ²காஸே து மஞ்சாதி³ங், அத்தனோ வா பரஸ்ஸ வா;
அத்தா²ய ஸந்த²ராபெத்வா, ஸந்த²ரித்வாபி வா பன.
- 1051 நேவுத்³த⁴ரெய்ய ஸங்க⁴ஸ்ஸ, உத்³த⁴ராபெய்ய வா ந தங்;
பக்கமந்தோ ஸசே தஸ்ஸ, ஹோதி பாசித்தி பி⁴க்கு²னோ.
- 1052 வஸ்ஸிகே சதுரோ மாஸே, ஸசே தே³வோ ந வஸ்ஸதி;
அஜ்ஜோ²காஸே ததா² சாபி, ட²பேதுங் ந ச வட்டதி.
- 1053 யத்த² வஸ்ஸதி ஹேமந்தே, சத்தாரோ அபரேபி ச;
ட²பேதுங் தத்த² மஞ்சாதி³ங், அட்ட² மாஸே ந வட்டதி.
- 1054 காகாதீ³னங் நிவாஸஸ்மிங், ருக்க²மூலே கதா³சிபி;
மஞ்சாதி³ங் பன ஸங்க⁴ஸ்ஸ, ட²பேதுங் ந ச வட்டதி.
- 1055 அஞ்ஞஸ்ஸத்தா²ய யங் கிஞ்சி, ஸந்த²தங் யதி³ ஸங்கி⁴கங்;
யத்த² கத்த²சி வா டா²னே, யேன கேனசி பி⁴க்கு²னா.
- 1056 யாவ ஸோ ந நிஸீதெ³ய்ய, “க³ச்சா²”தி ந வதெ³ய்ய வா;
தாவ ஸந்தா²ரகஸ்ஸேவ, பா⁴ரோ தந்தி பவுச்சதி.
- 1057 ஸசே தங் ஸாமணேரேன, ஸந்த²ராபேதி ஸந்த²தங்;
ஸந்த²ராபிதபி⁴க்கு²ஸ்ஸ, பலிபோ³தோ⁴தி தீ³பிதோ.
- 1058 ஸந்த²தங் பி⁴க்கு²னா தங் சே, பா⁴ரோ தஸ்ஸேவ தாவ தங்;
யாவ ஆணாபகோ தத்த², ஆக³ந்த்வா ந நிஸீத³தி.
- 1059 பி⁴க்கு²ங் வா ஸாமணேரங் வா, ஆராமிகமுபாஸகங்;
அனாபுச்சா² நிய்யாதெத்வா, ஸங்கி⁴கங் ஸயனாஸனங்.
- 1060 லெட்³டு³ப்பாதமதிக்கம்ம, க³ச்ச²தோ பட²மே பதே³;
து³க்கடங், து³தியே வாரே, பாசித்தியமுதீ³ரிதங்.
- 1061 ட²த்வா போ⁴ஜனஸாலாயங், வத்வா யோ ஸாமணேரகங்;
அஸுகஸ்மிங் தி³வாட்டா²னே, பஞ்ஞாபேஹீதி மஞ்சகங்.

நிக்க²மித்வா ஸசே தஸ்மா, டா²னா அஞ்ஞத்த² க³ச்ச²தி;
பாது³த்தா⁴ரேன ஸோ பி⁴க்கு², காரேதப்³போ³தி தீ³பிதோ.

1063 திகபாசித்தியங் வுத்தங், திகாதீதேன ஸத்து²னா;
ததா² புக்³க³லிகே தேன, தீ³பிதங் திகது³க்கடங்.

1064 சிமிலிங் தட்டிகங் சம்மங், ப²லகங் பாது³புஞ்ச²னிங்;
பூ⁴மத்த²ரணகங் வாபி, உத்தரத்த²ரணம்பி வா.

1065 தா³ருமத்திகப⁴ண்டா³னி , பத்தாதா⁴ரகமேவ வா;
அப்³போ⁴காஸே ட²பெத்வா தங், க³ச்ச²தோ ஹோதி து³க்கடங்.

1066 ஸசே ஆரஞ்ஞகேனாபி, அனோவஸ்ஸே ச நோ ஸதி;
லக்³கெத்வா பன ருக்க²ஸ்மிங், க³ந்தப்³ப³ங் து யதா²ஸுக²ங்.

1067 யதா² உபசிகாதீ³ஹி, ந க²ஜ்ஜதி ந லுஜ்ஜதி;
ததா² கத்வாபி தங் ஸப்³ப³ங், க³ந்துங் பன ச வட்டதி.

1068 அனாபத்துத்³த⁴ராபெத்வா, ஆபுச்சி²த்வாபி க³ச்ச²தோ;
அத்தனோ ஸந்தகே ருத்³தே⁴, ஆபதா³ஸுபி பி⁴க்கு²னோ.

1069 ஸமுட்டா²னாத³யோ ஸப்³பே³, கதி²னேன ஸமா மதா;
க்ரியாக்ரியமித³ங் வுத்த-மயமேவ விஸேஸதா.

பட²மஸேனாஸனகதா².

1070 பி⁴ஸிசிமிலிகா பூ⁴ம-த்த²ரணங் உத்தரத்த²ரங்;
தட்டிகா சம்மக²ண்டோ³ ச, பச்சத்த²ரனிஸீத³னங்.

1071 ஸந்தா²ரோ திணபண்ணானங், ஸெய்யா த³ஸவிதா⁴ ஸியா;
ஸப்³ப³ச்ச²ன்னபரிச்ச²ன்னே, விஹாரே பி⁴க்கு² யோ பன.

1072 ஏதங் த³ஸவித⁴ங் ஸெய்யங், ஸந்த²ரித்வாபி வா ஸயங்;
அனுத்³த⁴ரித்வானாபுச்சா², அதிக்மதி தங் ஸசே.

1073 ஆராமஸ்ஸௌபசாரங் வா, பரிக்கே²பங் பனஸ்ஸ வா;
பட²மே து³க்கடங் பாதே³, பாசித்தி து³தியே ஸியா.

1074 ஸேனாஸனஸ்ஸ ஸெய்யாய, உப⁴யேஸங் வினாஸதோ;

க³ச்ச²தோ ஸந்த²ரித்வந்தோ-க³ப்³பே⁴ பாசித்தி வண்ணிதா.

1075 உபசாரே விஹாரஸ்ஸ, து³க்கடங் மண்ட³பாதி³கே;
க³ச்ச²தோ ஸந்த²ரித்வா வா, ஸெய்யாமத்தங் வினாஸதோ.

1076 திகபாசித்தியங் வுத்தங், ஸங்கி⁴கே த³ஸவத்து²கே;
ததா² புக்³க³லிகே தஸ்ஸ, தீ³பிதங் திகது³க்கடங்.

1077 அனாபத்துத்³த⁴ரித்வா வா, ஆபுச்ச²ங் வாபி க³ச்ச²தோ;
பலிபுத்³தே⁴பி வாஞ்ஞேன, அத்தனோ ஸந்தகேபி வா.

1078 ஸாபெக்கோ²வ ச க³ந்த்வா தங், தத்த² ட²த்வாபி புச்ச²தி;
ஸமுட்டா²னாத³யோ ஸப்³பே³, அனந்தரஸமா மதா.

து³தியஸேனாஸனகதா².

1079 யோ புப்³பு³பக³தங் பி⁴க்கு²ங், ஜானங் அனுபக²ஜ்ஜ ச;
கப்பெய்ய ஸங்கி⁴காவாஸே, ஸெய்யங் பாசித்தியஸ்ஸ சே.

1080 பாத³தோ⁴வனபாஸாணா, பவிஸந்தஸ்ஸ பி⁴க்கு²னோ;
யாவ தங் மஞ்சபீட²ங் வா, நிக்³மந்தஸ்ஸ வா பன.

1081 மஞ்சபீட²கதோ யாவ, பஸ்ஸாவட்டா²னமேவ து;
எத்த²ந்தரே இத³ங் டா²னங், உபசாரோதி வுச்சதி.

1082 தத்த² பா³தே⁴துகாமஸ்ஸ, உபசாரே து பி⁴க்கு²னோ;
த³ஸஸ்வஞ்ஞதரங் ஸெய்யங், ஸந்த²ரந்தஸ்ஸ து³க்கடங்.

1083 நிஸீத³ந்தஸ்ஸ வா தத்த², நிபஜ்ஜந்தஸ்ஸ வா பன;
ததா² த்³வேபி கரொந்தஸ்ஸ, ஹோதி பாசித்தியத்³வயங்.

1084 புனப்புனங் கரொந்தஸ்ஸ, பயோக³க³ணனாவஸா;
திகபாசித்தியங் வுத்தங், புக்³க³லே திகது³க்கடங்.

1085 வுத்தூபசாரங் முஞ்சித்வா, ஸெய்யங் ஸந்த²ரதோபி வா;
விஹாரஸ்ஸுபசாரே வா, அஜ்ஜோ²காஸேபி வா பன.

1086 ஸந்த²ராபயதோ வாபி, தத்த² தஸ்ஸ நிஸீத³தோ;
ஸப்³புத்த² து³க்கடங் வுத்தங், நிவாஸோ ச நிவாரிதோ.

1087 அனாபத்தி கி³லானஸ்ஸ, ஸீதாது³ப்பீளிதஸ்ஸ வா;
ஆபதா³ஸுபி பி⁴க்கு²ஸ்ஸ, ததா² உம்மத்தகாதி³னோ.

1088 ஸமுட்டா²னாத³யோ ஸப்³பே³, பட²மந்திமவத்து²னா;
ஸதி³ஸாதி ச விஞ்ஞெய்யா, ஹோதீத³ங் து³க்க²வேத³னங்.

அனுபக²ஜ்ஜகதா².

1089 விஹாரா ஸங்கி⁴கா பி⁴க்கு²ங், நிக்கட்³டெ⁴ய்ய ஸசே பன;
நிக்கட்³டா⁴பெய்ய வா குத்³தோ⁴, தஸ்ஸ பாசித்தியங் ஸியா.

1090 ப³ஹுபூ⁴மாபி பாஸாதா³, பயோகே³னேககேன யோ;
நிக்கட்³டே⁴தி ஸசே தஸ்ஸ, ஏகா பாசித்தி தீ³பிதா.

1091 ட²பெத்வா ச ட²பெத்வா ச, நிக்கட்³ட⁴ந்தஸ்ஸ அந்தரா;
த்³வாரானங் க³ணனாயஸ்ஸ, ஹோந்தி பாசித்தியோ பன.

1092 “நிக்க²மா”தி வத³ந்தஸ்ஸ, வாசாயபி அயங் நயோ;
ஆணத்தியா க²ணேயேவ, ஆணாபெந்தஸ்ஸ து³க்கடங்.

1093 ஸசே ஸோ ஸகிமாணத்தோ, த்³வாரேபி ப³ஹுகே பன;
அதிக்காமேதி ஏகாவ, ப³ஹுகானி ப³ஹுனி சே.

1094 தஸ்ஸஹபட்டா²னஸாலாதி³-விஹாரஸ்ஸஹபசாரதோ ;
காயேனபி ச வாசாய, ததா² நிக்கட்³ட⁴னேபி ச.

1095 விஹாரஸ்ஸஹபசாரா வா, விஹாரா வாபி சேதரங்;
நிக்கட்³ட⁴ந்தஸ்ஸ ஸப்³பே³ஸங், பரிக்கா²ரம்பி து³க்கடங்.

1096 அஸம்ப³த்³தே⁴ஸு பி⁴க்கு²ஸ்ஸ, பரிக்கா²ரேஸு பண்டி³தோ;
வத்து²னங் க³ணனாயஸ்ஸ, து³க்கடங் பரிதீ³பயே.

1097 அந்தேவாஸிமலஜ்ஜிங் வா, ததா² ஸத்³தி⁴விஹாரிகங்;
நிக்கட்³ட⁴ந்தஸ்ஸ உம்மத்தங், ஸயங் உம்மத்தகஸ்ஸ ச.

1098 அத்தனோ வஸனட்டா²னா, ததா² விஸ்ஸாஸிகஸ்ஸ வா;
பரிக்கா²ரஞ்ச வா தேஸங், அனாபத்தி பகாஸிதா.

1099.

ஸங்கா⁴ராமாபி ஸப்³ப்ஸ்மா, ததா² கலஹகாரகங்;
இத³ங் து திஸமுட்டா²னங், வேத³னா து³க்க²வேத³னா.

நிக்கட்³ட்⁴னகதா².

1100 மஜ்ஜி²மாஸீஸக⁴ட்டாய, வேஹாஸகுடியுபரி;
ஆஹச்சபாத³கே மஞ்சே, பீடே² வா பன பி⁴க்கு²னோ.

1101 நிஸீத³ந்தஸ்ஸ வா தஸ்மிங், நிபஜ்ஜந்தஸ்ஸ வா பன;
பயோக³க³ணனாயேவ, தஸ்ஸ பாசித்தியோ ஸியுங்.

1102 திகபாசித்தியங் வுத்தங், புக்³க³லே திகது³க்கடங்;
ஹெட்டா² அபரிபோ⁴கே³ வா, ஸீஸக⁴ட்டாய வா பன.

1103 அவேஹாஸவிஹாரே வா, அத்தனோ ஸந்தகேபி வா;
விஸ்ஸாஸிகவிஹாரே வா, ந தோ³ஸும்மத்தகாதி³னோ.

1104 யத்த² படாணி வா தி³ன்னா, தத்த² ட²த்வா லகே³தி வா;
இத³மேளகலோமேன, ஸமுட்டா²னங் ஸமங் மதங்.

வேஹாஸகுடிகதா².

1105 யாவ த்³வாரஸ்ஸ கோஸம்ஹா, அக்³க³ளட்ட²பனாய து;
பி⁴க்கு²னா லிம்பிதப்³பங் வா, லேபாபேதப்³பமேவ வா.

1106 ஞெய்யோ ஆலோகஸந்தீ⁴னங், பரிகம்மெப்யயங் நயோ;
ச²த³னஸ்ஸ த்³வத்திபரியாயங், டி²தேன ஹரிதே பன.

1107 அதி⁴ட்டெ²ய்யங் ததோ உத்³த⁴ங், அதி⁴ட்டே²தி ஸசே பன;
தஸ்ஸ பாசித்தியங் ஹோதி, து³க்கடங் தத்த² திட்ட²தோ.

1108 பிட்டி²வங்ஸே டி²தோ கோசி, ச²த³னஸ்ஸ முக²வட்டியா;
யஸ்மிங் டா²னே டி²தங் பி⁴க்கு²ங், ஓலோகெந்தோ ந பஸ்ஸதி.

1109 தஸ்மிங் டா²னே பன டா²துங், நேவ பி⁴க்கு²ஸ்ஸ வட்டதி;
விஹாரஸ்ஸ பதந்தஸ்ஸ, பதனோகாஸதோ ஹி தங்.

1110 ஊனகத்³வத்திபரியாயே, அதிரேகோதி ஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1111 ந தோ³ஸோ த்³வத்திபரியாயே, லேணே திணகுடஸு வா;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

த்³வத்திபரியாயகதா².

1112 ஜானங் ஸப்பாணகங் தோயங், திணங் வா மத்திகம்பி வா;
யதி³ ஸிஞ்செய்ய பாசித்தி, ஸிஞ்சாபெய்ய பரேஹி வா.

1113 அச்சி²ந்தி³த்வா ஸசே தா⁴ரங், மத்திகங் ஸிஞ்சதோ பன;
ஏகஸ்மிம்பி க⁴டே ஏகா, பாசித்தி பரிதீ³பிதா.

1114 விச்சி²ந்த³தி ஸசே தா⁴ரங், பயோக³க³ணனாவஸா;
ஸம்முக²ம்பி கரொந்தஸ்ஸ, மாதிகங் ஸந்த³மானகங்.

1115 ஏகாவ சே ஸியாபத்தி, தி³வஸம்பி ச ஸந்த³து;
ப³ந்த⁴தோ தத்த² தத்த²ஸ்ஸ, பயோக³க³ணனா ஸியா.

1116 ஸசே ஸகடபுண்ணம்பி, மத்திகங் திணமேவ வா;
உத³கே பக்கி²பந்தஸ்ஸ, ஏகா பாசித்தி ஏகதோ.

1117 ஏகேகங் பக்கி²பந்தஸ்ஸ, பயோக³க³ணனாய சே;
க²யங் வா ஆவிலத்தங் வா, ஜலங் க³ச்ச²தி தாதி³ஸே.

1118 “ஸிஞ்சாஹி”தி வத³ந்தஸ்ஸ, ஹோதி ஆபத்தி து³க்கடங்;
ஏகாயாணத்தியா ஏகா, தி³வஸம்பி ச ஸிஞ்சதோ.

1119 அப்பாணே உத³கே ஸுத்³தே⁴, ஸப்பாணமிதி ஸஞ்ஞினோ;
ஸப்³புத்த² விமதிஸ்ஸாபி, ஹோதி ஆபத்தி து³க்கடங்.

1120 ஸப்³புத்தா²பாணஸஞ்ஞிஸ்ஸ, அஸஞ்சிச்சாஸதிஸ்ஸ வா;
அஜானதோ அனாபத்தி, ததா² உம்மத்தகாதி³னோ.

1121 ஸப்பாணகத்தங் தோயஸ்ஸ, ஸப்பாணந்தி விஜானநங்;
வினா வத⁴கசித்தேன, திணாதீ³னங் நிஸேசனங்.

1122 சத்தாரேவஸ்ஸ அங்கா³னி, நித்³தி³ட்டா²னி மஹேஸினா;
அதி³ன்னாதா³னதுல்யாவ, ஸமுட்டா²னாத³யோ நயா.

1123.

இத³ங் பண்ணத்திவஜ்ஜஞ்ச, திசித்தஞ்சாதி தீ³பிதங்;
இத³மேவெத்த² நித்³தி³ட்ட²ங், தஸ்ஸ சஸ்ஸ விஸேஸனங்.

ஸப்பாணககதா².

ஸேனாஸனவக்³கோ³ து³தியோ.

1124பி⁴க்கு²ஸ்ஸாட்ட²ங்க³யுத்தஸ்ஸ, பி⁴க்கு²னோவாத³ஸம்முதி;
இத⁴ ஞத்திசதுத்தே²ன, அனுஞ்ஞாதா மஹேஸினா.

1125யோ தாயாஸம்மதோ பி⁴க்கு², க³ருத⁴ம்மேஹி அட்ட²ஹி;
ஏகங் ஸம்ப்ஹுலா வாபி, பி⁴க்கு²னிஸங்க⁴மேவ வா.

1126ஓஸாரெந்தோவ தே த⁴ம்மே, ஓவதெ³ய்ய ஸசே பன;
ஓவாத³பரியோஸானே, தஸ்ஸ பாசித்தியங் ஸியா.

1127அஞ்ஞேன பன த⁴ம்மேன, ஓவத³ந்தஸ்ஸ து³க்கடங்;
ஏகதோஉபஸம்பன்னங், க³ருத⁴ம்மேஹி வா ததா².

1128பி⁴க்க²னங் ஸந்திகேயேவ, உபஸம்பன்னபி⁴க்கு²னிங்;
ததா², லிங்க³விபல்லாஸே, பாசித்தேவ பகாஸிதா.

1129ஸம்மதஸ்ஸாபி பி⁴க்கு²ஸ்ஸ, து³க்கடங் ஸமுதீ³ரிதங்;
ஓவாத³ங் அனியாதெ³த்வா, த⁴ம்மேனஞ்ஞேன பா⁴ஸதோ.

1130“ஸமக்³ம்ஹா”தி வுத்தேபி, அஞ்ஞேனோவத³தோ ததா²;
“வக்³ம்ஹா”தி ச வுத்தேபி, க³ருத⁴ம்மேஹி து³க்கடங்.

1131அக³ண்ஹந்தஸ்ஸ ஓவாத³ங், அபச்சாஹரதோபி தங்;
ட²பெத்வா து³க்கடங் பா³லங், கி³லானங் க³மிகங் ஸியா.

1132அத⁴ம்மே பன கம்மஸ்மிங், அத⁴ம்மந்தி ச ஸஞ்ஞினோ;
வக்³கே³ பி⁴க்கு²னிஸங்க⁴ஸ்மிங், திகபாசித்தியங் ஸியா.

1133ததா² வேமதிகஸ்ஸாபி, த⁴ம்மகம்மந்தி ஸஞ்ஞினோ;
நவ பாசித்தியோ வுத்தா, ஸமக்³கே³பி ச தத்தகா.

1134நவகானங் வஸா த்³வின்னங், அட்டா²ரஸ ப⁴வந்தி தா;
து³க்கடங் த⁴ம்மகம்மேபி, ஸத்தரஸவித⁴ங் ஸியா.

1135“ஓஸாரேஹீ”தி வுத்தோ வா, பஞ்ஹங் புட்டோ² கதே²தி வா;
ஸிக்க²மானாய வா நேவ, தோ³ஸோ உம்மத்தகாதி³னோ.

1136வாசுக்³க³தாவ காதப்³பா³, பகு³ணா த்³வேபி மாதிகா;
ஸுத்தந்ததோ ச சத்தாரோ, பா்⁴ணவாரா பகாஸிதா.

1137ஏகோ பரிகத²த்தா²ய, கதா²மக்³கோ³ பகாஸிதோ;
மங்க³லாமங்க³லத்தா²ய, திஸ்ஸோயேவானுமோத³னா.

1138உபோஸதா²தி³அத்தா²ய, கம்மாகம்மவினிச்ச²யோ;
கம்மட்டா²னங் ததா² ஏகங், உத்தமத்த²ஸ்ஸ பாபகங்.

1139எத்தகங் உக்³க³ஹேத்வான, பஞ்சவஸ்ஸோ ப³ஹுஸ்ஸுதோ;
முஞ்சித்வா நிஸ்ஸயங் காமங், வஸிதுங் லப்⁴திஸ்ஸரோ.

1140வாசுக்³க³தா விப்⁴ங்கா³ த்³வே, பகு³ணா ப்யஞ்ஜனாதி³தோ;
சதூஸ்வபி நிகாயேஸு, ஏகோ வா பொத்த²கோபி ச.

1141கம்மாகம்மஞ்ச வத்தானி, உக்³க³ஹேதப்³ப³மெத்தகங்;
ஸப்³ப³ந்திமபரிச்சே²தோ³, த³ஸவஸ்ஸோ ஸசே பன.

1142ப³ஹுஸ்ஸுதோ தி³ஸாமொக்கோ², யேனகாமங்க³மோ ஸியா;
பரிஸங் லப்⁴தே காமங், உபட்டா²பேதுமிஸ்ஸரோ.

1143யஸ்ஸ ஸாட்ட²கத²ங் ஸப்³ப³ங், வாசுக்³க³ங் பிடகத்தயங்;
ஸோயங் ப³ஹுஸ்ஸுதோ நாம, பி்⁴க்கு²னோவாத³கோ ஸியா.

1144அஸ்ஸாஸம்மததாதீ³னி , தீணி அங்கா³னி தீ³பயே;
பத³ஸோத்⁴ம்மதுல்யாவ, ஸமுட்டா²னாத³யோ நயா.

ஓவாத³கதா².

1145பாசித்தி க³ருத்⁴ம்மேஹி, த்⁴ம்மேனஞ்ஞேன வா பன;
ஹொத்யத்த²ங்க³தே ஸுரியே, ஓவத³ந்தஸ்ஸ பி்⁴க்கு²னிங்.

1146திகபாசித்தியங் வுத்தங், ஸம்மதஸ்ஸாபி பி்⁴க்கு²னோ;
ஏகதோஉபஸம்பன்னங், ஓவத³ந்தஸ்ஸ து³க்கடங்.

1147.

ததா²னத்த²ங்க³தே ஸூரியே, க³தே அத்த²ந்தி ஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1148 உத்³தே³ஸாதி³னயேனஸ்ஸ, அனாபத்தி பகாஸிதா;
அனந்தரஸமா ஸேஸா, ஸமுட்டா²னாத³யோ நயா.

அத்த²ங்க³தஸூரியகதா².

1149 பி⁴க்கு²னிங் ஓவத³ந்தஸ்ஸ, க³ந்த்வா பி⁴க்கு²னுபஸ்ஸயங்;
க³ருத⁴ம்மேஹி அஞ்ஞத்ர, காலா பாசித்தியங் ஸியா.

1150 ஸசே அஸம்மதோ ஹோதி, ஹோதி பாசித்தியத்³வயங்;
அத்த²ங்க³தே ச ஸூரியே, ஸசே வத³தி தீணிபி.

1151 அஞ்ஞேன பன த⁴ம்மேன, வத³தோ து³க்கடத்³வயங்;
ஏகங் பாசித்தியங் ஹோதி, பி⁴க்கு²னோ ரத்திஹேதுகங்.

1152 ஸம்மதஸ்ஸாபி பி⁴க்கு²ஸ்ஸ, ஹோதி பாசித்தியத்³வயங்;
க³ருத⁴ம்மனிதா³னஸ்ஸ, ஸம்மதத்தா அபா⁴வதோ.

1153 தஸ்ஸேவஞ்ஞேன த⁴ம்மேன, ஓவத³ந்தஸ்ஸ து³க்கடங்;
ஸம்மதத்தா அனாபத்தி, ஏகா பாசித்தி ரத்தியங்.

1154 திகபாசித்தியங் வுத்தங், து³க்கடங் இதரத்³வயே;
ஏகதோஉபஸம்பன்னங், ஓவத³ந்தஸ்ஸ து³க்கடங்.

1155 ததா² அஞ்ஞேன த⁴ம்மேன, க³ந்த்வா பி⁴க்கு²னுபஸ்ஸயங்;
ஸமுட்டா²னாத³யோ ஸப்³பே³, கதி²னேன ஸமா மதா.

பி⁴க்கு²னுபஸ்ஸயகதா².

1156 சீவராதி³னமத்தா²ய , ஓவத³ந்தீதி பி⁴க்கு²னிங்;
வத³தோ ஸம்மதே பி⁴க்கு², தஸ்ஸ பாசித்தியங் ஸியா.

1157 திகபாசித்தியங் வுத்தங், ததே²வ திகது³க்கடங்;
ஸங்கே⁴னாஸம்மதங் பி⁴க்கு²ங், வத³ந்தஸ்ஸ ச து³க்கடங்.

1158 ததே²வானுபஸம்பன்னங், ஸம்மதங் வா அஸம்மதங்;
ந தோ³ஸோ ஆமிஸத்தா²ய, ஓவத³ந்தஸ்ஸ பா⁴ஸதோ.

1159 ததா² உம்மத்தகாதீ³னங், அனாபத்தி பகாஸிதா;
இத³ஞ்ஹி திஸமுட்டா²னங், வேத³னா து³க்க²வேத³னா.

ஆமிஸகதா².

1160 ஸசே பி⁴க்கு²னியா பி⁴க்கு², த³தெ³ய்ய பன சீவரங்;
அஞ்ஞாதிகாய பாசித்தி, ட²பெத்வா பாரிவத்தகங்.

1161 சீவரஸ்ஸ படிக்கா³ஹ-ஸிக்கா²பத³ஸமோ நயோ;
அவஸேஸோ மதோ ஸத்³தி⁴ங், ஸமுட்டா²னாதி³னா பன.

1162 தத்த² பி⁴க்கு²னியா தி³ன்னங், சீவரங் இத⁴ பி⁴க்கு²னா;
தத்த² நிஸ்ஸக்கி³யங் ஸுத்³த⁴-பாசித்தி இத⁴ ஸுசிதா.

சீவரதா³னகதா².

1163 சீவரங் யோ ஹி ஸிப்³பெ³ய்ய, ஸிப்³பா³பெய்ய பரேன வா;
அஞ்ஞாதிகாய பாசித்தி, ஹோதி பி⁴க்கு²னியா பன.

1164 யங் வா நிவாஸிதுங் ஸக்கா, யங் வா பாருபனுபக³ங்;
சீவரந்தி அதி⁴ப்பேதோ, இத³மெத்த² மஹேஸினா.

1165 ஸயங் ஸுசிங் பவேஸெத்வா, ஸிப்³பு³ந்தஸ்ஸ ச பி⁴க்கு²னோ;
ஸுசினீஹரணே தஸ்ஸ, பாசித்தியமுதீ³ரிதங்.

1166 ஸதக்க²த்தும்பி விஜ்ஜி²த்வா, ஸகிங் நீஹரதோ பன;
ஏகங் பாசித்தியங் வுத்தங், பயோக³ஸ்ஸ வஸா ப³ஹு.

1167 “ஸிப்³பா³”தி பன ஆணத்தோ, அவிஸேஸேன பி⁴க்கு²னா;
நிட்டா²பேதி ஸசே ஸப்³பு³ங், ஏகங் பாசித்தியங் ஸியா.

1168 “யமெத்த² சீவரே கம்மங், பா⁴ரோ ஸப்³பு³ங் தவா”தி ஹி;
ஆணத்தோ பி⁴க்கு²னா ஸப்³பு³ங், நிட்டா²பேதி ஸசே பன.

1169 பி⁴க்கு²ஸ்ஸாணாபகஸ்ஸேவ, ஏகாயாணத்தியா பன;
ஹோந்தி பாசித்தியாபத்தி, அனேகாராபதே² பதே².

1170 புனப்புணாணாபெந்தஸ்ஸ, அனேகாணத்தியங் பன;
கா ஹி நாம கதா² அத்தி²? திகபாசித்தியங் ஸியா.

1171 ஞாதிகாய ச அஞ்ஞாதி-ஸஞ்ஞிஸ்ஸ விமதிஸ்ஸ வா;
ஏகதோ஁பஸம்பன்ன-சீவரே து³க்கடங் ஸியா.

1172 ட²பெத்வா சீவரங் அஞ்ஞங், பரிக்கா²ரஞ்ச ஸிப்³ப³தோ;
அனாபத்தி வினித்³தி³ட்டா², ஸிக்க²மானாதி³காயபி.

1173 ஸஞ்சரித்தஸமுட்டா²னங், க்ரியங் பண்ணத்திவஜ்ஜகங்;
காயகம்மங் வசீகம்மங், திசித்தஞ்ச திவேத³னங்.

சீவரஸிப்³ப³னகதா².

1174 பி⁴க்கு² பி⁴க்கு²னியா ஸத்³தி⁴ங், ஸங்விதா⁴ய பனேகதோ;
படிபஜ்ஜெய்ய மக்³க³ங் சே, அஞ்ஞத்ர ஸமயா இத⁴.

1175 கா³மந்தரோக்கமே வாபி, அத்³த⁴யோஜனதிக்கமே;
அகா³மகே அரஞ்ஞோ வா, ஹோதி ஆபத்தி பி⁴க்கு²னோ.

1176 எத்தா²கப்பியபூ⁴மட்டோ², ஸங்விதா⁴னங் கரோதி யோ;
ஸங்விதா⁴னநிமித்தங் து, து³க்கடங் தஸ்ஸ தீ³பிதங்.

1177 ஸங்விதா⁴னங் கரொந்தஸ்ஸ, ட²த்வா கப்பியபூ⁴மியங்;
ஸங்விதா⁴னநிமித்தங் து, ந வத³ந்தஸ்ஸ து³க்கடங்.

1178 உப⁴யத்தா²பி பாசித்தி, க³ச்ச²ந்தஸ்ஸேவ பி⁴க்கு²னோ;
அனந்தரஸ்ஸ கா³மஸ்ஸ, உபசாரோக்கமே ஸியா.

1179 தத்ராபி பட²மே பாதே³, து³க்கடங் ஸமுதீ³ரிதங்;
து³தியே பத³வாரஸ்மிங், பாசித்தியமுதீ³ரிதங்.

1180 அந்தரா ஸங்விதா⁴னேபி, பி⁴க்கு²னோ து³க்கடங் ஸியா;
த்³வாரமக்³க³விஸங்கேதே, ஸதி சாபத்தி வுச்சதி.

1181 அஸங்வித³ஹிதே காலே, வித³ஹிதோதி ஸஞ்ஞினோ;
பி⁴க்கு²ஸ்ஸேவ விதா⁴னஸ்மிங், ஹோதி ஆபத்தி து³க்கடங்.

1182 ஸமயே வித³ஹித்வா வா, விஸங்கேதேன க³ச்ச²தோ;
ஆபதா³ஸு அனாபத்தி, ததா² உம்மத்தகாதி³னோ.

1183.

இத³ங் சதுஸமுட்டா²னங், காயதோ காயவாசதோ;
காயசித்தா ஸமுட்டா²தி, காயவாசாதி³கத்தயா.

ஸங்விதா⁴னகதா².

1184 ஏகமுஜ்ஜவனிங் நாவங், ததா² ஓஜவனிம்பி வா;
அபி⁴ருஹெய்ய பாசித்தி, ஸத்³தி⁴ங் பி⁴க்கு²னியா ஸசே.

1185 ஸகா³மதீரபஸ்ஸேன , கா³மந்தரவஸேன வா;
அகா³மதீரபஸ்ஸேன, க³மனே அத்³த⁴யோஜனே.

1186 ததா² யோஜனவித்தி²ண்ண-நதீ³மஜ்ஜே²ன க³ச்ச²தோ;
அத்³த⁴யோஜனஸங்கா²ய, ஹொந்தி பாசித்தியோ பன.

1187 யதா²ஸுக²ங் ஸமுத்³த³ஸ்மிங், ஸப்³ப³அட்ட²கதா²ஸு ஹி;
நதி³யங்யேவ ஆபத்தி, ந ஸமுத்³தே³ விசாரிதா.

1188 தித்த²ஸம்பாத³னத்தா²ய, உத்³த⁴ங் வா நதி³யா அதோ⁴;
ஸசே ஹரந்தி தங்யுத்தா, அனாபத்தி பகாஸிதா.

1189 ததா² ஸங்வித³ஹித்வா வா, திரியங் தரணாய வா;
ஆபதா³ஸு விஸேஸோ ஹி, அனந்தரஸமோ மதோ.

நாவாபி⁴ருஹனகதா².

1190 ஞுத்வா பி⁴க்கு²னியா ப⁴த்தங், பு⁴ஞ்ஜதோ பரிபாசிதங்;
ஹித்வா கி³ஹிஸமாரம்ப⁴ங், ஹொதி பாசித்தி பி⁴க்கு²னோ.

1191 போ⁴ஜனங் பஞ்சதா⁴ வுத்தங், க³ஹணே தஸ்ஸ து³க்கடங்;
அஜ்ஜோ²ஹாரேஸு ஸப்³பே³ஸு, தஸ்ஸ பாசித்தியோ ஸியுங்.

1192 ஸந்தகங் ஞாதகாதீ³னங், கி³ஹிஸம்பாதி³தம்பி வா;
வினா பி⁴க்கு²னியா தோ³ஸோ, பு⁴ஞ்ஜதோ பரிபாசிதங்.

1193 பரிபாசிதஸஞ்ஞிஸ்ஸ , பி⁴க்கு²ஸ்ஸாபரிபாசிதே;
உபோ⁴ஸு விமதிஸ்ஸாபி, ஹொதி ஸப்³ப³த்த² து³க்கடங்.

1194 ஏகதோஉபஸம்பன்ன-பரிபாசிதபோ⁴ஜனங்;
அஜ்ஜோ²ஹாரவஸேனேவ, து³க்கடங் பரிபு⁴ஞ்ஜதோ.

- 1195 அஞ்ஞங் வா பன யங் கிஞ்சி, ட²பெத்வா பஞ்சபோ⁴ஜனங்;
பு⁴ஞ்ஜந்தஸ்ஸ அனாபத்தி, யாகு³க²ஜ்ஜப²லாதி³கங்.
- 1196 ஸமுட்டா²னாத³யோ துல்யா, பட²மந்திமவத்து²னா;
இத³ங் பண்ணத்திவஜ்ஜங் து, திசித்தஞ்ச திவேத³னங்.
- பரிபாசிதகதா².
- 1197 து³தியானியதேனேவ, த³ஸமங் ஸதி³ஸங் மதங்;
இத³ங் ஸிக்கா²பத³ங் ஸப்³ப³ங், ஸமுட்டா²னநயாதி³னா.
- ரஹோனிஸஜ்ஜகதா².
- பி⁴க்கு²னிவக்³கோ³ ததியோ.
- 1198 ஏகோ ஆவஸதோ² பிண்டோ³, அகி³லானேன பி⁴க்கு²னா;
பு⁴ஞ்ஜிதப்³போ³ ததோ உத்³த⁴ங், பாசித்தி பரிபு⁴ஞ்ஜதோ.
- 1199 அனோதி³ஸ்ஸேவ பஞ்ஞத்தே, யாவத³த்தே²வ பி⁴க்கு²னா;
பு⁴ஞ்ஜிதப்³ப³ங் ஸகிங் தத்த², ததோ உத்³த⁴ங் ந வட்டதி.
- 1200 து³தியே தி³வஸே தத்த², க³ஹ்ணே து³க்கடங் மதங்;
அஜ்ஜோ²ஹாரேஸு ஸப்³பே³ஸு, தஸ்ஸ பாசித்தியோ மதா.
- 1201 குலேனேகேன பஞ்ஞத்தே, ஸஹ நானாகுலேஹி வா;
நானேகட்டா²னபே⁴தே³ஸு, ஏகபா⁴கோ³வ வட்டதி.
- 1202 நானாட்டா²னேஸு பஞ்ஞத்தோ, யோ ச, நானாகுலேஹி வா;
பு⁴ஞ்ஜதோ பன ஸப்³ப³த்த², ந தோ³ஸோ படிபாடியா.
- 1203 படிபாடிமஸேஸேன, கே²பெத்வா புன பு⁴ஞ்ஜதோ;
ஆதி³தோ பன பட்டா²ய, ந ச கப்பதி பி⁴க்கு²னோ.
- 1204 அனாபத்தி கி³லானஸ்ஸ, ஆக³ச்ச²ந்தஸ்ஸ க³ச்ச²தோ;
ஓதி³ஸ்ஸபி ச பஞ்ஞத்தே, பரித்தே பு⁴ஞ்ஜதோ ஸகிங்.
- 1205 யாகு³ஆதீ³னி நிச்சம்பி, பு⁴ஞ்ஜிதுங் பன வட்டதி;
ஸேஸமேளகலோமேன, ஸமுட்டா²னாதி³கங் ஸமங்.

1206 அஞ்ஞத்ர ஸமயா வத்தா, பாசித்தி க³ணபோ⁴ஜனே;
க³ணோதி பன நித்³தி³ட்டா², சத்தாரோ வா ததுத்தரிங்.

1207 யங் நிமந்தனதோ வாபி, லத்³த⁴ங் விஞ்ஞத்திதோபி வா;
போ⁴ஜனங் பன பஞ்சன்னங், ஹோதி அஞ்ஞதரங் இத⁴.

1208 போ⁴ஜனானம்பி பஞ்சன்னங், க³ஹெத்வா நாமமேவ து;
நிமந்தேதி ஸசே பி⁴க்கூ², சத்தாரோ ப³ஹுகேபி வா.

1209 “ஓத³னங் போ⁴ஜனங் ப⁴த்தங், ஸம்படிச்ச²த² க³ண்ஹத²”;
இதி வேவசனேஹேவ, அத² பா⁴ஸந்தரேன வா.

1210 ததோ தஸ்ஸ ச தே பி⁴க்கூ², ஸாதி³யித்வா நிமந்தனங்;
ஏகதோ நானதோ வா சே, க³ந்த்வா க³ண்ஹந்தி ஏகதோ.

1211 ஸப்³பே³ஸங் ஹோதி பாசித்தி, க³ணபோ⁴ஜனகாரணா;
ஏகதோ க³ஹணங் எத்த², க³ணபோ⁴ஜனகாரணங்.

1212 ஏகதோ நானதோ வாபி, க³மனங் போ⁴ஜனம்பி வா;
காரணந்தி ந தங் விஞ்ஞா, ப⁴ணந்தி க³ணபோ⁴ஜனே.

1213 ஸசேபி ஓத³னாதீ³னங், க³ஹெத்வா நாமமேவ வா;
ஏகதோ நானதோ வாபி, விஞ்ஞாபெத்வா மனுஸ்ஸகே.

1214 நானதோ வேகதோ க³ந்த்வா, ஸசே க³ண்ஹந்தி ஏகதோ;
ஏவம்பி பன ஹோதீதி, வண்ணிதங் க³ணபோ⁴ஜனங்.

1215 து³வித⁴ஸ்ஸாபி ஏதஸ்ஸ, படிக்க³ஹணகாரணா;
து³க்கடங் ஹோதி பாசித்தி, அஜ்ஜோ²ஹாரேஸு தீ³பிதா.

1216 ஸமயேஸு அனாபத்தி, ஸத்தஸ்வபி பகாஸிதா;
க³ஹெத்வா ஏகதோ த்³வின்னங், திண்ணங் வா பு⁴ஞ்ஜதங் ததா².

1217 முனிநானுபஸம்பன்ன-சாரிபத்தானிமந்திதா ;
சதுத்தே² ஏகதோ கத்வாபி, க³ணபோ⁴தோ³ பகாஸிதோ.

நேவ ஸமயலத்³தா⁴னங், வஸேனபி ஹி ஸப்³ப³ஸோ;
க³ணபோ⁴தோ³ பனாபத்தி, வேதி³தப்³பா³ விபா⁴வினா.

1219போ⁴ஜனானஞ்ச பஞ்சன்னங், வஸேன க³ணபோ⁴ஜனே;
நத்தே²வ ச விஸங்கேதங், யாகு³ஆதி³ஸு தங் ஸியா.

1220க³ணபோ⁴ஜனஸஞ்ஞிஸ்ஸ, பி⁴க்கு²ஸ்ஸாக³ணபோ⁴ஜனே;
தத்த² வேமதிகஸ்ஸாபி, ஹோதி ஆபத்தி து³க்கடங்.

1221போ⁴ஜனானி ச பஞ்சேவ, ட²பெத்வா யாகு³ஆதி³ஸு;
அனாபத்தீதி ஞாதப்³பா³, நிச்சப⁴த்தாதி³கேஸுபி.

1222ததா² உம்மத்தகாதி³னங், ஸமுட்டா²னாதி³னா பன;
இத³ங் ஏளகலோமேன, ஸதி³ஸந்தி பகாஸிதங்.

க³ணபோ⁴ஜனகதா².

1223ப³ஹுஹி யோ பி⁴க்கு² மனுஸ்ஸகேஹி;
நிமந்திதோ பஞ்சஹி போ⁴ஜனேஹி;
ஹித்வா ஸசே புப்³ப³னிமந்தனாய;
விகப்பனங் பஞ்சஸு யஸ்ஸ கஸ்ஸ.

1224பச்சா² நிமந்திதங் ப⁴த்தங், ததா² உப்படிபாடியா;
பு⁴ஞ்ஜதோ ஏகஸித்த²ம்பி, தஸ்ஸ பாசித்தியங் ஸியா.

1225போ⁴ஜனானங் து பஞ்சன்னங், யேன கேன நிமந்திதோ;
தங் ட²பெத்வா ஸசே அஞ்ஞங், போ⁴ஜனங் பரிபு⁴ஞ்ஜதி.

1226தேஸமேவ ச பஞ்சன்னங், போ⁴ஜனானங் மஹேஸினா;
ஏதங் பரம்பரங் நாம, போ⁴ஜனங் பரிதீ³பிதங்.

1227யத்த² கீ²ரங் ரஸங் வாபி, ஆகிரந்தி ஸசே பன;
யேன அஜ்ஜொ²த்த²டங் ப⁴த்தங், ஸப்³ப³மேகரஸங் ஸியா.

1228கோடிதோ பன பட்டா²ய, ஸங்ஸட்ட²ங் பரிபு⁴ஞ்ஜதோ;
அனாபத்தீதி நித்³தி³ட்ட²ங், மஹாபச்சரியங் பன.

1229பரம்பரந்தி ஸஞ்ஞாய, அபரம்பரபோ⁴ஜனே;
தத்த² வேமதிகஸ்ஸாபி, து³க்கடங் பரிபு⁴ஞ்ஜதோ.

1230 ஸகலேனபி கா³மேன, பூகே³ன நிக³மேன வா;
நிமந்திதஸ்ஸ வா நிச்ச-ப⁴த்தே தோ³ஸோ ந விஜ்ஜதி.

1231 ஸமுட்டா²னாத³யோ ஸப்³பே³, கதி²னேனாதி³னா ஸமா;
க்ரியாக்ரியமித³ங் வுத்தங், போ⁴ஜனஞ்சாவிகப்பனங்.

பரம்பரபோ⁴ஜனகதா².

1232 பூவா பஹேணகத்தா²ய, படியத்தா ஸசே பன;
பாதெ²ய்யத்தா²ய மந்தா² வா, யே ஹி தத்த² ச பி⁴க்கு²னா.

1233 த்³வத்திபத்தா க³ஹேதப்³பா³, பூரா பூவேஹி ஸத்துஹி;
ததோ சே உத்தரிங் தஸ்ஸ, ஹோதி பாசித்தி க³ண்ஹதோ.

1234 க³ஹேத்வா நிக்²மந்தேன, “த்³வத்திபத்தா மயா இத⁴;
க³ஹிதா பன பூவா”தி, பி⁴க்கு²ங் தி³ஸ்வாவதே³ பு³தோ⁴.

1235 “மா கோ² த்வங் படிக³ண்ஹா”தி, அவத³ந்தஸ்ஸ து³க்கடங்;
க³ண்ஹதோபி ச தங் ஸுத்வா, ஹோதி ஆபத்தி து³க்கடங்.

1236 ஊனகத்³வத்திபத்தேஸு, அதிரேகோதி ஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1237 யேன தத்த² தயோ லத்³தா⁴, பத்தபூரா ததோ பன;
த்³வே ஸங்க⁴ஸ்ஸ பதா³தப்³பா³, த்³வே சே ஏகோ, ந ஏகதோ.

1238 அபஹேணகபாதெ²ய்யங், அவஸேஸம்பி வா ததோ;
ஸந்தகங் ஞாதகாதீ³னங், தெ³ந்தானம்பி ததூ³னகங்.

1239 க³ண்ஹதோபி அனாபத்தி, ததா² உம்மத்தகாதி³னோ;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

காணமாதுகதா².

1240 அஞ்ஞேன பன பஞ்சன்னங், போ⁴ஜனானங் பவாரிதோ;
பாசித்தினதிரித்தங் சே, புன பு⁴ஞ்ஜதி போ⁴ஜனங்.

1241 அஸனங் போ⁴ஜனஞ்சேவ, ஹத்த²பாஸாபி⁴ஹாரதா;
காயவாசாபடிக்²போ, பஞ்சங்கே³ஹி பவாரணா.

- 1242 ஓத³னோ ஸத்து கும்மாலோ, மச்சோ² மங்ஸந்தி ஸப்³ப³ஸோ;
நிப்பபஞ்சேன நித்³தி³ட்ட²ங், போ⁴ஜனங் பஞ்சதா⁴ மதங்.
- 1243 ஓத³னோ தத்த² ஸத்தன்னங், த⁴ஞ்ஞானங் ஓத³னோ மதோ;
ப⁴ஜ்ஜிதானங் து த⁴ஞ்ஞானங், சுண்ணங் “ஸத்தூ”தி வுச்சதி.
- 1244 கும்மாலோ யவகும்மாலோ, மச்சோ² வுச்சதி ஓத³கோ;
மங்ஸம்பி கப்பியமங்ஸங், அயமெத்த² வினிச்ச²யோ.
- 1245 ஸாலி வீஹி யவோ கங்கு³, வரகோ கோ³து⁴மோ ததா²;
குத்³ருஸகோதி ஸத்தேதே, த⁴ஞ்ஞா த⁴ஞ்ஞேன தே³ஸிதா.
- 1246 ஸாமாகாதி³திணங் ஸப்³ப³ங், குத்³ருஸேனேவ தீ³பிதங்;
நீவாரோ ஸாலியங் வுத்தோ, வரகே வரகசோரகோ.
- 1247 ஸத்தன்னங் பன த⁴ஞ்ஞானங், ஓத³னோ யாகு³ வா பன;
அங்க³ஸம்பத்தியா யுத்தா, ஸஞ்ஜனேதி பவாரணங்.
- 1248 ஹத்தே²ன க³ஹிதோகாஸே, ஓதி⁴ங் த³ஸ்ஸேதி யா பன;
யாகு³ஸா இத⁴ ஸப்³பா³பி, ஓத³னோதி பவுச்சதி.
- 1249 அப்³பு⁴ண்ஹா பன யா யாகு³, உத்³த⁴னோரோபிதா தனு;
ஸசே ஓதி⁴ங் ந த³ஸ்ஸேதி, ந ஜனேதி பவாரணங்.
- 1250 புன ஸா ஸீதலீபு⁴தா, க⁴னபா⁴வங் க³தா ஸசே;
ஓதி⁴ங் த³ஸ்ஸேதி ஸோ புப்³பே³, தனுபா⁴வோ ந ரக்க²தி.
- 1251 தக்கத⁴ஞ்ஞரஸாதீ³னி, ஆரோபெத்வா ப³ஹுனிபி;
ப²லபண்ணகளிரானி, பக்கி²பித்வான தத்த² ச.
- 1252 தண்டு³லே முட்டி²மத்தேபி, பக்கி²பித்வா பசந்தி சே;
ஓதி⁴ங் பன ச த³ஸ்ஸேதி, ஸஞ்ஜனேதி பவாரணங்.
- 1253 ரஸே த⁴ஞ்ஞரஸே கீ²ரே, வாகிரித்வான ஓத³னங்;
“யாகு³ங் க³ண்ஹத², யாகு³”ந்தி, வத்வா தெ³ந்தி ஸசே பன.
- 1254 கிஞ்சாபி தனுகா ஹோதி, ஸஞ்ஜனேதி பவாரணங்;
தங் பசித்வா ஸசே தெ³ந்தி, யாகு³ஸங்க³ஹிதா பன.

- 1255 சு²பந்தி மச்ச²மங்ஸங் வா, தனு²காயபி யாகு³யா;
ஸசே ஸாஸபமத்தம்பி, பஞ்ஞாயதி பவாரணங்.
- 1256 மச்ச²மங்ஸரஸோ ஸுத்³தோ⁴, ஸங்ஸத்தோ ரஸயாகு³ வா;
ந சாகப்பியமங்ஸங் வா, ஸஞ்ஜனேதி பவாரணங்.
- 1257 ட²பெத்வா வுத்தத⁴ஞ்ஞானங், ஓத³னங் பன ஸப்³ப³ஸோ;
வேளுதண்டு³லகாதீ³னங், ந பவாரேதி ஓத³னோ.
- 1258 புது²கா வா ததோ தாஹி, கதப⁴த்தம்பி ஸத்துபி;
ஸுத்³தா⁴ ந பன புவா வா, பவாரெந்தி கதா³சிபி.
- 1259 க²ரபாகேன ப⁴ட்டா²னங், வீஹீனங் தண்டு³லே பன;
கொட்டெத்வா தெ³ந்தி தங் சுண்ணங், ஸத்துஸங்க³ஹிதங் மதங்.
- 1260 ப⁴ஜ்ஜிதானங் து வீஹீனங், ந பவாரெந்தி தண்டு³லா;
தேஸங் பன ச யங் சுண்ணங், தங் ஜனேதி பவாரணங்.
- 1261 க²ரபாகேன ப⁴ட்டா²னங், வீஹீனங் குண்ட³கம்பி ச;
ஸத்துனங் மோத³கோ வாபி, ஸஞ்ஜனேதி பவாரணங்.
- 1262 ஸமபாகேன ப⁴ட்டா²னங், ஸுக்கா²னங் ஆதபேன ச;
குண்ட³கங் பன வீஹீனங், ந ஜனேதி பவாரணங்.
- 1263 லாஜா வா பன தேஹேவ, கதப⁴த்தம்பி ஸத்து வா;
க²ஜ்ஜகங் பன ஸுத்³த⁴ங் வா, ந ஜனேதி பவாரணங்.
- 1264 பூரிதங் மச்ச²மங்ஸேஹி, தங் ஜனேதி பவாரணங்;
யங் கிஞ்சி ப⁴ஜ்ஜிதங் பிட்ட²ங், ந பவாரேதி ஸுத்³த⁴கங்.
- 1265 யவேஹி கதகும்மாலோ, பவாரேதி, ந சாபரோ;
மச்ச²மங்ஸேஸு வத்தப்³ப³ங், பாகடத்தா ந விஜ்ஜதி.
- 1266 கா²த³ந்தோ கப்பியங் மங்ஸங், நிஸேதே⁴தி அகப்பியங்;
ந ஸோ தேன பவாரேதி, அவத்து²த்தாதி தீ³பிதங்.
- 1267 ததே²வாகப்பியங் மங்ஸங், கா²த³ந்தோ கப்பியங் ஸசே;
நிஸேதே⁴தி பவாரேதி, வத்து²கத்தாதி வண்ணிதங்.

- 1268 மங்ஸங் பன ச கா²த³ந்தோ, கப்பியங் வா அகப்பியங்;
பவாரேதி நிலேதே⁴தி, கிஞ்சி கப்பியபோ⁴ஜனங்.
- 1269 ஸசே அகப்பியங் மங்ஸங், கா²த³ந்தோவ அகப்பியங்;
நிலேதே⁴ங் ந பவாரேதி, ததா² அஞ்ஞங் அகப்பியங்.
- 1270 ஸசே அஜ்ஜோ²ஹடங் ஹோதி, ஸித்த²மேகம்பி பி⁴க்கு²னா;
பத்தே ஹத்தே² முகே² வாபி, போ⁴ஜனங் பன விஜ்ஜதி.
- 1271 பவாரணபஹோனங் சே, படிக்கி²பதி போ⁴ஜனங்;
பவாரேதி ஸசே நத்தி², ந பவாரேதி கத்த²சி.
- 1272 கி³லித்வா ச முகே² ப⁴த்தங், ஸேஸமாதா³ய க³ச்ச²தி;
அந்தரா ச நிலேதெ⁴ந்தோ, ந பவாரேதி போ⁴ஜனங்.
- 1273 முகே² ச ப⁴த்தங் கி³லிதஞ்ச ஹத்தே²;
ப⁴த்தங் து அஞ்ஞஸ்ஸ ச தா³துகாமோ;
பத்தே ச ப⁴த்தங் புன தா³துகாமோ;
படிக்கி²பந்தோ ந பவாரிதோ ஸோ.
- 1274 அஸனஸ்ஸ உபச்சே²தா³, ந பவாரேதி ஸோதி ஹி;
கத²யந்தி மஹாபஞ்ஞா, காரணாகாரணஞ்ஞனோ.
- 1275 க³ண்ஹதோ பச்சி²மங் அங்க³ங், த³த³தோ புரிமங் பன;
உபி⁴ன்னங் அட்³ட⁴தெய்யங் சே, வினா ஹத்த²ங் பஸாரிதங்.
- 1276 தஸ்மிங் அபி⁴ஹடங் டா²னே, பவாரணபஹோனகங்;
தாதி³ஸங் பு⁴ஞ்ஜமானோவ, நிலேதே⁴தி பவாரிதோ.
- 1277 ஹத்தே² ஆதா⁴ரகே வாபி, பத்தங் ஊருஸு வா டி²தங்;
ஆஹரித்வா ஸசே பி⁴க்கு², “ப⁴த்தங் க³ண்ஹா”தி பா⁴ஸதி.
- 1278 அனந்தரே நிஸின்னோவ, தங் படிக்கி²பதோ பன;
அபி⁴ஹாரஸ்ஸ சாபா⁴வா, நத்தி² தஸ்ஸ பவாரணா.
- 1279 ப⁴த்தபச்சி²ங் பணாமெத்வா, ட²பெத்வா புரதோ “இத³ங்;
க³ண்ஹாஹி”தி ச வுத்தேபி, அயமேவ வினிச்ச²யோ.

- 1280 அனந்தரஸ்ஸ பி⁴க்கு²ஸ்ஸ, தீ³யமானே பனேதரோ;
பித³ஹந்தோ ஸகங் பத்தங், ஹத்தே²ஹி ந பவாரிதோ.
- 1281 காயேனாபி⁴ஹடங் ப⁴த்தங், படிக்கி²பதி யோ பன;
காயேன வாபி வாசாய, ஹோதி கஸ்ஸ பவாரணா.
- 1282 ஏகோ அபி⁴ஹடே ப⁴த்தே, பவாரணப⁴யா பன;
“ஆகிராகிர கொட்டெத்வா, கொட்டெத்வா பூரயா”தி ச.
- 1283 ஸசே வத³தி தஸ்ஸாபி, ந பனத்தி² பவாரணா;
இச்சேவாஹ மஹாதே²ரோ, மஹாபது³மநாமகோ.
- 1284 ஸமங்ஸஞ்ஹி ரஸங் நெத்வா, க³ண்ஹதா²தி ரஸங் வதே³;
தங் ஸுத்வா ச நிலேஸதெ⁴ந்தோ, நேவ ஹோதி பவாரிதோ.
- 1285 “க³ண்ஹ மச்ச²ரஸங் ஸாரங், க³ண்ஹ மங்ஸரஸ”ந்தி வா;
“இத³ங் க³ண்ஹா”தி வா வுத்தே, படிக்கே²பே பவாரணா.
- 1286 ஸசே மங்ஸங் விஸுங் கத்வா, “க³ண்ஹ மங்ஸரஸ”ந்தி வா;
வதே³ய்யத்தி² ச மங்ஸங் சே, படிக்கே²பே பவாரணா.
- 1287 ஓத³னேன ச புச்ச²ந்தங், “முஹுத்தங் ஆக³மேஹி”தி;
க³ஹணத்த²ங் ட²பெந்தஸ்ஸ, நேவ தஸ்ஸ பவாரணா.
- 1288 களீரபனஸாதீ³ஹி, மிஸ்ஸகங் மச்ச²மங்ஸகங்;
“களீரஸூபகங் க³ண்ஹ, பனஸப்³யஞ்ஜன”ந்தி வா.
- 1289 வத³ந்தி சே படிக்கே²பே, நேவ ஹோதி பவாரணா;
அபவாரணஹேதுனங், நாமேன பன வுத்ததோ.
- 1290 “மச்ச²ஸூப”ந்தி வா வுத்தே, “மங்ஸஸூப”ந்தி வா பன;
“இத³ங் க³ண்ஹா”தி வா வுத்தே, ஹோதியேவ பவாரணா.
- 1291 ஏஸேவ ச நயோ வுத்தோ, ஞெய்யோ மங்ஸகரம்ப³கே;
ஸப்³பே³ஸு மச்ச²மங்ஸேஹி, மிஸ்ஸகேஸு அயங் நயோ.
- 1292 ப⁴த்தஸம்மிஸ்ஸிதங் யாகு³ங், ஆஹரித்வா ஸசே பன;
“யாகு³ங் க³ண்ஹா”தி வுத்தஸ்மிங், ந பவாரேதி வாரயங்.

1293. “ப⁴த்தங் க³ண்ஹா”தி வுத்தே து, பவாரேதி படிக்கி²பங்;
யேன வாபுச்சி²தோ தஸ்ஸ, அத்தி²தாயாதி காரணங்.
1294. “யாகு³மிஸ்ஸகங் க³ண்ஹா”தி, வுத்தே தத்த² ச யாகு³ சே;
ஸமா ப³ஹுதரா வா ஸா, ந பவாரேதி ஸோ கிர.
1295. மந்தா³ யாகு³, ப³ஹுங் ப⁴த்தங், ஸசே ஹோதி பவாரணா;
இத³ங் ஸப்³புத்த² நித்³தி³ட்ட²ங், காரணங் பன து³த்³த³ஸங்.
1296. ரஸங் ப³ஹுரஸே ப⁴த்தே, கீ²ரங் வா ப³ஹுகீ²ரகே;
க³ண்ஹதா²தி விஸுங் கத்வா, தே³தி நத்தி² பவாரணா.
1297. க³ச்ச²ந்தேனேவ பொ⁴த்தப்³பங், க³ச்ச²ந்தோ சே பவாரிதோ;
பு⁴ஞ்ஜிதப்³பங் டி²தேனேவ, ட²த்வா யதி³ பவாரிதோ.
1298. உத³கங் வாபி பத்வா ஸோ, ஸசே திட்ட²தி கத்³த³மங்;
அதிரித்தங் து காரெத்வா, பு⁴ஞ்ஜிதப்³பங் ததோ புன.
1299. பீ²கே யோ நிஸீதி³த்வா, பவாரேதி ஸசே பன;
ஆஸனங் அவிசாலெத்வா, பு⁴ஞ்ஜிதப்³பங் யதா²ஸுக²ங்.
1300. ஸசே மஞ்சே நிஸீதி³த்வா, பவாரேதி ததோ பன;
இதோ ஸங்ஸரிதுங் எத்தோ, ஈஸகம்பி ந லப்³ப⁴தி.
1301. தேன மஞ்சேன நங் ஸத்³தி⁴ங், வட்டதஞ்ஞத்ர நெந்தி சே;
ஏவங் ஸப்³புத்த² ஞாதப்³பங், விஞ்ஞனா வினயஞ்ஞனா.
1302. நிபஜ்ஜித்வாவ பொ⁴த்தப்³பங், நிபன்னோ சே பவாரிதோ;
வாரேதுக்குடிகோ ஹுத்வா, பு⁴ஞ்ஜிதப்³பங் ததே²வ ச.
1303. அதா²லமேதங் ஸப்³புந்தி, வத்தப்³பங் தேன பி⁴க்கு²னா;
அதிரித்தங் கரொந்தேன, ஓனமெத்வான பா⁴ஜனங்.
1304. கப்பியங் பன காதப்³பங், ந பத்தேயேவ கேவலங்;
பச்சி²யங் யதி³ வா குண்டே³, காதுங் வட்டதி பா⁴ஜனே.
1305. பவாரிதானங் அபவாரிதானங்;
அஞ்ஞேஸமேதங் பன வட்டதேவ;

யேனாதிரித்தங் து கதங் ட²பெத்வா;
தமேவ சேகங் பரிபு⁴ஞ்ஜிதப்³ப³ங்.

1306 கப்பியங் பன காரெத்வா, பு⁴ஞ்ஜந்தஸ்ஸேவ பி⁴க்கு²னோ;
ப்³யஞ்ஜனங் வாபி யங் கிஞ்சி, பத்தே தஸ்ஸாகிரந்தி சே.

1307 அதிரித்தங் து காரெத்வா, பு⁴ஞ்ஜிதப்³ப³ங் ததா² புன;
யேன தங் அகதங் யங் வா, காதப்³ப³ங் தேன தங் விஸுங்.

1308 கதங் அகப்பியாதீ³ஹி, அதிரித்தங் து ஸத்தஹி;
ந கி³லானாதிரித்தஞ்ச, தங் ஹோதினதிரித்தகங்.

1309 யோபி பாதோவ ஏகம்பி, ஸித்த²ங் பு⁴த்வா நிஸீத³தி;
உபகட்டு²பனீதம்பி, காதுங் லப⁴தி கப்பியங்.

1310 ஆஹாரத்தா²ய யாமாதி³-காலிகங் படிக³ண்ஹதோ;
அனாமிஸங் தமேவஸ்ஸ, து³க்கடங் பரிபு⁴ஞ்ஜதோ.

1311 ததா² அனதிரித்தந்தி, ஸஞ்ஞினோ அதிரித்தகே;
தத்த² வேமதிகஸ்ஸாபி, து³க்கடங் பரிதீ³பிதங்.

1312 அனாபத்தாதிரித்தங் து, காராபெத்வான பு⁴ஞ்ஜதோ;
கி³லானஸ்ஸாதிரித்தங் வா, ததா² உம்மத்தகாதி³னோ.

1313 ஸமுட்டா²னாத³யோ ஸப்³பே³, கதி²னேன ஸமா மதா;
கப்பியாகரணஞ்சேவ, போ⁴ஜனஞ்ச க்ரியாக்ரியங்.

பட²மபவாரணகதா².

1314 யோ பனானதிரித்தேன, பவாரெய்ய பவாரிதங்;
ஜானங் ஆஸாத³னாபெக்கோ², பு⁴த்தே பாசித்தி தஸ்ஸ து.

1315 து³க்கடங் அபி⁴ஹாரே ச, க³ஹணே இதரஸ்ஸ ஹி;
அஜ்ஜோ²ஹாரபயோகே³ஸு, ஸப்³பே³ஸுபி ச து³க்கடங்.

1316 போ⁴ஜனஸ்ஸாவஸானஸ்மிங், பாசித்தி பரிதீ³பிதா;
அபி⁴ஹாரகபி⁴க்கு²ஸ்ஸ, ஸப்³ப³ங் தஸ்ஸேவ த³ஸ்ஸிதங்.

1317 பவாரிதோதி ஸஞ்ஞிஸ்ஸ, பி⁴க்கு²ஸ்மிங் அபவாரிதே;

விமதிஸ்ஸுப⁴யத்தா²பி, து³க்கடங் பரிதீ³பிதங்.

1318 அனாபத்தாதிரித்தங் வா, காராபெத்வாவ தே³தி சே;
கி³லானஸ்ஸாவஸேஸங் வா, அஞ்ஞஸ்ஸத்தா²ய தே³தி வா.

1319 ஸேஸங் ஸப்³ப³மஸேஸேன, அனந்தரஸமங் மதங்;
ஓமஸவாத³துல்யாவ, ஸமுட்டா²னாத³யோ நயா.

து³தியபவாரணகதா².

1320 கா²த³னீயங் வா போ⁴ஜனீயங் வா;
கிஞ்சி விகாலே யோ பன பி⁴க்கு²;
கா²த³தி பு⁴ஞ்ஜதி வாபி ச தங்;
ஸோ ஜினவுத்தங் தோ³ஸமுபேதி.

1321 யமாமிஸக³தஞ்செத்த², வனமூலப²லாதி³கங்;
காலிகெஸ்வஸம்மோஹத்த²ங், வேதி³தப்³ப³மித³ங் பன.

1322 மூலங் கந்த³ங் முளாலஞ்ச, மத்த²கங் க²ந்த⁴கங் தசங்;
பத்தங் புப்²ங் ப²லங் அட்டி², பிட்ட²ங் நிய்யாஸமேவ ச.

1323 மூலகா²த³னீயாதீ³னங், முக²மத்தனித³ஸ்ஸனங்;
பி⁴க்க²னங் பாடவத்தா²ய, நாமத்தே²ஸு நிபோ³த⁴த².

1324 மூலகங் கா²ரகஞ்சேவ, வத்து²லங் தண்டு³லெய்யகங்;
தம்ப³கங் ஜஜ்ஜ²ரிகஞ்ச, சச்ச வஜகலீபி ச.

1325 மூலானி ஏவமாதீ³னங், ஸாகானங் ஆமிஸே பன;
ஸங்க³ஹங் இத⁴ க³ச்ச²ந்தி, ஆஹாரத்த²ங் ப²ரந்தி ஹி.

1326 ச²ட்³டெ³ந்தி ஜரட்ட²ங் செ²த்வா, யங் தங் வஜகலிஸ்ஸ து;
தங் யாவஜீவிகங் வுத்தங், ஸேஸானங் யாவகாலிகங்.

1327 ஹலித்³தி³ ஸிங்கி³வேரஞ்ச, வசத்தங் அதிவிஸங் வசங்;
உஸீரங் ப⁴த³த³முத்தஞ்ச, ததா² கடுகரோஹிணீ.

1328 இச்சேவமாதி³கங் அஞ்ஞங், பஞ்சமூலாதி³கங் ப³ஹு;
நானப்பகாரகங் மூலங், விஞ்ஞெய்யங் யாவஜீவிகங்.

- 1329 மஸாலுபிண்ட³லாதீ³னங் , வல்லீனங் ஆலுவஸ்ஸ ச;
கந்தோ³ உப்பலஜாதீனங், ததா² பது³மஜாதியா.
- 1330 கத³லீஸிக்³கு³தாலானங், மாலுவஸ்ஸ ச வேளுயா;
ஸதாவரி கஸேருனங், கந்தோ³ அம்பா³டகஸ்ஸ ச.
- 1331 இச்சேவமாத³யோ கந்தா³;
த³ஸ்ஸிதா யாவகாலிகா;
தோ⁴தோ ஸோ ஆமிஸே வத்தோ;
கந்தோ³ யோ கீ²ரவல்லியா.
- 1332 அதோ⁴தோ லஸுணஞ்சேவ, கீ²ரகாகோலிஆத³யோ;
கந்தா³ வாக்யபதா²தீதா, விஞ்ஞெய்யா யாவஜீவிகா.
- 1333 புண்ட³ரீகமுளாலஞ்ச , முளாலங் பது³மஸ்ஸ ச;
ஏவமாதி³மனேகம்பி, முளாலங் யாவகாலிகங்.
- 1334 தாலஹிந்தாலகுந்தால-நாளிகேராதி³ஸம்ப⁴வங்;
ஹலித்³தி³ஸிங்கி³வேரானங், முளாலங் யாவஜீவிகங்.
- 1335 தாலஹிந்தாலகுந்தால-களீரோ கேதகஸ்ஸ ச;
கத³லீனாளிகேரானங், மத்த²கங் மூலகஸ்ஸ ச.
- 1336 க²ஜ்ஜரேரகவெத்தானங், உச்ச²வேளுனளாதி³னங்;
ஸத்தன்னங் பன த⁴ஞ்ஞானங், களீரோ ஸாஸபஸ்ஸ ச.
- 1337 இச்சேவமாத³யோனேகே, மத்த²கா யாவகாலிகா;
அஞ்ஞே ஹலித்³தி³ஆதீ³னங், மத்த²கா யாவஜீவிகா.
- 1338 தாலகுந்தாலகாதீ³னங், சி²ந்தி³த்வா பாதிதோ பன;
க³தோ ஜரட்ட²பு³ந்தோ³ ஸோ, ஸங்க³ஹங் யாவஜீவிகே.
- 1339 க²ந்த⁴கா²த³னீயங் நாம, உச்ச²க²ந்தோ⁴ பகாஸிதோ;
ஸாலகல்யாணியா க²ந்தோ⁴, ததா² பத²வியங் க³தோ.
- 1340 ஏவமுப்பலஜாதீனங், த³ண்ட³கோ யாவகாலிகோ;
பண்ணத³ண்டு³ப்பலாதீ³னங், ஸப்³போ³ பது³மஜாதியா.

- 1341 யாவஜீவிகஸங்கா²தா , கரமத்³தா³தி³த³ண்ட³கா;
தசேஸுச்சு²தசோவேகோ, ஸரஸோ யாவகாலிகோ.
- 1342 மூலகங் கா²ரகோ சச்சு, தம்ப³கோ தண்டு³லெய்யகோ;
வத்து²லோ சீனமுக³கோ³ ச, உம்மா வஜகலீ ததா².
- 1343 ஜஜ்ஜ²ரீ காஸமத்³தோ³ ச, ஸேல்லு ஸிக்³கு³ ச நாளிகா;
வருணோ அக்³கி³மந்தோ² ச, ஜீவந்தீ ஸுனிஸன்னகோ.
- 1344 ராஜமாலோ ச மாலோ ச, நிப்பா²வோ மிக³புப்பி²கா;
வண்டகோ பூ⁴மிலோணிதி, ஏவமாதி³மனேககங்.
- 1345 பத்தகா²த³னீயங் நாம, கதி²தங் யாவகாலிகங்;
இதரா ச மஹாலோணி, தீ³பிதா யாவஜீவிகா.
- 1346 யாவகாலிகமிச்சேவ, கதி²தங் அம்ப³பல்லவங்;
நிம்ப³ஸ்ஸ குடஜஸ்ஸாபி, பண்ணங் ஸுலஸியாபி ச.
- 1347 கப்பாஸிகபடோலானங் , தேஸங் புப்ப²ப²லானி ச;
ப²ணிஜ்ஜகஜ்ஜுகானஞ்ச, பண்ணங் தங் யாவஜீவிகங்.
- 1348 அட்ட²ன்னங் மூலகாதி³னங், புப்ப²ங் நிப்பா²வகஸ்ஸ ச;
ததா² புப்ப²ங் கரீரஸ்ஸ, புப்ப²ங் வருணகஸ்ஸ ச.
- 1349 புப்ப²ங் கஸேருகஸ்ஸாபி, ஜீவந்தீ ஸிக்³கு³புப்ப²கங்;
பது³முப்பலஜாதீனங், புப்பா²னங் கண்ணிகாபி ச.
- 1350 நாளிகேரஸ்ஸ தாலஸ்ஸ, தருணங் கேதகஸ்ஸ ச;
இச்சேவமாதி³கங் புப்ப²-மனேகங் யாவகாலிகங்.
- 1351 யாவகாலிகபுப்பா²னி, ட²பெத்வா பன ஸேஸகங்;
யாவஜீவிகபுப்ப²ந்தி, தீ³பயே ஸப்³ப³மேவ ச.
- 1352 திலகமகுலஸாலமல்லிகானங் ;
ககுத⁴கபித்த²ககுந்த³களீனங்;
குரவககரவீரபாடலீனங்;
குஸுமமித³ங் பன யாவஜீவிகங்.

- 1353 அம்பும்பா³டகஜம்பு³னங், ப²லஞ்ச பனஸஸ்ஸ ச;
மாதுலுங்க³கபித்தா²னங், ப²லங் திந்திணிகஸ்ஸ ச.
- 1354 தாலஸ்ஸ நாளிகேரஸ்ஸ, ப²லங் க²ஜ்ஜூரியாபி ச;
லபு³ஜஸ்ஸ ச சோசஸ்ஸ, மோசஸ்ஸ மது⁴கஸ்ஸ ச.
- 1355 ப³த³ரஸ்ஸ கரமத்³த³ஸ்ஸ, ப²லங் வாதிங்க³ணஸ்ஸ ச;
கும்ப⁴ண்ட³திபுஸானஞ்ச, ப²லங் ஏளாலுகஸ்ஸ ச.
- 1356 ராஜாயதனப²லங் புஸ்ஸ-ப²லங் திம்ப³ருகஸ்ஸ ச;
ஏவமாதி³மனேகம்பி, ப²லங் தங் யாவகாலிகங்.
- 1357 திப²லங் பிப்ப²லீ ஜாதி-ப²லஞ்ச கடுகப்ப²லங்;
கொ³ட்ட²ப²லங் பி³லங்க³ஞ்ச, தக்கோலமரிசானி ச.
- 1358 ஏவமாதீ³னி வுத்தானி, அவுத்தானி ச பானியங்;
ப²லானி பன க³ச்ச²ந்தி, யாவஜீவிகஸங்க³ஹங்.
- 1359 பனஸம்பா³டகட்டி²னி, ஸாலட்டி² லபு³ஜட்டி² ச;
சிஞ்சாபி³ம்ப³ப²லட்டி²னி, பொக்க²ரட்டி² ச ஸப்³ப³ஸோ.
- 1360 க²ஜ்ஜூரிகேதகாதீ³னங் , ததா² தாலப²லட்டி² ச;
ஏவமாதீ³னி க³ச்ச²ந்தி, யாவகாலிகஸங்க³ஹங்.
- 1361 புன்னாக³மது⁴கட்டி²னி, ஸேல்லட்டி² திப²லட்டி² ச;
ஏவமாதீ³னி அட்டி²னி, நித்தி³ட்டா²னி அனாமிஸே.
- 1362 ஸத்தன்னங் பன த⁴ஞ்ஞானங், அபரண்ணானமேவ ச;
பிட்ட²ங் பனஸஸாலானங், லபு³ஜம்பா³டகஸ்ஸ ச.
- 1363 தாலபிட்ட²ங் ததா² தோ⁴தங், பிட்ட²ங் யங் கீ²ரவல்லியா;
ஏவமாதி³மனேகம்பி, கதி²தங் யாவகாலிகங்.
- 1364 அதோ⁴தங் தாலபிட்ட²ஞ்ச, பிட்ட²ங் யங் கீ²ரவல்லியா;
அஸ்ஸக³ந்தா⁴தி³பிட்ட²ஞ்ச, ஹோதி தங் யாவஜீவிகங்.
- 1365 நிய்யாஸோ உச்ச²னிப்³ப³த்தோ, ஏகோ ஸத்தாஹகாலிகோ;
அவஸேஸோ ச ஹிங்கா³தி³, நிய்யாஸோ யாவஜீவிகோ.

1366 மூலாதீஸு மயா கிஞ்சி, முக²மத்தங் நித³ஸ்ஸிதங்;
ஏதஸ்ஸேவானுஸாரேன, ஸேஸோ ஞெய்யோ விபா⁴வினா.

1367 “பு⁴ஞ்ஜிஸ்ஸாமி விகாலே”தி, ஆமிஸங் படிக³ண்ஹதோ;
காலே விகாலஸஞ்ஞிஸ்ஸ, காலே வேமதிகஸ்ஸ ச.

1368 து³க்கடங், காலஸஞ்ஞிஸ்ஸ, அனாபத்தி பகாஸிதா;
இத³ங் ஏளகலோமேன, ஸமுட்டா²னாதி³னா ஸமங்.

விகாலபோ⁴ஜனகதா².

1369 போ⁴ஜனங் ஸன்னிதி⁴ங் கத்வா, கா²த³னங் வாபி யோ பன;
பு⁴ஞ்ஜெய்ய வாபி கா²தெ³ய்ய, தஸ்ஸ பாசித்தியங் ஸியா.

1370 பி⁴க்கு² யங் ஸாமணேரானங், பரிச்சஜத்யனாலயோ;
நித³ஹித்வா ஸசே தஸ்ஸ, தெ³ந்தி தங் புன வட்டதி.

1371 ஸயங் படிக³க³ஹெத்வான, அபரிச்சத்தமேவ யங்;
து³தியே தி³வஸே தஸ்ஸ, நிஹிதங் தங் ந வட்டதி.

1372 ததோ அஜ்ஜோ²ஹரந்தஸ்ஸ, ஏகஸித்த²ம்பி பி⁴க்கு²னோ;
பாசித்தி கதி²தா ஸுத்³தா⁴, ஸுத்³த⁴சித்தேன தாதி³னா.

1373 அகப்பியேஸு மங்ஸேஸு, மனுஸ்ஸஸ்ஸேவ மங்ஸகே;
து²ல்லச்சயேன பாசித்தி, து³க்கடேன ஸஹேதரே.

1374 யாமகாலிகஸங்கா²தங் , பாசித்தி பரிபு⁴ஞ்ஜதோ;
து³க்கடாபத்தியா ஸத்³தி⁴ங், ஆஹாரத்தா²ய பு⁴ஞ்ஜதோ.

1375 ஸசே பவாரிதோ ஹுத்வா, அன்னங் அனதிரித்தகங்;
பு⁴ஞ்ஜதோ பகதங் தஸ்ஸ, ஹோதி பாசித்தியத்³வயங்.

1376 து²ல்லச்சயேன ஸத்³தி⁴ங் த³வே, மங்ஸே மானுஸகே ஸியுங்;
ஸேஸே அகப்பியே மங்ஸே, து³க்கடேன ஸஹ த³வயங்.

1377 யாமகாலிகஸங்கா²தங், பு⁴ஞ்ஜதோ ஸதி பச்சயே;
ஸாமிஸேன முகே²ன த³வே, ஏகமேவ நிராமிஸங்.

1378.

தமேவஜ்ஜோ²ஹரந்தஸ்ஸ, ஆஹாரத்தா²ய கேவலங்;
த்³வீஸு தேஸு விகப்பேஸு, து³க்கடங் பன வட்³ட⁴தி.

1379 விகாலே பு⁴ஞ்ஜதோ ஸுத்³த⁴ங், ஸன்னிதி⁴பச்சயாபி ச;
விகாலபோ⁴ஜனா சேவ, ஹோதி பாசித்தியத்³வயங்.

1380 மங்ஸே து²ல்லச்சயஞ்சேவ, து³க்கடம்பி ச வட்³ட⁴தி;
மனுஸ்ஸமங்ஸே ஸேஸே ச, யதா²னுக்கமதோ த்³வயங்.

1381 நத்தே²வானதிரித்தம்பி, விகாலே பரிபு⁴ஞ்ஜதோ;
தோ³ஸோ ஸப்³ப³விகப்பேஸு, பி⁴க்கு²னோ தன்னிமித்தகோ.

1382 விகாலபச்சயா வாபி, ந தோ³ஸோ யாமகாலிகே;
ஸத்தாஹகாலிகங் யாவ-ஜீவிகங் படிக³ண்ஹதோ.

1383 ஆஹாரஸ்ஸேவ அத்தா²ய, க³ஹணே து³வித⁴ஸ்ஸ து;
அஜ்ஜோ²ஹாரபயோகே³ஸு, து³க்கடங் து நிராமிஸே.

1384 அத² ஆமிஸஸங்ஸட்ட²ங், க³ஹெத்வா ட²பிதங் ஸசே;
புன அஜ்ஜோ²ஹரந்தஸ்ஸ, பாசித்தேவ பகாஸிதா.

1385 காலோ யாமோ ச ஸத்தாஹங், இதி காலத்தயங் இத³ங்;
அதிக்கமயதோ தோ³ஸோ, காலங் தங் தங் து காலிகங்.

1386 அத்தனா தீணி ஸம்பி⁴ன்ன-ரஸானி இதரானி ஹி;
ஸபா⁴வமுபனேதேவ, யாவகாலிகமத்தனோ.

1387 ஏவமேவ ச ஸேஸேஸு, காலிகேஸு வினித்³தி³ஸே;
இமேஸு பன ஸப்³பே³ஸு, காலிகேஸு சதூஸ்வபி.

1388 காலிகத்³வயமாதி³ம்ஹி, அந்தோவுத்த²ஞ்ச ஸன்னிதி⁴;
உப⁴யம்பி ந ஹோதேவ, பச்சி²மங் காலிகத்³வயங்.

1389 அகப்பியாய குடியா, வத்தே²னந்தத்³வயேன தங்;
க³ஹிதங் தத³ஹே வாபி, த்³வயங் புப்³ப³ங் ந வட்டதி.

1390 முக²ஸன்னிதி⁴ நாமாயங், அந்தோவுத்த²ங் ந கப்பதி;
இதி வுத்தங் த³ள்ஹங் கத்வா, மஹாபச்சரியங் பன.

1391 ந தோ³ஸோ நித³ஹித்வாபி, பட²மங் காலிகத்தயங்;
தங் தங் ஸகங் ஸகங் கால-மனதிக்கம்ம பு⁴ஞ்ஜதோ.

1392 ததா² உம்மத்தகாதீ³னங், அனாபத்தி பகாஸிதா;
ஸமமேளகலோமேன, ஸமுட்டா²னாதி³னா இத³ங்.

ஸன்னிதி⁴காரகதா².

1393 போ⁴ஜனானி பணீதானி, அகி³லானோ பனத்தனோ;
அத்தா²ய விஞ்ஞாபெத்வான, பாசித்தி பரிபு⁴ஞ்ஜதோ.

1394 “ஸப்பினா தே³ஹி ப⁴த்தங் மே, ஸஸப்பிங் ஸப்பிமிஸ்ஸகங்;
ஸப்பிப⁴த்தஞ்ச தே³ஹி”தி, விஞ்ஞாபெந்தஸ்ஸ து³க்கடங்.

1395 விஞ்ஞாபெத்வா ததா² தங் சே, து³க்கடங் படிக³ண்ஹதோ;
புன அஜ்ஜோ²ஹரந்தஸ்ஸ, பாசித்தி பரியாபுதா.

1396 ஸுத்தா⁴னி ஸப்பிஆதீ³னி, விஞ்ஞாபெத்வான பு⁴ஞ்ஜதோ;
ஸேகி²யேஸுபி விஞ்ஞத்தி, து³க்கடங் பரிதீ³பயே.

1397 தஸ்மா பணீதஸங்ஸட்ட²ங், விஞ்ஞாபெத்வாவ பு⁴ஞ்ஜதோ;
ஸத்தத⁴ஞ்ஞமயங் ப⁴த்தங், பாசித்தியமுதீ³ரயே.

1398 ஸசே “கோ³ஸப்பினா மய்ஹங், தே³ஹி ப⁴த்த”ந்தி யாசிதோ;
அஜியா ஸப்பிஆதீ³ஹி, விஸங்கேதங் த³தா³தி சே.

1399 “ஸப்பினா தே³ஹி” வுத்தோ சே, நவனீதாதி³கேஸுபி;
தே³தி அஞ்ஞதரேனஸ்ஸ, விஸங்கேதந்தி தீ³பிதங்.

1400 யேன யேன ஹி விஞ்ஞத்தங், தஸ்மிங் மூலேபி தஸ்ஸ வா;
லத்³தே⁴பி பன தங் லத்³த⁴ங், ஹோதியேவ ந அஞ்ஞதா².

1401 ட²பெத்வா ஸப்பிஆதீ³னி, ஆக³தானி ஹி பாளியங்;
அஞ்ஞேஹி விஞ்ஞாபெந்தஸ்ஸ, ஹோதி ஆபத்தி து³க்கடங்.

1402 ஸப்³பே³ஹி ஸப்பிஆதீ³ஹி, விஞ்ஞாபெத்வாவ ஏகதோ;
பு⁴ஞ்ஜதேகரஸங் கத்வா, நவ பாசித்தியோ மதா.

1403.

அகப்பியேன வுத்தேபி, ஸப்பினா தே³தி தேன சே;
க³ஹணே பரிபோ⁴கே³பி, து³க்கடங் பரிதீ³பிதங்.

1404 கி³லானஸ்ஸ கி³லானோதி, ஸஞ்ஞினோ விமதிஸ்ஸ வா;
து³க்கடங் முனினா வுத்தங், அனாபத்தி பகாஸிதா.

1405 கி³லானகாலே விஞ்ஞத்த-மகி³லானஸ்ஸ பு⁴ஞ்ஜதோ;
கி³லானஸ்ஸாவஸேஸங் வா, ஞாதகாதீ³னமேவ வா.

1406 இத³ங் சதுஸமுட்டா²னங், காயதோ காயவாசதோ;
காயசித்தா ததா² காய-வாசாசித்தத்தயாபி ச.

பணீதபோ⁴ஜனகதா².

1407 அதி³ன்னஞ்ஹி முக²த்³வாரங், ஆஹாரங் ஆஹரெய்ய யோ;
த³ந்தபோனோத³கங் ஹித்வா, தஸ்ஸ பாசித்தியங் ஸியா.

1408 ஹத்த²பாஸோபி⁴னீஹாரோ, மஜ்ஜி²முச்சாரணக்க²மோ;
மனுஸ்ஸோ வாமனுஸ்ஸோ வா, தே³தி காயாதி³னா திதா⁴.

1409 படிக்க³ண்ஹாதி தங் பி⁴க்கு², தீ³யமானங் ஸசே த்³விதா⁴;
ஏவங் பஞ்சங்க³ஸங்யோகே³, க³ஹணங் தஸ்ஸ ரூஹதி.

1410 தா³யகோ க³க³னட்டோ² சே, பூ⁴மட்டோ² சேதரோ ஸியா;
பூ⁴மட்ட²ஸ்ஸ ச ஸீஸேன, க³க³னட்ட²ஸ்ஸ தே³ஹினோ.

1411 யமாஸன்னதரங் அங்க³ங், ஓரிமந்தேன தஸ்ஸ து;
தா³துங் வாபி க³ஹேதுங் வா, வினா ஹத்த²ங் பஸாரிதங்.

1412 ஹத்த²பாஸோ மினேதப்³போ³, நக³ட்டா²தீ³ஸ்வயங் நயோ;
ஏவரூபே பன டா²னே, ட²த்வா சே தே³தி வட்டதி.

1413 பக்கீ² வா முக²துண்டே³ன, ஹத்தீ² ஸொண்டா³ய வா பன;
ஸசே யங் கிஞ்சி புப்ப²ங் வா, ப²லங் வா தே³தி வட்டதி.

1414 பு⁴த்தப்³யஞ்ஜனபுண்ணானி, பா⁴ஜனானி ப³ஹுனிபி;
ஸீஸேனாதா³ய பி⁴க்கு²ஸ்ஸ, க³ந்த்வா கஸ்ஸசி ஸந்திகங்.

1415 ஈஸகங் பன ஓனத்வா, “க³ண்ஹா”தி யதி³ பா⁴ஸதி;

தேன ஹத்த²ங் பஸாரெத்வா, ஹெட்டி²மங் பன பா⁴ஜனங்.

1416 படிச்சி²தப்³ப³ங் தங் ஏக- தே³ஸேனாபி ச பி⁴க்கு²னா;
ஹொந்தி எத்தாவதா தானி, க³ஹிதானேவ ஸப்³ப³ஸோ.

1417 ததோ பட்டா²ய தங் ஸப்³ப³ங், ஓரோபெத்வா யதா²ஸுக²ங்;
உக்³கா⁴டெத்வா ததோ இட்ட²ங், க³ஹேதுங் பன வட்டதி.

1418 பச்சி²ஆதி³ம்ஹி வத்தப்³ப³-மத்தி² கிங் ஏகபா⁴ஜனே;
காஜப⁴த்தங் ஹரந்தோ சே, ஓனத்வா தே³தி வட்டதி.

1419 திங்ஸஹத்தோ² ஸியா வேளு, அந்தேஸு ச து³வே க⁴டா;
ஸப்பினோ, க³ஹிதேகஸ்மிங், ஸப்³ப³ங் க³ஹிதமேவ தங்.

1420 ப³ஹுபத்தா ச மஞ்சே வா, பீடே² வா கடஸாரகே;
ட²பிதா தா³யகோ ஹத்த²-பாஸே ட²த்வான தே³தி சே.

1421 படிக்க³ஹணஸஞ்ஞாய, மஞ்சாதீ³னி ஸசே பன;
நிஸீத³தி பு³ஸித்வா யோ, யஞ்ச பத்தேஸு தீ³யதி.

1422 க³ஹிதங் தேன தங் ஸப்³ப³ங், ஹோதியேவ ந ஸங்ஸயோ;
படிக்க³ஹெஸ்ஸாமிச்சேவ, மஞ்சாதீ³னி ஸசே பன.

1423 க³ஹிதங் ஹோதி தங் ஸப்³ப³ங், ஆருஹித்வா நிஸீத³தி;
ஆஹச்ச குச்சி²யா குச்சி²ங், டி²தா பத்தா ஹி பூ⁴மியங்.

1424 யங் யங் அங்கு³லியா வாபி, பு³ஸித்வா ஸூசியாபி வா;
நிஸின்னோ தத்த² தத்தே²வ, தீ³யமானங் து வட்டதி.

1425 கடஸாரே மஹந்தஸ்மிங், ததா² ஹத்த²த்த²ராதி³ஸு;
க³ண்ஹதோ ஹத்த²பாஸஸ்மிங், விஜ்ஜமானே து வட்டதி.

1426 தத்த²ஜாதகபண்ணேஸு, க³ஹேதுங் ந ச வட்டதி;
ந பனேதானி காயேன, படிப³த்த³தா⁴னி ஹொந்தி ஹி.

1427 அஸங்ஹாரிமபாஸானே , ப²லகே வாபி தாதி³ஸே;
கா²ணுப³த்த³தே⁴பி வா மஞ்சே, க³ஹணங் நேவ ஞுஹதி.

1428.

திந்திணிகாதி³பண்ணேஸு, பூ⁴மியங் பத்த²டேஸு வா;
தா⁴ரேதுமஸமத்த²த்தா, க³ஹணங் ந ச ஞுஹதி.

1429 ஹத்த²பாஸமதிக்கம்ம, தீ³க⁴த³ண்டே³ன தே³தி சே;
வத்தப்³போ³ பி⁴க்கு²னாக³ந்த்வா, தே³ஹீதி பரிவேஸகோ.

1430 ஸசே பத்தே ரஜோ ஹோதி, தோ⁴விதப்³போ³ ஜலே ஸதி;
தஸ்மிங் அஸதி புஞ்சி²த்வா, க³ஹேதப்³போ³ அஸேஸதோ.

1431 பிண்டா³ய விசரந்தஸ்ஸ, ரஜங் பத்தி சே பன;
பி⁴க்கா² படிக்க³ஹேத்வாவ, க³ஹேதப்³பா³ விஜானதா.

1432 அப்படிக்க³ஹிதே பி⁴க்கு²ங், க³ண்ஹதோ பன து³க்கடங்;
படிக்க³ஹேத்வானாபத்தி, பச்சா² தங் பரிபு⁴ஞ்ஜதோ.

1433 “படிக்க³ஹேத்வா தே³தா²”தி, வுத்தே தங் வசனங் பன;
அஸுத்வானாதி³யித்வா வா, தெ³ந்தி சே நத்தி² து³க்கடங்.

1434 பச்சா² படிக்க³ஹேத்வாவ, க³ஹேதப்³பங் விஜானதா;
ஸசே ரஜங் நிபாதேதி, மஹாவாதோ ததோ ததோ.

1435 ந ஸக்கா ச ஸியா பி⁴க்க²ங், க³ஹேதுங் யதி³ பி⁴க்கு²னா;
அஞ்ஞஸ்ஸ தா³துகாமேன, க³ஹேதுங் பன வட்டதி.

1436 ஸாமணேரஸ்ஸ தங் த³த்வா, தி³ன்னங் வா தேன தங் புன;
தஸ்ஸ விஸ்ஸாஸதோ வாபி, பு⁴ஞ்ஜிதுங் பன வட்டதி.

1437 பி⁴க்கா²சாரே ஸசே ப⁴த்தங், ஸரஜங் தே³தி பி⁴க்கு²னோ;
“படிக்க³ஹேத்வா பி⁴க்க²ங் த்வங், க³ண்ஹ வா பு⁴ஞ்ஜ வா”தி ச.

1438 வத்தப்³போ³ ஸோ ததா² தேன, கத்தப்³பஞ்சேவ பி⁴க்கு²னா;
ரஜங் உபரி ப⁴த்தஸ்ஸ, தஸ்ஸுப்லவதி சே பன.

1439 கஞ்ஜிகங் து பவாஹேத்வா, பு⁴ஞ்ஜிதப்³பங் யதா²ஸுக²ங்;
அந்தோ படிக்க³ஹேதப்³பங், பவிட்ட²ங் து ஸசே பன.

1440 பதிதங் ஸுக்க²ப⁴த்தே சே, அபனீயாவ தங் ரஜங்;
ஸுகு²மங் சே ஸப⁴த்தம்பி, பு⁴ஞ்ஜிதப்³பங் யதா²ஸுக²ங்.

- 1441 உளுங்கேனாஹரித்வாபி , தெ³ந்தஸ்ஸ பட²மங் பன;
தே²வோ உளுங்கதோ பத்தே, ஸசே பததி வட்டதி.
- 1442 ப⁴த்தே ஆகிரமானே து, சருகேன ததோ பன;
மஸி வா சா²ரிகா வாபி, ஸசே பததி பா⁴ஜனே.
- 1443 தஸ்ஸ சாபி⁴ஹடத்தாபி, ந தோ³ஸோ உபலப்³ப⁴தி;
அனந்தரஸ்ஸ பி⁴க்கு²ஸ்ஸ, தீ³யமானங் து பத்ததோ.
- 1444 உப்பபி⁴த்வா ஸசே பத்தே, இதரஸ்ஸ ச பி⁴க்கு²னோ;
பததி வட்டதேவாயங், படிக்க³ஹிதமேவ தங்.
- 1445 பாயாஸஸ்ஸ ச பூரெத்வா, பத்தங் சே தெ³ந்தி பி⁴க்கு²னோ;
உண்ஹத்தா பன தங் ஹெட்டா², க³ஹேதுங் ந ச ஸக்கதி.
- 1446 வட்டதீதி ச நித்³தி³ட்ட²ங், க³ஹேதுங் முக²வட்டியங்;
ந ஸக்கா சே க³ஹேதப்³போ³, ததா² ஆதா⁴ரகேனபி.
- 1447 ஸசே ஆஸனஸாலாயங், க³ஹேத்வா பத்தமத்தனோ;
நித்³தா³யதி நிஸின்னோவ, தீ³யமானங் ந ஜானதி.
- 1448 நேவாஹரியமானங் வா, அப்படிக்க³ஹிதமேவ தங்;
ஆபோ⁴க³ங் பன கத்வா சே, நிஸின்னோ ஹோதி வட்டதி.
- 1449 ஸசே ஹத்தே²ன முஞ்சித்வா, பத்தங் ஆதா⁴ரகம்பி வா;
பேல்லெத்வா பன பாதே³ன, நித்³தா³யதி ஹி வட்டதி.
- 1450 பாதே³னாதா⁴ரகங் அக்க-மித்வாபி படிக³ண்ஹதோ;
ஜாக³ரஸ்ஸாபி ஹோதேவ, க³ஹணஸ்மிங் அனாத³ரோ.
- 1451 தஸ்மா தங் ந ச காதப்³ப³ங், பி⁴க்கு²னா வினயஞ்ஞனா;
யங் தீ³யமானங் பததி, க³ஹேதுங் தங் து வட்டதி.
- 1452 ப⁴ஞ்ஜந்தானஞ்ச த³ந்தா வா, கீ²யந்திபி நகா²பி வா;
ததா² பத்தஸ்ஸ வண்ணோ வா, அப்³போ³ஹாரனயோ அயங்.
- 1453 ஸத்த²கேனுச்ச²ஆதீ³னி, பா²லெந்தானங் ஸசே மலங்;
பஞ்ஞாயதி ஹி தங் தேஸு, ஸியா நவஸமுட்டி²தங்.

- 1454 படிக்க³ஹெத்வா தங் பச்சா², கா²தி³தப்³ப³ங் து பி⁴க்கு²னா;
ந பஞ்ஞாயதி சே தஸ்மிங், மலங் வட்டதி கா²தி³துங்.
- 1455 பிஸந்தானம்பி பே⁴ஸஜ்ஜங், கொட்டெந்தானம்பி வா ததா²;
நிஸதோ³து³க்க²லா³தீ³னங், கீ²யனேபி அயங் நயோ.
- 1456 பே⁴ஸஜ்ஜத்தா²ய தாபெத்வா, வாஸிங் கீ²ரே கி²பந்தி சே;
உட்டே²தி நீலிகா தத்த², ஸத்த²கே விய நிச்ச²யோ.
- 1457 ஸசே ஆமகதக்கே வா, கீ²ரே வா பக்கி²பந்தி தங்;
ஸாமபாகனிமித்தம்ஹா, ந து முச்சதி து³க்கடா.
- 1458 பிண்டா³ய விசரந்தஸ்ஸ, வஸ்ஸகாலேஸு பி⁴க்கு²னோ;
பத்தே பததி சே தோயங், கிலிட்ட²ங் காயவத்த²தோ.
- 1459 பச்சா² படிக்க³ஹெத்வா தங், பு⁴ஞ்ஜிதப்³ப³ங் யதா²ஸுக²ங்;
ஏஸேவ ச நயோ வுத்தோ, ருக்க²முலேபி பு⁴ஞ்ஜதோ.
- 1460 ஸத்தாஹங் பன வஸ்ஸந்தே, தே³வே ஸுத்³த⁴ங் ஜலங் ஸசே;
அப்³போ⁴காலேஸபி வா பத்தே, தோயங் பததி வட்டதி.
- 1461 ஓத³னங் பன தெ³ந்தேன, ஸாமணேரஸ்ஸ பி⁴க்கு²னா;
தா³தப்³போ³ அச்ச²பந்தேன, தஸ்ஸ பத்தக³தோத³னங்.
- 1462 படிக்க³ஹெத்வா வா பத்தங், தா³தப்³போ³ தஸ்ஸ ஓத³னோ;
சு²பித்வா தே³தி சே ப⁴த்தங், தங் பனுக்க³ஹிதங் ஸியா.
- 1463 அஞ்ஞஸ்ஸ தா³துகாமேன, பரிச்சத்தங் ஸசே பன;
யாவ ஹத்த²க³தங் தாவ, படிக்க³ஹிதமேவ தங்.
- 1464 “க³ண்ஹா”தி நிரபெக்கோ²வ, பத்தமாதா⁴ரகே டி²தங்;
ஸசே வத³தி பச்சா² தங், படிக்க³ண்ஹெய்ய பண்டி³தோ.
- 1465 ஸாபெக்கோ²யேவ யோ பத்தங், ட²பெத்வாதா⁴ரகே பன;
“எத்தோ புவம்பி ப⁴த்தங் வா, கிஞ்சி க³ண்ஹா”தி பா⁴ஸதி.
- 1466 ஸாமணேரோபி தங் ப⁴த்தங், தோ⁴வித்வா ஹத்த²மத்தனோ;
அத்தபத்தக³தங் ப⁴த்தங், அபு²ஸித்வா ஸசே பன.

- 1467 பக்கி²பந்தோ ஸதக்க²த்துங், உத்³த⁴ரித்வாபி க³ண்ஹது;
தங்²படிக்க³ஹணே கிச்சங், புன தஸ்ஸ ந விஜ்ஜதி.
- 1468 அத்தபத்தக³தங் ப⁴த்தங், பு²ஸித்வா யதி³ க³ண்ஹதி;
பச்சா² படிக்க³ஹேதப்³பங், ஸங்ஸட்ட²த்தா பரேன தங்.
- 1469 பி⁴க்க²னங் யாகு³ஆதீ³னங், பசனே பா⁴ஜனே பன;
பக்கி²பித்வா ட²பெந்தேன, அஞ்ஞஸ்ஸத்தா²ய ஓத³னங்.
- 1470 பா⁴ஜனுபரி ஹத்தே²ஸு, ஸாமணேரஸ்ஸ பக்கி²பே;
பதிதங் ஹத்த²தோ தஸ்மிங், ந கரோதி அகப்பியங்.
- 1471 பரிச்சத்தஞ்ஹி தங் ஏவங், அகத்வாகிரதேவ சே;
பு⁴ஞ்ஜிதப்³பங் து தங் கத்வா, பத்தங் விய நிராமிஸங்.
- 1472 ஸசே யாகு³குடங் புண்ணங், ஸாமணேரோ ஹி து³ப்³பலோ;
பி⁴க்கு²ங் படிக்க³ஹாபேதுங், ந ஸக்கோதி ஹி தங் புன.
- 1473 குடஸ்ஸ கீ³வங் பத்தஸ்ஸ, ட²பெத்வா முக²வட்டியங்;
பி⁴க்கு²னா உபனீதஸ்ஸ, ஆவஜ்ஜேதி ஹி வட்டதி.
- 1474 அத² வா பூ⁴மியங்யேவ, ஹத்தே² பி⁴க்கு² ட²பேதி சே;
ஆரோபேதி பவட்டெத்வா, தத்த² சே பன வட்டதி.
- 1475 ப⁴த்தபச்ச²ச்ச²பா⁴ரேஸு, அயமேவ வினிச்ச²யோ;
த்³வே தயோ ஸாமணேரா வா, தெ³ந்தி சே க³ஹணூபக³ங்.
- 1476 பா⁴ரமேகஸ்ஸ பி⁴க்கு²ஸ்ஸ, க³ஹேதுங் பன வட்டதி;
ஏகேன வா ததா² தி³ன்னங், க³ண்ஹந்தி த்³வே தயோபி வா.
- 1477 மஞ்சஸ்ஸ பாதே³ பீ²ஸ்ஸ, பாதே³ தேலக⁴டாதி³கங்;
லக்³கெந்தி தத்த² பி⁴க்கு²ஸ்ஸ, வட்டதேவ நிஸீதி³துங்.
- 1478 அப்படிக்க³ஹிதங் ஹெட்டா²-மஞ்சே சே தேலதா²லகங்;
ஸம்முஜ்ஜந்தோ ச க⁴ட்டேதி, ந பனுக்க³ஹிதங் ஸியா.
- 1479 படிக்க³ஹிதஸஞ்ஞாய, அப்படிக்க³ஹிதங் பன;
க³ண்ஹித்வா புன தங் ஞத்வா, ட²பேதுங் தத்த² வட்டதி.

- 1480 விவரித்வா ஸசே புப்³பே³, ட²பிதங் பிஹிதம்பி ச;
ததே²வ தங் ட²பேதப்³பங், கத்தப்³பங் ந பனஞ்ஞதா².
- 1481 ப³ஹி ட²பேதி சே தேன, சு²பிதப்³பங் ந தங் புன;
யதி³ சு²பதி சே ஞத்வா, தங் பனுக்³ஹிதங் ஸியா.
- 1482 படிக்க³ஹிததேலஸ்மிங், உட்டே²தி யதி³ கண்ணகா;
ஸிங்கீ³வேராதி³கே மூலே, க⁴னசுண்ணம்பி வா ததா².
- 1483 தங்ஸமுட்டா²னதோ ஸப்³பங், தஞ்ஞேவாதி பவுச்சதி;
படிக்க³ஹணகிச்சங் து, தஸ்மிங் புன ந விஜ்ஜதி.
- 1484 தாலங் வா நாளிகேரங் வா, ஆருள்ஹோ கோசி புக்³கலோ;
தத்ரட்டோ² தாலபிண்டி³ங் ஸோ, ஓதாரெத்வான ரஜ்ஜயா.
- 1485 ஸசே வத³தி “க³ண்ஹா”தி, ந க³ஹேதப்³பமேவ ச;
தமஞ்ஞோ பன பூ⁴மட்டோ², க³ஹேத்வா தே³தி வட்டதி.
- 1486 சி²ந்தி³த்வா சே வதிங் உச்ச²ங், ப²லங் வா தே³தி க³ண்ஹிதுங்;
த³ண்ட³கே அபு²ஸித்வாவ, நிக்³கதங் பன வட்டதி.
- 1487 ஸசே ந புது²லோ ஹோதி, பாகாரோ அதிஉச்சகோ;
அந்தொட்டி²தப்³ஹிட்டா²னங், ஹத்த²பாஸோ பஹோதி சே.
- 1488 உத்³த⁴ங் ஹத்த²ஸதங் க³ந்த்வா, ஸம்பத்தங் புன தங் பன;
க³ண்ஹதோ பி⁴க்கு²னோ தோ³ஸோ, கோசி நேவூபலப்³ப⁴தி.
- 1489 பி⁴க்கு²னோ ஸாமணேரங் து, க²ந்தே⁴ன வஹதோ ஸசே;
ப²லங் க³ஹேத்வா தத்தே²வ, நிஸின்னோ தே³தி வட்டதி.
- 1490 அபரோபி வஹந்தோவ, பி⁴க்கு²ங் யோ கோசி புக்³கலோ;
ப²லங் க²ந்தே⁴ நிஸின்னஸ்ஸ, பி⁴க்கு²னோ தே³தி வட்டதி.
- 1491 க³ஹேத்வா ப²லினிங் ஸாக²ங், சா²யத்த²ங் யதி³ க³ச்ச²தி;
புன சித்தே ஸமுப்பன்னே, கா²தி³துங் பன பி⁴க்கு²னோ.
- 1492 ஸாக²ங் படிக்க³ஹாபெத்வா, ப²லங் கா²த³தி வட்டதி;
மக்கி²கானங் நிவாரத்த²ங், க³ஹிதாயப்யயங் நயோ.

- 1493 கப்பியங் பன காரெத்வா, படிக்க³ண்ணாதி தங் புன;
பொ⁴த்துகாமோ ஸசே மூல-க³ஹணங்யேவ வட்டதி.
- 1494 மாதாபிதூனமத்தா²ய, க³ஹெத்வா ஸப்பிஆதி³கங்;
க³ச்ச²ந்தோ அந்தராமக்கே³, யங் இச்ச²தி ததோ பன.
- 1495 தங் ஸோ படிக்க³ஹாபெத்வா, பரிபு⁴ஞ்ஜதி வட்டதி;
தங் படிக்க³ஹிதங் மூல-க³ஹணங்யேவ வட்டதி.
- 1496 ஸாமணேரஸ்ஸ பாதெ²ய்ய-தண்டு³லே பி⁴க்கு² க³ண்ணாதி;
பி⁴க்கு²ஸ்ஸ ஸாமணேரோபி, க³ஹெத்வா பன க³ச்ச²தி.
- 1497 தண்டு³லேஸு ஹி கீ²ணேஸு, அத்தனா க³ஹிதேஸு ஸோ;
ஸசே யாகு³ங் பசித்வான, தண்டு³லேஹிதரேஹிபி.
- 1498 உபி⁴ன்னங் த³வீஸு பத்தேஸு, ஆகிரித்வா பனத்தனோ;
யாகு³ங் பி⁴க்கு²ஸ்ஸ தங் த³த்வா, ஸயங் பிவதி தஸ்ஸ சே.
- 1499 ஸன்னிதி⁴பச்சயா நேவ, ந உக்க³ஹிதகாரணா;
ஸாமணேரஸ்ஸ பீதத்தா, தோ³ஸோ பி⁴க்கு²ஸ்ஸ விஜ்ஜதி.
- 1500 மாதாபிதூனமத்தா²ய, தேலாதி³ங் ஹரதோபி ச;
ஸாக²ங் சா²யாதி³அத்தா²ய, இமஸ்ஸ ந விஸேஸதா.
- 1501 தஸ்மா ஹிஸ்ஸ விஸேஸஸ்ஸ, சிந்தேதப்³ப³ங் து காரணங்;
தஸ்ஸ ஸாலயபா⁴வங் து, விஸேஸங் தக்கயாமஹங்.
- 1502 தண்டு³லே பன தோ⁴வித்வா, நிச்சாலேதுஞ்ஹி சேலகோ;
ந ஸக்கோதி ஸசே தே ச, தண்டு³லே பா⁴ஜனம்பி ச.
- 1503 படிக்க³ஹெத்வா தோ⁴வித்வா, ஆரோபெத்வா பனுத்³த⁴னங்;
பி⁴க்கு²னாக்³கி³ ந காதப்³போ³, விவரித்வாபி பக்கதா.
- 1504 ஞாதப்³பா³ பக்ககாலஸ்மிங், ஓரோபெத்வா யதா²ஸுக²ங்;
பு⁴ஞ்ஜிதப்³ப³ங், ந பச்ச²ஸ்ஸ, படிக்க³ஹணகாரணங்.
- 1505 ஆரோபெத்வா ஸசே பி⁴க்கு², உத்³த⁴னங் ஸுத்³த⁴பா⁴ஜனங்;
உத³கங் யாகு³அத்தா²ய, தாபேதி யதி³ வட்டதி.

- 1506 தத்தே பனுத³கே கோசி, சே பக்கி²பதி தண்டு³லே;
ததோ பட்டா²ய தேனக்³கி³, ந காதப்³போ³வ பி⁴க்கு²னா.
- 1507 படிக்க³க³ஹெத்வா தங் யாகு³ங், பாதுங் வட்டதி பி⁴க்கு²னோ;
ஸசே பசதி பச்சா² தங், ஸாமபாகா ந முச்சதி.
- 1508 தத்த²ஜாதப²லங் கிஞ்சி, ஸஹ சாலேதி வல்லியா;
தஸ்ஸேவ ச ததோ லத்³த⁴ங், ப²லங் கிஞ்சி ந வட்டதி.
- 1509 ப²லருக்க²ங் பராமட்டு²ங், தமபஸ்ஸயிதும்பி வா;
கண்டகே ப³ந்தி⁴துங் வாபி, பி⁴க்கு²னோ கிர வட்டதி.
- 1510 ஸண்டா³ஸேன ச தீ³கே⁴ன, க³ஹெத்வா தா²லகங் பன;
பசதோ பி⁴க்கு²னோ தேலங், ப⁴ஸ்மங் பததி தத்த² சே.
- 1511 அமுஞ்சந்தேன ஹத்தே²ன, பசித்வா தேலதா²லகங்;
ஓதாரெத்வாவ தங் பச்சா², படிக்க³க³ணஹய்ய வட்டதி.
- 1512 படிக்க³க³ஹெத்வா அங்கா³ரே, தானி தா³ருனி வா பன;
ட²பிதானி ஸசே ஹொந்தி, புப்³ப³கா³ஹொவ வட்டதி.
- 1513 உச்ச²ங் கா²த³தி சே பி⁴க்கு², ஸாமணேரோபி இச்ச²தி;
“சி²ந்தி³த்வா த்வமிதோ க³ண்ணு”, இதி வுத்தோ ச க³ண்ணுதி.
- 1514 நத்தே²வ அவஸேஸஸ்ஸ, படிக்க³க³ஹணகாரணங்;
கா²த³தோ கு³ளபிண்ட³ம்பி, அயமேவ வினிச்ச²யோ.
- 1515 காதுங் ஸாக³ரதோயேன, லோணகிச்சங் து வட்டதி;
யாவஜீவிகஸங்கா²தங், தோயத்தா ந து க³ச்ச²தி.
- 1516 இத³ங் காலவினிம்முத்தங், உத³கங் பரிதீ³பிதங்;
நிப்³பா³னங் விய நிப்³பா³ன-குஸலேன மஹேஸினா.
- 1517 உத³கேன ஸமா வுத்தா, ஹிமஸ்ஸ கரகாபி ச;
கூபாதீ³ஸு ஜலங் பாதுங், ப³ஹலம்பி ச வட்டதி.
- 1518 கெ²த்தேஸு கஸிதட்டா²னே, ப³ஹலங் தங் ந வட்டதி;
ஸந்தி³த்வா யதி³ தங் க³ந்த்வா, நதி³ங் பூரேதி வட்டதி.

1519 ஸொப்³பே⁴ஸு ககுதா⁴தீ³னங், ஜலே புப்²ஸமாகுலே;
ந ஞாயதி ரஸோ தேஸங், ந படி³க³ஹணகாரணங்.

1520 ஸரேணுகானி புப்பா²னி, பானீயஸ்ஸ க⁴டே பன;
பக்கி²த்தானி ஸசே ஹொந்தி, படி³க³ண்ஹெய்ய தங் பன.

1521 படி³க³ஹெத்வா தெ³ய்யானி, வாஸபுப்பா²னி தத்த² வா;
கமல்லிகாஸு தி³ன்னாஸு, அப்³போ³ஹாரோதி வட்டதி.

1522 அப்படி³க³ஹிதஸ்ஸேவ , த³ந்தகட்ட²ஸ்ஸ யோ ரஸோ;
அஜானந்தஸ்ஸ பாசித்தி, ஸோ சே விஸதி கா²த³தோ.

1523 ஸரீரட்டே²ஸு பூ⁴தேஸு, கிங் வட்டதி? ந வட்டதி?
கப்பாகப்பியமங்ஸானங், கீ²ரங் ஸப்³ப³ம்பி வட்டதி.

1524 கண்ணக்கி²கூ³த²கோ த³ந்த- மலங் முத்தங் கரீஸகங்;
ஸெம்ஹங் ஸிங்கா⁴ணிகா கே²ளோ, அஸ்ஸு லோணந்தி வட்டதி.

1525 யங் பனெத்த² ஸகட்டா²னா, சவித்வா பதிதங் ஸியா;
பத்தே வா பன ஹத்தே² வா, படி³க³ண்ஹெய்ய தங் புன.

1526 அங்க³லக்³மவிச்ச²ன்னங், படி³க³ஹிதமேவ தங்;
உண்ஹயாகு³ங் பிவந்தஸ்ஸ, ஸேதோ³ ஹத்தே²ஸு ஜாயதி.

1527 பிண்டா³ய விசரந்தஸ்ஸ, ஸேதோ³ ஹத்தா²னுஸாரதோ;
ஓரோஹதி ஸசே பத்தங், ந படி³க³ஹணகாரணங்.

1528 ஸாமங் க³ஹெத்வா சத்தாரி, விகடானி நதா³யகே;
ஸப்பத³ட்ட²க்க²ணேயேவ, ந தோ³ஸோ பரிபு⁴ஞ்ஜதோ.

1529 பத²விங் மத்திகத்தா²ய, க²ணிதுங் சி²ந்தி³தும்பி வா;
தரும்பி சா²ரிகத்தா²ய, பி⁴க்கு²னோ பன வட்டதி.

1530 அச்சே²த³கா³ஹனிரபெக்க²னிஸஜ்ஜதோ ச;
ஸிக்க²ப்பஹானமரணேஹி ச லிங்க³பே⁴தா³;
தா³னேன தஸ்ஸ ச பரஸ்ஸ அபி⁴க்கு²கஸ்ஸ;
ஸப்³ப³ங் படி³க³ஹணமேதி வினாஸமேவங்.

1531 து³ருபசிண்ணே நித்³தி³ட்ட²ங், க³ஹணுக்³க³ஹிதஸ்ஸபி;
அந்தோவுத்தே² ஸயங்பக்கே, அந்தோபக்கே ச து³க்கடங்.

1532 படிக்க³க³ஹிதகே தஸ்மிங், அப்படிக்க³க³ஹிதஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1533 படிக்க³க³ஹிதஸஞ்ஞிஸ்ஸ , த³ந்தபோனோத³கேஸுபி;
ந தோ³ஸௌகலோமேன, ஸமுட்டா²னாத³யோ ஸமா.

1534 நவமஜ்ஜி²மதே²ரபி⁴க்கு²னீனங்;
அவிஸேஸேன யதிச்சி²தப்³ப³கோ;
ஸகலோ அஸமாஸதோவ மயா;
கதி²தோ எத்த² வினிச்ச²யோ ததோ.

த³ந்தபோனகதா².

போ⁴ஜனவக்க³கோ³ சதுத்தோ².

1535 யங் கிஞ்சிசேலகாதீ³னங், தித்தி²யானங் பனாமிஸங்;
தெ³ந்தஸ்ஸேகபயோகே³ன, ஏகங் பாசித்தியங் ஸியா.

1536 விச்சி²ந்தி³த்வான தெ³ந்தஸ்ஸ, பயோக³க³ணனாவஸா;
ஹோந்தி பாசித்தியோ தஸ்ஸ, திகபாசித்தியங் ஸியா.

1537 உத³கங் த³ந்தபோனங் வா, தெ³ந்தஸ்ஸ ச அதித்தி²யே;
தித்தி²யோதி ச ஸஞ்ஞிஸ்ஸ, து³க்கடங் விமதிஸ்ஸ ச.

1538 தா³பெந்தஸ்ஸ பனஞ்ஞேன, ஸாமணேராதி³கேன வா;
நிக்கி²த்தபா⁴ஜனே தேஸங், தெ³ந்தஸ்ஸ ப³ஹிலேபனங்.

1539 ட²பெத்வா போ⁴ஜனங் தேஸங், ஸந்திகே “க³ண்ஹதா²”தி ச;
வத³ந்தஸ்ஸ அனாபத்தி, ஸமுட்டா²னௌகூபமங்.

அசேலககதா².

1540 தா³பெத்வா வா அதா³பெத்வா, பி⁴க்கு² யங் கிஞ்சி ஆமிஸங்;
கத்துகாமோ ஸசே ஸத்³தி⁴ங், ஹஸனாதீ³னி இத்தி²யா.

1541 உய்யோஜேதி ஹி “க³ச்சா²”தி, வத்வா தப்பச்சயா பன;

தஸ்ஸுய்யோஜனமத்தஸ்மிங், து³க்கடங் பட²மேன ச.

1542பாதே³னஸ்ஸுபசாரஸ்மிங், அதிக்கந்தே ச து³க்கடங்;
து³தியேனஸ்ஸ பாசித்தி, ஸீமாதிக்கமனே பன.

1543து³ஸ்ஸனே உபசாரஸ்ஸ, ஹத்தா² த்³வாத³ஸ தே³ஸிதா;
பமாணங் ஸவனே சேவங், அஜ்ஜோ²காஸே ந சேதரே.

1544பி⁴க்கு²ஸ்மிங் திகபாசித்தி, இதரே திகது³க்கடங்;
உபி⁴ன்னங் து³க்கடங் வுத்தங், கலிஸாஸனரோபனே.

1545உய்யோஜெந்தஸ்ஸ கிச்சேன, ந தோ³ஸும்மத்தகாதி³னோ;
அதி³ன்னாதா³னதுல்யாவ, ஸமுட்டா²னாத³யோ நயா.

உய்யோஜனகதா².

1546கு²த்³த³கே பிட்டி²வங்ஸங் யோ, அதிக்கம்ம நிஸீத³தி;
ஸபோ⁴ஜனே குலே தஸ்ஸ, ஹோதி பாசித்தி பி⁴க்கு²னோ.

1547ஹத்த²பாஸங் அதிக்கம்ம, பிட்டி²ஸங்கா⁴டகஸ்ஸ ச;
ஸயனஸ்ஸ பனாஸன்னே, டா²னே தோ³ஸோ மஹல்லகே.

1548அஸயனிக⁴ரே தஸ்ஸ, ஸயனிக⁴ரஸஞ்ஞினோ;
தத்த² வேமதிகஸ்ஸாபி, து³க்கடங் பரிதீ³பிதங்.

1549நிஸீத³ந்தஸ்ஸனாபத்தி, பி⁴க்கு²ஸ்ஸ து³தியே ஸதி;
வீதராகே³ஸு வா தேஸு, நிக்க²ந்தேஸு உபோ⁴ஸு வா.

1550நிஸின்னஸ்ஸானதிக்கம்ம, பதே³ஸங் வுத்தலக்க²ணங்;
ஸமுட்டா²னாத³யோ துல்யா, பட²மந்திமவத்து²னா.

ஸபோ⁴ஜனகதா².

1551சதுத்தே² பஞ்சமே சேவ, வத்தப்³பங் நத்தி² கிஞ்சிபி;
வத்தப்³பங் யஞ்ச தங் ஸப்³பங், வுத்தங் அனியதத்³வயே.

1552ஸமுட்டா²னங் பனேதேஸங், அனந்தரஸமங் மதங்;
அயமேவ விஸேஸோதி, தேஸமேஸஞ்ச தீ³பிதோ.

ரஹோபடிச்ச²ன்னரஹோனிஸஜ்ஜகதா².

1553போ⁴ஜனானங் து பஞ்சன்னங், வுத்தோ அஞ்ஞதரேன யோ;
ஸந்தங் பி⁴க்கு²மனாபுச்சா², ஆபஜ்ஜெய்ய குலேஸு சே.

1554சாரித்தங் தஸ்ஸ பாசித்தி, அஞ்ஞத்ர ஸமயா ஸியா;
ட²பெத்வா ஸமயங் பி⁴க்கு², து³வித⁴ங் வுத்தலக்க²ணங்.

1555அவிதிவத்தே மஜ்ஜ²ணஹே, க⁴ரமஞ்ஞஸ்ஸ க³ச்ச²தி;
க⁴ருபசாரோக்கமனே, பட²மேன ஹி து³க்கடங்.

1556அதிக்கந்தே க⁴ரும்மாரே, அபரம்பி ச து³க்கடங்;
து³தியேன ச பாதே³ன, பாசித்தி ஸமதிக்கமே.

1557டி²தட்டா²னே ஸசே பி⁴க்கு²ங், ஓலோகெத்வா ந பஸ்ஸதி;
“அஸந்த”ந்தி அனாபுச்சா², பவிட்டோ² நாம வுச்சதி.

1558ஸசே து³ரே டி²தோ ஹோதி, அஸந்தோ நாம பி⁴க்கு² ஸோ;
நத்தி² ஆரோசனே கிச்சங், க³வேஸித்வா இதோ சிதோ.

1559ந தோ³ஸோ ஸமயே ஸந்தங், ஆபுச்சி²த்வா ச க³ச்ச²தோ;
பி⁴க்கு²ங் க⁴ரேன மக்³கோ³ சே, ஆராமங் க³ச்ச²தோபி ச.

1560தித்தி²யானம்பி ஸெய்யங் வா, ததா² பி⁴க்கு²னுபஸ்ஸயங்;
ஆபதா³ஸனஸாலங் வா, ப⁴த்தியஸ்ஸ க⁴ரம்பி வா.

1561இத³ங் பன ஸமுட்டா²னங், கதி²னேன ஸமங் மதங்;
க்ரியாக்ரியமசித்தஞ்ச, திசித்தஞ்ச திவேத³னங்.

சாரித்தகதா².

1562ஸப்³பா³பி ஸாதி³தப்³பா³வ, சதுமாஸபவாரணா;
பி⁴க்கு²னா அகி³லானேன, புன நிச்சபவாரணா.

1563“விஞ்ஞாபெஸ்ஸாமி ரோக³ஸ்மிங், ஸதி மே பச்சயே”தி ச;
ந படிக்கி³பிதப்³பா³ ஸா, “ரோகோ³ தா³னி ந மே”தி ச.

1564திகபாசித்தியங் வுத்தங், து³க்கடங் நததுத்தரிங்;
ததுத்தரிந்தி ஸஞ்ஞிஸ்ஸ, தத்த² வேமதிகஸ்ஸ ச.

1565 நததுத்தரிஸஞ்ஞிஸ்ஸ, யேஹி யேன பவாரிதோ;
ததோ அஞ்ஞேஹி வா பி⁴ய்யோ, ஆசிக்கி²த்வா யதா²தத²ங்.

1566 விஞ்ஞாபெந்தஸ்ஸ பி⁴க்கு²ஸ்ஸ, அஞ்ஞஸ்ஸத்தா²ய வா பன;
ஞாதகானமனாபத்தி, அத்தனோ வா த⁴னேனபி.

1567 ததா² உம்மத்தகாதீ³னங், அனாபத்தி பகாஸிதா;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

பே⁴ஸஜ்ஜகதா².

1568 உய்யுத்தங் பி⁴க்கு²னோ ஸேனங், த³ஸ்ஸனத்தா²ய க³ச்ச²தோ;
அஞ்ஞத்ர பச்சயா தஸ்ஸ, து³க்கடங் து பதே³ பதே³.

1569 த³ஸ்ஸனஸ்ஸுபசாரஸ்மிங், ட²த்வா பாசித்தி பஸ்ஸதோ;
உபசாரங் விமுஞ்சித்வா, பஸ்ஸந்தஸ்ஸ பயோக³தோ.

1570 ஆரோஹா பன சத்தாரோ, த்³வே த்³வே தங்பாத³ரக்க²கா;
ஏவங் த்³வாத³ஸபோஸோ ச, ஏகோ ஹத்தீ²தி வுச்சதி.

1571 த்³வேபாத³ரக்கா² ஆரோஹோ, ஏகோ திபுரிஸோஹயோ;
ஏகோ ஸாரதி² யோதே⁴கோ, ஆணிரக்கா² து³வே ஜனா.

1572 சதுபோஸோ ரதோ² வுத்தோ, சதுஸச்சவிபா⁴வினா;
சத்தாரோ பத³ஹத்தா² ச, புரிஸா பத்தீ²தி வுச்சதி.

1573 வுத்தலக்க²ணஸம்பன்னா , அயங் பச்சி²மகோடியா;
சதுரங்க³ஸமாயுத்தா, ஸேனா நாம பவுச்சதி.

1574 ஹத்தி²ஆதீ³ஸு ஏகேகங், த³ஸ்ஸனத்தா²ய க³ச்ச²தோ;
அனுய்யுத்தேபி உய்யுத்த-ஸஞ்ஞிஸ்ஸாபி ச து³க்கடங்.

1575 அத்தனோ ச டி²தோகாஸங், ஸம்பத்தங் பன பஸ்ஸதி;
ஆபதா³ஸு அனாபத்தி, ததா²ருபே ச பச்சயே.

உய்யுத்தகதா².

1576 சதுத்தே² தி³வஸே அத்த²-ங்க³தே ஸூரியே அரோக³வா;
ஸசே திட்ட²து ஸேனாய, நிஸீத³து நிபஜ்ஜது.

1577 ஆகாஸே இத்³தி⁴யா ஸெய்யங், பகப்பேது ச இத்³தி⁴மா;
ஹோதேவ தஸ்ஸ பாசித்தி, திகபாசித்தியங் ஸியா.

1578 ஊனகே ச திரத்தஸ்மிங், அதிரேகோதி ஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1579 புராருணாவ நிக்க²ம்ம, ததியாய ச ரத்தியா;
ந தோ³ஸோ புன வஸந்தஸ்ஸ, கி³லானஸ்ஸாபதா³ஸுபி.

ஸேனாவாஸகதா².

1580 உய்யோதி⁴கங் ப³லக்³ங் வா, ஸேனாப்யூஹம்பி வா பன;
த³ஸ்ஸனத்தா²யனீகங் வா, ஹோதி பாசித்தி க³ச்ச²தோ.

1581 புரிமே பன யோ வுத்தோ, “ஹத்தீ² த்³வாத³ஸபோரிஸோ”;
இதி தேன தயோ ஹத்தீ², “ஹத்தா²னீக”ந்தி தீ³பிதங்.

1582 ஸேஸேஸுபி ச ஏஸேவ, நயோ ஞெய்யோ விபா⁴வினா;
திண்ணமேளகலோமேன, ஸமுட்டா²னாத³யோ ஸமா.

உய்யோதி⁴ககதா².

அசேளகவக்³கோ³ பஞ்சமோ.

1583 பிட்டா²தீ³ஹி கதங் மஜ்ஜங், ஸுரா நாமாதி வுச்சதி;
புப்பா²தீ³ஹி கதோ ஸப்³போ³, ஆஸவோ ஹோதி மேரயங்.

1584 பீஜதோ பன பட்டா²ய, பிவந்தஸ்ஸுப⁴யம்பி ச;
பயோகே³ ச பயோகே³ ச, ஹோதி பாசித்தி பி⁴க்கு²னோ.

1585 திகபாசித்தியங் வுத்தங், அமஜ்ஜே மஜ்ஜஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1586 அமஜ்ஜங் மஜ்ஜவண்ணஞ்ச, மஜ்ஜக³ந்த⁴ரஸம்பி ச;
அரிட்ட²ங் லோணஸோவீரங், ஸுத்தகங் பிவதோபி ச.

1587 வாஸகா³ஹாபனத்தா²ய, பக்கி²பித்வான ஈஸகங்;
ஸுபாதீ³னங் து பாகேபி, அனாபத்தி பகாஸிதா.

1588 ஹோதேளகஸமுட்டா²னங், அசித்தங் வத்து²ஜானநா;
இத³ஞ்சாகுஸலேனேவ, பானதோ லோகவஜ்ஜகங்.

ஸுராபானகதா².

1589 யேன கேனசி அங்கே³ன, ஹஸாதி⁴ப்பாயினோ பன;
பு²ஸதோ உபஸம்பன்னங், ஹோதி பாசித்தி பி⁴க்கு²னோ.

1590 ஸப்³ப³த்த² து³க்கடங் காய-படிப³த்தா⁴தி³கே நயே;
ததே²வானுபஸம்பன்னே, தீ³பிதங் திகது³க்கடங்.

1591 எத்த² சானுபஸம்பன்ன-ட்டா²னே திட்ட²தி பி⁴க்கு²னீ;
கி²ட்³டா³தி⁴ப்பாயினோ தம்பி, பு²ஸந்தஸ்ஸ ச து³க்கடங்.

1592 அனாபத்தி நஹஸாதி⁴-ப்பாயஸ்ஸ பு²ஸதோ பரங்;
ஸதி கிச்சே பு²ஸந்தஸ்ஸ, ததா² உம்மத்தகாதி³னோ.

அங்கு³லிபதோத³ககதா².

1593 ஜலே நிமுஜ்ஜனாதீ³ன-மத்தா²ய பன கேவலங்;
பத³வாரேஸு ஸப்³பே³ஸு, ஓதரந்தஸ்ஸ து³க்கடங்.

1594 கீளாபெக்கோ² ஸசே ஹுத்வா, ஜலே உபரிகொ³ப்ப²கே;
நிமுஜ்ஜெய்யபி வா பி⁴க்கு², உம்முஜ்ஜெய்ய தரெய்ய வா.

1595 பயோகே³ ச பயோகே³ ச, தஸ்ஸ பாசித்தியங் ஸியா;
அந்தோயேவோத³கே தஸ்ஸ, நிமுஜ்ஜித்வான க³ச்ச²தோ.

1596 ஹத்த²பாத³பயோகே³ஹி, பாசித்திங் பரிதீ³பயே;
ஹத்தே²ஹேவ தரந்தஸ்ஸ, ஹத்த²வாரேஹி காரயே.

1597 யேன யேன பனங்கே³ன, பி⁴க்கு²னோ தரதோ ஜலங்;
தஸ்ஸ தஸ்ஸ பயோகே³ன, பாசித்திங் பரிதீ³பயே.

1598 தருதோ தீரதோ வாபி, பாசித்தி பததோ ஜலே;
திகபாசித்தியங் வுத்தங், ததே²வ திகது³க்கடங்.

1599 பாஜெந்தோபி ஸசே நாவங், அரித்தேன பி²யேன வா;
உஸ்ஸாரெந்தோபி தீரே வா, நாவங் கீளதி து³க்கடங்.

1600 ஹத்தே²ன வாபி பாதே³ன, கட்டே²ன கத²லாய வா;
உத³கங் நீஹரந்தஸ்ஸ, ஹோதி ஆபத்தி து³க்கடங்.

1601 உத³கங் கஞ்ஜிகங் வாபி, சிக்க²ல்லங் வாபி விக்கி²பங்;
கீளந்தஸ்ஸாபி பி⁴க்கு²ஸ்ஸ, ஹோதி ஆபத்தி து³க்கடங்.

1602 விகா³ஹித்வா ஜலங் கிச்சே, ஸதி நிம்முஜ்ஜனாதி³கங்;
கரொந்தஸ்ஸ அனாபத்தி, ததா² பாரஞ்ச க³ச்ச²தோ.

1603 ஸமுட்டா²னாத³யோ துல்யா, பட²மந்திமவத்து²னா;
அனந்தரஸ்ஸிமஸ்ஸாபி, நத்தி² காசி விஸேஸதா.

ஹஸத⁴ம்மகதா².

1604 வுச்சமானோ ஸசே பி⁴க்கு², பஞ்ஞத்தேனேவ பி⁴க்கு²னா;
அகத்துகாமதாயஸ்ஸ, வசனங் த⁴ம்மமேவ வா.

1605 யோ அஸிக்கி²துகாமோவ, ந கரோதி பனாத³ரங்;
தஸ்ஸானாத³ரியே தஸ்மிங், பாசித்தியமுதீ³ரயே.

1606 திகபாசித்தியங் வுத்தங், திகாதீதேன ஸத்து²னா;
ததே²வாணுபஸம்பன்னா-நாத³ரே திகது³க்கடங்.

1607 ஸுத்தேனேவாபி⁴த⁴ம்மேன, அபஞ்ஞத்தேன பி⁴க்கு²னா;
து³க்கடங் ஸாமணேரேன, வுத்தஸ்ஸ உப⁴யேனபி.

1608 “ஆசரியானமயங் கா³ஹோ, அம்ஹாகங் து பவேணியா;
ஆக³தோ”தி ப⁴ணந்தஸ்ஸ, ந தோ³ஸும்மத்தகாதி³னோ.

1609 எத்த² நேவ க³ஹேதப்³போ³, கா³ரய்ஹாசரியுக்³க³ஹோ;
ஓமஸவாத³துல்யாவ, ஸமுட்டா²னாத³யோ நயா.

அனாத³ரியகதா².

1610 ப⁴யஸஞ்ஜனந்ததா²ய, ரூபாதி³ங் உபஸங்ஹரே;
ப⁴யானகங் கத²ங் வாபி, கதெ²ய்ய பரஸந்திகே.

1611 தி³ஸ்வா வா பன தங் ஸுத்வா, மா வா பா⁴யது, பா⁴யது;
இதரஸ்ஸ து பி⁴க்கு²ஸ்ஸ, ஹோதி பாசித்தி தங்க²ணே.

1612 திகபாசித்தியங் வுத்தங், ததே²வ திகது³க்கடங்;
ஸாமணேரங் க³ஹட்ட²ங் வா, பி⁴ங்ஸாபெந்தஸ்ஸ பி⁴க்கு²னோ.

1613 நபி⁴ங்ஸாபேதுகாமஸ்ஸ, அனாபத்தாதி³கம்மினோ;
ஸமுட்டா²னாதி³ ஸப்³பும்பி, அனந்தரஸமங் மதங்.

பி⁴ங்ஸாபனகதா².

1614 ஜோதிங் தப்பேதுகாமோ சே, ஜலாபெய்ய ஜலெய்ய வா;
ட²பெத்வா ஹோதி பாசித்தி, ததா²ருபங் து பச்சயங்.

1615 ஸயங் ஸமாத³ஹந்தஸ்ஸ, யாவ ஜாலா ந ஜாயதி;
தாவ ஸப்³பயோகே³ஸு, ஹோதி ஆபத்தி து³க்கடங்.

1616 ஜாலுட்டா²னே பனாபத்தி, பாசித்தி பரிதீ³பிதா;
ஜாலாபெந்தஸ்ஸ அஞ்ஞேன, ஹோதி ஆபத்தி து³க்கடங்.

1617 கி³லானஸ்ஸ கி³லானோதி, ஸஞ்ஞிஸ்ஸ விமதிஸ்ஸ வா;
அலாதங் உக்கி²பந்தஸ்ஸ, அவிஜ்ஜா²தங் து து³க்கடங்.

1618 விஜ்ஜா²தங் துஜ்ஜலந்தஸ்ஸ, யதா²வத்து²கதா மதா;
அனாபத்தி கி³லானஸ்ஸ, கதங் அஞ்ஞேன வா பன.

1619 விஸிப்³பெ³ந்தஸ்ஸ அங்கா³ரங், பதீ³புஜ்ஜாலனாதி³கே;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

ஜோதிஸமாத³ஹனகதா².

1620 அபுண்ணே அத்³த⁴மாஸஸ்மிங், தே³ஸே சே மஜ்ஜி²மே பன;
“ந்ஹாயிஸ்ஸாமீ”தி சுண்ணங் வா, மத்திகங் வாபி கோ³மயங்.

1621 அபி⁴ஸங்க²ரதோ ஸப்³ப³-பயோகே³ஸுபி து³க்கடங்;
ந்ஹானஸ்ஸ பரியோஸானே, ஹோதி பாசித்தி பி⁴க்கு²னோ.

1622 அதிரேகத்³த⁴மாஸுன-ஸஞ்ஞினோ விமதிஸ்ஸ வா;
து³க்கடங் அதிரேகத்³த⁴- மாஸே ச ஸமயேஸு ச.

1623 ந்ஹாயந்தஸ்ஸ அனாபத்தி, நதீ³பாரம்பி க³ச்ச²தோ;
வாலிகங் உக்கிரித்வான, கதாவாடேஸு வா ததா².

1624 பச்சந்திமேபி வா தே³ஸே, ஸப்³பே³ஸங் ஆபதா³ஸுபி;
இத³மேளகலோமேன, ஸமுட்டா²னாதி³னா ஸமங்.

ந்ஹானகதா².

1625 சீவரங் யங் நிவாஸேதுங், ஸக்கா பாருபிதும்பி வா;
ச²ன்னமஞ்ஞதரங் பி⁴க்கு², ரஜித்வா யத்த² கத்த²சி.

1626 பதே³ஸே கங்ஸனீலேன, பத்தனீலேன வா பன;
யேன கேனசி காளேன, கத்³த³மேனபி வா ததா².

1627 மங்கு³லஸ்ஸ மயூரஸ்ஸ, பிட்டி²அக்கி²ப்பமாணகங்;
அகத்வா கப்பியங் பி³ந்து³ங், பாசித்தி பரிபு⁴ஞ்ஜதோ.

1628 பாளிகண்ணிககப்போ வா, ந ச வட்டதி கத்த²சி;
ஏகங் வாபி அனேகங் வா, பி³ந்து³ வட்டதி வட்டகங்.

1629 ஆதி³ன்னேபி அனாதி³ன்ன-ஸஞ்ஞினோ விமதிஸ்ஸ ச;
து³க்கடங் முனினா வுத்தங், அனாபத்தி பகாஸிதா.

1630 கப்பே நட்²பி வா ஸத்³தி⁴ங், தேன ஸங்ஸிப்³பி³தேஸு வா;
க்ரியாக்ரியமித³ங் வுத்தங், ஸமுட்டா²னேளகூபமங்.

து³ப்³ண்ணகரணகதா².

1631 விகப்பனா து³வே வுத்தா, ஸம்முகா²ஸம்முகா²திபி;
ஸம்முகா²ய விகப்பெந்தோ, பி⁴க்கு²ஸ்ஸேகஸ்ஸ ஸந்திகே.

1632 ஏகத்தங் ப³ஹுபா⁴வங் வா, து³ரஸந்திகதம்பி வா;
சீவரானங் து ஜானித்வா, யதா²வசனயோக³தோ.

1633 “இமாஹங் சீவரங் துய்ஹங், விகப்பேமீ”தி நித்³தி³ஸே;
கப்பதெத்தாவதா காமங், நிதே⁴துங், ந ச கப்பதி.

1634 பரிபோ⁴கா³தி³கங் தேன, அபச்சுத்³த⁴டதோ பன;
தேன பச்சுத்³த⁴டேயேவ, பரிபோ⁴கா³தி³ வட்டதி.

1635 “ஸந்தகங் பன மய்ஹங் த்வங், பரிபு⁴ஞ்ஜ பரிச்சஜ;
யதா²பச்சயங் கரோஹீ”தி, வுத்தே பச்சுத்³த⁴டங் ஸியா.

- 1636 அபரா ஸம்முகா² வுத்தா, பி⁴க்கு²ஸ்ஸேகஸ்ஸ ஸந்திகே;
யஸ்ஸ கஸ்ஸசி நாமங் து, க³ஹெத்வா ஸஹத⁴ம்மினங்.
- 1637 “இமாஹங் சீவரங் திஸ்ஸ- பி⁴க்கு²னோ, திஸ்ஸதே²ரியா;
விகப்பேமீ”தி வத்தப்³பங், வத்தப்³பங் புன தேனபி.
- 1638 “திஸ்ஸஸ்ஸ பி⁴க்கு²னோ வா த்வங், தஸ்ஸா திஸ்ஸாய தே²ரியா;
ஸந்தகங் பரிபு⁴ஞ்ஜாஹி, விஸ்ஸஜ்ஜேஹீ”தி வா ததா².
- 1639 ததோ பபு⁴தி ஸப்³பம்பி, பரிபோ⁴கா³தி³ வட்டதி;
ஏவங் பரம்முகா²யாபி, வத்தப்³பங் ஏகஸந்திகே.
- 1640 “இமாஹங் சீவரங் துய்ஹங், விகப்பத்தா²ய த³ம்மி”தி;
புன தேனபி வத்தப்³பங், “கோ தே மித்தோ”தி பி⁴க்கு²னா.
- 1641 இதரேனபி வத்தப்³பங், “திஸ்ஸோ திஸ்ஸா”தி வா புன;
வத்தப்³பங் பி⁴க்கு²னா தேன, “இத³ங் திஸ்ஸஸ்ஸ ஸந்தகங்.
- 1642 திஸ்ஸாய தே²ரியா வா த்வங், ஸந்தகங் பரிபு⁴ஞ்ஜ வா;
விஸ்ஸஜ்ஜேஹீ”தி வா வுத்தே, ஹோதி பச்சுத்³த⁴டங் புன.
- 1643 இச்சேதாஸு பன த்³வீஸு, யாய காயசி சீவரங்;
விகப்பெத்வா ஸத⁴ம்மேஸு, யஸ்ஸ கஸ்ஸசி பஞ்சஸு.
- 1644 அபச்சுத்³தா⁴ரகங் வாபி, அவிஸ்ஸாஸேன தஸ்ஸ வா;
யேன தங் வினயங் கம்மங், கதங் பனித⁴ பி⁴க்கு²னா.
- 1645 சீவரங் பரிபு⁴ஞ்ஜெய்ய, ஹோதி பாசித்தி பி⁴க்கு²னோ;
தஞ்சேவாதி⁴ட்ட²ஹந்தஸ்ஸ, விஸ்ஸஜ்ஜந்தஸ்ஸ து³க்கடங்.
- 1646 பச்சுத்³தா⁴ரகவத்தே²ஸு , அபச்சுத்³தா⁴ரஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.
- 1647 பச்சுத்³தா⁴ரணஸஞ்ஞிஸ்ஸ, விஸ்ஸாஸா பரிபு⁴ஞ்ஜதோ;
அனாபத்தி ஸமுட்டா²னங், கதி²னேனாதி³னா ஸமங்.

விகப்பனகதா².

அதி⁴ட்டா²னுபக³ங் பத்தங், சீவரங் வாபி தாதி³ஸங்;
ததா² ஸூசிக⁴ரங் காய-ப³ந்த⁴னங் வா நிஸீத³னங்.

1649 அபனெத்வா நிதெ⁴ந்தஸ்ஸ, ஹஸாபெக்க²ஸ்ஸ கேவலங்;
ஹோதி பாசித்தியங் அஞ்ஞங், ஆணாபெந்தஸ்ஸ து³க்கடங்.

1650 தேனாபனிஹிதே தஸ்ஸ, பாசித்திங் பரிதீ³பயே;
வுத்தங் அனுபஸம்பன்ன-ஸந்தகே திகது³க்கடங்.

1651 வினா வுத்தப்பகாரானி, பத்தாதீ³னி ததோ பன;
அஞ்ஞங் அபனிதெ⁴ந்தஸ்ஸ, ஹோதி ஆபத்தி து³க்கடங்.

1652 ஸப்³பெ³ஸ்வனுபஸம்பன்ன-ஸந்தகேஸுபி து³க்கடங்;
து³ன்னிக்கி²த்தமனாபத்தி, படிஸாமயதோ பன.

1653 ததா² “த⁴ம்மகத²ங் கத்வா, த³ஸ்ஸாமீ”தி நிதே⁴தி சே;
அவிஹேஸேதுகாமஸ்ஸ, அகீளஸ்ஸாதி³கம்மினோ.

1654 ஸமுட்டா²னாத³யோ துல்யா, து³தியந்திமவத்து²னா;
இத³ங் அகுஸலேனேவ, ஸசித்தஞ்ச திவேத³னங்.

சீவராபனிதா⁴னகதா².

ஸுராபானவக்³கோ³ ச²ட்டோ².

1655 திரச்சா²னக³தங் பாணங், மஹந்தங் கு²த்³த³கம்பி வா;
ஹோதி பாசித்தியாபத்தி, மாரெந்தஸ்ஸஸ்ஸ பி⁴க்கு²னோ.

1656 அப்பாணே பாணஸஞ்ஞிஸ்ஸ, விமதிஸ்ஸுப⁴யத்த² ச;
து³க்கடங் து அனாபத்தி, அஸஞ்சிச்ச அஜானதோ.

1657 ந ச மாரேதுகாமஸ்ஸ, ததா² உம்மத்தகாதி³னோ;
ஸமுட்டா²னாத³யோ துல்யா, ததியந்திமவத்து²னா.

ஸஞ்சிச்சபாணகதா².

1658 ஸப்பாணகங் ஜலங் ஜானங், பாசித்தி பரிபு⁴ஞ்ஜதோ;
பயோக³ப³ஹுதாயஸ்ஸ, பாசித்திப³ஹுதா ஸியா.

1659.

ஏகேனேவ பயோகே³ன, அவிச்சி²ஜ்ஜ ஸசே பன;
பிவதோ பத்தபூரம்பி, ஏகங் பாசித்தியங் ஸியா.

1660 தாதி³ஸேனுத³கேனஸ்ஸ, ஆவிஞ்சி²த்வான ஸாமிஸங்;
தோ⁴வதோ பன பத்தங் வா, நிப்³பா³பெந்தஸ்ஸ யாகு³யோ.

1661 ஹத்தே²ன தங் உளுங்கேன, க³ஹெத்வா ந்ஹாயதோபி வா;
பயோகே³ ச பயோகே³ ச, பாசித்தி பரிதீ³பிதா.

1662 அப்பாணகேபி ஸப்பாண-ஸஞ்ஞிஸ்ஸ உப⁴யத்த²பி;
விமதிஸ்ஸாபி பி⁴க்கு²ஸ்ஸ, ஹோதி ஆபத்தி து³க்கடங்.

1663 ஸப்பாணேபி ச அப்பாணே, அப்பாணமிதி ஸஞ்ஞினோ;
ந தோ³ஸோ “பரிபோ⁴கே³ன, ந மரந்தீ”தி ஜானதோ.

1664 பதனங் ஸலபா⁴தீ³னங், ஞத்வா ஸுத்³தே⁴ன சேதஸா;
பதீ³புஜ்ஜலனஞ்செத்த², ஞத்வா ஸப்பாணபா⁴வதங்.

1665 பு⁴ஞ்ஜதோ ஜலஸஞ்ஞாய, ஞெய்யா பண்ணத்திவஜ்ஜதா;
ஸிஞ்சனே ஸிஞ்சனங் வத்தங், பரிபோ⁴கே³ இத³ங் பன.

1666 அயமேவ விஸேஸோதி, தஸ்ஸ சேவ பனஸ்ஸ ச;
அதி³ன்னாதா³னதுல்யாவ, ஸமுட்டா²னாத³யோ நயா.

ஸப்பாணககதா².

1667 நிஹதங் து யதா²த⁴ம்மங், கிச்சாதி⁴கரணங் புன;
நிஹாதப்³பந்தி பாசித்தி, உக்கோடெந்தஸ்ஸ பி⁴க்கு²னோ.

1668 “அகதங் து³க்கதங் கம்மங், காதப்³பங் புனதே³வி”தி;
வத³தா பன தங் கம்மங், உச்சாலேதுங் ந வட்டதி.

1669 ஸசே விப்பகதே கம்மே, படிக்கோஸதி தங் புன;
ஸஞ்ஞாபெத்வாவ காதப்³பங், ந காதப்³பங் பனஞ்ஞதா².

1670 அத⁴ம்மே பன கம்மஸ்மிங், த⁴ம்மகம்மந்தி ஸஞ்ஞினோ;
விமதிஸ்ஸுப⁴யத்தா²பி, ஹோதி ஆபத்தி து³க்கடங்.

1671 “அத⁴ம்மேன ச வக்³கே³ன, ந ச கம்மாரஹஸ்ஸ வா;

கத²ந்தி ஜானதோ நத்தி², தோ³ஸோ உக்கோடனே பன.

1672 ததா² உம்மத்தகாதீ³ன-மனாபத்தி பகாஸிதா;
ஓமஸவாத³துல்யாவ, ஸமுட்டா²னாத³யோ நயா.

உக்கோடனகதா².

1673 ஸங்கா⁴தி³ஸேஸங் து³ட்டு²ல்லங், ஆபத்திங் பி⁴க்கு²னோ பன;
ஞத்வா சா²த³யதோ தஸ்ஸ, பாசித்தி பரியாபுதா.

1674 நிக்கி²பித்வா து⁴ரங் தஸ்ஸ, படிச்சா²த³னஹேதுகங்;
ஆரோசேதி ஸசஞ்ஞஸ்ஸ, ஸோபி அஞ்ஞஸ்ஸ வாதி ஹி.

1675 ஏவங் ஸதம்பி பி⁴க்க²னங், ஸஹஸ்ஸம்பி ச தாவ தங்;
ஆபஜ்ஜதேவ ஆபத்திங், யாவ கோடி ந சி²ஜ்ஜதி.

1676 மூலேனாரோசிதஸ்ஸேவ , து³தியஸ்ஸ பகாஸிதே;
ததியேன நிவத்தித்வா, கோடி சி²ன்னாதி வுச்சதி.

1677 து³ட்டு²ல்லாய ச து³ட்ட²ல்ல-ஸஞ்ஞீ பாசித்தியங் பு²ஸே;
இதரேஸு பன த்³வீஸு, து³க்கடங் பரிதீ³பிதங்.

1678 அது³ட்டு²ல்லாய ஸப்³பத்த², நித்³தி³ட்ட²ங் திகது³க்கடங்;
ஸப்³பத்தா²னுபஸம்பன்ன-வாரேஸுபி ச து³க்கடங்.

1679 “ஸங்க⁴ஸ்ஸ பே⁴த³னாதீ³னி, ப⁴விஸ்ஸந்தீ”தி வா பன;
ந ச சா²தே³துகாமோ வா, ஸபா⁴க³ங் வா ந பஸ்ஸதி.

1680 “பஞ்ஞாயிஸ்ஸதி கம்மேன, ஸகேனாயந்தி கக்க²ளோ”;
அனாரோசேதி சே தோ³ஸோ, நத்தி² உம்மத்தகாதி³னோ.

1681 து⁴ரனிக்கே²பதுல்யாவ, ஸமுட்டா²னாத³யோ நயா;
காயகம்மங் வசீகம்மங், அக்ரியங் து³க்க²வேத³னங்.

து³ட்டு²ல்லகதா².

1682 ஊனவீஸதிவஸ்ஸங் யோ, கரெய்ய உபஸம்பத³ங்;
தஸ்ஸ பாசித்தியங் ஹோதி, ஸேஸானங் ஹோதி து³க்கடங்.

1683 உபஸம்பாதி³தோ சேஸோ, ஜானதா வா அஜானதா;
ஹோதேவானுபஸம்பன்னோ, காதப்³போ³ புனரேவ ஸோ.

1684 து³ஸவஸ்ஸச்சயேனஸ்ஸ, உபஜ்ஜா²யஸ்ஸ சே ஸதோ;
உபஸம்பாத³னே தோ³ஸோ, அஞ்ஞேஸங் நத்தி² கோசிபி.

1685 முஞ்சித்வா பன தங் பி⁴க்கு²ங், க³ணோ சே பரிபூரதி;
ஹோந்தி தே ஸுபஸம்பன்னா, ந தோ³ஸோ கோசி விஜ்ஜதி.

1686 உபஜ்ஜா²யோ ஸசே ஹுத்வா, க³ணங் ஆசரியம்பி வா;
பரியேஸதி பத்தங் வா, ஸம்மன்னதி ச மாளகங்.

1687 “உபஸம்பாத³யிஸ்ஸாமி” , இதி ஸப்³பே³ஸு தஸ்ஸ ஹி;
ஞத்தியா ச ததா² த்³வீஸு, கம்மவாசாஸு து³க்கடங்.

1688 கம்மவாசாய ஓஸானே, பாசித்தி பரிதீ³பிதா;
ஊனவீஸதிஸஞ்ஞிஸ்ஸ, பரிபுண்ணேபி புக்³க³லே.

1689 விமதிஸ்ஸுப⁴யத்தா²பி, ஹோதி ஆபத்தி து³க்கடங்;
பரிபுண்ணோதி ஸஞ்ஞிஸ்ஸ, உப⁴யத்த² ந தோ³ஸதா.

1690 ததா² உம்மத்தகஸ்ஸாபி, ஆதி³கம்மிகபி⁴க்கு²னோ;
அதி³ன்னாதா³னதுல்யாவ, ஸமுட்டா²னாத³யோ நயா.

ஊனவீஸதிகதா².

1691 தெ²ய்யஸத்தே²ன ஜானந்தோ, ஸங்விதா⁴ய ஸசே பன;
மக்³க³ங் க³ச்ச²தி ஸத்தி⁴ங் யோ, தஸ்ஸ பாசித்தியங் ஸியா.

1692 க³மனே ஸங்விதா⁴னே ச, வத்தப்³போ³ யோ வினிச்ச²யோ;
ஸோ ச பி⁴க்கு²னிவக்³க³ஸ்மிங், வத்தத்தா ந ச உத்³த⁴டோ.

1693 மக்³கா³டவிவிஸங்கேதே, யதா²வத்து²கமேவ து;
தெஸ்வஸங்வித³ஹந்தேஸு, ஸயங் வித³ஹதோபி ச.

1694 ததே²வாதெ²ய்யஸத்தே²பி, தெ²ய்யஸத்த²ந்தி ஸஞ்ஞினோ;
விமதிஸ்ஸுப⁴யத்தா²பி, ஹோதி ஆபத்தி து³க்கடங்.

1695.

அதெ²ய்யஸத்த²ஸஞ்ஞிஸ்ஸ , அஸங்வித³ஹதோபி ச;
ஆபதா³ஸு அனாபத்தி, விஸங்கேதே ச காலிகே.

1696 தெ²ய்யஸத்த²ஸமுட்டா²னங், கதி²தங் காயசித்ததோ;
காயவாசாசித்ததோ ச, திசித்தஞ்ச திவேத³னங்.

தெ²ய்யஸத்த²கதா².

1697 ஹோதி பி⁴க்கு²னியா ஸத்³தி⁴ங், ஸங்விதா⁴னேன ஸத்தமங்;
ஸமுட்டா²னாதி³னா துல்யங், விஸேஸோ நத்தி² கோசிபி.

ஸங்விதா⁴னகதா².

1698 கம்மங் கிலேஸோ பாகோ ச, உபவாதோ³ அதிக்கமோ;
அந்தராயகரா ஏதே, பஞ்ச த⁴ம்மா பகாஸிதா.

1699 “அனந்தராயிகா ஏதே, யதா² ஹொந்தி ததா² அஹங்;
தே³ஸிதங் முனினா த⁴ம்ம-மாஜானாமீ”தி யோ வதே³.

1700 திக்க²த்துங் தேஹி வத்தப்³போ³, யே பஸ்ஸந்தி ஸுணந்தி ச;
“மா ஹேவங் அவசாயஸ்மா”, இதி பி⁴க்கூ²ஹி ஸோ பன.

1701 து³க்கடங் அவத³ந்தஸ்ஸ, தங் அனிஸ்ஸஜதோபி ச;
ஞத்தியா ச ததா² த்³வீஹி, கம்மவாசாஹி து³க்கடங்.

1702 கம்மவாசாய ஓஸானே, பாசித்தி பரிதீ³பிதா;
திகபாசித்தியங் வுத்தங், அத⁴ம்மே திகது³க்கடங்.

1703 நாபத்தாகதகம்மஸ்ஸ, படினிஸ்ஸஜதோபி ச;
ஸமுட்டா²னாத³யோ ஸப்³பே³, வுத்தா ஸமனுபா⁴ஸனே

அரிட்ட²கதா².

1704 ஞுவாகதானுத⁴ம்மேன, ததா²வாதி³கபி⁴க்கு²னா;
ஸங்வஸெய்ய ச பு⁴ஞ்ஜெய்ய, பாசித்தி ஸஹ ஸெய்ய வா.

1705 உபோஸதா²தி³கங் கம்மங், கரோதோ ஸஹ தேன ஹி;
கம்மஸ்ஸ பரியோஸானே, தஸ்ஸ பாசித்தியங் ஸியா.

1706.

ஏகேனேவ பயோகே³ன, க³ண்ஹதோ ஆமிஸங் ப³ஹுங்;
த³த³தோபி ததா² ஏகங், ப³ஹுனி ச ப³ஹுஸ்வபி.

1707 உக்கி²த்தகே நிபன்னஸ்மிங், இதரோ ஸேதி சே பன;
இதரஸ்மிங் நிபன்னே வா, பரோ ஸேதி உபோ⁴பி வா.

1708 நிபஜ்ஜனபயோகா³னங், வஸேனாபத்தியோ ஸியுங்;
ஏகனானூபசாரேஸு, ஏகச்ச²ன்னே வினிச்ச²யோ.

1709 அனுக்கி²த்தேபி உக்கி²த்த-ஸஞ்ஞினோ பன பி⁴க்கு²னோ;
விமதிஸ்ஸுப⁴யத்தா²பி, து³க்கடங் பரிதீ³பிதங்.

1710 அனாபத்துப⁴யத்தா²பி, அனுக்கி²த்தகஸஞ்ஞினோ;
நிஸ்ஸட்டோ²தி ச தங் தி³ட்டி²ங், ஸஞ்ஞிஸ்ஸோஸாரிதோதி ச.

1711 ததா² உம்மத்தகாதீ³னங், இத³ங் பண்ணத்திவஜ்ஜகங்;
அதி³ன்னாதா³னதுல்யாவ, ஸமுட்டா²னாத³யோ நயா.

உக்கி²த்தகதா².

1712 ததா² வினாஸிதங் ஜானங், உபலாபெய்ய தேன வா;
உபட்டா²பெய்ய பாசித்தி, ஸங்பு⁴ஞ்ஜெய்ய வஸெய்ய வா.

1713 ஸங்வாஸேன ச லிங்கே³ன, த³ண்ட³கம்மேன நாஸனா;
திஸ்ஸோ எத்த² அதி⁴ப்பேதா, த³ண்ட³கம்மேன நாஸனா.

1714 ஸம்போ⁴கா³ ஸஹஸெய்யா ச, அனந்தரஸமா மதா;
தத்த² வுத்தனயேனேவ, வேதி³தப்³போ³ வினிச்ச²யோ.

1715 ஸமுட்டா²னாத³யோ ஸப்³பே³, அரிட்டே²ன ஸமா மதா;
ந ஹெத்த² கிஞ்சி வத்தப்³பங், ஸப்³பங் உத்தானமேவித³ங்.

கண்டககதா².

ஸப்பாணகவக்³கோ³ ஸத்தமோ.

1716 வுச்சமானோ ஹி பி⁴க்கூ²ஹி, பி⁴க்கு² ஸிக்கா²பதே³ன யோ;
“ஸிக்கா²பதே³ பனேதஸ்மிங், ந ஸிக்கி²ஸ்ஸாமி தாவஹங்.

1717.

யாவ நாஞ்ஞங் வியத்தஞ்ச, பகதஞ்ஞங் பஹுஸ்ஸுதங்;
புச்சா²மீ¹தி ப⁴ணந்தஸ்ஸ, தஸ்ஸ பாசித்தியங் ஸியா.

1718 ஸத்து²னானுபஸம்பன்னே, தீ³பிதங் திகது³க்கடங்;
ந ஸல்லேகா²யிதங் ஹோதி, வுச்சமானஸ்ஸுபோ⁴ஹிபி.

1719 அபஞ்ஞத்தேன தஸ்ஸேவங், வத³தோ ஹோதி து³க்கடங்;
ந தோ³ஸும்மத்தகாதீ³னங், “ஸிக்கி²ஸ்ஸாமீ¹தி பா⁴ஸதோ.

ஸஹத⁴ம்மிககதா².

1720 உத்³தி³ட்டே²ஹி கிமேதேஹி, குக்குச்சாதி³னிதா³னதோ;
ஹோதி பாசித்தியாபத்தி, ஸிக்கா²பத³விவண்ணனே.

1721 திகபாசித்தியங் வுத்தங், ததே²வ திகது³க்கடங்;
விவண்ணேனுபஸம்பன்ன-ஸந்திகே தங் ஸசே பன.

1722 து³க்கடங் பனுபி⁴ன்னம்பி, அஞ்ஞத⁴ம்மவிவண்ணனே;
நவிவண்ணேதுகாமஸ்ஸ, “ஸுத்தந்தங் பரியாபுண.

1723 வினயங் பன பச்சா²பி, ஹந்த³ பரியாபுணிஸ்ஸஸி¹;
இச்சேவங் து வத³ந்தஸ்ஸ, ததா² உம்மத்தகாதி³னோ.

1724 அனாபத்தீதி ஞாதப்³பங், ஸமுட்டா²னாத³யோ நயா;
அனந்தரஸ்ஸிமஸ்ஸாபி, ஓமஸவாத³ஸாதி³ஸா.

விலேக²னகதா².

1725 அஞ்ஞாணேன பனாபத்தி, மொக்கோ² நேவஸ்ஸ விஜ்ஜதி;
காரேதப்³போ³ ததா² பி⁴க்கு², யதா² த⁴ம்மோ டி²தோ பன.

1726 தஸ்ஸாரோபனியோ மோஹோ, உத்தரிம்பி ஹி பி⁴க்கு²னோ;
து³தியேனேவ கம்மேன, நிந்தி³த்வா தஞ்ஹி புக்³கலங்.

1727 ஏவங் ஆரோபிதே மோஹே, யதி³ மோஹேதி யோ பன;
தஸ்மிங் மோஹனகே வுத்தா, பாசித்தி பன புக்³கலே.

1728 அத⁴ம்மே பன கம்மஸ்மிங், தீ³பிதங் திகது³க்கடங்;
ததா²னாரோபிதே மோஹே, து³க்கடங் பரிகித்திதங்.

1729 ந ச மோஹேதுகாமஸ்ஸ, வித்தா²ரேனாஸுதஸ்ஸபி;
ஊனகே த்³வத்திக்க²த்துங் வா, வித்தா²ரேனாஸுதஸ்ஸ ச.

1730 அனாபத்தீதி விஞ்ஞெய்யங், ததா² உம்மத்தகாதி³னோ;
ஸமுட்டா²னாத³யோ ஸப்³பே³, அனந்தரஸமா மதா.

மோஹனகதா².

1731 குத்³தோ⁴ தே³தி பஹாரங் சே, தஸ்ஸ பாசித்தியங் ஸியா;
ஸம்பஹரிதுகாமேன, பஹாரே பி⁴க்கு²னோ பன.

1732 தி³ன்னே பி⁴ஜ்ஜது ஸீஸங் வா, பாதோ³ வா பரிபி⁴ஜ்ஜது;
ஸோ சே மரது வா, மா வா, பாசித்தி பரிதீ³பிதா.

1733 விருபகரணாபெக்கோ², “இச்சாயங் ந விரோசதி”;
கண்ணங் வா தஸ்ஸ நாஸங் வா, யதி³ சி²ந்த³தி து³க்கடங்.

1734 ததே²வானுபஸம்பன்னே, இத்தி²யா புரிஸஸ்ஸ வா;
திரச்சா²னக³தஸ்ஸாபி, பஹாரங் தே³தி து³க்கடங்.

1735 ஸசே பஹரதித்தி²ஞ்ச, பி⁴க்கு² ரத்தேன சேதஸா;
க³ருகா தஸ்ஸ ஆபத்தி, வினித்³தி³ட்டா² மஹேஸினா.

1736 பஹாரங் தே³தி மொக்கா²தி⁴-ப்பாயோ தோ³ஸோ ந விஜ்ஜதி;
காயேன காயபத்³தே⁴ன, ததா² நிஸ்ஸக்³கி³யேன வா.

1737 பஸ்ஸித்வா அந்தராமக்³கே³, சோரங் பச்சத்தி²கம்பி வா;
ஹேடே²துகாமமாயந்தங், “மா இதா⁴க³ச்ச²பாஸக”.

1738 இதி வத்வா பனாயந்தங், “க³ச்ச² ரே”தி ச முக்³க³ரங்;
ஸத்த²ங் வாபி க³ஹெத்வா வா, பஹரித்வா து யாதி சே.

1739 அனாபத்தி ஸசே தேன, பஹாரேன மதேபி ச;
ஏஸேவ ச நயோ வுத்தோ, து⁴த்தவாளமிகே³ஸுபி.

1740 திகபாசித்தியங் வுத்தங், ஸேஸே ச திகது³க்கடங்;
காயசித்தஸமுட்டா²னங், ஸசித்தங் து³க்க²வேத³னங்.

பஹாரகதா².

1741 காயங் வா காயப³த்³த்⁴ங் வா, உச்சாரெய்ய ஸசே பன;
ஹோதி பாசித்தியாபத்தி, தஸ்ஸுக்³கி³ரணபச்சயா.

1742 உக்³கி³ரித்வா விரத்³தோ⁴ ஸோ, பஹாரங் தே³தி சே பன;
அஸம்பஹரிதுகாமேன, தி³ன்னத்தா து³க்கடங் ஸியா.

1743 ஸசே தேன பஹாரேன, பஹடஸ்ஸ ச பி⁴க்கு²னோ;
ஹத்தா²தீ³ஸுபி யங் கிஞ்சி, அங்க³ங் பி⁴ஜ்ஜதி து³க்கடங்.

1744 ஸேஸோ அனந்தரே வுத்த-நயேன வினயஞ்ஞனா;
ஸமுட்டா²னாதி³னா ஸத்³தி⁴ங், வேதி³தப்³போ³ வினிச்ச²யோ.

தலஸத்திகதா².

1745 அமூலகேன ஸங்கா⁴தி³-ஸேஸேன பன பி⁴க்கு² யோ;
சோதா³பெய்யபி சோதெ³ய்ய, தஸ்ஸ பாசித்தியங் ஸியா.

1746 திகபாசித்தியங் தத்த², தி³ட்டா²சாரவிபத்தியா;
சோத³தோ து³க்கடாபத்தி, ஸேஸே ச திகது³க்கடங்.

1747 ததா²ஸஞ்ஞிஸ்ஸனாபத்தி , ததா² உம்மத்தகாதி³னோ;
ஓமஸவாத³துல்யாவ, ஸமுட்டா²னாத³யோ நயா.

அமூலககதா².

1748 ஸஞ்சிச்ச பன குக்குச்சங், உப்பாதெ³ந்தஸ்ஸ பி⁴க்கு²னோ;
“ஊனவீஸதிவஸ்ஸோ த்வங், மஞ்ஞே” இச்சேவமாதி³னா.

1749 ஹோதி வாசாய வாசாய, பாசித்தி பன பி⁴க்கு²னோ;
ததா²ருபே பனஞ்ஞஸ்மிங், ஸசே அஸதி பச்சயே.

1750 திகபாசித்தியங் வுத்தங், ஸேஸே ச திகது³க்கடங்;
நஉப்பாதே³துகாமஸ்ஸ, குக்குச்சங் நத்தி² வஜ்ஜதா.

1751 “ஹிதேஸிதாயஹங் மஞ்ஞே, நிஸின்னங் இத்தி²யா ஸஹ;
விகாலே ச தயா பு⁴த்தங், மா ஏவ”ந்தி ச பா⁴ஸதோ.

1752 ததா² உம்மத்தகாதீ³ன-மனாபத்தி பகாஸிதா;
ஸமுட்டா²னாத³யோ ஸப்³பே³, அனந்தரஸமா மதா.

- 1753 ஸசே ப்⁴ண்ட³னஜாதானங், பி்⁴க்கூ²னங் பன பி்⁴க்கு² யோ;
திட்டெ²ய்யுபஸ்ஸுதிங் ஸோதுங், தஸ்ஸ பாசித்தியங் ஸியா.
- 1754 “யங் இமே து ப்⁴ணிஸ்ஸந்தி, தங் ஸொஸ்ஸாமீ”தி க³ச்ச²தோ;
சோதே³துகாமதாயஸ்ஸ, து³க்கடங் து பதே³ பதே³.
- 1755 புரதோ க³ச்ச²தோ ஸோதுங், ஓஹீயந்தஸ்ஸ து³க்கடங்;
க³ச்ச²தோ துரிதங் வாபி, அயமேவ வினிச்ச²யோ.
- 1756 டி²தோகாஸங் பனாக³ந்த்வா, யதி³ மந்தெந்தி அத்தனோ;
உக்காஸித்வாபி வா எத்த², ஞாபேதப்³ப³மஹந்தி வா.
- 1757 தஸ்ஸேவமகரொந்தஸ்ஸ , பாசித்தி ஸவனே ஸியா;
திகபாசித்தியங் வுத்தங், ஸேஸே ச திகது³க்கடங்.
- 1758 “இமேஸங் வசனங் ஸுத்வா, ஓரமிஸ்ஸ”ந்தி க³ச்ச²தோ;
ததா² உம்மத்தகாதீ³ன-மனாபத்தி பகாஸிதா.
- 1759 தெ²ய்யஸத்த²ஸமுட்டா²னங், இத³ங் ஹோதி க்ரியாக்ரியங்;
காயகம்மங் வசீகம்மங், ஸதோ³ஸங் து³க்க²வேத³னங்.

உபஸ்ஸுதிகதா².

- 1760 த்⁴ம்மிகானங் து கம்மானங், ச²ந்த³ங் த³த்வா ஸசே பன;
பச்சா² கீயதி பாசித்தி, வாசதோ வாசதோ ஸியா.
- 1761 அத்⁴ம்மே பன கம்மஸ்மிங், த்⁴ம்மகம்மந்தி ஸஞ்ஞினோ;
விமதிஸ்ஸுப்⁴யத்தா²பி, ஹோதி ஆபத்தி து³க்கடங்.
- 1762 “அத்⁴ம்மேன ச வக்³கே³ன, ததா²கம்மாரஹஸ்ஸ ச;
இமே கம்மங் கரொந்தீ³தி, ஞத்வா கீயதி தஸ்ஸ ச.
- 1763 ததா² உம்மத்தகாதீ³ன-மனாபத்தி பகாஸிதா;
அமூலகஸமானாவ, ஸமுட்டா²னாத³யோ நயா.

1764 யாவ ஆரோசிதங் வத்து², அவினிச்சி²தமேவ வா;
ட²பிதா ஞுத்தி வா நிட்ட²ங், கம்மவாசா ந க³ச்ச²தி.

1765 ஏதஸ்மிங் அந்தரே கம்மங், கோபேதுங் பரிஸாய ஹி;
ஹத்த²பாஸங் ஜஹந்தஸ்ஸ, ஹோதி ஆபத்தி து³க்கடங்.

1766 அத³த்வா ஜஹிதே ச²ந்த³ங், தஸ்ஸ பாசித்தியங் ஸியா;
த⁴ம்மகம்மே அத⁴ம்மே ச, விமதிஸ்ஸ ச து³க்கடங்.

1767 அத⁴ம்மேபி ச கம்மஸ்மிங், த⁴ம்மகம்மந்தி ஸஞ்ஞினோ;
“ஸங்க⁴ஸ்ஸ ப⁴ண்ட³னாதீ³னி, ப⁴விஸ்ஸந்தீ³”தி ஸஞ்ஞினோ.

1768 கி³லானோ வா கி³லானஸ்ஸ, கரணீயே ந தோ³ஸதா;
ந ச கோபேதுகாமஸ்ஸ, கம்மங் பஸ்ஸாவனாதி³னா.

1769 பீளிதஸ்ஸாக³மிஸ்ஸாமி, இச்சேவங் க³ச்ச²தோபி வா;
ஸமங் ஸமனுபா⁴ஸேன, ஸமுட்டா²னங் க்ரியாக்ரியங்.

ச²ந்த³ங் அத³த்வா க³மனகதா².

1770 ஸமக்³கே³ன ச ஸங்கே⁴ன, ஸத்தி³தி⁴ங் த³த்வான சீவரங்;
ஸம்மதஸ்ஸ ஹி பி⁴க்கு²ஸ்ஸ, பச்சா² கீயதி யோ பன.

1771 தஸ்ஸ வாசாய வாசாய, பாசித்தி பரிதீ³பிதா;
திகபாசித்தியங் த⁴ம்ம- கம்மே வுத்தங் து சீவரங்.

1772 ட²பெத்வாஞ்ஞபரிக்கா²ரங், த³த்வா கீயதி து³க்கடங்;
ஸங்கே⁴னாஸம்மதஸ்ஸாபி, சீவரங் அஞ்ஞமேவ வா.

1773 ததே²வானுபஸம்பன்னே, ஸப்³பத்தா²பி ச து³க்கடங்;
ச²ந்தா³தீ³னங் வஸேனேவ, கரொந்தஞ்ச ஸபா⁴வதோ.

1774 கீயந்தஸ்ஸ அனாபத்தி, ததா² உம்மத்தகாதி³னோ;
அமூலகஸமா ஞுய்யா, ஸமுட்டா²னாத³யோ நயா.

து³ப்³ப³லகதா².

1775 இத³ங் திங்ஸககண்ட³ஸ்மிங், அந்திமேன ச ஸப்³பதா²;
துல்யங் த³வாத³ஸமங் ஸப்³பங், அயமேவ விலேஸதா.

1776 தத்த² நிஸ்ஸக்³கியங் வுத்தங், அத்தனோ பரிணாமனா;
இத⁴ ஸுத்³தி⁴கபாசித்தி, புக்³க³லே பரிணாமனா.

பரிணாமனகதா².

ஸஹத⁴ம்மிகவக்³கோ³ அட்ட²மோ.

1777 அனிக்க²ந்தே சே ராஜஸ்மிங், அனிக்க²ந்தாய தே³வியா;
ஸயனீயக்⁴ரா தஸ்ஸ, உம்மாரங் யோ அதிக்கமே.

1778 து³க்கடங் பட²மே பாதே³, பாசித்தி து³தியே ஸியா;
தே³வியா வாபி ரஞ்ஞோ வா, ஸசே ந விதி³தாக³மோ.

1779 படிஸங்விதி³தே நேவ-படிஸங்விதி³தஸஞ்ஞினோ;
தத்த² வேமதிகஸ்ஸாபி, து³க்கடங் பரிதீ³பிதங்.

1780 படிஸங்விதி³தஸஞ்ஞிஸ்ஸ, நேவ ச க²த்தியஸ்ஸ வா;
ந க²த்தியாபி⁴ஸேகேன, அபி⁴ஸித்தஸ்ஸ வா பன.

1781 உபோ⁴ஸுபி⁴ன்னமஞ்ஞிஸ்மிங், நிக்க²ந்தே விஸதோபி வா;
ந தோ³ஸும்மத்தகாதீ³னங், கதி²னேன க்ரியாக்ரியங்.

அந்தேபுரகதா².

1782 ரஜதங் ஜாதருபங் வா, உக்³க³ண்ஹந்தஸ்ஸ அத்தனோ;
தஸ்ஸ நிஸ்ஸக்³கியாபத்தி, உக்³க³ண்ஹாபயதோபி வா.

1783 க³ணபுக்³க³லஸங்கா⁴னங், நவகம்மஸ்ஸ சேதியே;
உக்³க³ண்ஹாபயதோ ஹோதி, து³க்கடங் க³ண்ஹதோபி வா.

1784 அவஸேஸஞ்ச முத்தாதி³-ரதனங் அத்தனோபி வா;
ஸங்கா⁴தீ³னம்பி அத்தா²ய, உக்³க³ண்ஹந்தஸ்ஸ து³க்கடங்.

1785 ஸசே கப்பியவத்து²ங் வா, வத்து²ங் வாபி அகப்பியங்;
தாலபண்ணம்பி வா ஹோது, மாதுகண்ணபிலந்த⁴னங்.

1786 ப⁴ண்டா³கா³ரிகஸீஸேன, யங் கிஞ்சி கி³ஹிஸந்தகங்;
தஸ்ஸ பாசித்தியாபத்தி, படிஸாமயதோ பன.

1787“இத³ங் ட²பெத்வா தே³ஹீ”தி, வுத்தேன பன கேனசி;
“ந வட்டதீ”தி வத்வா தங், ந நிதே⁴தப்³ப³மேவ து.

1788“ட²பேஹீ”தி ச பாதெத்வா, ஸசே க³ச்ச²தி புக்³க³லோ;
பலிபோ³தோ⁴ ஹி நாமேஸோ, ட²பேதுங் பன வட்டதி.

1789அனுஞ்ஞாதே பனட்டா²னே, உக்³க³ஹெத்வா அனாத³ரா;
ஸம்மா அனிக்கி²பந்தஸ்ஸ, ஹோதி ஆபத்தி து³க்கடங்.

1790அனுஞ்ஞாதே பனட்டா²னே, க³ஹெத்வா ரதனங் பன;
நிக்கி²பந்தஸ்ஸ வா ஸம்மா, ப⁴ண்ட³ங் ரதனஸம்மதங்.

1791க³ண்ஹந்தஸ்ஸ ச விஸ்ஸாஸங், தாவகாலிகமேவ ச;
ந தோ³ஸும்மத்தகாதீ³னங், ஸஞ்சரித்தஸமோத³யங்.

ரதனகதா².

1792மஜ்ஜ²ண்ஹஸமயா உத்³த⁴ங், அருணுக³க³மதோ புரே;
ஏதஸ்மிங் அந்தரே காலோ, விகாலோதி பவுச்சதி.

1793ஸந்தங் பி⁴க்கு²மனாபுச்சா², விகாலே பச்சயங் வினா;
பரிக்கி²த்தஸ்ஸ கா³மஸ்ஸ, பரிக்கே²போக்கமே பன.

1794அபரிக்கி²த்தகா³மஸ்ஸ, உபசாரோக்கமேபி வா;
து³க்கடங் பட²மே பாதே³, பாசித்தி து³தியே ஸியா.

1795அத² ஸம்ப³ஹுலா கா³மங், விகாலே பவிஸந்தி சே;
ஆபுச்சி²த்வாவ க³ந்தப்³ப³ங், அஞ்ஞமஞ்ஞங் ந சஞ்ஞதா².

1796க³ச்ச²ந்தி சே ததோ அஞ்ஞங், ததோ அஞ்ஞந்தி வட்டதி;
புன ஆபுச்ச²னே கிச்சங், நத்தி² கா³மஸதேபி ச.

1797பஸ்ஸம்பெ⁴த்வான உஸ்ஸாஹங், விஹாரத்தா²ய நிக்³க³தா;
பவிஸந்தி ஸசே அஞ்ஞங், புச்சி²தப்³ப³ங் து அந்தரா.

1798கத்வா குலக⁴ரே ப⁴த்த- கிச்சங் அஞ்ஞத்த² வா பன;
ஸசே சரிதுகாமோ யோ, ஸப்பிபி⁴க்கா²ய வா ஸியா.

1799.

ஆபுச்சி²த்வாவ க³ந்தப்³ப³ங், பஸ்ஸே சே பி⁴க்கு² லப்³ப⁴தி;
அஸந்தே பன நத்தீ²தி, க³ந்தப்³ப³ங் து யதா²ஸுக²ங்.

1800 ஓதரித்வா மஹாவிதி²ங், பி⁴க்கு²ங் யதி³ ச பஸ்ஸதி;
நத்தி² ஆபுச்ச²னே கிச்சங், சரிதப்³ப³ங் யதா²ஸுக²ங்.

1801 கா³மமஜ்ஜே²ன மக்³கே³ன, க³ச்ச²ந்தஸ்ஸேவ பி⁴க்கு²னோ;
“சரிஸ்ஸாமீ”தி உப்பன்னே, தேலபி⁴க்கா²ய மானஸே.

1802 ஆபுச்சி²த்வாவ க³ந்தப்³ப³ங், பஸ்ஸே சே பி⁴க்கு² விஜ்ஜதி;
அனோக்கம்ம சரந்தஸ்ஸ, மக்³கா³ ஆபுச்ச²னேன கிங்?

1803 திகபாசித்தியங் , காலே, விகாலோயந்தி ஸஞ்ஞினோ;
காலே வேமதிகஸ்ஸாபி, ஹோதி ஆபத்தி து³க்கடங்.

1804 ஆபுச்சி²த்வாவ ஸந்தங் வா, அனாபுச்சா² அஸந்தகங்;
கிச்சே அச்சாயிகே வாபி, பவிஸந்தஸ்ஸ பி⁴க்கு²னோ.

1805 க³ச்ச²தோ அந்தராராமங், பி⁴க்கு²னீனங் உபஸ்ஸயங்;
ததா² ஆஸனஸாலங் வா, தித்தி²யானங் உபஸ்ஸயங்.

1806 ஸியா கா³மேன மக்³கோ³ சே, அனாபத்தாபதா³ஸுபி;
ஸமுட்டா²னாத³யோ ஸப்³பே³, கதி²னேன ஸமா மதா.

1807 ந கேவலமனாபுச்சா², அப³ந்தி⁴த்வா ச ப³ந்த⁴னங்;
அபாருபித்வா ஸங்கா⁴டிங், க³ச்ச²தோபினவஜ்ஜதா.

விகாலகா³மப்பவேஸனகதா².

1808 அட்டி²த³ந்தமயங் ஸூசி-க⁴ரங் வாபி விஸாணஜங்;
காராபனே ச கரணே, பி⁴க்கு²னோ ஹோதி து³க்கடங்.

1809 லாபே⁴ பே⁴த³னகங் தஸ்ஸ, பாசித்தியமுதீ³ரிதங்;
அஞ்ஞஸ்ஸத்தா²ய கரணே, ததா² காராபனேபி ச.

1810 அஞ்ஞேன ச கதங் லத்த³தா⁴, து³க்கடங் பரிபு⁴ஞ்ஜதோ;
அனாபத்தாரணிகே விதே⁴, க³ண்டி²கஞ்ஜனிகாஸுபி.

1811 த³கபஞ்ச²னியா வாஸி-ஜடே உம்மத்தகாதி³னோ;

ஸமுட்டா²னாத³யோ நயா, ஸஞ்சரித்தஸமா மதா.

ஸூசிக⁴ரகதா².

1812 நவங் மஞ்சம்பி பீட²ங் வா, காராபெந்தேன பி⁴க்கு²னா;
அட்ட²ங்கு³லப்பமானேன, ஸுக³தங்கு³லதோ பன.

1813 காராபேதப்³ப³மேவங் து, ட²பெத்வா ஹெட்டி²மாடனிங்;
ஸச்சே²தா³ தஸ்ஸ பாசித்தி, தமதிக்கமதோ ஸியா.

1814 அஞ்ஞஸ்ஸத்தா²ய கரணே, ததா² காராபனேபி ச;
அஞ்ஞேன ச கதங் லத்³தா⁴, து³க்கடங் பரிபு⁴ஞ்ஜதோ.

1815 அனாபத்தி பமானேன, கரொந்தஸ்ஸப்பமாணிகங்;
லபி⁴த்வா தஸ்ஸ பாதே³ஸு, சி²ந்தி³த்வா பரிபு⁴ஞ்ஜதோ.

1816 நேவ சி²ந்தி³துகாமோ சே, நிக²ணித்வா பமாணதோ;
உத்தானங் வாபி அட்டங் வா, ப³ந்தி⁴த்வா பரிபு⁴ஞ்ஜதோ.

மஞ்சகதா².

1817 மஞ்சங் வா பன பீட²ங் வா, தூலோனத்³த⁴ங் கரெய்ய யோ;
தஸ்ஸுத்³தா³லனகங் வுத்தங், பாசித்தியமனீதினா.

1818 அனாபத்தி பனாயோகே³, ப³ந்த⁴னே அங்ஸப³த்³த⁴கே;
பி³ப்³போ³ஹனே பரிஸ்ஸாவே, த²விகாதீ³ஸு பி⁴க்கு²னோ.

1819 அஞ்ஞேன ச கதங் லத்³தா⁴, உத்³தா³லெத்வா நிலேவதோ;
அனந்தரஸ்ஸிமஸ்ஸாபி, ஸஞ்சரித்தஸமா நயா.

தூலோனத்³த⁴கதா².

1820 நிஸீத்³னங் கரொந்தேன, காதப்³ப³ங் து பமாணதோ;
பமாணாதிக்கமே தஸ்ஸ, பயோகே³ து³க்கடங் ஸியா.

1821 படி³லாபே⁴ன ஸச்சே²த³ங், பாசித்தியமுதீ³ரிதங்;
த்³வீஸு டா²னேஸு பா²லெத்வா, தஸ்ஸ திஸ்ஸோ த³ஸா ஸியுங்.

1822 அனாபத்தி பமானேன, கரொந்தஸ்ஸ ததூ³னகங்;

விதானாதி³ங் கரொந்தஸ்ஸ, ஸஞ்சரித்தஸமா நயா.

நிஸீத³னகதா².

1823 ரோகே³ கண்டு³படிச்சா²தி³, காதப்³பா³ ஹி பமாணதோ;
பமாணாதிக்கமே தஸ்ஸ, பயோகே³ து³க்கடங் லியா.

1824 படி³லாபே⁴ன ஸச்சே²த³ங், பாசித்தியமுதீ³ரிதங்;
அனாபத்தினயோபெத்த², அனந்தரஸமோ மதோ.

கண்டு³படிச்சா²தி³கதா².

1825 பமாணேனேவ காதப்³பா³, ததா² வஸ்ஸிகஸாடிகா;
பமாணாதிக்கமே தஸ்ஸ, அனந்தரஸமோ நயோ.

வஸ்ஸிகஸாடிககதா².

1826 சீவரேன ஸசே துல்ய-ப்பமாணங் ஸுக³தஸ்ஸ து;
சீவரங் பி⁴க்கு² காரெய்ய, கரணே து³க்கடங் லியா.

1827 படி³லாபே⁴ன ஸச்சே²த³ங், பாசித்தியமுதீ³ரிதங்;
அனந்தரஸமோயேவ, அனாபத்தினயோ மதோ.

1828 தீ³க⁴ஸோ ச பமாணேன, நவ தஸ்ஸ வித³த்தி²யோ;
திரியங் ச² வினித்தி³ட்டா², ஸுக³தஸ்ஸ வித³த்தி²யா.

1829 அஞ்ஞேன ச கதங் லத்த³தா⁴, ஸேவதோ து³க்கடங் ப⁴வே;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

நந்த³கதா².

ராஜவக்³கோ³ நவமோ.

இதி வினயவினிச்ச²யே பாசித்தியகதா² நி⁴டி²தா.

பாடிதே³ஸனீயகதா²

1830 யோ சந்தரக⁴ரங் பி⁴க்கு², பவிட்டா²ய து ஹத்த²தோ;
அஞ்ஞாதிகாய யங் கிஞ்சி, தஸ்ஸ பி⁴க்கு²னியா பன.

1831.

ஸஹத்தா² படிக்க³ண்ணெய்ய, கா²த³னங் போ⁴ஜனம்பி வா;
க³ஹணே து³க்கடங் போ⁴கே³, பாடிதே³ஸனியங் ஸியா.

1832 ரதி²காயபி வா ப்³யூஹே, ஸந்தி⁴ஸிங்கா⁴டகேஸு வா;
ஹத்தி²ஸாலாதி³கே ட²த்வா, க³ண்ணஹதோபி அயங் நயோ.

1833 ரதி²காய ஸசே ட²த்வா, தே³தி பி⁴க்கு²னி போ⁴ஜனங்;
ஆபத்தி அந்தராராமே, ட²த்வா க³ண்ணஹாதி பி⁴க்கு² சே.

1834 எத்த²ந்தரக⁴ரங் தஸ்ஸா, பவிட்டா²ய ஹி வாக்யதோ;
பி⁴க்கு²ஸ்ஸ ச டி²தட்டா²னங், நப்பமாணந்தி வண்ணிதங்.

1835 தஸ்மா பி⁴க்கு²னியா ட²த்வா, ஆராமாதீ³ஸு தெ³ந்தியா;
வீதி²யாதீ³ஸு சே ட²த்வா, ந தோ³ஸோ படிக³ண்ணஹதோ.

1836 யாமகாலிகஸத்தாஹ-காலிகங் யாவஜீவிகங்;
ஆஹாரத்தா²ய க³ஹணே, அஜ்ஜோ²ஹாரே ச து³க்கடங்.

1837 ஆமிஸேன அஸம்பி⁴ன்ன-ரஸங் ஸந்தா⁴ய பா⁴ஸிதங்;
பாடிதே³ஸனியாபத்தி, ஸம்பி⁴ன்னேகரஸே ஸியா.

1838 ஏகதோ²பஸம்பன்ன-ஹத்த²தோ படிக³ண்ணஹதோ;
காலிகானங் சதுன்னம்பி, ஆஹாரத்தா²ய து³க்கடங்.

1839 ஞாதிகாயபி அஞ்ஞாதி-ஸஞ்ஞினோ விமதிஸ்ஸ வா;
து³க்கடங் ஞாதிஸஞ்ஞிஸ்ஸ, ததா² அஞ்ஞாதிகாய வா.

1840 தா³பெந்தியா அனாபத்தி, த³த³மானாய வா பன;
நிக்கி²பித்வாந்தராராமா-தீ³ஸு ட²த்வாபி தெ³ந்தியா.

1841 கா³மதோ நீஹரித்வா வா, தே³தி சே ப³ஹி வட்டதி;
“பச்சயே ஸதி பு⁴ஞ்ஜா”தி, தே³தி சே காலிகத்தயங்.

1842 ஹத்த²தோ ஸாமணேரீனங், ஸிக்க²மானாய வா ததா²;
இத³ங் ஏளகலோமேன, ஸமுட்டா²னங் ஸமங் மதங்.

பட²மபாடிதே³ஸனீயகதா².

1843 அவுத்தே “அபஸக்கா”தி, ஏகேனாபி ச பி⁴க்கு²னா;

ஸசெஜ்ஜோ²ஹரணத்தா²ய, ஆமிஸங் படி³ண்ஹதி.

1844 க³ஹணே து³க்கடங் போ⁴கே³, பாடிதே³ஸனியங் ஸியா;
ஏகதோஉபஸம்பன்னங், ந வாரெந்தஸ்ஸ து³க்கடங்.

1845 ததே²வானுபஸம்பன்னா-யுபஸம்பன்னஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1846 அனாபத்தித்தனோ ப⁴த்தங், பதா³பேதி ந தே³தி சே;
ததா² அஞ்ஞஸ்ஸ ப⁴த்தங் வா, ந தா³பேதி பதே³தி சே.

1847 யங் ந தி³ன்னங் தங் தா³பேதி, ந தி³ன்னங் யத்த² வாபி ச;
தத்த² தம்பி ச ஸப்³பே³ஸங், ஸமங் தா³பேதி பி⁴க்கு²னீ.

1848 வோஸாஸந்தீ டி²தா ஸிக்க²-மானா வா ஸாமணேரிகா;
போ⁴ஜனானி ச பஞ்சேவ, வினா, உம்மத்தகாதி³னோ.

1849 கதி²னேன ஸமுட்டா²னங், ஸமானந்தி பகாஸிதங்;
க்ரியாக்ரியமித³ங் வுத்தங், திசித்தஞ்ச திவேத³னங்.

து³தியபாடிதே³ஸனீயகதா².

1850 ஸெக்க²ந்தி ஸம்மதே பி⁴க்கு², லத்³த⁴ஸம்முதிகே குலே;
க⁴ருபசாரோக்கமனா, புப்³பே³வ அனிமந்திதோ.

1851 அகி³லானோ க³ஹெத்வா சே, பரிபு⁴ஞ்ஜெய்ய ஆமிஸங்;
க³ஹணே து³க்கடங் போ⁴கே³, பாடிதே³ஸனியங் ஸியா.

1852 யாமகாலிகஸத்தாஹ-காலிகே யாவஜீவிகே;
க³ஹணே பரிபோ⁴கே³ ச, ஹோதி ஆபத்தி து³க்கடங்.

1853 அஸெக்க²ஸம்மதே ஸெக்க²-ஸம்மதந்தி ச ஸஞ்ஞினோ;
தத்த² வேமதிகஸ்ஸாபி, ததே²வ பரிதீ³பிதங்.

1854 அனாபத்தி கி³லானஸ்ஸ, கி³லானஸ்ஸாவஸேஸகே;
நிமந்திதஸ்ஸ வா பி⁴க்கா², அஞ்ஞேஸங் தத்த² தீ³யதி.

1855 க⁴ரதோ நீஹரித்வா வா, தெ³ந்தி சே யத்த² கத்த²சி;
நிச்சப⁴த்தாதி³கே வாபி, ததா² உம்மத்தகாதி³னோ.

1856 அனாக³தே ஹி பி⁴க்கு²ம்ஹி, க⁴ரதோ பட²மங் பன;
நீஹரித்வா ஸசே த்³வாரே, ஸம்பத்தே தெ³ந்தி வட்டதி.

1857 பி⁴க்கு²ங் பன ச தி³ஸ்வாவ, நீஹரித்வான கே³ஹதோ;
ந வட்டதி ஸசே தெ³ந்தி, ஸமுட்டா²னௌகூபமங்.

ததியபாடிதே³ஸனீயகதா².

1858 க³ஹட்டே²னாக³ஹட்டே²ன , இத்தி²யா புரிஸேன வா;
ஆராமங் உபசாரங் வா, பவிஸித்வா ஸசே பன.

1859 “இத்த²ன்னாமஸ்ஸ தே ப⁴த்தங், யாகு³ வா ஆஹரீயதி”;
ஏவமாரோசிதங் வுத்தங், படிஸங்விதி³தந்தி ஹி.

1860 ஆஹரீயது தங் பச்சா², யதா²ரோசிதமேவ வா;
தஸ்ஸ வா பரிவாரம்பி, அஞ்ஞங் கத்வா ப³ஹுங் பன.

1861 யாகு³யா விதி³தங் கத்வா, பூவங் ப⁴த்தங் ஹரந்தி சே;
இத³ம்பி விதி³தங் வுத்தங், வட்டதீதி குருந்தி³யங்.

1862 குலானி பன அஞ்ஞானி, தெ³ய்யத⁴ம்மங் பனத்தனோ;
ஹரந்தி தேன ஸத்³தி⁴ங் சே, ஸப்³ப³ங் வட்டதி தம்பி ச.

1863 அனாரோசிதமேவங் யங், யங் ஆராமமனாப⁴தங்;
தங் அஸங்விதி³தங் நாம, ஸஹத⁴ம்மிகஞாபிதங்.

1864 யங் அஸங்விதி³தங் கத்வா, ஆப⁴தங் பன தங் ப³ஹி;
ஆராமங் பன பேஸெத்வா, காராபெத்வா தமாஹரே.

1865 க³ந்த்வா வா அந்தராமக்³கே³, க³ஹேதப்³ப³ங் து பி⁴க்கு²னா;
ஸசே ஏவமகத்வா தங், ஆராமே உபசாரதோ.

1866 க³ஹேத்வாஜ்ஜோ²ஹரந்தஸ்ஸ, க³ஹணே து³க்கடங் ஸியா;
அஜ்ஜோ²ஹாரபயோகே³ஸு, பாடிதே³ஸனியங் மதங்.

1867 படிஸங்விதி³தேயேவ, அஸங்விதி³தஸஞ்ஞினோ;
தத்த² வேமதிகஸ்ஸாபி, ஹோதி ஆபத்தி து³க்கடங்.

1868.

படிஸங்விதி³தே தஸ்ஸ, கி³லானஸ்ஸாவஸேஸகே;
ப³ஹாராமே க³ஹெத்வா வா, அந்தோயேவஸ்ஸ பு⁴ஞ்ஜதோ.

1869 தத்த²ஜாதப²லாதீ³னி, அனாபத்தேவ கா²த³தோ;
ஸமுட்டா²னாத³யோ ஸப்³பே³, கதி²னேன ஸமா மதா.

சதுத்த²பாடிதே³ஸனீயகதா².

இதி வினயவினிச்ச²யே பாடிதே³ஸனீயகதா² நி²டி²தா.

ஸேகி²யகதா²

1870 யோ அனாத³ரியேனேவ, புரதோ பச்ச²தோபி வா;
ஓலம்பெ³த்வா நிவாஸெய்ய, தஸ்ஸ சாபத்தி து³க்கடங்.

1871 ஹத்தி²ஸொண்டா³தி³துல்யங் து, நிவாஸெந்தஸ்ஸ து³க்கடங்;
ஆபத்திபீ⁴ருனா நிச்சங், வத்த²ப³ப³ங் பரிமண்ட³லங்.

1872 ஜாணுமண்ட³லதோ ஹெட்டா², அட்ட²ங்³கு³லப்பமாணகங்;
ஓதாரெத்வா நிவத்த²ப³ப³ங், ததோ ஊனங் ந வட்டதி.

1873 அஸஞ்சிச்சாஸதிஸ்ஸாபி, அஜானந்தஸ்ஸ கேவலங்;
அனாபத்தி கி³லானஸ்ஸா-பதா³ஸும்மத்தகாதி³னோ.

பரிமண்ட³லகதா².

1874 உபோ⁴ கோணே ஸமங் கத்வா, ஸாத³ரங் பரிமண்ட³லங்;
கத்வா பாருபிதப்³பே³வங், அகரொந்தஸ்ஸ து³க்கடங்.

1875 அவிஸேஸேன வுத்தங் து, இத³ங் ஸிக்கா²பத³த்³வயங்;
தஸ்மா க⁴ரே விஹாரே வா, கத்த²ப³ப³ங் பரிமண்ட³லங்.

து³தியங்.

1876 க³ண்டி²கங் படிமுஞ்சித்வா, கத்வா கோணே உபோ⁴ ஸமங்;
சா²தெ³த்வா மணிப³ந்த⁴ஞ்ச, க³ந்த²ப³ப³ங் கீ³வமேவ ச.

1877 ததா² அகத்வா பி⁴க்கு²ஸ்ஸ, ஜத்தூனிபி உரம்பி ச;
விவரித்வா யதா²காமங், க³ச்ச²தோ ஹோதி து³க்கடங்.

ததியங்.

1878 க³லவாடகதோ உத்³த⁴ங், ஸீஸஞ்ச மணிப³ந்த⁴தோ;
ஹத்தே² பிண்டி³கமங்ஸம்ஹா, ஹெட்டா² பாதே³ உபோ⁴பி ச.

1879 விவரித்வாவஸேஸஞ்ச , சா²தெ³த்வா சே நிஸீத³தி;
ஹோதி ஸோ ஸுப்படிச்ச²ன்னோ, தோ³ஸோ வாஸுபக³ஸ்ஸ ந.

சதுத்த²ங்.

1880 ஹத்த²ங் வா பன பாத³ங் வா, அசாலெந்தேன பி⁴க்கு²னா;
ஸுவினீதேன க³ந்தப்³ப³ங், ச²ட்டே² நத்தி² விஸேஸதா.

பஞ்சமச²ட்டா²னி.

1881 ஸதீமதாவிகாரேன, யுக³மத்தஞ்ச பெக்கி²னா;
ஸுஸங்வுதேன க³ந்தப்³ப³ங், பி⁴க்கு²னொக்கி²த்தசக்கு²னா.

1882 யத்த² கத்த²சி ஹி ட்டா²னே, ஏகஸ்மிங் அந்தரே க⁴ரே;
ட²த்வா பரிஸ்ஸயாபா⁴வங், ஓலோகேதும்பி வட்டதி.

1883 யோ அனாத³ரியங் கத்வா, ஓலோகெந்தோ தஹிங் தஹிங்;
ஸசெந்தரக⁴ரே யாதி, து³க்கடங் அட்ட²மங் ததா².

ஸத்தமட்ட²மானி.

1884 ஏகதோ உப⁴தோ வாபி, ஹுத்வா உக்கி²த்தசீவரோ;
இந்த³கீ²லகதோ அந்தோ, க³ச்ச²தோ ஹோதி து³க்கடங்.

நவமங்.

1885 ததா² நிஸின்னகாலேபி, நீஹரந்தேன குண்டி³கங்;
அனுக்கி²பித்வா தா³தப்³பா³, தோ³ஸோ வாஸுபக³ஸ்ஸ ந.

த³ஸமங்.

பட²மோ வக்³கோ³.

1886 ந வட்டதி ஹஸந்தேன, க³ந்துஞ்சேவ நிஸீதி³துங்;
வத்து²ஸ்மிங் ஹஸனீயஸ்மிங், ஸிதமத்தங் து வட்டதி.

பட²மது³தியானி.

1887 அப்பஸத்³தே³ன க³ந்தப்³ப³ங், சதுத்தே²பி அயங் நயோ;
மஹாஸத்³த³ங் கரொந்தஸ்ஸ, உப⁴யத்தா²பி து³க்கடங்.

ததியசதுத்தா²னி.

1888 காயப்பசாலகங் கத்வா, பா³ஹுஸீஸப்பசாலகங்;
க³ச்ச²தோ து³க்கடங் ஹோதி, ததே²வ ச நிஸீத்³தோ.

1889 காயங் பா³ஹுஞ்ச ஸீஸஞ்ச, பக்³க³ஹெத்வா உஜுங் பன;
க³ந்தப்³ப³மாஸிதப்³ப³ஞ்ச, ஸமேனிரியாபதே²ன து.

1890 நிஸீத்³னேன யுத்தேஸு, தீஸு வாஸுபக³ஸ்ஸ ஹி;
அனாபத்தீதி ஞாதப்³ப³ங், விஞ்ஞனா வினயஞ்ஞனா.

து³தியோ வக்³கோ³.

1891 க²ம்ப⁴ங் கத்வா ஸஸீஸங் வா, பாருபித்வான க³ச்ச²தோ;
து³க்கடங் முனினா வுத்தங், ததா² உக்குடிகாய வா.

1892 ஹத்த²பல்லத்தி²காயாபி, து³ஸ்ஸபல்லத்தி²காய வா;
தஸ்ஸந்தரக⁴ரே ஹோதி, நிஸீத்³ந்தஸ்ஸ து³க்கடங்.

1893 து³தியே ச சதுத்தே² ச, ச²ட்டே² வாஸுபக³ஸ்ஸ து;
அனாபத்தீதி ஸாருப்பா, ச²ப்³பீ³ஸதி பகாஸிதா.

ச²ட்ட²ங்.

1894 ஸக்கச்சங் ஸதியுத்தேன, பி⁴க்கு²னா பத்தஸஞ்ஞினா;
பிண்ட³பாதோ க³ஹேதப்³போ³, ஸமஸுபோவ விஞ்ஞனா.

1895 ஸுபோ ப⁴த்தசதுப்³பா⁴கோ³, “ஸமஸுபோ”தி வுச்சதி;
முக்³க³மாஸகுலத்தா²னங், ஸுபோ “ஸுபோ”தி வுச்சதி.

1896 அனாபத்தி அஸஞ்சிச்ச, கி³லானஸ்ஸ ரஸேரஸே;
ததே²வ ஞாதகாதீனங், அஞ்ஞத்தா²ய த⁴னேன வா.

ஸத்தமட்ட²மனவமானி.

1897 அந்தோலேகா²பமானேன , பத்தஸ்ஸ முக²வட்டியா;
பூரிதோவ க³ஹேதப்³போ³, அதி⁴ட்டா²னூபக³ஸ்ஸ து.

1898 தத்த² தூ²பீகதங் கத்வா, க³ண்ஹதோ யாவகாலிகங்;
யங் கிஞ்சி பன பி⁴க்கு²ஸ்ஸ, ஹோதி ஆபத்தி து³க்கடங்.

1899 அதி⁴ட்டா²னூபகே³ பத்தே, காலிகத்தயமேவ ச;
ஸேஸே தூ²பீகதங் ஸப்³பங், வட்டதேவ ந ஸங்ஸயோ.

1900 த்³வீஸு பத்தேஸு ப⁴த்தங் து, க³ஹேத்வா பத்தமேககங்;
பூரெத்வா யதி³ பேஸேதி, பி⁴க்க²னங் பன வட்டதி.

1901 பத்தே பக்கி²ப்பமானங் யங், உச்ச²க²ண்ட³ப²லாதி³கங்;
ஓரோஹதி ஸசே ஹட்டா², ந தங் தூ²பீகதங் ஸியா.

1902 புப்ப²தக்கோலகாதீ³னங், ட²பெத்வா சே வடங்ஸகங்;
தி³ன்னங் அயாவகாலித்தா, ந தங் தூ²பீகதங் ஸியா.

1903 வடங்ஸகங் து பூவஸ்ஸ, ட²பெத்வா ஓத³னோபரி;
பிண்ட³பாதங் ஸசே தெ³ந்தி, இத³ங் தூ²பீகதங் ஸியா.

1904 ப⁴த்தஸ்ஸுபரி பண்ணங் வா, தா²லகங் வாபி கிஞ்சிபி;
ட²பெத்வா பரிபூரெத்வா, ஸசே க³ண்ஹாதி வட்டதி.

1905 படிக்க³ஹேதுமேவஸ்ஸ, தங் து ஸப்³பங் ந வட்டதி;
க³ஹிதங் ஸுக³ஹிதங், பச்சா², பு⁴ஞ்ஜிதப்³பங் யதா²ஸுக²ங்.

ததியோ வக்³கோ³.

1906 பட²மங் து³தியங் வுத்த-நயங் து ததியே பன;
உபரோதி⁴மத³ஸ்ஸெத்வா, பொ⁴த்தப்³பங் படிபாடியா.

1907 அஞ்ஞேஸங் அத்தனோ ப⁴த்தங், ஆகிரங் பன பா⁴ஜனே;
நத்தோ²மஸதி சே தோ³ஸோ, ததா² உத்தரிப⁴ங்க³கங்.

ததியங்.

1908 சதுத்தே² யங் து வத்தப்³பங், வுத்தங் புப்³பே³ அஸேஸதோ;
பஞ்சமே மத்த²கங் தோ³ஸோ, மத்³தி³த்வா பரிபு⁴ஞ்ஜதோ.

1909 அனாபத்தி கி³லானஸ்ஸ, பரித்தேபி ச ஸேஸகே;
ஏகதோ பன மத்³தி³த்வா, ஸங்கட்³டி⁴த்வான பு⁴ஞ்ஜதோ.

சதுத்த²பஞ்சமானி.

1910 யோ பி⁴ய்யோகம்யதாஹேது, ஸூபங் வா ப்யஞ்ஜனம்பி வா;
படிச்சா²தெ³ய்ய ப⁴த்தேன, தஸ்ஸ சாபத்தி து³க்கடங்.

ச²ட்ட²ங்.

1911 விஞ்ஞத்தியங் து வத்தப்³ப³ங், அபுப்³ப³ங் நத்தி² கிஞ்சிபி;
அட்ட²மே பன உஜ்ஜா²னே, கி³லானோபி ந முச்சதி.

1912 “த³ஸ்ஸாமி தா³பெஸ்ஸாமீ”தி, ஓலோகெந்தஸ்ஸ பி⁴க்கு²னோ;
அனாபத்தீதி ஞாதப்³ப³ங், ந ச உஜ்ஜா²னஸஞ்ஞினோ.

அட்ட²மங்.

1913 மஹந்தங் பன மோரண்ட³ங், குக்குடண்ட³ஞ்ச கு²த்³த³கங்;
தேஸங் மஜ்ஜ²ப்பமானேன, கத்தப்³போ³ கப³ளோ பன.

1914 க²ஜ்ஜகே பன ஸப்³ப³த்த², மூலகா²த³னியாதி³கே;
ப²லாப²லே அனாபத்தி, கி³லானும்மத்தகாதி³னோ.

நவமங்.

1915 அதீ³கோ⁴ பன காதப்³போ³, ஆலோபோ பரிமண்ட³லோ;
க²ஜ்ஜதுத்தரிப⁴ங்க³ஸ்மிங், அனாபத்தி ப²லாப²லே.

த³ஸமங்.

சதுத்தோ² வக்³கோ³.

1916 அனாஹடே முக²த்³வாரங், அப்பத்தே கப³ளே பன;
அத்தனோ ச முக²த்³வாரங், விவரந்தஸ்ஸ து³க்கடங்.

பட²மங்.

1917 முகே² ச ஸகலங் ஹத்த²ங், பக்கி²பந்தஸ்ஸ து³க்கடங்;
முகே² ச கப³ளங் கத்வா, கதே²துங் ந ச வட்டதி.

1918 வசனங் யத்தகேனஸ்ஸ, பரிபுண்ணங் ந ஹோதி ஹி;
முக்²ஸ்மிங்தத்தகே ஸந்தே, ப்யாஹரந்தஸ்ஸ து³க்கடங்.

1919 முகே² ஹரீதகாதீ³னி, பக்கி²பித்வா கதே²தி யோ;
வசனங் பரிபுண்ணங் சே, கதே²துங் பன வட்டதி.

து³தியததியானி.

1920 யோ பிண்டு³க்கே²பகங் பி⁴க்கு², கப³ளச்சே²த³கம்பி வா;
மக்கடோ விய க³ண்டே³ வா, கத்வா பு⁴ஞ்ஜெய்ய து³க்கடங்.

சதுத்த²பஞ்சமச²ட்டா²னி.

1921 நித்³து⁴னித்வான ஹத்த²ங் வா, ப⁴த்தங் ஸித்தா²வகாரகங்;
ஜிவ்ஹானிச்சா²ரகங் வாபி, ததா² “சபு சபு”தி வா.

1922 அனாத³ரவஸேனேவ, பு⁴ஞ்ஜதோ ஹோதி து³க்கடங்;
ஸத்தமே அட்ட²மே நத்தி², தோ³ஸோ கசவருஜ்ஜ²னே.

ஸத்தமத³ஸமானி.

பஞ்சமோ வக்³கோ³.

1923 கத்வா ஏவங் ந பொ⁴த்தப்³பங், ஸத்³தங் “ஸுரு ஸுரு”தி ச;
ஹத்த²னில்லேஹகங் வாபி, ந ச வட்டதி பு⁴ஞ்ஜிதுங்.

1924 பா²ணிதங் க⁴னயாகு³ங் வா, க³ஹேத்வா அங்கு³லீஹி தங்;
முகே² அங்கு³லியோ பொ⁴த்துங், பவேஸெத்வாபி வட்டதி.

1925 ந பத்தோ லேஹிதப்³போ³வ, ஏகாயங்கு³லிகாய வா;
ஏகஒட்டோ²பி ஜிவ்ஹாய, ந ச நில்லேஹிதப்³போ³.

சதுத்த²ங்.

1926 ஸாமிஸேன து ஹத்தே²ன, ந ச பானியதா²லகங்;
க³ஹேதப்³பங், படிக்கி²த்தங், படிக்கூலவஸேன ஹி.

1927 புக்³க³லஸ்ஸ ச ஸங்க⁴ஸ்ஸ, க³ஹட்ட²ஸ்ஸத்தனோபி ச;
ஸந்தகோ பன ஸங்கோ² வா, ஸராவங் வாபி தா²லகங்.

1928 தஸ்மா ந ச க³ஹேதப்³ப³ங், க³ண்ஹதோ ஹோதி து³க்கடங்;
அனாமிஸேன ஹத்தே²ன, க³ஹணங் பன வட்டதி.

பஞ்சமங்.

1929 உத்³த⁴ரித்வாபி பி⁴ந்தி³த்வா, க³ஹேத்வா வா படிக்க³ஹே;
நீஹரித்வா அனாபத்தி, ச²ட்³டெ³ந்தஸ்ஸ க⁴ரா ப³ஹி.

ச²ட்ட²ங்.

1930 ச²த்தங் யங் கிஞ்சி ஹத்தே²ன, ஸரீராவயவேன வா;
ஸசே தா⁴ரயமானஸ்ஸ, த⁴ம்மங் தே³ஸேதி து³க்கடங்.

ஸத்தமங்.

1931 அயமேவ நயோ வுத்தோ, த³ண்ட³பாணிம்ஹி புக்க³லே;
சதுஹத்த²ப்பமாணோவ, த³ண்டோ³ மஜ்ஜி²மஹத்த²தோ.

அட்ட²மங்.

1932 ததே²வ ஸத்த²பாணிஸ்ஸ, த⁴ம்மங் தே³ஸேதி து³க்கடங்;
ஸத்த²பாணி ந ஹோதாஸிங், ஸன்னய்ஹித்வா டி²தோ பன.

நவமங்.

1933 த⁴னுங் ஸரேன ஸத்³தி⁴ங் வா, த⁴னுங் வா ஸரமேவ வா;
ஸஜியங் நிஜியங் வாபி, க³ஹேத்வா த⁴னுத³ண்ட³கங்.

1934 டி²தஸ்ஸபி நிஸின்னஸ்ஸ, நிபன்னஸ்ஸாபி வா ததா²;
ஸசே தே³ஸேதி ஸத்³த⁴ம்மங், ஹோதி ஆபத்தி து³க்கடங்.

1935 படிமுக்கம்பி கண்ட²ம்ஹி, த⁴னுங் ஹத்தே²ன யாவதா;
ந க³ண்ஹாதி நரோ தாவ, த⁴ம்மங் தே³ஸெய்ய வட்டதி.

ச²ட்டோ² வக்கோ³.

1936 பாது³காருஹகஸ்ஸாபி, த⁴ம்மங் தே³ஸேதி து³க்கடங்;
அக்கமித்வா டி²தஸ்ஸாபி, படிமுக்கஸ்ஸ வா ததா².

பட²மங்.

1937 உபாஹனக³தஸ்ஸாபி, அயமேவ வினிச்ச²யோ;
ஸப்³புத்த² அகி³லானஸ்ஸ, யானே வா ஸயனேபி வா.

1938 நிபன்னஸ்ஸாகி³லானஸ்ஸ, கடஸாரே ச²மாய வா;
பீடே² மஞ்சேபி வா உச்சே, நிஸின்னேன டி²தேன வா.

1939 ந ச வட்டதி தே³ஸேதுங், ட²த்வா வா உச்சபூ⁴மியங்;
ஸயனேஸு க³தேனாபி, ஸயனேஸு க³தஸ்ஸ ச.

1940 ஸமானே வாபி உச்சே வா, நிபன்னே நேவ வட்டதி;
நிபன்னேன டி²தஸ்ஸாபி, நிபன்னஸ்ஸபி வட்டதி.

1941 நிஸின்னேன நிஸின்னஸ்ஸ, டி²தஸ்ஸாபி ச வட்டதி;
டி²தஸ்ஸேவ டி²தேனாபி, தே³ஸேதும்பி ததே²வ ச.

து³தியததியசதுத்தா²னி.

1942 பல்லத்தி²கா நிஸின்னஸ்ஸ, அகி³லானஸ்ஸ தே³ஹினோ;
ததா² வேடி²தஸ்ஸஸ்ஸ, த⁴ம்மங் தே³ஸேதி து³க்கடங்.

1943 கேஸந்தங் விவராபெத்வா, தே³ஸேதி யதி³ வட்டதி;
ஸஸ்ஸங் பாருதஸ்ஸாபி, அயமேவ வினிச்ச²யோ.

பஞ்சமச²ட்ட²ஸத்தமானி.

1944 அட்ட²மே நவமே வாபி, த³ஸமே நத்தி² கிஞ்சிபி;
ஸசேபி தே²ருபட்டா²னங், க³ந்த்வான த³ஹரங் டி²தங்.

1945 பஞ்ஹங் புச்ச²தி சே தே²ரோ, கதே²துங் ந ச வட்டதி;
தஸ்ஸ பஸ்ஸே பனஞ்ஞஸ்ஸ, கதே²தப்³பங் விஜானதா.

அட்ட²மனவமத³ஸமானி.

ஸத்தமோ வக்³கோ³.

1946 க³ச்ச²தோ புரதோ பஞ்ஹங், ந வத்தப்³பங் து பச்ச²தோ;
“பச்சி²மஸ்ஸ கதே²மீ”தி, வத்தப்³பங் வினயஞ்ஞனா.

1947 ஸத்³தி⁴ங் உக்³க³ஹிதங் த⁴ம்மங், ஸஜ்ஜா²யதி ஹி வட்டதி;

ஸமமேவ யுக³க்³கா³ஹங், கதே²துங் க³ச்ச²தோபி ச.

பட²மங்.

1948 ஏகேகஸ்ஸாபி சக்கஸ்ஸ, பதே²னாபி ச க³ச்ச²தோ;
உப்பதே²ன ஸமங் வாபி, க³ச்ச²ந்தஸ்ஸேவ வட்டதி.

து³தியங்.

1949 ததியே நத்தி² வத்தப்³பங், சதுத்தே² ஹரிதே பன;
உச்சாராதி³சதுக்கங் து, கரோதோ து³க்கடங் ஸியா.

1950 ஜீவருக்க²ஸ்ஸ யங் மூலங், தி³ஸ்ஸமானங் து க³ச்ச²தி;
ஸாகா² வா பூ⁴மிலக்³கா³ தங், ஸப்³பங் ஹரிதமேவ ஹி.

1951 ஸசே அஹரிதங் டா²னங், பெக்க²ந்தஸ்ஸேவ பி⁴க்கு²னோ;
வச்சங் நிக்க²மதேவஸ்ஸ, ஸஹஸா பன வட்டதி.

1952 பலாலண்டு³பகே வாபி, கோ³மயே வாபி கிஸ்மிசி;
கத்தப்³பங், ஹரிதங் பச்சா², தமொத்த²ரதி வட்டதி.

1953 கதோ அஹரிதே டா²னே, ஹரிதங் ஏதி வட்டதி;
ஸிங்கா⁴ணிகா க³தா எத்த², கே²ளேனேவ ச ஸங்க³ஹங்.

சதுத்த²ங்.

1954 வச்சகுடிஸமுத்த³தா³தி³-உத³கேஸுபி பி⁴க்கு²னோ;
தேஸங் அபரிபோ⁴க³த்தா, கரோதோ நத்தி² து³க்கடங்.

1955 தே³வே பன ச வஸ்ஸந்தே, உத³கோகே⁴ ஸமந்ததோ;
அஜலங் அலப⁴ந்தேன, ஜலே காதும்பி வட்டதி.

பஞ்சமங்.

அட்ட²மோ வக்³கோ³.

1956 ஸமுட்டா²னாத³யோ ஞெய்யா, ஸேகி²யானங் பனெத்த² ஹி;
உஜ்ஜக்³கி⁴காதி³சத்தாரி, கப³ளேன முகே²ன ச.

1957 ச²மானீசாஸனட்டா²ன-பச்சா² உப்பத²வா த³ஸ;

ஸமுட்டா²னாத³யோ துல்யா, வுத்தா ஸமனுபா⁴ஸனே.

1958 ச²த்தங் த³ண்டா³வுத⁴ங் ஸத்த²ங், பாது³காருள்ஹுபாஹனா;
யானங் ஸயனபல்லத்த²-வேடி²தோகு³ண்டி²தானி ச.

1959 த⁴ம்மதே³ஸனாதுல்யாவ, ஸமுட்டா²னாதி³னா பன;
ஸுபோத³னேன விஞ்ஞத்தி, தெ²ய்யஸத்த²ஸமங் மதங்.

1960 அவஸேஸா திபஞ்ஞாஸ, ஸமானா பட²மேன து;
ஸேகி²யேஸுபி ஸப்³பே³ஸு, அனாபத்தாபதா³ஸுபி.

1961 உஜ்ஜா²னஸஞ்ஞிகே தூ²பீ-கதே ஸுபபடிச்ச²தே³;
தீஸு ஸிக்கா²பதெ³ஸ்வேவ, கி³லானோ ந பனாக³தோ.

ஸேகி²யகதா².

1962 இமங் விதி³த்வா வினயே வினிச்ச²யங்;
விஸாரதோ³ ஹோதி, வினீதமானஸோ;
பரேஹி ஸோ ஹோதி ச து³ப்பத⁴ங்ஸியோ;
ததோ ஹி ஸிக்கே² ஸததங் ஸமாஹிதோ.

1963 இமங் பரமஸங்கரங் ஸங்கரங்;
அவேச்ச ஸவனாமதங் நாமதங்;
படுத்தமதி⁴கே ஹிதே கே ஹி தே;
ந யந்தி கலிஸாஸனே ஸாஸனே.

இதி வினயவினிச்ச²யே

பி⁴க்கு²விப⁴ங்க³கதா² நிட்டி²தா.

பி⁴க்கு²னீவிப⁴ங்கோ³

1964 பி⁴க்கு²னீனங் ஹிதத்தா²ய, விப⁴ங்க³ங் யங் ஜினொப்³ரவி;
தஸ்மிங் அபி ஸமாஸேன, கிஞ்சிமத்தங் ப⁴ணாமஹங்.

பாராஜிககதா²

1965 ச²ந்த³ஸோ மேது²னங் த⁴ம்மங், படிஸேவெய்ய யா பன;
ஹோதி பாராஜிகா நாம, ஸமணீ ஸா பவுச்சதி.

1966 மனுஸ்ஸபுரிஸாதீ³னங், நவன்னங் யஸ்ஸ கஸ்ஸசி;
ஸஜீவஸ்ஸாப்யஜீவஸ்ஸ, ஸந்த²தங் வா அஸந்த²தங்.

1967 அத்தனோ திவிதே⁴ மக்³கே³, யேபு⁴ய்யக்கா²யிதாதி³கங்;
அங்க³ஜாதங் பவேஸெந்தீ, அல்லோகாஸே பராஜிதா.

1968 இதோ பரமவத்வாவ, ஸாதா⁴ரணவினிச்ச²யங்;
அஸாதா⁴ரணமேவாஹங், ப⁴ணிஸ்ஸாமி ஸமாஸதோ.

1969 அத⁴க்க²கங் ஸரீரகங், யது³ப்³ப⁴ஜாணுமண்ட³லங்;
ஸரீரகேன சே தேன, பு²ஸெய்ய பி⁴க்கு²னீ பன.

1970 அவஸ்ஸுதஸ்ஸாவஸ்ஸுதா, மனுஸ்ஸபுக்³க³லஸ்ஸ யா;
ஸரீரமஸ்ஸ தேன வா, பு²ட்டா² பாராஜிகா ஸியா.

1971 கப்பரஸ்ஸ பனுத்³த⁴ம்பி, க³ஹிதங் உப்³ப⁴ஜாணுனா;
யதா²வுத்தப்பகாரேன, காயேனானேன அத்தனோ.

1972 புரிஸஸ்ஸ ததா² காய- படிப³த்³த⁴ங் பு²ஸந்தியா;
ததா² யதா²பரிச்சி²ன்ன- காயப³த்³தே⁴ன அத்தனோ.

1973 அவஸேஸேன வா தஸ்ஸ, காயங் காயேன அத்தனோ;
ஹோதி து²ல்லச்சயங் தஸ்ஸா, பயோகே³ புரிஸஸ்ஸ ச.

1974 யக்க²பேததிரச்சா²ன- பண்ட³கானங் அத⁴க்க²கங்;
உப்³ப⁴ஜாணுங் ததே²வஸ்ஸா, உப⁴தோவஸ்ஸவே ஸதி.

1975 ஏகதோவஸ்ஸவே சாபி, து²ல்லச்சயமுதீ³ரிதங்;

அவஸேஸே ச ஸப்³ப³த்த², ஹோதி ஆபத்தி து³க்கடங்.

1976 உப்³ப³க்க²கமதோ⁴ஜாணு-மண்ட³லங் பன யங் இத⁴;
கப்பரஸ்ஸ ச ஹெட்டா²பி, க³தங் எத்தே²வ ஸங்க³ஹங்.

1977 கேலாயதி ஸசே பி⁴க்கு², ஸத்³தி⁴ங் பி⁴க்கு²னியா பன;
உபி⁴ன்னங் காயஸங்ஸக்³க³-ராகே³ ஸதி ஹி பி⁴க்கு²னோ.

1978 ஹோதி ஸங்கா⁴தி³ஸேஸோவ, நாலோ பி⁴க்கு²னியா ஸியா;
காயஸங்ஸக்³க³ராகோ³ ச, ஸசே பி⁴க்கு²னியா ஸியா.

1979 பி⁴க்கு²னோ மேது²னோ ராகோ³, கே³ஹபேமம்பி வா ப⁴வே;
தஸ்ஸா து²ல்லச்சயங் வுத்தங், பி⁴க்கு²னோ ஹோதி து³க்கடங்.

1980 உபி⁴ன்னங் மேது²னே ராகே³, கே³ஹபேமேபி வா ஸதி;
அவிஸேஸேன நித்³தி³ட்ட²ங், உபி⁴ன்னங் து³க்கடங் பன.

1981 யஸ்ஸ யத்த² மனோஸுத்³த⁴ங், தஸ்ஸ தத்த² ந தோ³ஸதா;
உபி⁴ன்னம்பி அனாபத்தி, உபி⁴ன்னங் சித்தஸுத்³தி⁴யா.

1982 காயஸங்ஸக்³க³ராகே³ன, பி⁴ந்தி³த்வா பட²மங் பன;
பச்சா² தூ³ஸேதி சே நேவ, ஹோதி பி⁴க்கு²னிதூ³ஸகோ.

1983 அத² பி⁴க்கு²னியா புட்டோ², ஸாதி³யந்தோவ சேதஸா;
நிச்சலோ ஹோதி சே பி⁴க்கு², ந ஹோதாபத்தி பி⁴க்கு²னோ.

1984 பி⁴க்கு²னீ பி⁴க்கு²னா புட்டா², ஸசே ஹோதிபி நிச்சலா;
அதி⁴வாஸேதி ஸம்ப²ஸ்ஸங், தஸ்ஸா பாராஜிகங் ஸியா.

1985 ததா² து²ல்லச்சயங் கெ²த்தே, து³க்கடஞ்ச வினித்³தி³ஸே;
வுத்தத்தா “காயஸங்ஸக்³க³ங், ஸாதி³யெய்யா”தி ஸத்து²னா.

1986 தஸ்ஸா க்ரியஸமுட்டா²னங், ஏவங் ஸதி ந தி³ஸ்ஸதி;
இத³ங் தப்³ப³ஹுலேனேவ, நயேன பரிதீ³பிதங்.

1987 அனாபத்தி அஸஞ்சிச்ச, அஜானித்வாமஸந்தியா;
ஸதி ஆமஸனே தஸ்ஸா, ப²ஸ்ஸங் வாஸாதி³யந்தியா.

1988.

வேத³னட்டாய வா கி²த்த-சித்தாயும்மத்திகாய வா;
ஸமுட்டா²னாத³யோ துல்யா, பட²மந்திமவத்து²னா.

உப்³பு⁴ஜாணுமண்ட³லகதா².

1989 பாராஜிகத்தங் ஜானந்தி, ஸலிங்கே³ து டி²தாய ஹி;
“ந கஸ்ஸசி பரஸ்ஸாஹங், ஆரோசெஸ்ஸாமி தா³னி”தி.

1990 து⁴ரே நிக்கி²த்தமத்தஸ்மிங், ஸா ச பாராஜிகா ஸியா;
அயங் வஜ்ஜபடிச்சா²தி³- நாமிகா பன நாமதோ.

1991 ஸேஸங் ஸப்பாணவக்³க³ஸ்மிங், து³ட்டு²ல்லேன ஸமங் நயே;
விஸேஸோ தத்ர பாசித்தி, இத⁴ பாராஜிகங் ஸியா.

வஜ்ஜபடிச்சா²தி³கதா².

1992 ஸங்கே⁴னுக்கி²த்தகோ பி⁴க்கு², டி²தோ உக்கே²பனே பன;
யங்தி³ட்டி²கோ ச ஸோ தஸ்ஸா, தி³ட்டி²யா க³ஹணேன தங்.

1993 அனுவத்தெய்ய யா பி⁴க்கு²ங், பி⁴க்கு²னீ ஸா விஸும்பி ச;
ஸங்க⁴மஜ்ஜே²பி அஞ்ஞாஹி, வச்சமானா ததே²வ ச.

1994 அசஜந்தீவ தங் வத்து²ங், க³ஹைத்வா யதி³ திட்ட²தி;
தஸ்ஸ கம்மஸ்ஸ ஓஸானே, உக்கி²த்தஸ்ஸானுவத்திகா.

1995 ஹோதி பாராஜிகாபன்னா, ஹோதாஸாகியதீ⁴தரா;
புன அப்படிஸந்தே⁴யா, த்³விதா⁴ பி⁴ன்னா ஸிலா விய.

1996 அத⁴ம்மே பன கம்மஸ்மிங், நித்³தி³ட்ட²ங் திகது³க்கடங்;
ஸமுட்டா²னாத³யோ ஸப்³பே³, வுத்தா ஸமனுபா⁴ஸனே.

உக்கி²த்தானுவத்திககதா².

1997 அபாராஜிககெ²த்தஸ்ஸ , க³ஹணங் யஸ்ஸ கஸ்ஸசி;
அங்க³ஸ்ஸ பன தங் ஹத்த²-க்³க³ஹணந்தி பவுச்சதி.

1998 பாருதஸ்ஸ நிவத்த²ஸ்ஸ, க³ஹணங் யஸ்ஸ கஸ்ஸசி;
ஏதங் ஸங்கா⁴டியா கண்ண-க்³க³ஹணந்தி பவுச்சதி.

1999.

காயஸங்ஸக்³ஸங்கா²த-அஸத்³த⁴ம்மஸ்ஸ காரணா;
பி⁴க்கு²னீ ஹத்த²பாஸஸ்மிங், திட்டெ²ய்ய புரிஸஸ்ஸ வா.

2000 ஸல்லபெய்ய ததா² தத்த², ட²த்வா து புரிஸேன வா;
ஸங்கேதங் வாபி க³ச்செ²ய்ய, இச்செ²ய்யா க³மனஸ்ஸ வா.

2001 தத³த்தா²ய படிச்ச²ன்ன-ட்டா²னஞ்ச பவிஸெய்ய வா;
உபஸங்ஹரெய்ய காயங் வா, ஹத்த²பாஸே டி²தா பன.

2002 அயமஸ்ஸமணீ ஹோதி, வினட்டா² அட்ட²வத்து²கா;
அப⁴ப்³பா³ புனருள்ஹாய, சின்னோ தாலோவ மத்த²கே.

2003 அனுலோமேன வா வத்து²ங், படிலோமேன வா சுதா;
அட்ட²மங் பரிபூரெந்தீ, ததே²கந்தரிகாய வா.

2004 அதா²தி³தோ பனேகங் வா, த்³வே வா தீணிபி ஸத்த வா;
ஸதக்க²த்தும்பி பூரெந்தீ, நேவ பாராஜிகா ஸியா.

2005 ஆபத்தியோ பனாபன்னா, தே³ஸெத்வா தாஹி முச்சதி;
து⁴ரனிக்கே²பனங் கத்வா, தே³ஸிதா க³ணனுபிகா.

2006 ந ஹோதாபத்தியா அங்க³ங், ஸஉஸ்ஸாஹாய தே³ஸிதா;
தே³ஸனாக³ணனங் நேதி, தே³ஸிதாபி அதே³ஸிதா.

2007 அனாபத்தி அஸஞ்சிச்ச, அஜானித்வா கரொந்தியா;
ஸமுட்டா²னாத³யோ ஸப்³பே³, அனந்தரஸமா மதா.

2008 “அஸத்³த⁴ம்மோ”தி நாமெத்த², காயஸங்ஸக்³க³னாமகோ;
அயமுத்³தி³ஸிதோ அத்தோ², ஸப்³ப³அட்ட²கதா²ஸுபி.

2009 விஞ்ஞா படிப³லோ காய-ஸங்ஸக்³க³ங் படிபஜ்ஜிதுங்;
காயஸங்ஸக்³க³பா⁴வே து, ஸாத⁴கங் வசனங் இத³ங்.

அட்ட²வத்து²ககதா².

2010 அவஸ்ஸுதா படிச்சா²தீ³, உக்கி²த்தா அட்ட²வத்து²கா;
அஸாதா⁴ரணபஞ்ஞத்தா, சதஸ்ஸோவ மஹேஸினா.

பாராஜிககதா² நி²டி²தா.

ஸங்கா⁴தி³ஸேஸகதா²

- 2011 யா பன பி⁴க்கு²னீ உஸஸயவாதா³;
அட்டகரீ முக²ரீ விஹரெய்ய;
யேன கேனசி நரேனித⁴ ஸத்³தி⁴ங்;
ஸா க³ருகங் கிர தோ³ஸமுபேதி.
- 2012 ஸக்கி²ங் வாபி ஸஹாயங் வா, பரியேஸதி து³க்கடங்;
பதே³ பதே³ ததா² அட்டங், காதுங் க³ச்ச²ந்தியாபி ச.
- 2013 ஆரோசேதி ஸசே புப்³பங், பி⁴க்கு²னீ அத்தனோ கத²ங்;
தி³ஸ்வா வோஹாரிகங் தஸ்ஸா, ஹோதி ஆபத்தி து³க்கடங்.
- 2014 ஆரோசேதி ஸசே பச்சா², இதரோ அத்தனோ கத²ங்;
ஹோதி பி⁴க்கு²னியா தஸ்ஸா, து²ல்லச்சயமனந்தரங்.
- 2015 ஆரோசேதிதரோ புப்³பங், ஸசே ஸோ அத்தனோ கத²ங்;
பச்சா² பி⁴க்கு²னீ சே புப்³ப-ஸதி³ஸோவ வினிச்ச²யோ.
- 2016 “ஆரோசேஹி”தி வுத்தா சே, “கத²ங் தவ மமாபி ச”;
ஆரோசேது யதா²காமங், பட²மே து³க்கடங் ஸியா.
- 2017 து³தியாரோசனே தஸ்ஸா, து²ல்லச்சயமுதீ³ரிதங்;
உபாஸகேன வுத்தேபி, அயமேவ வினிச்ச²யோ.
- 2018 ஆரோசிதகத²ங் ஸுத்வா, உபி⁴ன்னம்பி யதா² ததா²;
வினிச்ச²யே கதே தேஹி, அட்டே பன ச நிட்டி²தே.
- 2019 அட்டஸ்ஸ பரியோஸானே, ஜயே பி⁴க்கு²னியா பன;
பராஜயேபி வா தஸ்ஸா, ஹோதி ஸங்கா⁴தி³ஸேஸதா.
- 2020 து³தங் வாபி பஹிணித்வா, ஆக³ந்த்வான ஸயம்பி வா;
பச்சத்தி²கமனுஸ்ஸேஹி, ஆகட்³டி⁴யதி யா பன.
- 2021 ஆராமே பன அஞ்ஞேஹி, அனாசாரங் கதங் ஸசே;
அனோதி³ஸ்ஸ பரங் கிஞ்சி, ரக்க²ங் யாசதி தத்த² யா.
- 2022 யாய கிஞ்சி அவுத்தாவ, த⁴ம்மட்டா² ஸயமேவ து;

ஸுத்வா தங் அஞ்ஞதோ அட்டங், நிட்டா²பெந்தி ஸசே பன.

2023 தஸ்ஸா, உம்மத்திகாதீ³ன-மனாபத்தி பகாஸிதா;
கதி²னேன ஸமுட்டா²னங், துல்யங் ஸகிரியங் இத³ங்.

அட்டகாரிகதா².

2024 ஜானந்தீ பி⁴க்கு²னீ சோரிங், வஜ்ஜ²ங் விதி³தமேவ யா;
ஸங்க⁴ங் அனபலோகெத்வா, ராஜானங் க³ணமேவ வா.

2025 வுட்டா²பெய்ய வினா கப்பங், சோரிவுட்டா²பனங் பன;
ஸங்கா⁴தி³ஸேஸமாபத்தி-மாபன்னா நாம ஹோதி ஸா.

2026 பஞ்சமாஸக்³க⁴னங் யாய, ஹரிதங் பரஸந்தகங்;
அதிரேகக்³க⁴னங் வாபி, அயங் “சோரீ”தி வுச்சதி.

2027 பி⁴க்கு²னீஸு பனஞ்ஞாஸு, தித்தி²யேஸுபி வா ததா²;
யா பப்³பஜிதபுப்³பா³ ஸா, அயங் “கப்பா”தி வுச்சதி.

2028 வுட்டா²பேதி ச யா சோரிங், ட²பெத்வா கப்பமேவித³ங்;
ஸசே ஆசரினிங் பத்தங், சீவரங் பரியேஸதி.

2029 ஸம்மன்னதி ச ஸீமங் வா, தஸ்ஸா ஆபத்தி து³க்கடங்;
ஞத்தியா து³க்கடங் த்³வீஹி, கம்மவாசாஹி ச த்³வயங்.

2030 து²ல்லச்சயஸ்ஸ, கம்மந்தே, க³ருகங் நித்³தி³ஸே பு³தோ⁴;
க³ணோ ஆசரினீ சேவ, ந ச முச்சதி து³க்கடங்.

2031 அனாபத்தி அஜானந்தீ, வுட்டா²பேதி, ததே²வ ச;
கப்பங் வா அபலோகெத்வா, தஸ்ஸா உம்மத்திகாய வா.

2032 சோரிவுட்டா²பனங் நாம, ஜாயதே வாசசித்ததோ;
காயவாசாதி³தோ சேவ, ஸசித்தஞ்ச க்ரியாக்ரியங்.

சோரிவுட்டா²பனகதா².

2033 கா³மந்தரங் நதீ³பாரங், க³ச்செ²ய்யேகாவ யா ஸசே;
ஓஹீயெய்ய க³ணம்ஹா வா, ரத்திங் விப்பவஸெய்ய வா.

- 2034 பட²மாபத்திகங் த⁴ம்மங், ஸாபன்னா க³ருகங் ஸியா;
ஸககா³மா அனாபத்தி, ஞாதப்³பா³ நிக்க²மந்தியா.
- 2035 நிக்க²மித்வா ததோ அஞ்ஞங், கா³மங் க³ச்ச²ந்தியா பன;
து³க்கடங் பத³வாரேன, வேதி³தப்³பங் விபா⁴வினா.
- 2036 ஏகேன பத³வாரேன, கா³மஸ்ஸ இதரஸ்ஸ ச;
பரிக்கே²பே அதிக்ந்தே, உபசாரோக்கமேபி வா.
- 2037 து²ல்லச்சயங் அதிக்ந்தே, ஓக்கந்தே து³தியேன து;
பாதே³ன க³ருகாபத்தி, ஹோதி பி⁴க்கு²னியா பன.
- 2038 நிக்க²மித்வா ஸசே பச்சா², ஸகங் கா³மங் விஸந்தியா;
அயமேவ நயோ ஞெய்யோ, வதிச்சி²த்³தே³ன வா ததா².
- 2039 பாகாரேன விஹாரஸ்ஸ, பூ⁴மிங் து பவிஸந்தியா;
கப்பியந்தி பவிட்ட²த்தா, ந தோ³ஸோ கோசி விஜ்ஜதி.
- 2040 பி⁴க்கு²னீனங் விஹாரஸ்ஸ, பூ⁴மி தாஸங் து கப்பியா;
ஹோதி பி⁴க்கு²விஹாரஸ்ஸ, பூ⁴மி தாஸமகப்பியா.
- 2041 ஹத்தி²அஸ்ஸரதா²தீ³ஹி, இத்³தி⁴யா வா விஸந்தியா;
அனாபத்தி ஸியாபத்தி, பத³ஸா க³மனே பன.
- 2042 யங் கிஞ்சி ஸககா³மங் வா, பரகா³மம்பி வா ததா²;
ப³ஹிகா³மே பன ட²த்வா, ஆபத்தி பவிஸந்தியா.
- 2043 லக்க²ணேனுபபன்னாய, நதி³யா து³தியங் வினா;
பாரங் க³ச்ச²தி யா தீரங், தஸ்ஸா ஸமணியா பன.
- 2044 பட²மங் உத்³த⁴ரித்வான, பாத³ங் தீரே ட²பெந்தியா;
ஹோதி து²ல்லச்சயாபத்தி, து³தியாதிக்கமே க³ரு.
- 2045 அந்தரனதி³யங்யேவ, ஸத்³தி⁴ங் து³தியிகாய ஹி;
ப⁴ண்டி³த்வா ஓரிமங் தீரங், ததா² பச்சுத்தரந்தியா.
- 2046 இத்³தி⁴யா ஸேதுனா நாவா-யானரஜ்ஜஹி வா பன;
ஏவம்பி ச பரங் தீரங், அனாபத்துத்தரந்தியா.

- 2047 நஹாயிதுங் பிவிதுங் வாபி, ஓதிண்ணாத² நதி³ங் புன;
பத³ஸாவோரிமங் தீரங், பச்சுத்தரதி வட்டதி.
- 2048 பத³ஸா ஓதரித்வான, நதி³ங் உத்தரணே பன;
ஆரோஹித்வா ததா² ஸேதுங், அனாபத்துத்தரந்தியா.
- 2049 ஸேதுனா உபக³ந்த்வா வா, யானாகாஸேஹி வா ஸசே;
யாதி உத்தரணே காலே, பத³ஸா க³ருகங் பு²ஸே.
- 2050 நதி³யா பாரிமங் தீரங், இதோ ஓரிமதீரதோ;
உல்லங்கி⁴த்வான வேகே³ன, அனாபத்துத்தரந்தியா.
- 2051 பிட்டி²யங் வா நிஸீதி³த்வா, க²ந்தே⁴ வா உத்தரந்தியா;
ஹத்த²ஸங்கா⁴தனே வாபி, து³ஸ்ஸயானேபி வட்டதி.
- 2052 “புரேருணோத³யாயேவ , பாஸங் து³தியிகாய ஹி;
க³மிஸ்ஸாமீ”தி ஆபோ⁴க³ங், வினா பி⁴க்கு²னியா பன.
- 2053 ஏகக³ப்⁴பி வா ஹத்த²-பாஸங் து³தியிகாய ஹி;
அதிக்கம்ம ஸியாபத்தி, அருணங் உட்ட²பெந்தியா.
- 2054 “க³மிஸ்ஸாமீ”தி ஆபோ⁴க³ங், கத்வா க³ச்ச²ந்தியா பன;
ந தோ³ஸோ து³தியா பாஸங், உட்டே²தி அருணங் ஸசே.
- 2055 இந்த³கீ²லமதிக்கம்ம, அரஞ்ஞங் எத்த² தீ³பிதங்;
கா³மதோ ப³ஹி நிக்க²ம்ம, தஸ்ஸா து³தியிகாய து.
- 2056 த³ஸ்ஸனஸ்ஸபசாரங் து, ஜானித்வா விஜஹந்தியா;
ஹோதி து²ல்லச்சயாபத்தி, ஜஹிதே க³ருகங் ஸியா.
- 2057 ஸாணிபாகாரபாகார-தருஅந்தரிதே பன;
ஸவனஸ்ஸபசாரேபி, ஸதி ஆபத்தி ஹோதி ஹி.
- 2058 அஜ்ஜோ²காஸே து துா³ரேபி, த³ஸ்ஸனஸ்ஸபசாரதா;
ஹோதி, எத்த² கத²ங் த⁴ம்ம-ஸவனாரோசனே விய.
- 2059 மக்³க³முள்ஹஸ்ஸ ஸத்³தே³ன, விய கூஜந்தியா பன;
“அய்யே”தி தஸ்ஸா ஸத்³த³ஸ்ஸ, ஸவனாதிக்கமேபி ச.

- 2060 ஹோதி, பி⁴க்கு²னியாபத்தி, க³ருகா ஏவருபகே;
எத்த² பி⁴க்கு²னீ ஏகாபி, க³ணாயேவாதி வுச்சதி.
- 2061 ஓஹீயித்வாத² க³ச்ச²ந்தீ, “பாபுணிஸ்ஸாமி தா³னிஹங்”;
இச்சேவங் து ஸஉஸ்ஸாஹா, அனுப³ந்த⁴தி வட்டதி.
- 2062 த்³வின்னங் மக்³க³ங் க³ச்ச²ந்தீனங், ஏகா க³ந்துங் நோ ஸக்கோதி;
உஸ்ஸாஹஸ்ஸச்சே²த³ங் கத்வா, ஓஹீனா சே தஸ்ஸாபத்தி.
- 2063 இதராபி ஸசே யாதி, “ஓஹீயது அய”ந்தி ச;
ஹோதி தஸ்ஸாபி ஆபத்தி, ஸஉஸ்ஸாஹா ந ஹோதி சே.
- 2064 க³ச்ச²ந்தீஸு ததா² த்³வீஸு, புரிமா யாதி ஏககங்;
அஞ்ஞங் பன ஸசே மக்³க³ங், பச்சி²மாபி ச க³ண்ஹதி.
- 2065 ஏகிஸ்ஸா பன பக்கந்த-ட்டா²னே திட்ட²தி சேதரா;
தஸ்மா தத்த² உபி⁴ன்னம்பி, அனாபத்தி பகாஸிதா.
- 2066 அருணுக்³க³மனா புப்³பே³, நிக்க²மித்வா ஸகா³மதோ;
அருணுக்³க³மனே காலே, கா³மந்தரக³தாய ஹி.
- 2067 அதிக்கமந்தியா பாரங், நதி³யா து³தியிகங் வினா;
ஆபத்தியோ சதஸ்ஸோபி, ஹொந்தி ஏகக்க²ணே பன.
- 2068 பக்கந்தா வாபி விப்³ப⁴ந்தா, யாதா பேதானங் லோகங் வா;
பக்க²ஸங்கந்தா வா நட்டா², ஸத்³தி⁴ங் யாதா ஸா சே ஹோதி.
- 2069 கா³மந்தரோக்கமாதீ³னி, சத்தாரிபி கரொந்தியா;
அனாபத்தீதி ஞாதப்³ப³ங், ஏவங் உம்மத்திகாயபி.
- 2070 ரத்தியங் விப்பவாஸங் து, ஹத்த²பாஸோவ ரக்க²தி;
அகா³மகே அரஞ்ஞே து, க³ணா ஓஹீயனங் மதங்.
- 2071 ஸககா³மே யதா²காமங், தி³வா ச விசரந்தியா;
சத்தாரோபி ச ஸங்கா⁴தி³-ஸோஸா தஸ்ஸா ந விஜ்ஜரே.
- 2072 ஸமுட்டா²னாத³யோ துல்யா, பட²மந்திமவத்து²னா;
ஸசித்தங் காயகம்மஞ்ச, திசித்தஞ்ச திவேத³னங்.

- 2073 ஸீமாஸம்முதியா சேவ, க³ணஸ்ஸ பரியேஸனே;
ஞத்தியா து³க்கடங், த்³வீஹி, ஹொந்தி து²ல்லச்சயா து³வே.
- 2074 கம்மஸ்ஸ பரியோஸானே, ஹொதி ஸங்கா⁴தி³ஸேஸதா;
திகஸங்கா⁴தி³ஸேஸங் து, அத⁴ம்மே திகது³க்கடங்.
- 2075 புச்சித்வா காரகங் ஸங்க⁴ங், ச²ந்த³ங் த³த்வா க³ணஸ்ஸ வா;
வத்தே வா பன வத்தந்திங், அஸந்தே காரகேபி வா.
- 2076 பி⁴க்கு²னிங் பன உக்கி²த்தங், யா ஓஸாரேதி பி⁴க்கு²னீ;
தஸ்ஸா உம்மத்திகாதீ³ன-மனாபத்தி பகாஸிதா.
- 2077 ஸங்க⁴பே⁴த³ஸமா வுத்தா, ஸமுட்டா²னாத³யோ நயா;
க்ரியாக்ரியமித³ங் வுத்தங், அயமேவ விலேஸஸதா.

சதுத்த²ங்.

- 2078 ஸயங் அவஸ்ஸுதா ததா², அவஸ்ஸுதஸ்ஸ ஹத்த²தோ;
மனுஸ்ஸபுக்³க³லஸ்ஸ சே, யதே³வ கிஞ்சி க³ண்ஹதி.
- 2079 ஆமிஸங், க³ஹணே தஸ்ஸா;
து²ல்லச்சயமுதீ³ரிதங்;
அஜ்ஜோ²ஹாரேஸு ஸங்கா⁴தி³;
ஸேஸா ஹொந்தி பயோக³தோ.
- 2080 ஏகதோவஸ்ஸுதே கிஞ்சி, படிக்க³க³ண்ஹதி, து³க்கடங்;
அஜ்ஜோ²ஹாரப்பயோகே³ஸு, து²ல்லச்சயசயோ ஸியா.
- 2081 யக்க²பேததிரச்சா²ன-பண்ட³கானஞ்ச ஹத்த²தோ;
மனுஸ்ஸவிக்க³க³ஹானம்பி, உப⁴தோவஸ்ஸுதே ததா².
- 2082 ஏகதோவஸ்ஸுதே எத்த², உத³கே த³ந்தகட்ட²கே;
க³ஹணே பரிபோ⁴கே³ ச, ஸப்³புத்தா²பி ச து³க்கடங்.
- 2083 உப⁴யாவஸ்ஸுதாபா⁴வே, ந தோ³ஸோ யதி³ க³ண்ஹதி;
“அவஸ்ஸுதோ ந சாய”ந்தி, ஞத்வா க³ண்ஹதி யா பன.

2084 தஸ்ஸா உம்மத்திகாதீன-மனாபத்தி பகாஸிதா;
ஸமுட்டா²னாத³யோ துல்யா, பட²மந்திமவத்து²னா.

பஞ்சமங்.

2085 உய்யோஜனே பனேகிஸ்ஸா, இதரிஸ்ஸா படி³க³ஹே;
து³க்கடானி ச போ⁴கே³ஸு, து²ல்லச்சயக³ணோ ஸியா.

2086 போ⁴ஜனஸ்ஸாவஸானஸ்மிங் , ஹோதி ஸங்கா⁴தி³ஸேஸதா;
யக்கா²தீ³னங் சதுன்னம்பி, ததே²வ புரிஸஸ்ஸ ச.

2087 த³ந்தகட்டு²த³கானஞ்ச, க³ஹணுய்யோஜனே பன;
தேஸஞ்ச பரிபோ⁴கே³பி, து³க்கடங் பரிகித்திதங்.

2088 யக்கா²தீ³னங் து ஸேஸஸ்ஸ, க³ஹணுய்யோஜனே பன;
போ⁴கே³ ச து³க்கடங், பு⁴த்தே, து²ல்லச்சயமுதீ³ரிதங்.

2089 “நாவஸ்ஸுதோ”தி ஞத்வா வா, குபிதா வா ந க³ண்ஹதி;
குலானுத்³யதா வாபி, உய்யோஜேதி ச யா பன.

2090 தஸ்ஸா உம்மத்திகாதீன-மனாபத்தி பகாஸிதா;
அதி³ன்னாதா³னதுல்யாவ, ஸமுட்டா²னாத³யோ நயா.

ச²ட்ட²ங்.

2091 ஸத்தமங் அட்ட²மங் ஸங்க⁴-போ⁴தே³ன ஸதி³ஸங் மதங்;
ஸமுட்டா²னாதி³னா ஸத்³தி⁴ங், நத்தி² காசி விலேஸஸதா.

ஸத்தமட்ட²மானி.

2092 நவமே த³ஸமே வாபி, வத்தப்³ப³ங் நத்தி² கிஞ்சிபி;
அனந்தரஸமாயேவ, ஸமுட்டா²னாத³யோ நயா.

நவமத³ஸமானி.

2093 து³ட்ட²தோ³ஸத்³வயேனாபி, ஸஞ்சரித்தேன தேன ச²;
யாவததியகா அட்ட², சத்தாரி ச இதோ ததோ.

ஸங்கா⁴தி³ஸேஸகதா².

நிஸ்ஸக்³கியகதா²

2094.அதி⁴ட்டா²னூபக³ங் பத்தங், அனதி⁴ட்டா²ய பி⁴க்கு²னீ;
விகப்பனமகத்வா வா, ஏகாஹம்பி ட²பெய்ய சே.

2095.அருணுக்³க³மனேனேவ, ஸத்³தி⁴ங் பி⁴க்கு²னியா ஸியா;
தஸ்ஸா நிஸ்ஸக்³கியாபத்தி, பத்தஸன்னிதி⁴காரணா.

2096.ஸேஸோ பன கதா²மக்³கோ³, பத்தஸிக்கா²பதே³ இத⁴;
ஸப்³போ³ வுத்தனயேனேவ, வேதி³தப்³போ³ வினிச்ச²யோ.

2097.த³ஸாஹாதிக்கமே தத்த², ஏகாஹாதிக்கமே இத⁴;
தஸ்ஸிமஸ்ஸ உபி⁴ன்னம்பி, அயமேவ விஸேஸதா.

பட²மங்.

2098.அகாலே சீவரங் தி³ன்னங், தி³ன்னங் காலேபி கேனசி;
ஆதி³ஸ்ஸ பன “ஸம்பத்தா, பா⁴ஜெந்தூ”தி நியாமிதங்.

2099.அகாலசீவரங் “கால-சீவர”ந்தி ஸசே பன;
பா⁴ஜாபெய்ய ச யா தஸ்ஸா, பயோகே³ து³க்கடங் ஸியா.

2100.அத்தனா படிலத்³த⁴ங் யங், தங் து நிஸ்ஸக்³கியங் ப⁴வே;
லபி⁴த்வா பன நிஸ்ஸட்ட²ங், யதா²தா³னே நியோஜயே.

2101.கத்வா வினயகம்மங் து, படிலத்³த⁴ம்பி தங் புன;
தஸ்ஸ சாயமதி⁴ப்பாயோ, ஸேவிதுங் ந ச வட்டதி.

2102.அகாலவத்த²ஸஞ்ஞாய, து³க்கடங் காலசீவரே;
உப⁴யத்த²பி நித்³தி³ட்ட²ங், ததா² வேமதிகாயபி.

2103.காலசீவரஸஞ்ஞாய, சீவரே உப⁴யத்த²பி;
ந தோ³ஸும்மத்திகாதீ³னங், திஸமுட்டா²னதா மதா.

து³தியங்.

2104.சீவரேஸுபி ப³ந்தி⁴த்வா, ட²பிதேஸு ப³ஹுஸ்வபி;
ஏகாயேவ ஸியாபத்தி, அச்சி²ந்த³தி ஸசே ஸயங்.

2105 ததா²ச்சி²ந்தா³பனே ஏகா, ஏகாயாணத்தியா ப⁴வே;
இதரேஸு ச வத்து²னங், பயோக³ஸ்ஸ வஸா ஸியா.

2106 திகபாசித்தி அஞ்ஞஸ்மிங், பரிக்கா²ரே து து³க்கடங்;
திகது³க்கடமுத்³தி³ட்ட²ங், இதரிஸ்ஸா து சீவரே.

2107 தாய வா தீ³யமானங் து, தஸ்ஸா விஸ்ஸாஸமேவ வா;
க³ண்ஹந்தியா அனாபத்தி, திஸமுட்டா²னதா மதா.

ததியங்.

2108 விஞ்ஞாபெத்வா ஸசே அஞ்ஞங், தத³ஞ்ஞங் விஞ்ஞாபெந்தியா;
விஞ்ஞத்திது³க்கடங் தஸ்ஸா, லாபா⁴ நிஸ்ஸக்³கியங் ஸியா.

2109 திகபாசித்தியங் வுத்தங், அனஞ்ஞே த்³விகது³க்கடங்;
அனஞ்ஞேனஞ்ஞஸஞ்ஞாய, அப்பஹாந்தேபி வா புன.

2110 தஸ்மிங் தஞ்ஞேவ வா அஞ்ஞங், அஞ்ஞேனத்தே²பி வா ஸதி;
ஆனிஸங்ஸஞ்ச த்³ஸ்ஸெத்வா, தத³ஞ்ஞங் விஞ்ஞாபெந்தியா.

2111 அனாபத்தீதி ஞாதப்³பங், ததா² உம்மத்திகாயபி;
ஸஞ்சரித்தஸமா வுத்தா, ஸமுட்டா²னாத³யோ நயா.

சதுத்த²ங்.

2112 அஞ்ஞங் சேதாபெத்வா புப்³பங், பச்சா² அஞ்ஞங் சேதாபெய்ய;
ஏவங் ஸஞ்ஞாயஞ்ஞங் த⁴ஞ்ஞங், மய்ஹங் ஆனெத்வா தே³தீதி.

2113 சேதாபனபயோகே³ன, மூலட்டா²ய ஹி து³க்கடங்;
லாபே⁴ நிஸ்ஸக்³கியங் ஹோதி, தேன சஞ்ஞேன வாப⁴தங்.

2114 ஸேஸங் அனந்தரேனேவ, ஸதி³ஸந்தி வினித்³தி³ஸே;
ஸமுட்டா²னாதி³னா ஸத்³தி⁴ங், அபுப்³பங் நத்தி² கிஞ்சிபி.

பஞ்சமங்.

2115 அஞ்ஞத³த்தா²ய தி³ன்னேன, பரிக்கா²ரேன யா பன;
சேதாபெய்ய ஸசே அஞ்ஞங், ஸங்கி⁴கேனித⁴ பி⁴க்கு²னீ.

2116பயோகே³ து³க்கடங், லாபே⁴, தஸ்ஸா நிஸ்ஸக்³கியங் ஸியா;
அனஞ்ஞத³த்தி²கே எத்த², நித்³தி³ட்ட²ங் த்³விகது³க்கடங்.

2117ஸேஸகங் அஞ்ஞத³த்தா²ய, அனாபத்துபனெந்தியா;
புச்சி²த்வா ஸாமிகே வாப்யா-பதா³ஸும்மத்திகாய வா.

2118ஸஞ்சரித்தஸமா வுத்தா, ஸமுட்டா²னாத³யோ நயா;
ஸத்தமங் ச²ட்ட²ஸதி³ஸங், ஸயங் யாசிதகங் வினா.

ச²ட்ட²ஸத்தமானி.

2119அட்ட²மே நவமே வாபி, வத்தப்³ப³ங் நத்தி² கிஞ்சிபி;
“மஹாஜனிகஸஞ்ஞாசி-கேனா”தி பத³தாதி⁴கா.

2120த³ஸமேபி கதா² ஸப்³பா³, அனந்தரஸமா மதா;
ஸமுட்டா²னாதி³னா ஸத்³தி⁴ங், விலேஸேஸா நத்தி² கோசிபி.

அட்ட²மனவமத³ஸமானி.

பட²மோ வக்³கோ³.

2121அதிரேகசதுக்கங்ஸங், க³ருபாவுரணங் பன;
சேதாபெய்ய ஸசே தஸ்ஸா, சதுஸச்சப்பகாஸினா.

2122பயோகே³ து³க்கடங் வுத்தங், லாபே⁴ நிஸ்ஸக்³கியங் மதங்;
கஹாபணசதுக்கங் து, கங்ஸோ நாம பவுச்சதி.

2123ஊனகே து சதுக்கங்ஸே, உத்³தி³ட்ட²ங் த்³விகது³க்கடங்;
அனாபத்தி சதுக்கங்ஸ-பரமங் க³ருகங் பன.

2124சேதாபேதி ததூ³னங் வா, ஞாதகானஞ்ச ஸந்தகே;
அஞ்ஞஸ்ஸத்தா²ய வா அத்த-த⁴னேனும்மத்திகாய வா.

2125சேதாபெந்தங் மஹக்³க⁴ங் யா, சேதாபேதப்பமேவ வா;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

ஏகாத³ஸமங்.

2126லஹுபாவுரணங் அட்³ட⁴- தெய்யகங்ஸக்³க⁴னங் பன;

ததோ சே உத்தரிங் யங் து, சேதாபேதி ஹி பி⁴க்கு²னீ.

2127 தஸ்ஸா நிஸ்ஸக்³கி³யாபத்தி, பாசித்தி பரியாபுதா;
அனந்தரஸமங் ஸேஸங், நத்தி² காசி விஸேஸதா.

த்³வாத³ஸமங்.

2128 ஸாதா⁴ரணானி ஸேஸானி, தானி அட்டா²ரஸாபி ச;
இமானி த்³வாத³ஸேவாபி, ஸமதிங்ஸேவ ஹொந்தி ஹி.

நிஸ்ஸக்³கி³யகதா².

பாசித்தியகதா²

2129 லஸுணங் ப⁴ண்டி³கங் வுத்தங், ந ஏகத்³விதிமிஞ்ஜகங்;
ஆமகங் மாக³த⁴ங்யேவ, “கா²தி³ஸ்ஸாமீ”தி க³ண்ஹதி.

2130 க³ஹணே து³க்கடங் தஸ்ஸா, பாசித்தி யதி³ கா²த³தி;
அஜ்ஜோ²ஹாரவஸேனேவ, பாசித்திங் பரிதீ³பயே.

2131 த்³வே தயோ ப⁴ண்டி³கே ஸத்³தி⁴ங், ஸங்கா²தி³த்வா ஸசே பன;
அஜ்ஜோ²ஹரதி யா தஸ்ஸா, ஏகங் பாசித்தியங் ஸியா.

2132 பி⁴ந்தி³த்வா தத்த² ஏகேகங், மிஞ்ஜங் கா²த³ந்தியா பன;
மிஞ்ஜானங் க³ணனாயஸ்ஸா, பாசித்திக³ணனா ஸியா.

2133 பலண்டு³கோ ப⁴ஞ்ஜனகோ, ஹரிதோ சாபலோபி ச;
லஸுணா பன சத்தாரோ, வட்டந்தேவ ஸபா⁴வதோ.

2134 பலண்டு³கோ பண்டு³வண்ணோ, ப⁴ஞ்ஜனோ லோஹிதோபி ச;
ஹரிதோ ஹரிதவண்ணோ, சாபலோ ஸேதகோபி ச.

2135 ஏகா மிஞ்ஜா பலண்டு³ஸ்ஸ, ப⁴ஞ்ஜனஸ்ஸ து³வே ஸியுங்;
திஸ்ஸோ ஹரிதகஸ்ஸாபி, சாபலோ ஹொத்யமிஞ்ஜகோ.

2136 ஸுபமங்ஸாதி³ஸங்பாகே , ஸாளவுத்தரிப⁴ங்க³கே;
ந தோ³ஸுமமத்திகாதீ³னங், ஸமுட்டா²னேளகூபமங்.

பட²மங்.

2137 ஸம்பா³தே⁴ உபகச்சே²ஸு, முத்தஸ்ஸ கரணேபி வா;
ஏகலோமம்பி பாசித்தி, ஸங்ஹராபெந்தியா ஸியா.

2138 ப்³ஹுகேபி ததா² லோமே, ஸங்ஹராபெந்தியா பன;
பயோக³க³ணனாயஸ்ஸா, ந லோமக³ணனாய ஹி.

2139 ந தோ³ஸோ ஸதி ஆபா³தே⁴, லோமகே ஸங்ஹரந்தியா;
ஸமுட்டா²னாத³யோ மக்³க³- ஸங்விதா⁴னஸமா மதா.

து³தியங்.

2140 ஹோதி அந்தமஸோ முத்த-கரணஸ்ஸ தலகா⁴தனே;
கேஸரேனாபி ராகே³ன, பாசித்தி பது³மஸ்ஸ வா.

2141 க³ண்ட³ங் தத்த² வணங் வாபி, ந தோ³ஸோ பஹரந்தியா;
ஸமுட்டா²னாத³யோ துல்யா, பட²மந்திமவத்து²னா.

ததியங்.

2142 யா பனுப்பலபத்தம்பி, ப்³யஞ்ஜனே பி⁴க்கு²னத்தனோ;
காமராக³பரேதா து, பவேஸேதி ந வட்டதி.

2143 இத³ங் வத்து²வஸேனேவ, வுத்தங் து ஜதுமட்ட²கங்;
த³ண்ட³மேலாளுகங் வாபி, முத்தஸ்ஸ கரணே பன.

2144 ஸம்ப²ஸ்ஸங் ஸாதி³யந்தியா, பவேஸேதி ஸசே பன;
பவேஸாபேதி வா தஸ்மிங், தஸ்ஸா பாசித்தியங் ஸியா.

2145 ஆபா³த⁴பச்சயா தோ³ஸோ, நத்தி² உம்மத்திகாய வா;
தலகா⁴தகதுல்யாவ, ஸமுட்டா²னாத³யோ மதா.

சதுத்த²ங்.

2146 அங்கு³லீனங் பன த்³வின்னங், அக்³க³பப்³புத்³வயாதி⁴கங்;
பாசித்தியங் பவேஸெத்வா, த³கஸுத்³தி⁴ங் கரொந்தியா.

2147 ஏகிஸ்ஸாங்கு³லியா தீணி, பப்³பா³னி பன தீ³க⁴தோ;
பாசித்தியங் ப⁴வே ஸுத்³தி⁴ங், பவேஸெத்வாதி³யந்தியா.

2148 சதுன்னங் வாபி திஸ்ஸன்னங், ஏகபப்³பும்பி யா பன;
வித்தா²ரதோ பவேஸேதி, தஸ்ஸா பாசித்தியங் ஸியா.

2149 இதி ஸப்³பப்பகாரேன, மஹாபச்சரியா பன;
அபி⁴ப்யத்ததரங் கத்வா, அயமத்தோ² விபா⁴விதோ.

2150 தோ³ஸோ த்வங்கு³லபப்³பே³ வா, நத்தி² ஆபா³த⁴காரணா;
அதி⁴கம்பி பவேஸெத்வா, த³கஸுத்தி⁴ங் கரொந்தியா.

2151 ததா² உம்மத்திகாதீ³ன-மனாபத்தி பகாஸிதா;
ஸமுட்டா²னாத³யோ ஸப்³பே³, தலகா⁴தஸமா மதா.

பஞ்சமங்.

2152 பு⁴ஞ்ஜதோ பன பி⁴க்கு²ஸ்ஸ, பானீயங் வா விதூ⁴பனங்;
க³ஹெத்வா உபதிட்டெ²ய்ய, தஸ்ஸா பாசித்தியங் ஸியா.

2153 க³ஹிதா உத³கேனேவ, கீ²ரதக்காத³யோ ரஸா;
“பீ³ஜனீ”தி ச யா காசி, வத்த²கோணாதி³ வுச்சதி.

2154 ஹத்த²பாஸே இத⁴ட்டா²ன-பச்சயாபத்தி தீ³பிதா;
பஹாரபச்சயா வுத்தங், க²ந்த⁴கே து³க்கடங் விஸுங்.

2155 ஹத்த²பாஸங் ஜஹித்வா வா, உபதிட்ட²ந்தியா பன;
கா²த³தோ கா²த³னங் வாபி, ஹோதி ஆபத்தி து³க்கடங்.

2156 ந தோ³ஸோ தே³தி தா³பேதி, ததா² உம்மத்திகாய வா;
இத³ங் ஏளகலோமேன, ஸமுட்டா²னங் ஸமங் மதங்.

ச²ட்ட²ங்.

2157 விஞ்ஞத்வா ஆமகங் த⁴ஞ்ஞங், ப⁴ஜ்ஜித்வா யதி³ பி⁴க்கு²னீ;
கொட்டெத்வா ச பசித்வா ச, பாசித்தி பரிபு⁴ஞ்ஜதி.

2158 ந கேவலங் து த⁴ஞ்ஞானங், க³ஹணேயேவ து³க்கடங்;
ஹரணேபி ச த⁴ஞ்ஞானங், ததா² ஸுக்கா²பனே பன.

2159 ப⁴ஜ்ஜனத்தா²ய த⁴ஞ்ஞானங், கபல்லுத்³த⁴னஸஜ்ஜனே;
அக்³கி³ஸ்ஸ கரணே த³ப்³பி³-ஸஜ்ஜனே ச, கபல்லகே.

2160 த⁴ஞ்ஞபக்கி²பனே தத்த², த³ப்³பி³யா க⁴ட்டகொட்டனே;
பப்போ²டனாதி³கே ஸப்³ப³-பயோகே³ து³க்கடங் ப⁴வே.

2161 போ⁴ஜனஞ்சேவ விஞ்ஞத்தி, பமாணங் இத³மெத்த² ஹி;
விஞ்ஞத்வா வா ஸயங் தஸ்மா, ப⁴ஜ்ஜனாதீ³னி அஞ்ஞதோ.

2162 விஞ்ஞாபெத்வா பனஞ்ஞாய, ப⁴ஜ்ஜனாதீ³னி வா ஸயங்;
காராபெத்வாபி கத்வா வா, அஜ்ஜோ²ஹரதி யா பன.

2163 அஜ்ஜோ²ஹாரபயோகே³ஸு, தஸ்ஸா பாசித்தியோ ஸியுங்;
மாதரங் வாபி யாசித்வா, பாசித்தி பரிபு⁴ஞ்ஜதி.

2164 ப⁴ஜ்ஜனாதீ³னி கத்வா வா, காராபெத்வாபி வா பன;
அவிஞ்ஞத்தி ஸயங் லத்³த⁴ங், து³க்கடங் பரிபு⁴ஞ்ஜதி.

2165 விஞ்ஞத்தியா பனஞ்ஞாய, லத்³த⁴ங் தாய ஸயம்பி வா;
காராபெத்வாபி கத்வா வா, ததா² அஜ்ஜோ²ஹரந்தியா.

2166 ஸேத³கம்மாதி³அத்தா²ய, த⁴ஞ்ஞவிஞ்ஞத்தியா பன;
ட²பெத்வா ஸத்த த⁴ஞ்ஞானி, ஸேஸவிஞ்ஞத்தியாபி ச.

2167 அனாபத்தீதி ஞாதப்³ப³ங், ததா² உம்மத்திகாய ச;
ஞாதகானம்பி த⁴ஞ்ஞங் து, ஆமகங் ந ச வட்டதி.

2168 வினா விஞ்ஞத்தியா லத்³த⁴ங், நவகம்மேஸு வட்டதி;
ஸமுட்டா²னாத³யோ ஸப்³பே³, அத்³தா⁴னஸதி³ஸா மதா.

ஸத்தமங்.

2169 உச்சாரங் வாபி பஸ்ஸாவங், ஸங்காரங் வா விகா⁴ஸகங்;
ச²ட்³டெ³ய்ய வா திரோகுட்டே, ச²ட்³டா³பெய்ய பரேஹி வா.

2170 ஹோதி பாசித்தியங் தஸ்ஸா, பாகாரேபி அயங் நயோ;
ச²ட்³டெ³ந்தியா பனேகேக-மனேகாபத்தி தீ³பிதா.

2171 ஏதானி பன வத்தூ²னி, சத்தாரி ஸகலானிபி;
ஏகேனேவ பயோகே³ன, ஏகா ச²ட்³டெ³ந்தியா ஸியா.

2172.

ஆணத்தியம்பி ஏஸேவ, நயோ ஞெய்யோ விபா⁴வினா;
ச²ட்³ட³னே த³ந்தகட்ட²ஸ்ஸ, பாசித்தி பரிதீ³பிதா.

2173 ஸப்³புத்த² பன பி⁴க்கு²ஸ்ஸ, ஹோதி ஆபத்தி து³க்கடங்;
அவலஞ்ஜேபி வா டா²னே, ஓலோகெத்வாபி வா பன.

2174 ச²ட்³டெ³ந்தியா அனாபத்தி, ததா² உம்மத்திகாய வா;
ஸஞ்சரித்தஸமுட்டா²னங், க்ரியாக்ரியமித³ங் ஸியா.

அட்ட²மங்.

2175 கெ²த்தே வா நாளிகேராதி³-ஆராமே வாபி யா பன;
ரோபிமே ஹரிதட்டா²னே, யத்த² கத்த²சி பி⁴க்கு²னீ.

2176 தானி சத்தாரி வத்து²னி, ஸசே ச²ட்³டே³தி வா ஸயங்;
ச²ட்³டா³பேதி ததா² வுத்த-நயோ ஆபத்தினிச்ச²யோ.

2177 பு⁴ஞ்ஜமானா நிஸீதி³த்வா, கெ²த்தே து ஹரிதே ததா²;
உச்ச²ஆதீ³னி கா²த³ந்தீ, கச்ச²ந்தீ பன தத்த² யா.

2178 ச²ட்³டே³தி யதி³ உச்சி²ட்ட²ங், உத³கங் சலகானி வா;
ஹோதி பாசித்தியங் தஸ்ஸா, பி⁴க்கு²னோ ஹோதி து³க்கடங்.

2179 ச²ட்³டெ³ந்தியா ஸியாபத்தி, டா²னே அந்தமஸோ ஜலங்;
பிவித்வா மத்த²கச்சி²ன்னங், நாளிகேரம்பி தாதி³ஸே.

2180 கஸிதே து பனட்டா²னே, பீ³ஜனிக்கே²பனே கதே;
ந உட்டே²தங்குரங் யாவ, ஸப்³பே³ஸங் தாவ து³க்கடங்.

2181 லாயிதம்பி மனுஸ்ஸானங், கெ²த்தங் ரக்க²தி சே புன;
ரோஹனத்தா²ய தத்த²ஸ்ஸா, யதா²வத்து²கமேவ ஹி.

2182 ந தோ³ஸோ ச²ட்³டி³தே கெ²த்தே, ஸப்³புங் ச²ட்³டெ³ந்தியா பன;
ஸமுட்டா²னாத³யோ ஸப்³பே³, அட்ட²மேன ஸமா மதா.

நவமங்.

2183 நச்சங் வா பன கீதங் வா, வாதி³தங் வாபி பி⁴க்கு²னீ;
தஸ்ஸனத்தா²ய கச்ச²செ²ய்ய, தஸ்ஸா பாசித்தியங் ஸியா.

2184 துஸ்ஸனத்தா²ய நச்சஸ்ஸ, கீதஸ்ஸ ஸவனாய ச;
கச்ச²ந்தியா ஸியா தஸ்ஸா, பதுவாரேன து³க்கடங்.

2185 ஸசே ஏகபயோகே³ன, ஓலோகெந்தீ ச பஸ்ஸதி;
ஸுணாதி தேஸங் கீதம்பி, ஏகா பாசித்தி தீ³பிதா.

2186 அஞ்ஞஸ்மிம்பி தி³ஸாபா⁴கே³, நச்சங் பஸ்ஸதி சே பன;
ஸுணாதி அஞ்ஞதோ கீதங், விஸுங் பாசித்தியோ ஸியுங்.

2187 பயோக³க³ணனாயெத்த², ஆபத்திக³ணனா ஸியா;
நச்சிதுங் கா³யிதுங் நேவ, ஸயங் லப⁴தி பி⁴க்கு²னீ.

2188 “அஞ்ஞங் நச்சாதி வாதே³ஹி”, இதி வத்துங் ந வட்டதி;
“உபட்டா²னங் கரோமா”தி, வத்தே வா ஸம்படிச்சி²துங்.

2189 தஸ்ஸா பாசித்தி ஸப்³புத்த², பி⁴க்கு²னோ ஹோதி து³க்கடங்;
“உபட்டா²னங் கரோமா”தி, வத்தே பி⁴க்கு²னியா பன.

2190 “உபட்டா²னங் பஸத்த²”ந்தி, வத்துமேவங் து வட்டதி;
ஆராமேயேவ ட²த்வா வா, யா பஸ்ஸதி ஸுணாதி வா.

2191 அத்தனோ ச டி²தோகாஸங், ஆக³ந்த்வா ச பயோஜிதங்;
க³ந்த்வா பஸ்ஸந்தியா வாபி, ததா²ருபா ஹி காரணா.

2192 பஸ்ஸந்தியா ததா² மக்³கங், நச்சங் படிபதே²பி ச;
ததா² உம்மத்திகாதீ³ன-மனாபத்தாபதா³ஸுபி.

2193 இத³மேளகலோமேன, ஸமுட்டா²னங் ஸமங் மதங்;
லோகவஜ்ஜமித³ங் பாப-சித்தஞ்சேவ திவேத³னங்.

து³ஸமங்.

லஸுணவக்³கோ³ பட²மோ.

2194 யாத⁴ ரத்தந்த⁴காரஸ்மிங், அப்பதீ³பே பனேகிகா;
ஸந்திட்ட²தி ஸசே ஸத்தி³தி⁴ங், புரிஸேன ச பி⁴க்கு²னீ.

2195 தஸ்ஸா பாசித்தியங் வுத்தங், ஸத்தி³தி⁴ங் வா ஸல்லபந்தியா;
ஹத்த²பாஸங் ஸமாக³ந்த்வா, ரஹஸ்ஸாத³வஸேன து.

2196 ஹத்த²பாஸங் ஜஹித்வா வா, புரிஸஸ்ஸ ஸசே பன;
அஜஹித்வாபி வா யக்க²-பேதாதீ³னம்பி பி⁴க்குனீ.

2197 ஸந்திட்ட²தி ச யா தஸ்ஸா, து³க்கடங் பரிதீ³பிதங்;
அனாபத்தி ஸசே கோசி, து³தியா விஞ்ஞ விஜ்ஜதி.

2198 ததா² உம்மத்திகாதீ³ன-மத²ஞ்ஞவிஹிதாய வா;
தெ²ய்யஸத்த²ஸமுட்டா²னங், க்ரியங் ஸஞ்ஞாவிமொக்க²கங்.

பட²மங்.

2199 து³தியே து “படிச்ச²ன்னே, ஓகாஸே”தி இத³ங் பன;
அதி⁴கங் இதரங் ஸப்³பங், பட²மேன ஸமங் மதங்.

து³தியங்.

2200 ததியேபி சதுத்தே²பி, அபுப்³பங் நத்தி² கிஞ்சிபி;
ஸமானங் பட²மேனேவ, ஸமுட்டா²னாதி³னா ஸஹ.

ததியசதுத்தா²னி.

2201 ச²த³னந்தோ நிஸீதி³த்வா, அனோவஸ்ஸப்பதே³ஸகங்;
அஜ்ஜோ²காஸே நிஸீதி³த்வா, உபசாரம்பி வா ஸசே.

2202 அதிக்மேதி யா, ஹோதி, து³க்கடங் பட²மே பதே³;
து³தியே ச பதே³ தஸ்ஸா, பாசித்தி பரியாபுதா.

2203 பல்லங்கஸ்ஸ அனோகாஸே, து³க்கடங் ஸமுதீ³ரிதங்;
ததா²புட்டே² அனாபுட்ட²-ஸஞ்ஞாய விசிகிச்ச²தோ.

2204 அஸங்ஹாரிமேனாபத்தி, கி³லானாயாபதா³ஸு வா;
ஸமுட்டா²னாத³யோ ஸப்³பே³, கதி²னேன ஸமா மதா.

பஞ்சமங்.

2205 ஏகாபத்தி நிஸீதி³த்வா, ஹோதி க³ச்ச²ந்தியா பன;
ஏகாவ அனிஸீதி³த்வா, நிபஜ்ஜித்வா வஜந்தியா.

2206 நிஸீதி³த்வா நிபஜ்ஜித்வா, ஹோந்தி க³ச்ச²ந்தியா து³வே;

ஸேஸங் அனந்தரேனேவ, ஸமுட்டா²னாதி³னா ஸமாங்.

ச²ட்ட²ங்.

2207 ச²ட்டே²ன ஸத்தமங் துல்யங், அட்ட²மே நத்தி² கிஞ்சிபி;
வத்தப்³பங் திஸமுட்டா²னங், ஸசித்தங் து³க்க²வேத³னங்.

ஸத்தமட்ட²மானி.

2208 நிரயப்³ரஹ்மசரியேஹி, அத்தானங் வா பரம்பி வா;
அபி⁴ஸபெய்ய பாசித்தி, வாசதோ வாசதோ ஸியா

2209 ட²பெத்வா நிரயஞ்சேவ, ப்³ரஹ்மசரியஞ்ச யா பன;
“ஸுனகீ² ஸுகரீ² காகீ, காணா குணீ²திஆதி³னா.

2210 அக்கோஸதி ச வாசாய, வாசாயாபத்தி து³க்கடங்;
திகபாசித்தியங் வுத்தங், ஸேஸாய திகது³க்கடங்.

2211 புரக்க²த்வா வத³ந்தீன-மத்த²த⁴ம்மானுஸாஸனிங்;
அனாபத்தட்ட²மேனேவ, ஸமுட்டா²னாத³யோ ஸமா.

நவமங்.

2212 ரோத³ந்தியா வதி⁴த்வா வா, பாசித்தி பரிதீ³பிதா;
த்³வீஸு தேஸு பனேகேகங், து³க்கடங் து கரொந்தியா.

2213 ஸேஸமுத்தானமேவெத்த², ஸமுட்டா²னாத³யோ பன;
து⁴ரனிக்கே²பதுல்யாவ, க்ரியாமத்தங் விஸேஸகங்.

த³ஸமாங்.

அந்த⁴காரவக்³கோ³ து³தியோ.

2214 ந்ஹாயதி நக்³கா³ யா பன ஹுத்வா;
ஸப்³பயோகே³ து³க்கடமஸ்ஸா;
தஸ்ஸ ச வோஸானே ஜினவுத்தங்;
பி⁴க்கு²னி தோ³ஸங் ஸா ஸமுபேதி.

2215 அச்சி²ன்னசீவரா நட²-சீவரா ஆபதா³ஸு வா;
ந தோ³ஸேளகலோமேன, ஸமுட்டா²னாத³யோ ஸமா.

பட²மங்.

2216 து³தியே பன வத்தப்³பங், அபுப்³பங் நத்தி² கிஞ்சிபி;
ஸமுட்டா²னாத³யோ ஸப்³பே³, ஸஞ்சரித்தஸமா மதா.

து³தியங்.

2217 து³ஸ்ஸிப்³பி³தங் விஸிப்³பெ³த்வா, ஸிப்³பு³னத்தா²ய சீவரங்;
அனந்தராய தங் பச்சா², யா ந ஸிப்³பெ³ய்ய பி⁴க்கு²னீ.

2218 ட²பெத்வா சதுபஞ்சாஹங், “ந ஸிப்³பி³ஸ்ஸாம்யஹ”ந்தி ஹி;
து⁴ரே நிக்கி²த்தமத்தேவ, தஸ்ஸா பாசித்தியங் ஸியா.

2219 பச்சா² ஸிப்³பி³தி பாசித்தி, நிக்கி²பித்வா து⁴ரங் ஸசே;
திகபாசித்தியங் வுத்தங், ஸேஸாய திகது³க்கடங்.

2220 வுத்தங் உபி⁴ன்னமஞ்ஞஸ்மிங், பரிக்கா²ரே து து³க்கடங்;
அனாபத்தி கி³லானாய, அந்தராயேபி வா ஸதி.

2221 அதிகமேதி பஞ்சாஹங், கரொந்தீ வாபி சீவரங்;
து⁴ரனிக்கே²பனங் நாம, ஸமுட்டா²னமித³ங் மதங்.

ததியங்.

2222 பஞ்சாஹிகங் து ஸங்கா⁴டி-சாரங் யாதிக்கமெய்ய ஹி;
ஹோதி பாசித்தியாபத்தி, ச²ட்டே² தஸ்ஸாருணுக்³க³மே.

2223 ஏகஸ்மிங் சீவரே ஏகா, பஞ்ச பஞ்சஸு தீ³பிதா;
திசீவரஞ்ச ஸங்கச்சி, த³கஸாடிதி பஞ்ச து.

2224 திகபாசித்தி பஞ்சாஹா-நதிக்கந்தே த்³விது³க்கடங்;
பஞ்சமே தி³வஸே பஞ்ச, சீவரானி நிலேவதி.

2225 ஓதாபேதி கி³லானாய, அனாபத்திபதா³ஸுபி;
ஸமுட்டா²னாத³யோ ஸப்³பே³, கதி²னேன ஸமா மதா.

சதுத்த²ங்.

2226 க³ஹெத்வா யா அனாபுச்சா², ஸங்கமேதப்³பு³சீவரங்;

பரிபு⁴ஞ்ஜதி அஞ்ஞிஸ்ஸா, தஸ்ஸா பாசித்தியங் ஸியா.

2227 திகபாசித்தியங் வுத்தங், ஸேஸாய திகது³க்கடங்;
அச்சி²ன்னசீவரா நட்²ட²-சீவரா ஆபதா³ஸு வா.

2228 ததா² உம்மத்திகாதீ³ன-மனாபத்தி பகாஸிதா;
கதி²னேன ஸமுட்டா²னங், துல்யமேதங் க்ரியாக்ரியங்.

பஞ்சமங்.

2229 யா ஹி பி⁴க்கு²னி ஸங்க⁴ஸ்ஸ, லபி⁴தப்³பங் து சீவரங்;
நிவாரேதி ஸசே தஸ்ஸா, பாசித்தி பரிதீ³பயே.

2230 க³ணஸ்ஸாபி ச ஏகிஸ்ஸா, லாபே⁴ ஆபத்தி து³க்கடங்;
ததே²வஞ்ஞங் பரிக்கா²ரங், நிவாரேதி ஸசே பன.

2231 ஆனிஸங்ஸங் நித³ஸ்ஸெத்வா, நிவாரேதி ந தோ³ஸதா;
அதி³ன்னாதா³னதுல்யாவ, ஸமுட்டா²னாத³யோ மதா.

ச²ட்ட²ங்.

2232 சீவரானங் விப⁴ங்க³ங் யா, படிஸேதெ⁴ய்ய த⁴ம்மிகங்;
ஹோதி பாசித்தியங் தஸ்ஸா, து³க்கடங் பரிதீ³பிதங்.

2233 அத⁴ம்மே த⁴ம்மஸஞ்ஞாய, உபோ⁴ வேமதிகாய வா;
ஆனிஸங்ஸங் நித³ஸ்ஸெத்வா, படிஸேதெ⁴ந்தியா பன.

2234 ததா² உம்மத்திகாதீ³ன-மனாபத்தி பகாஸிதா;
ஸமுட்டா²னாத³யோ ஸப்³பே³, அனந்தரஸமா மதா.

ஸத்தமங்.

2235 நிவாஸனுபக³ங் வாபி, ததா² பாருபனுபக³ங்;
கப்பபி³ந்து³கதங் கிஞ்சி, முஞ்சித்வா ஸஹத⁴ம்மிகே.

2236 பிதரோபி பனஞ்ஞஸ்ஸ, த³தெ³ய்ய யதி³ சீவரங்;
யஸ்ஸ கஸ்ஸசி தஸ்ஸாபி, பாசித்தி பரியாபுதா.

2237 க³ணனாய வஸேனெத்த², சீவரானங் து தா பன;

பாசித்தியோ க³ணேதப்³பா³, பி⁴க்கு²னோ து³க்கடங் ஸியா.

2238 தாவகாலிகமஞ்ஞேஸ-மனாபத்தி த³தா³தி சே;
ஸஞ்சரித்தஸமா வுத்தா, ஸமுட்டா²னாத³யோ நயா.

அட்ட²மங்.

2239 சீவரஸ்ஸ விப⁴ங்க³ங் யா, நிலேஸதெ⁴த்வான சீவரே;
காலங் அதிக்கமெய்யஸ்ஸா, து³ப்³ப³லாஸாய தோ³ஸதா.

2240 அது³ப்³ப³லே து சீவரே, ஸுது³ப்³ப³லந்தி சேதஸா;
உபோ⁴ஸு கங்கி²தாய வா, அவோச து³க்கடங் ஜினோ.

2241 ஆனிஸங்ஸங் நித³ஸ்ஸெத்வா, நிவாரேதி ந தோ³ஸதா;
அதி³ன்னாதா³னதுல்யாவ, ஸமுட்டா²னாத³யோ மதா.

நவமங்.

2242 த⁴ம்மிகங் கதி²னுத்³தா⁴ரங், யா நிவாரெய்ய பி⁴க்கு²னீ;
தஸ்ஸா பாசித்தியாபத்தி, முனிந்தே³ன பகாஸிதா.

2243 ஆனிஸங்ஸோ மஹா ஹோதி, யஸ்ஸ அத்தா²ரமுலகோ;
உத்³தா⁴ரமுலகோ அப்போ, ந தா³தப்³போ³ பனீதி³ஸோ.

2244 ஆனிஸங்ஸோ மஹா ஹோதி, யஸ்ஸ உப்³பா⁴ரமுலகோ;
அத்தா²ரமுலகோ அப்போ, தா³தப்³போ³ ஏவருபகோ.

2245 ததா² ஸமானிஸங்ஸோபி, ஸத்³தா⁴பாலனகாரணா;
ஆனிஸங்ஸங் நித³ஸ்ஸெத்வா, படிஸேதே⁴தி வட்டதி.

2246 ஸேஸங் பன அஸேஸேன, ஸத்தமேன ஸமங் மதங்;
ஸமுட்டா²னாதி³னா ஸத்³தி⁴ங், அபுப்³ப³ங் நத்தி² கிஞ்சிபி.

த³ஸமங்.

நக்³க³வக்³கோ³ ததியோ.

2247 ஏகாய து நிபன்னாய, அபரா வா நிபஜ்ஜது;
நிபஜ்ஜெய்யுங் ஸஹேவ த்³வே, த்³வின்னங் பாசித்தியங் ஸியா.

2248 ஆபத்திபுஹுகா ஞெய்யா, புனப்புனங் நிபஜ்ஜனே;
ஏகாய ச நிபன்னாய, ஸசே ஏகா நிஸீத³தி.

2249 உபோ⁴ வாபி நிஸீத³ந்தி, ஸமங், உம்மத்திகாய வா;
அனாபத்தி ஸமுட்டா²னங், ஏளகேன ஸமங் மதங்.

பட²மங்.

2250 பாவாரகடஸாராதி³ங், ஸந்த²ரித்வா பனேககங்;
ஸங்ஹாரிமேஸு தேனேவ, பாருபித்வா ஸசே பன.

2251 நிபஜ்ஜந்தி ஸஹேவ த்³வே, தாஸங் பாசித்தியங் ஸியா;
ஏகஸ்மிங் து³க்கடங் த்³வின்னங், வுத்தங் து த்³விகது³க்கடங்.

2252 வவத்தா²னங் நித³ஸ்ஸெத்வா, நிபஜ்ஜந்தி ஸசே பன;
ந தோ³ஸும்மத்திகாதீ³னங், ஸேஸங் துல்யங் பனாதி³னா.

து³தியங்.

2253 புரதோ ச அனாபுச்சா², யதி³ சங்கமனாத³யோ;
கரெய்ய பன பாசித்தி, அஞ்ஞிஸ்ஸாபா²ஸுகாரணா.

2254 நிவத்தனானங் க³ணனாய தஸ்ஸா;
பாசித்தியானங் க³ணனா ச ஞெய்யா;
பயோக³தோயேவ ப⁴வந்தி தோ³ஸா;
நிபஜ்ஜனட்டா²னநிஸீத³னானங்.

2255 உத்³தே³ஸாதீ³ஸு பாசித்தி, பதா³னங் க³ணனாவஸா;
திகபாசித்தியங் வுத்தங், ஸேஸாய திகது³க்கடங்.

2256 ந ச அபா²ஸுகாமாய, ஆபுச்சா² புரதோ பன;
தஸ்ஸா சங்கமனாதீ³னி, அனாபத்தி கரொந்தியா.

2257 அதி³ன்னாதா³னதுல்யாவ , ஸமுட்டா²னாத³யோ நயா;
க்ரியாக்ரியமித³ங் பாப- மானஸங் து³க்க²வேத³னங்.

ததியங்.

2258 ஸயங் அனந்தராயா யா, து³க்கி²தங் ஸஹஜீவினிங்;

நுபட்டா²பெய்ய சஞ்ஞாய, நுபட்டெ²ய்ய ஸயம்பி வா.

2259 து⁴ரே நிக்கி²த்தமத்தேவ, தஸ்ஸா பாசித்தியங் ஸியா;
அந்தேவாஸினியா வாபி, து³க்கடங் இதராய வா.

2260 அனாபத்தி கி³லானாய, க³வேஸித்வாலப⁴ந்தியா;
ஆபது³ம்மத்திகாதீனங், து⁴ரனிக்கே²பனோத³யங்.

சதுத்த²ங்.

2261 ஸகங் புக்³கலிகங் த³த்வா, ஸகவாடங் உபஸ்ஸயங்;
ஸயங் உபஸ்ஸயா தம்ஹா, நிக்கட்³ட⁴தி ஸசே பன.

2262 ஏகேனேவ பயோகே³ன, த்³வாராதீ³ஸு ப³ஹுனிபி;
தங் நிக்கட்³ட⁴ந்தியா தஸ்ஸா, ஏகங் பாசித்தியங் ஸியா.

2263 பயோக³க³ணனாயெத்த², பாசித்திக³ணனா மதா;
ஆணத்தியம்பி ஏஸேவ, நயோ வுத்தோ மஹேஸினா.

2264 “எத்தகாவ இமங் த்³வாரா, நிக்கட்³டா⁴ஹீ”தி பா⁴ஸதி;
ஏகாயாணத்தியா த்³வார-க³ணனாபத்தியோ ஸியுங்.

2265 து³க்கடங் அகவாடம்ஹா, ஸேஸாய திகது³க்கடங்;
உபி⁴ன்னங் பன ஸப்³புத்த², பரிக்கா²ரேஸு து³க்கடங்.

2266 ஸேஸமெத்த² அஸேஸேன, ஸமுட்டா²னாதி³னா ஸஹ;
ஸங்கி⁴கா ஹி விஹாரஸ்மா, நிக்கட்³ட⁴னஸமங் மதங்.

பஞ்சமங்.

2267 ச²ட்டே² பனித⁴ வத்தப்³பங், அபுப்³பங் நத்தி² கிஞ்சிபி;
ஸிக்கா²பதே³னரிட்ட²ஸ்ஸ, ஸதி³ஸோவ வினிச்ச²யோ.

ச²ட்ட²ங்.

2268 ஸாஸங்கஸம்மதே அந்தோ-ரட்டே² பி⁴க்கு²னியா பன;
சரந்தியா ஸியாபத்தி, வினா ஸத்தே²ன சாரிகங்.

2269 கா³மந்தரபவேஸே ச, அரஞ்ஞே அத்³த⁴யோஜனே;

பாசித்தியனயோ ஞெய்யோ, பி⁴க்கு²னா வினயஞ்ஞனா.

2270 ந தோ³ஸோ ஸஹ ஸத்தே²ன, கே²மட்டா²னாபதா³ஸ வா;
இத³ங் ஏளகலோமேன, ஸமுட்டா²னாதி³னா ஸமங்.

ஸத்தமங்.

2271 அட்ட²மே நவமே வாபி, அனுத்தானங் ந விஜ்ஜதி;
ஸத்தமேன ஸமானானி, ஸமுட்டா²னாதி³னா ஸஹ.

அட்ட²மனவமானி.

2272 பாசித்தி து⁴ரனிக்கே²பே, “ந க³மிஸ்ஸாம்யஹ”ந்தி ச;
கத்வா ச து⁴ரனிக்கே²பங், பச்சா² க³ச்ச²ந்தியா ததா².

2273 யோஜனானி பவாரெத்வா, பஞ்ச க³ந்தும்பி வட்டதி;
ச²ஸ வத்தப்³மேவத்தி², கின்னு நாமித⁴ தங் ஸியா.

2274 தீணி க³ந்த்வா ச தேனேவ, பச்சாக³ந்துங் ந வட்டதி;
அஞ்ஞேன பன மக்³கே³ன, பச்சா²க³ச்ச²தி வட்டதி.

2275 அனாபத்தந்தராயஸ்மிங், தஸ்ஸா த³ஸவிதே⁴ ஸதி;
ஆபதா³ஸ கி³லானாய, அலாபே⁴ து³தியாய வா.

2276 ராஜசோரமனுஸ்ஸக்³கி³-தோயவாளஸரீஸபா;
மனுஸ்ஸஜீவிதப்³ரஹ்ம-சரியஸ்ஸந்தராயிகா.

2277 ஸமுட்டா²னாதி³னா துல்யங், பட²மந்திமவத்து²னா;
அயமேவ விஸேஸோ ஹி, அக்ரியங் து³க்க²வேத³னங்.

த³ஸமங்.

துவட்டவக்³கோ³ சதுத்தோ².

2278 ராஜாகா³ரங் சித்தாகா³ரங், ஆராமங் கீஞ்ஞய்யானங் வா;
கீளாவாபிங் நானாகாரங், த³ட்டு²ங் க³ச்ச²ந்தினங் தானி.

2279 நித்³தி³ட்ட²ங் முனிநா தாஸங், து³க்கடங் து பதே³ பதே³;
பத³ங் அனுத்³த⁴ரித்வாவ, ஸசே பஸ்ஸந்தி பஞ்சபி.

2280 ஏகாயேவ பனாபத்தி, பாசித்தி பரிதீ³பிதா;
க³ந்த்வா பஸ்ஸந்தி சே தங் தங், பாடேக்காபத்தியோ ஸியுங்.

2281 பயோக³ப³ஹுதாயாபி, பாசித்திப³ஹுதா ஸியா;
பி⁴க்கு²ஸ்ஸ பன ஸப்³ப³த்த², ஹோதி ஆபத்தி து³க்கடங்.

2282 அவஸேஸோ அனாபத்தி-கதா²மக்³க³வினிச்ச²யோ;
நச்சத³ஸ்ஸனதுல்யோவ, ஸமுட்டா²னாதி³னா ஸஹ.

பட²மங்.

2283 ஆஸந்தி³ங் வா பல்லங்கங் வா, மாணனாதீதங் வாளுபேதங்;
ஸேவந்தீனங் யாஸங் தாஸங், பாசித்தாபத்திங் ஸத்தா²ஹ.

2284 நிஸீத³னஸ்ஸாபி நிபஜ்ஜனஸ்ஸ;
பயோக³ப³ஹுல்லவஸேன ஹோதி;
இச்சேவமச்சந்தயஸேன வுத்தா;
பாசித்தியானங் க³ணனா பனேவங்.

2285 பாதே³ ஆஸந்தி³யா செ²த்வா, பி⁴த்வா பல்லங்கவாளகே;
அனாபத்தி ஸமுட்டா²ன-மனந்தரஸமங் மதங்.

து³தியங்.

2286 ச²ன்னங் அஞ்ஞதரங் ஸுத்தங், யதி³ கந்ததி பி⁴க்கு²னீ;
யத்தகங் அஞ்சி²தங் ஹத்தா², தஸ்மிங் தக்கம்ஹி வேடி²தே.

2287 ஏகா பாசித்தி நித்³தி³ட்டா², ஸுத்தகந்தனதோ பன;
ஸப்³ப³பு³ப³யோகே³ஸு, து³க்கடங் ஹத்த²வாரதோ.

2288 ந தோ³ஸோ கந்திதங் ஸுத்தங், புன கந்தந்தியா பன;
இத³ங் ஏளகலோமேன, ஸமுட்டா²னாதி³னா ஸமங்.

ததியங்.

2289 கொட்டனங் தண்டு³லானங் து, ஆதி³ங் கத்வான து³க்கடங்;
ஸப்³ப³பு³ப³யோகே³ஸு, வெய்யாவச்சங் கரொந்தியா.

2290 பா⁴ஜனானி க³ணெத்வாவ, பாசித்தி யாகு³ஆதி³ஸு;

க²ஜ்ஜகாதீ³ஸு ரூபானங், க³ணனாய ஹி தீ³பயே.

2291 ஸசே மாதாபிதூனம்பி, ஆக³தானங் பனத்தனோ;
கிஞ்சி கம்மங் அகாரெத்வா, கிஞ்சி காதுங் ந வட்டதி.

2292 ஸங்க⁴ஸ்ஸ யாகு³பானே வா, ஸங்க⁴ப⁴த்தேபி வா ததா²;
சேதியஸ்ஸ ச பூஜாய, வெய்யாவச்சகரஸ்ஸ வா.

2293 அத்தனோ ச அனாபத்தி, ததா² உம்மத்திகாய வா;
ஸமுட்டா²னாத³யோ ஸப்³பே³, ததியேன ஸமா மதா.

சதுத்த²ங்.

2294 பாசித்தி து⁴ரனிக்கே²பே, யதா² சீவரஸிப்³ப³னே;
ததா² இத⁴ பனேகாஹங், பரிஹாரோ ந லப்³ப⁴தி.

2295 ஸேஸங் வுத்தனயேனேவ, தத்த² சீவரஸிப்³ப³னே;
ஸமுட்டா²னாதி³னா ஸத்³தி⁴ங், வேதி³தப்³ப³ங் விபா⁴வினா;

பஞ்சமங்.

2296 காயேன காயப³த்³தே⁴ன, ததா² நிஸ்ஸக்³கி³யேன வா;
கி³ஹீனங் பன யங் கிஞ்சி, த³ந்தபோனோத³கங் வினா.

2297 அஜ்ஜோ²ஹரணியங் அஞ்ஞங், அஞ்ஞேஸங் து த³தா³தி யா;
ஹோதி பாசித்தியங் தஸ்ஸா, ட²பெத்வா ஸஹத⁴ம்மிகே.

2298 த³ந்தகட்டோ²த³கே வுத்தங், து³க்கடங் முனினா இத⁴;
யா ந தே³தி ச தா³பேதி, நிக்க²மித்வாபி தெ³ந்தியா.

2299 தே³தி பா³ஹிரலேபங் வா, ந தோ³ஸும்மத்திகாய வா;
ஸமுட்டா²னாத³யோ ஸப்³பே³, ததியேன ஸமா மதா.

ச²ட்ட²ங்.

2300 அத³த்வா பரிபு⁴ஞ்ஜெய்ய, யா சாவஸத²சீவரங்;
தி³வஸே து சதுத்தே² தங், தோ⁴வித்வா புன சீவரங்.

2301 ஸாமணேராய வா அந்த-மஸோ உதுனியா ஸசே;

தஸ்ஸா பாசித்தியங் வுத்தங், திகபாசித்தியங் ஸியா.

2302 தஸ்ஸா நிஸ்ஸஜ்ஜிதே தஸ்மிங், வுத்தங் து த்³விகது³க்கடங்;
உதுனீனங் அபா⁴வே து, அஞ்ஞாஸங் புன பரியயே.

2303 அச்சி²ன்னசீவராதீ³ன-மனாபத்தாபதா³ஸுபி;
ஸமுட்டா²னாத³யோ ஸப்³பே³, கதி²னேன ஸமா மதா.

ஸத்தமங்.

2304 அத³த்வா ரக்க²ணத்தா²ய, விஹாரங் ஸகவாடகங்;
ஹோதி பாசித்தியங் தஸ்ஸா, சாரிகங் பக்கமந்தியா.

2305 அத்தனோ கா³மதோ அஞ்ஞங், கா³மங் க³ச்ச²ந்தியா பன;
பரிக்கி²த்தவிஹாரஸ்ஸ, பரிக்கே²பம்பி வா ததா².

2306 இதரஸ்ஸுபசாரங் வா, பட²மேன பதே³ன தங்;
து³க்கடங் ஸமதிக்கந்தே, பாசித்தி து³தியேன து.

2307 அகவாடப³ந்த⁴னஸ்மிங், து³க்கடங் பரிதீ³பிதங்;
அந்தராயே அனாபத்தி, ஜக்³கிகங் அலப⁴ந்தியா.

2308 ஆபதா³ஸு கி³லானாய, ததா² உம்மத்திகாய வா;
ஸமுட்டா²னாத³யோ ஸப்³பே³, கதி²னேன ஸமா மதா.

அட்ட²மங்.

2309 ஹத்தி²அஸ்ஸரதா²தீ³ஹி, ஸங்யுத்தங் ஸிப்பமேவ வா;
பருபகா⁴தகங் மந்தா-க³த³யோக³ப்பபே⁴த³கங்.

2310 பரியாபுணெய்ய சே கிஞ்சி, யஸ்ஸ கஸ்ஸசி ஸந்திகே;
ஹோதி பாசித்தியங் தஸ்ஸா, பதா³தீ³னங் வஸேனித⁴.

2311 லேகே² பன அனாபத்தி, தா⁴ரணாய ச கு³த்தியா;
பரித்தேஸு ச ஸப்³பே³ஸு, ததா² உம்மத்திகாய வா.

நவமங்.

2312 து³ஸமே நத்தி² வத்தப்³பங், நவமேன ஸமங் இத³ங்;

ஸமுட்டா²னாத³யோ த்³வின்னங், பத³ஸோத⁴ம்மஸாதி³ஸா.

த³ஸமங்.

சித்தாகா³ரவக்³கோ³ பஞ்சமோ.

2313 ஸபி⁴க்கு²கங் பனாராமங், ஜானித்வா பவிஸந்தியா;
அனாபுச்சா²வ யங் கிஞ்சி, பாசித்தி பரியாபுதா.

2314 ஸசே அந்தமஸோ ருக்க²-மூலஸ்ஸபி ச பி⁴க்கு²னீ;
அனாபுச்சா² பரிக்²பங், அதிக்²காமேதி யா பன.

2315 உபசாரோக்கமே வாபி, அபரிக்கி²த்தகஸ்ஸ து;
து³க்கடங் பட²மே பாதே³, பாசித்தி து³தியே ஸியா.

2316 அபி⁴க்கு²கே ஸபி⁴க்கூ²தி, ஸஞ்ஞாய பனுபோ⁴ஸுபி;
ஜாதகங்கா²ய வா தஸ்ஸா, ஹோதி ஆபத்தி து³க்கடங்.

2317 பட²மங் பவிஸந்தீனங், தாஸங் ஸீஸானுலோகிகா;
தா ஸன்னிபதிதா யத்த², தாஸங் க³ச்ச²தி ஸந்திகங்.

2318 ஸந்தங் பி⁴க்கு²ங் பனாபுச்சா², மக்³கோ³ வாராமமஜ்ஜ²தோ;
தேன க³ச்ச²ந்தியா வாபி, ஆபதா³ஸு விஸந்தியா.

2319 ததா² உம்மத்திகாதீ³ன-மனாபத்தி பகாஸிதா;
து⁴ரனிக்²பதுல்யாவ, ஸமுட்டா²னாத³யோ நயா.

பட²மங்.

2320 அக்கோஸெய்ய ச யா பி⁴க்கு²ங், பரிபா⁴ஸெய்ய வா பன;
திகபாசித்தியங் தஸ்ஸா, ஸேஸே ச திகது³க்கடங்.

2321 புரக்க²த்வா வத³ந்தீன-;
மத்த²த⁴ம்மானுஸாஸனிங்;
ந தோ³ஸோமஸவாதே³ன;
துல்யோ ஸேஸனயோ மதோ.

து³தியங்.

2322 யா ஸங்க⁴ங் பரிபா⁴ஸெய்ய, தஸ்ஸா பாசித்தியங் ஸியா;

ஏகங் ஸம்பஹுலா வாபி, ததே²வ இதராய வா.

2323 பரிபா⁴ஸந்தியா தஸ்ஸா, து³க்கடங் பரிதீ³பிதங்;
ஸேஸங் அனந்தரேனேவ, ஸமுட்டா²னாதி³னா ஸமங்.

ததியங்.

2324 நிமந்திதாபி வா ஸசே, பவாரிதாபி வா பன;
நிமந்தனபவாரணா, உபோ⁴பி வுத்தலக்க²ணா.

2325 புரேப⁴த்தங் து யாகு³ஞ்ச, ட²பெத்வா காலிகத்தயங்;
யா சஜ்ஜோ²ஹரணத்தா²ய, யங் கிஞ்சி பன ஆமிஸங்.

2326 படிக்க³ண்ஹாதி சே தஸ்ஸா, க³ஹணே து³க்கடங் ஸியா;
அஜ்ஜோ²ஹாரவஸேனெத்த², பாசித்தி பரிதீ³பிதா.

2327 காலிகானி ச தீணேவ, ஆஹாரத்தா²ய க³ண்ஹதி;
க³ஹணே து³க்கடங் வுத்தங், ததா² அஜ்ஜோ²ஹரந்தியா.

2328 நிமந்திதா யா பன அப்பவாரிதா;
ஸசேபி யாகு³ங் பிவதீத⁴ வட்டதி;
ததா² கதே²த்வா புன ஸாமிகஸ்ஸ வா;
ஸசேபி ஸா பு⁴ஞ்ஜதி அஞ்ஞபோ⁴ஜனங்.

2329 காலிகானி ச தீணேவ, பச்சயே ஸதி பு⁴ஞ்ஜதி;
ததா² உம்மத்திகாதீ³னங், அனாபத்தி பகாஸிதா.

2330 ஸமுட்டா²னமித³ங் துல்யங், அத³தா⁴னேன க்ரியாக்ரியங்;
நிமந்திதா அனாபுச்சா², ஸாமிங் பு⁴ஞ்ஜதி சே பன.

2331 கப்பியங் பன காரெத்வா, அகாரெத்வாபி வா யதி³;
பரிபு⁴ஞ்ஜதி யா தஸ்ஸா, பாசித்தி க்ரியதோ ஸியா.

சதுத்த²ங்.

2332 பி⁴க்கு²னீனங் அவண்ணங் வா, பாசித்தி குலஸந்திகே;
குலஸ்ஸாவண்ணனங் வாபி, பி⁴க்கு²னீனங் வத³ந்தியா.

2333 ஸந்தங் பா⁴ஸந்தியா தோ³ஸங், ந தோ³ஸும்மத்திகாய வா;

ஓமஸவாத³துல்யாவ, ஸமுட்டா²னாத³யோ நயா.

பஞ்சமங்.

2334 அத்³த்⁴யோஜனதோ ஓரே, பி⁴க்கு² ஓவாத³தா³யகோ;
ந வஸதி ஸசே மக்³கோ³, அகே²மோ வா ஸசே ஸியா.

2335 அயங் அபி⁴க்கு²கோ நாம, ஆவாஸோ பன தத்த² ஹி;
உபக்³ச்ச²ந்தியா வஸ்ஸங், ஆபத்தி அருணுக்³க³மே.

2336 பக்கந்தா பக்க²ஸங்கந்தா, விப்³ப⁴ந்தா வா மதாபி வா;
வஸ்ஸங் உபக்³தா பி⁴க்க², அனாபத்தாபதா³ஸுபி.

2337 ஸேஸோ ஞெய்யோ கதா²மக்³கோ³;
பி⁴க்கு²னோவாத³கோ பன;
இத³ங் ஏளகலோமேன;
ஸமுட்டா²னாதி³னா ஸமங்.

ச²ட்ட²ங்.

2338 யா பி⁴க்கு²னுப⁴தோஸங்கே⁴, வஸ்ஸங்வுட்டா² ததோ புன;
“நாஹங் பவாரெஸ்ஸாமீ”தி, ஸா நிக்கி²பதி சே து⁴ரங்.

2339 து⁴ரே நிக்கி²த்தமத்தஸ்மிங், தஸ்ஸா பாசித்தியங் ஸியா;
ஸதி வா அந்தராயஸ்மிங், கி³லானாயாபதா³ஸுபி.

2340 பரியேஸித்வாபி வா பி⁴க்கு²ங், ந தோ³ஸோ அலப⁴ந்தியா;
இத³ங் து து⁴ரனிக்கே²ப-ஸமுட்டா²னமுதீ³ரிதங்.

ஸத்தமங்.

2341 “ஓவாதா³தீ³னமத்தா²ய, ந க³ச்சி²ஸ்ஸாம்யஹ”ந்தி ஹி;
து⁴ரே நிக்கி²த்தமத்தஸ்மிங், பாசித்தி பரிதீ³பயே.

2342 ஸதி³ஸங் து ஸமுட்டா²னங், பட²மந்திமவத்து²னா;
அக்ரியங் லோகவஜ்ஜஞ்ச, காயிகங் து³க்க²வேத³னங்.

அட்ட²மங்.

2343 “ந யாசிஸ்ஸாமி ஓவாத³ங், ந புச்சி²ஸ்ஸாமுபோஸத²ங்”;

இச்சேவங் பன நிக்கி²த்தே, து⁴ரே பாசித்தியங் ஸியா.

2344 ஸதி வா அந்தராயஸ்மிங், கி³லானாயாபதா³ஸு வா;
ந தோ³ஸோ பரியேஸித்வா, து³தியங் அலப⁴ந்தியா.

2345 அட்ட²மேபி அனாபத்தி, ஏவமேவ பகாஸிதா;
இத³ங் து து⁴ரனிக்கே²ப-ஸமுட்டா²னமுதீ³ரிதங்.

நவமங்.

2346 பஸாகே² பன ஸஞ்ஜாதங், க³ண்ட³ங் ருசிதமேவ வா;
அனாபுச்சா²வ ஸங்க⁴ங் வா, க³ணங் ஏகேன ஏகிகா.

2347 “பி⁴ந்த³ பா²லேஹி தோ⁴வா”தி, ஸப்³பா³னேவாணாபெந்தியா;
கதேஸு து³க்கடானிச்ச², தஸ்ஸா பாசித்தியோ ச² ச.

2348 “யமெத்த² அத்தி² காதப்³பங், தங் ஸப்³பங் த்வங் கரோஹி”தி;
ஆணாபேதி ஸசே ஏவங், ஸோ ச ஸப்³பங் கரோதி சே.

2349 ஏகாய பன வாசாய, து³க்கடானி பனச்ச² ச;
தஸ்ஸா பாசித்தியச்ச²க்கங், த்வாத³ஸாபத்தியோ ஸியுங்.

2350 பே⁴த³னாதீ³ஸு ஏகங் ஸா, ஆணாபேதி ஸசே பன;
ஸோ கரோதி ச ஸப்³பா³னி, ஏகங் பாசித்தியங் ஸியா.

2351 ஆபுச்சி²த்வாபி வா விஞ்ஞங், க³ஹெத்வா து³தியம்பி வா;
பே⁴த³னாதீ³னி ஸப்³பா³னி, காராபேதி ஸசே பன.

2352 தஸ்ஸா உம்மத்திகாதீ³ன-மனாபத்தி பகாஸிதா;
ஸமுட்டா²னாத³யோ ஸப்³பே³, கதி²னேன ஸமா மதா.

த³ஸமங்.

ஆராமவக்³கோ³ ச²ட்டோ².

2353 க³ணங்பரியேஸனாதி³ஸ்மிங், க³ப்³பி⁴னிங் வுட்ட²பெந்தியா;
ஞத்தியா கம்மவாசாஹி, உபஜ்ஜா²யாய து³க்கடங்.

2354 கம்மவாசாய ஓஸானே, பாசித்தி பரியாபுதா;

ததா² க³ப³பி⁴னிஸஞ்ஞாய, ந ச க³ப³பி⁴னியா பன.

2355 உபோ⁴ ஸஞ்ஜாதகங்கா²ய, ஹோதி ஆபத்தி து³க்கடங்;
ததா²சரினியா தஸ்ஸா, க³ணஸ்ஸாபி ச தீ³பிதங்.

2356 த்³வீஸ்வக³ப³பி⁴னிஸஞ்ஞாய, ந தோ³ஸும்மத்திகாய வா;
அதி³ன்னாதா³னதுல்யாவ, ஸமுட்டா²னாத³யோ நயா.

பட²மங்.

2357 து³தியே நத்தி² வத்தப்³பங், பட²மேன ஸமங் மதங்;
ஸமுட்டா²னாதி³னா ஸத்³தி⁴ங், நத்தி² காசி விலேஸஸதா.

து³தியங்.

2358 ச²ஸ்வஸிக்கி²தஸிக்க²ங் து, ஸிக்க²மானஞ்ஹி பி⁴க்கு²னீ;
த்³வே வஸ்ஸானி ஸியாபத்தி, வுட்டா²பெய்ய ஸசே பன.

2359 திகபாசித்தியங் வுத்தங், த⁴ம்மகம்மே து ஸத்து²னா;
அத⁴ம்மே பன கம்மஸ்மிங், தீ³பிதங் திகது³க்கடங்.

2360 ச²ஸு ஸிக்கி²தஸிக்க²ங் யா, த்³வே வஸ்ஸானி அக²ண்ட³தோ;
வுட்டா²பேதி அனாபத்தி, ததா² உம்மத்திகாய வா.

2361 இமா ஹி ச² ச ஸிக்கா²யோ, ஸட்டி²வஸ்ஸாபி சே பன;
பப்³பஜ்ஜாய பதா³தப்³பா³, அத³த்வா ந ச காரயே.

ததியங்.

2362 சதுத்தே² நத்தி² வத்தப்³பங், இத⁴ ஸங்கே⁴ன ஸம்மதங்;
ஸிக்க²மானமனாபத்தி, ஹோதி தங் வுட்ட²பெந்தியா.

2363 அதி³ன்னா பட²மங் ஹோதி, ஸசே வுட்டா²னஸம்முதி;
தத்தா²பி ச பதா³தப்³பா³, உபஸம்பத³மாளகே.

2364 ததியஞ்ச சதுத்த²ஞ்ச, ஸமுட்டா²னாதி³னா பன;
பட²மேன ஸமங் ஞெய்யங், சதுத்த²ங் து க்ரியாக்ரியங்.

சதுத்த²ங்.

2365 ஊனத்³வாத³ஸவஸ்ஸங் து, கஞ்சி கி³ஹிக³தங் பன;
பரிபுண்ணாதி ஸஞ்ஞாய, ந தோ³ஸோ வுட்ட²பெந்தியா.

2366 ஹோதி வானுபஸம்பன்னா, உபஸம்பாதி³தாபி ஸா;
அஸேஸேன ச ஸேஸங் து, பட²மேன ஸமங் மதங்.

பஞ்சமங்.

2367 ச²ட்ட²ங் து ததியே வுத்த-நயேனேவ விபா⁴வயே;
ஸத்தமம்பி ததா² ஸப்³பங், சதுத்தே²ன ஸமங் மதங்.

ச²ட்ட²ஸத்தமாளி.

2368 யங் துவட்டகவக்³க³ஸ்மிங், து³க்கி²தங் ஸஹஜீவினிங்;
வுத்தங் தேன ஸமங் ஞெய்யங், அட்ட²மங் ந விலேஸஸதா.

அட்ட²மங்.

2369 த்³வே வஸ்ஸாளி ச யா காசி, வுட்டா²பிதபவத்தினிங்;
நானுப³ந்தெ⁴ய்ய சே தஸ்ஸா, பாசித்தி பரியாபுதா.

2370 த்³வே வஸ்ஸாளி அஹங் நானு-ப³ந்தி⁴ஸ்ஸாமீ²தி சே பன;
து⁴ரே நிக்கி²த்தமத்தஸ்மிங், தஸ்ஸா பாசித்தியங் ஸியா.

2371 தஞ்ச பா³லமலஜ்ஜிங் வா, கி³லானாயாபதா³ஸு வா;
நானுப³ந்த⁴ந்தியா தஸ்ஸா, ந தோ³ஸும்மத்திகாய வா.

2372 ஸமுட்டா²னாத³யோ துல்யா, பட²மந்திமவத்து²னா;
இதங் பனாக்ரியங் வுத்தங், வேத³னா து³க்க²வேத³னா.

நவமங்.

2373 வுட்டா²பெத்வா து யா காசி, பி⁴க்கு²னீ ஸஹஜீவினிங்;
தங் க³ஹெத்வா ந க³ச்செ²ய்ய, ந சஞ்ஞங் ஆணாபெய்ய சே.

2374 து⁴ரே நிக்கி²த்தமத்தஸ்மிங், தஸ்ஸா பாசித்தியங் ஸியா;
ஸதி வா அந்தராயஸ்மிங், து³தியங் அலப⁴ந்தியா.

2375 ஆபதா³ஸு கி³லானாய, ததா² உம்மத்திகாய வா;

ந தோ³ஸோ து⁴ரனிக்²ப-ஸமுட்டா²னமித³ங் பன.

த³ஸமங்.

க³பி⁴னிவக்³கோ³ ஸத்தமோ.

2376 குமாரிபு⁴தவக்³ஸ்ஸ, பட²மாதீ³னி தீணிபி;
கி³ஹிக்³தேஹி தீஹேவ, ஸதி³ஸானீதி நித்³தி³ஸே.

2377 யா மஹூபபதா³ த்வே து, ஸிக்க²மானா பனாதி³தோ;
“க³தா வீஸதிவஸ்ஸா”தி, விஞ்ஞாதப்³பா³ விபா⁴வினா.

2378 ஸசே கி³ஹிக்³தா ஹொந்தி, ந ச வா புரிஸங் க³தா;
“ஸிக்க²மானா”தி வத்தப்³பா³, தா ஹி ஸம்முதிஆதி³ஸு.

2379 ந தா “குமாரிபு⁴தா”தி, ததா² “கி³ஹிக்³தா”தி வா;
வத்தப்³பா³ பனுபோ⁴பேதா, ஏவங் வத்துங் ந வட்டதி.

2380 ஸம்முதிங் த³ஸவஸ்ஸாய, தத்வா த்³வாத³ஸவஸ்ஸிகா;
கத்தப்³பா³ உபஸம்பன்னா, ஸேஸாஸுபி அயங் நயோ.

2381 யா அட்டா²ரஸவஸ்ஸா து, ததோ பட்டா²ய ஸா பன;
வுத்தா “குமாரிபு⁴தா”தி, ததா² “கி³ஹிக்³தா”திபி.

2382 வுத்தா “குமாரிபு⁴தா”தி, ஸாமணேரீ ஹி யா பன;
“குமாரிபு⁴தா” இச்சேவ, வத்தப்³பா³ ந பனஞ்ஞதா².

2383 ஏதா து பன திஸ்ஸோபி, ஸிக்கா²ஸம்முதிதா³னதோ;
“ஸிக்க²மானா”தி வத்தும்பி, வட்டதேவ ந ஸங்ஸயோ.

ததியங்.

2384 ஊனத்³வாத³ஸவஸ்ஸாவ, வுட்டா²பேதி ஸசே பரங்;
ஹுத்வா ஸயமுபஜ்ஜா²யா, ஸிக்க²மானங் து பி⁴க்கு²னீ.

2385 புப்³பே³ வுத்தனயேனேவ, து³க்கடானமனந்தரங்;
கம்மவாசானமோஸானே, தஸ்ஸா பாசித்தி தீ³பிதா.

சதுத்த²ங்.

2386 பஞ்சமே நத்தி² வத்தப்³ப³ங், சதுத்த²ங் பஞ்சமம்பி ச;
உப⁴யங் திஸமுட்டா²னங், பஞ்சமங் து க்ரியாக்ரியங்.

பஞ்சமங்.

2387 ஸங்கே⁴னுபபரிக்கி²த்வா, “அலங் தாவா”தி வாரிதா;
உபஸம்பாதி³தேனெத்த², பச்சா² கீ²யதி தோ³ஸதா.

2388 உஜ்ஜா²யதி ஸசே ச²ந்த³-தோ³ஸாதீ³ஹி கரொந்தியா;
ந தோ³ஸோ திஸமுட்டா²னங், ஸசித்தங் து³க்க²வேத³னங்.

ச²ட்ட²ங்.

2389 லத்³தே⁴ ச சீவரே பச்சா², அஸந்தே அந்தராயிகே;
“வுட்டா²பெஸ்ஸாமி நாஹ”ந்தி, து⁴ரனிக்கே²பனே பன.

2390 ஹோதி பாசித்தியங் தஸ்ஸா, கி³லானாயாபதா³ஸுபி;
ந தோ³ஸோ பரியேஸித்வா, பரிஸங் அலப⁴ந்தியா.

2391 இத³ஞ்ஹி து⁴ரனிக்கே²ப-ஸமுட்டா²னங் ஸசித்தகங்;
அக்ரியங் லோகவஜ்ஜஞ்ச, ஹோதித³ங் து³க்க²வேத³னங்.

ஸத்தமங்.

2392 அட்ட²மங் ஸத்தமேனேவ, ஸதி³ஸங் பன ஸப்³ப³தா²;
நவமேபி ச வத்தப்³ப³ங், நத்தி² உத்தானமேவித³ங்.

2393 நத்தா²ஜானந்தியா தோ³ஸோ, ததா² உம்மத்திகாய வா;
அதி³ன்னாதா³னதுல்யாவ, ஸமுட்டா²னாத³யோ நயா.

அட்ட²மனவமானி.

2394 மாதரா பிதரா வாத², நானுஞ்ஞாதங் து ஸாமினா;
தஸ்ஸா பாசித்தியாபத்தி, தங் வுட்டா²பெந்தியா ஸியா.

2395 உபஸம்பத³காலஸ்மிங், ததா² பப்³பா³ஜனக்க²ணே;
த்³விக்க²த்துங் புச்சி²தப்³ப³ங் து, பி⁴க்கு²னீஹி, ந பி⁴க்கு²னா.

2396 அனாபத்தி ந ஜானாதி, மாதுஆதீ³னமத்தி²தங்;

இத³ங் சதுஸமுட்டா²னங், வாசதோ காயவாசதோ.

2397 வாசாமானஸதோ சேவ, காயவாசாதி³தோபி ச;
க்ரியாக்ரியமசித்தஞ்ச, திசித்தஞ்ச திவேத³னங்.

த³ஸமங்.

2398 யா பாரிவாஸிகேனெத்த², ச²ந்த³தா³னேன பி⁴க்கு²னீ;
வுட்டா²பேதி ஸசே ஸிக்க²-மானங் பாசித்தியங் ஸியா.

2399 அவுட்டி²தாயனாபத்தி, பரிஸாயாவிஹாய வா;
ச²ந்த³ங் து திஸமுட்டா²னங், திசித்தஞ்ச திவேத³னங்.

ஏகாத³ஸமங்.

2400 த்³வாத³ஸே தேரஸே வாபி, வத்தப்³பங் நத்தி² கிஞ்சிபி;
ஸமுட்டா²னாத³யோ ஸப்³பே³, அனந்தரஸமா மதா.

த்³வாத³ஸமதேரஸமானி.

குமாரீபூ⁴தவக்³கோ³ அட்ட²மோ.

2401 ஸமணீ அகி³லானா யா, தா⁴ரெய்ய ச²த்துபாஹனங்;
தஸ்ஸா பாசித்தியாபத்தி, ஹோதீதி பரியாபுதா.

2402 ஸசே ஏகபயோகே³ன, மக்³க³ஸ்ஸ க³மனே பன;
தி³வஸம்பி ச தா⁴ரேதி, ஏகங் பாசித்தியங் ஸியா.

2403 கத்³த³மாதீ³னி பஸ்ஸித்வா, ஓமுஞ்சித்வா உபாஹனா;
ச²த்தமேவ ச தா⁴ரெந்தீ, யதி³ க³ச்ச²தி து³க்கடங்.

2404 ஸசே உபாஹனாருஹா, தி³ஸ்வா க³ச்சா²தி³கங் பன;
தங் ச²த்தமபனாமெத்வா, து³க்கடங் ஹோதி க³ச்ச²தி.

2405 ச²த்தம்பி அபனாமெத்வா, ஓமுஞ்சித்வா உபாஹனா;
புன தா⁴ரெந்தியா தஸ்ஸா, ஹோதி பாசித்தியங் பன.

2406 பயோக³க³ணனாயேவ , பாசித்திக³ணனா ஸியா;
திகபாசித்தியங் வுத்தங், ததே²வ த்³விகது³க்கடங்.

2407 ஆராமே உபசாரே வா, தோ³ஸோ நத்தா²பதா³ஸுபி;
இத³ங் ஏளகலோமேன, ஸமுட்டா²னாதி³னா ஸமங்.

பட²மங்.

2408 ஹோதி பி⁴க்கு²னியா யானா, ஓரோஹித்வா புனப்புனங்;
அபி⁴ருஹந்தியாபத்தி, பயோக³க³ணனாவஸா.

2409 ஆபதா³ஸு அனாபத்தி, ததா² உம்மத்திகாய வா;
ஸேஸங் அனந்தரேனேவ, ஸமுட்டா²னாதி³னா ஸமங்.

து³தியங்.

2410 யா ச தா⁴ரெய்ய ஸங்கா⁴ணிங், யங் கிஞ்சிபி கடுபியங்;
தஸ்ஸா பாசித்தியாபத்தி, ஹோதீதி பரியாபுதா.

2411 தா⁴ரெந்தியா பனெத்தா²பி, ஓமுஞ்சித்வா புனப்புனங்;
பயோக³க³ணனாயேவ, தஸ்ஸா பாசித்தியோ ஸியுங்.

2412 ஆபா³த⁴பச்சயா யா து, தா⁴ரேதி கடிஸுத்தகங்;
ததா² உம்மத்திகாதீ³ன-மனாபத்தி பகாஸிதா.

2413 ஸேஸங் து பட²மேனேவ, ஸதி³ஸந்தி பகாஸிதங்;
இத⁴ சாகுஸலங் சித்தங், லோகவஜ்ஜங் விஸேஸதா.

ததியங்.

2414 தா⁴ரேதி பன யங் கிஞ்சி, ஸசே ஸீஸுபகா³தி³ஸு;
தஸ்ஸா தஸ்ஸ ச வத்து²ஸ்ஸ, க³ணனாபத்தியோ ஸியுங்.

2415 ஆபா³த⁴பச்சயா தோ³ஸோ, கிஞ்சி தா⁴ரெந்தியா ந ச;
ஸேஸங் அனந்தரேனேவ, ஸதி³ஸங் பரிதீ³பிதங்.

சதுத்த²ங்.

2416 யேன கேனசி க³ந்தே⁴ன, ஸவண்ணாவண்ணகேன ச;
ந்ஹாஸந்தியா பனாபத்தி, ந்ஹானோஸானே பகாஸிதா.

2417 க³ந்த⁴யோஜனதோ ஸப்³ப³-பயோகே³ து³க்கடங் ஸியா;

ஆபா³த⁴பச்சயா தோ³ஸோ, நத்தி² உம்மத்திகாய வா.

2418 ஸேஸங் து ததியேனேவ, ஸதி³ஸங் ஸப்³ப்தா² மதங்;
ச²ட்ட²ம்பி ததியேனேவ, ஸதி³ஸந்தி பகாஸிதங்.

பஞ்சமச²ட்டா²னி.

2419 உப்³பட்டாபெய்ய சஞ்ஞாய, ஸம்பா³ஹாபெய்ய வா ததா²;
ஹோதி பி⁴க்கு²னியாபத்தி, ஸசே பி⁴க்கு²னியா பன.

2420 எத்த² ஹத்த²மமோசெத்வா, ஏகா உப்³பட்டனே ஸியா;
மோசெத்வா பன மோசெத்வா, பயோக³க³ணனா ஸியா.

2421 ஸம்பா³ஹனேபி ஏஸேவ, நயோ ஞெய்யோ விபா⁴வினா;
ஆபதா³ஸு கி³லானாய, அனாபத்தி பகாஸிதா.

2422 ஸேஸங் து ததியேனேவ, ஸமுட்டா²னாதி³னா ஸமங்;
ஸத்தமேன ஸமானாவ, அட்ட²மாதீ³னி தீணிபி.

ஸத்தமட்ட²மனவமத³ஸமானி.

2423 யா அந்தோஉபசாரஸ்மிங், பி⁴க்கு²ஸ்ஸ புரதோ பன;
அனாபுச்சா² நிஸ்தெ³ய்ய, ச²மாயபி ந வட்டதி.

2424 திகபாசித்தியங் வுத்தங், புச்சி²தே து³க்கடத்³வயங்;
ஆபதா³ஸு கி³லானாய, ந தோ³ஸும்மத்திகாய வா.

2425 இத³ங் பன ஸமுட்டா²னங், கதி²னேன ஸமங் மதங்;
க்ரியாக்ரியமசித்தஞ்ச, திசித்தஞ்ச திவேத³னங்.

ஏகாத³ஸமங்.

2426 அனோகாஸகதங் பி⁴க்கு²ங், பஞ்ஹங் புச்செ²ய்ய தோ³ஸதா;
வினயே ச கதோகாஸங், ஸுத்தங் புச்ச²ந்தியாபி ச.

2427 காரெத்வா பன ஓகாஸங், அனோதி³ஸ்ஸாபி புச்ச²தி;
ந தோ³ஸோ பத³ஸோத⁴ம்ம-ஸமுட்டா²னமித³ங் பன.

த்³வாத³ஸமங்.

2428 ஸங்கச்சிகங் வினா கா³மங், பத³ஸா பவிஸந்தியா;
பரிக்கி²த்தஸ்ஸ கா³மஸ்ஸ, பரிக்²கே²போக்கமே பன.

2429 து³க்கடங் பட²மே பாதே³, பாசித்தி து³தியே ஸியா;
உபசாரோக்கமேபெத்த², ஏஸேவ ச நயோ மதோ.

2430 யஸ்ஸா ஸங்கச்சிகங் நட்²ங், அச்சி²ன்னங் வாபி கேனசி;
அனாபத்தி ஸியா தஸ்ஸா, கி³லானாயாபதா³ஸுபி.

2431 இத³மேளகலோமேன, ஸமுட்டா²னாதி³னா ஸமங்;
ஸேஸங் வுத்தனயேனேவ, விஞ்ஞாதப்³ப³ங் விபா⁴வினா.

தேரஸமங்.

ச²த்துபாஹனவக்³கோ³ நவமோ.

இதி வினயவினிச்ச²யே பாசித்தியகதா² நி²டி²தா.

பாடிதே³ஸனீயகதா²

2432 அகி³லானா ஸசே ஸப்பிங், லத்³த⁴ங் விஞ்ஞத்தியா ஸயங்;
“பு⁴ஞ்ஜிஸ்ஸாமீ”தி க³ஹணே, து³க்கடங் பரிதீ³பிதங்.

2433 அஜ்ஜோ²ஹாரவஸேனேவ, பாடிதே³ஸனீயங் ஸியா;
திபாடிதே³ஸனீயங் து, கி³லானாய த்³விது³க்கடங்.

2434 கி³லானா விஞ்ஞாபெத்வான, பச்சா² ஸேவந்தியாபி ச;
கி³லானாயாவஸேஸங் வா, விஞ்ஞத்தங் ஞாதகாதி³தோ.

2435 அஞ்ஞஸ்ஸத்தா²ய வா அத்த-த⁴னேனும்மத்திகாய வா;
அனாபத்தி ஸமுட்டா²னங், அத்³தா⁴னஸதி³ஸங் மதங்.

பட²மங்.

2436 அயமேவ ச ஸேஸேஸு, து³தியாதீ³ஸு நிச்ச²யோ;
ஸமுட்டா²னாதி³னா ஸத்³தி⁴ங், நத்தி² காசி விலேஸஸதா.

2437 அனாக³தேஸு ஸப்³பே³ஸு, ஸப்பிஆதீ³ஸு பானியங்;
பு⁴ஞ்ஜந்தியா து விஞ்ஞத்வா, அட்²ஸுபி ச து³க்கடங்.

இதி வினயவினிச்ச²யே

பாடிதே³ஸனீயகதா² நிட்டி²தா.

2438 ஸேகி²யா பன யே த்⁴ம்மா, உத்³தி³ட்டா² பஞ்சஸத்ததி;
தேஸங் மஹாவிப⁴ங்கே³ து, வுத்தோ அத்த²வினிச்ச²யோ.

இதி வினயவினிச்ச²யே

ஸிக்கா²கரணீயகதா² நிட்டி²தா.

2439 உப⁴தோபாதிமொக்கா²னங் ;
ஸவிப⁴ங்கா³னமேவ யோ;
அத்தோ² அட்ட²கதா²ஸாரோ;
ஸோ ச வுத்தோ விஸேஸதோ.

2440 தஞ்ச ஸப்³ப³ங் ஸமாதா³ய, வினயஸ்ஸ வினிச்ச²யோ;
பி⁴க்கூ²னங் பி⁴க்கு²னீனஞ்ச, ஹிதத்தா²ய கதோ மயா.

2441 இமங் படிபா⁴னஜந்து நோ ஜந்துனோ;
ஸுணந்தி வினயே ஹி தே யே ஹிதே;
ஜனஸ்ஸ ஸுமதாயனே தாயனே;
ப⁴வந்தி பகதஞ்ஞனோ தஞ்ஞனோ.

2442 ப³ஹுஸாரனயே வினயே பரமே;
அபி⁴பத்த²யதா ஹி விஸாரத³தங்;
பரமா பன பு³த்தி⁴மதா மஹதீ;
கரணீயதமா யதினாத³ரதா.

2443 அவக³ச்ச²தி யோ பன பி⁴க்கு² இமங்;
வினயஸ்ஸ வினிச்ச²யமத்த²யுதங்;
அமரங் அஜரங் அரஜங் அருஜங்;
அதி⁴க³ச்ச²தி ஸந்திபத³ங் பன ஸோ.

இதி வினயவினிச்ச²யே

பி⁴க்கு²னீவிப⁴ங்க³கதா² நிட்டி²தா.

க²ந்த⁴ககதா²

மஹாவக்³கோ³

மஹாக²ந்த⁴ககதா²

பப்³ப³ஜ்ஜாகதா²

2444 ஸீலக்க²ந்தா⁴தி³யுத்தேன , ஸுப⁴க்க²ந்தே⁴ன தே³ஸிதே;
க²ந்த⁴கேபி பவக்கா²மி, ஸமாளேன வினிச்ச²யங்.

2445 மாதரா அனநுஞ்ஞாதங், பிதரா வாபி பி⁴க்கு²னோ;
ப⁴ண்டு³கம்மமபுச்சி²த்வா, பப்³பா³ஜெந்தஸ்ஸ து³க்கடங்.

2446 உத்³தே³ஸபரிபுச்சா²ய, ஸயங் சே ப்யாவடோ ஸியா;
த³ஹரோ ஆணாபேதப்³போ³, பப்³பா³ஜெத்வானயாதி ச.

2447 உபஜ்ஜா²யமது²த்³தி³ஸ்ஸ, அவுத்தோ த³ஹரோ பன;
பப்³பா³ஜேதி ஸசே தங் ஸோ, ஸயமேவாபி வட்டதி.

2448 ஸாமணேரோபி வத்தப்³போ³, த³ஹரோ நத்தி² தத்த² சே;
“க²ண்ட³ஸீமமிமங் நெத்வா, பப்³பா³ஜெத்வானயா”தி ச.

2449 ஸரணானி பனேதஸ்ஸ, தா³தப்³பா³னேவ அத்தனா;
ஏவம்பி பி⁴க்கு²னாயேவ, ஹோதி பப்³பா³ஜிதோ நரோ.

2450 புரிஸங் பி⁴க்கு²தோ அஞ்ஞோ, பப்³பா³ஜேதி ந வட்டதி;
இத்தி²ங் பி⁴க்கு²னிதோ அஞ்ஞோ, பப்³பா³ஜேதி ந வட்டதி.

2451 ஸாமணேரோபி வா தா³துங், ஸாமணேரீபி வா ததா²;
ஆணத்தியா உபி⁴ன்னம்பி, காஸாயானி லப⁴ந்தி தே.

2452 ஸயமேவ ச யங் கிஞ்சி, பப்³பா³ஜெந்தேன பி⁴க்கு²னா;
கேஸாபனயனங் கத்வா, பட²மங் உத³கே புன.

2453 ந்ஹாபேதப்³போ³ ஸியா ஸுட்டு², க⁴ங்ஸித்வா கோ³மயாதி³னா;
ஸரீரே பீளகா வாபி, கச்ச² வா தஸ்ஸ ஹொந்தி சே.

2454 மாதா யதா² நியங்புத்தங், ந ஜிகு³ச்ச²தி ஸப்³ப³ஸோ;
ந்ஹாபேதப்³போ³வ யதினா, ததே²வ அஜிகு³ச்ச²தா.

- 2455 கஸ்மா? பனெத்தகேனாபி, உபகாரேன ஸாஸனே;
ஸோ ஸதா³ ப³லவஸ்னேஹோ, ஹோதுபஜ்ஜா²யகாதி³ஸு.
- 2456 வினோதெ³த்வா பனுப்பன்னங், உக்கண்ட²ங் குலபுத்தகா;
ஸிக்கா²யோ பரிபூரெத்வா, நிப்³பா³னங் பாபுணந்தி ஹி.
- 2457 க³ந்த⁴சுண்ணேன வா பச்சா², சுண்ணேனபி ஹலித்³தி³யா;
ஸரீரங் தஸ்ஸ ஸீஸஞ்ச, உப்³ப³ட்டெத்வா புனப்புனங்.
- 2458 கி³ஹிக³ந்த⁴ங் வினோதெ³த்வா, காஸாயானி பனேகதோ;
த்³வத்திக்க²த்துங் ஸகிங் வாபி, தா³தப்³பா³னிஸ்ஸ பி⁴க்கு²னா.
- 2459 அத² ஹத்தே²பி வா தஸ்ஸ, அத³த்வா ஸயமேவ தங்;
அச்சா²தே³தி உபஜ்ஜா²யோ, வட்டதாசரியோபி வா.
- 2460 நிவாஸேதி அனாணத்தோ, ஸோ பாருபதி வா ஸயங்;
அபனெத்வா ததோ ஸப்³ப³ங், புன தா³தப்³ப³மேவ தங்.
- 2461 பி⁴க்கு²னா து ஸஹத்தே²ன, ததா² ஆணத்தியாபி வா;
தி³ன்னங் வட்டதி காஸாவங், நாதி³ன்னங் பன வட்டதி.
- 2462 தஸ்ஸேவ ஸந்தகங் வாபி, கா கதா² அத்தஸந்தகே;
வந்தா³பெத்வா தத்த² பி⁴க்க², காராபெத்வான உக்குடிங்.
- 2463 அஞ்ஜலிங் பக்³க³ஹாபெத்வா, தா³தப்³ப³ங் ஸரணத்தயங்;
படிபாடிவஸேனேவ, ந ச உப்படிபாடியா.
- 2464 ஸசே ஏகபத³ங் வாபி, தே³தி ஏகக்க²ரம்பி வா;
படிபாடிங் விரஜ்ஜி²த்வா, க³ஹிதங் சே ந வட்டதி.
- 2465 திக்க²த்துங் யதி³ வா தே³தி, புத்³த⁴ங் ஸரணமேவ வா;
ததா² ஸேஸேஸு சேவம்பி, ந தி³ன்னானேவ ஹோந்தி ஹி.
- 2466 கத்வானுனாஸிகந்தானி , ஏகாபத்³தா⁴னி வா பன;
விச்சிந்தி³த்வாத² ம-ந்தானி, தா³தப்³பா³னி விஜானதா.
- 2467 உபஸம்பத³கம்மங் து, ஏகதோஸுத்³தி⁴யா ஸியா;
ந ஹோதி பன பப்³ப³ஜ்ஜா, உப⁴தோஸுத்³தி⁴யா வினா.

2468 தஸ்மா ஆசரியேனாபி, ததா²ந்தேவாஸிகேனபி;
பு³-த³த⁴-காராத³யோ வண்ணா, டா²னகரணஸம்பத³ங்.

2469 அஹாபெந்தேன வத்தப்³பா³, பப்³ப³ஜ்ஜாகு³ணமிச்ச²தா;
ஏகவண்ணவினாஸேன, பப்³ப³ஜ்ஜா ஹி ந ரூஹதி.

2470 யதி³ ஸித்தா⁴பி பப்³ப³ஜ்ஜா, ஸரணாக³மனதோவ ஹி;
தா³தப்³பா³ த³ஸ ஸீலானி, பூரணத்தா²ய பி⁴க்கு²னா.

பப்³ப³ஜ்ஜாகதா².

2471 உபஜ்ஜா²யமதா²சரியங், நிஸ்ஸாய வஸதா பன;
கத்தப்³பா³னேவ வத்தானி, பியஸீலேன பி⁴க்கு²னா.

2472 ஆஸனங் பஞ்ஞபேதப்³ப³ங், த³ந்தகட்ட²ங் முகோ²த³கங்;
தா³தப்³ப³ங் தஸ்ஸ காலேன, ஸசே யாகு³ ப⁴விஸ்ஸதி.

2473 யாகு³ தஸ்ஸுபனேதப்³பா³, ஸங்க⁴தோ குலதோபி வா;
பத்தே வத்தஞ்ச காதப்³ப³ங், வத்தங் கா³மப்பவேஸனே.

2474 சீவரே யானி வத்தானி, வுத்தானி ஹி மஹேஸினா;
ஸேனாஸனே ததா² பாத³-பீட²கத²லிகாதி³ஸு.

2475 ஏவமாதீ³னி வத்தானி, ஸப்³பா³னி பன ரோக³தோ;
வுட்டா²னாக³மனந்தானி, ஸத்ததிங்ஸஸதங் ஸியுங்.

2476 வத்தபே⁴தே³ன ஸப்³ப³த்த², து³க்கடங் து பகாஸிதங்;
அனாத³ரவஸேனேவ, அகரொந்தஸ்ஸ பி⁴க்கு²னோ.

உபஜ்ஜா²யாசரியவத்தகதா².

2477 உபஜ்ஜா²யஸ்ஸ வத்தானி, ததா² ஸத்³தி⁴விஹாரிகே;
ஸதங் தேரஸ ஹொந்தேவ, ததா²ந்தேவாஸிகேபி ச.

ஸத்³தி⁴விஹாரிகந்தேவாஸிகவத்தகதா².

2478 பக்கந்தே வாபி விப்³ப⁴ந்தே, பக்க²ஸங்கந்தகே மதே;
ஆணத்தியா உபஜ்ஜா²யா, பஸ்ஸம்ப⁴தி ச நிஸ்ஸயோ.

2479 ஹோதி ஆசரியம்ஹாபி, ச²தா⁴ நிஸ்ஸயபே⁴த³னங்;
பக்கந்தே வாபி விப்³ப⁴ந்தே, பக்க²ஸங்கந்தகே மதே.

2480 ஆணத்தியங் உபி⁴ன்னம்பி, து⁴ரனிக்கே²பனேபி ச;
ஏகேகஸ்ஸ உபி⁴ன்னங் வா, நாலயே ஸதி பி⁴ஜ்ஜதி.

2481 உபஜ்ஜா²யஸமோதா⁴ன-க³தஸ்ஸாபி ச பி⁴ஜ்ஜதி;
த³ஸ்ஸனங் ஸவனஞ்சாதி, ஸமோதா⁴னங் த³விதா⁴ மதங்.

2482 அத³தி⁴கஸ்ஸ கி³லானஸ்ஸ, கி³லானுபட்ட²கஸ்ஸ ச;
யாசிதஸ்ஸ ந தோ³ஸோவ, வஸிதுங் நிஸ்ஸயங் வினா.

2483 ஜானதா அத்தனோ சேவ, வனே பா²ஸுவிஹாரதங்;
ஸபா⁴கே³ தா³யகேஸந்தே, வஸிதும்பி ச வட்டதி.

நிஸ்ஸயபடிப்பஸ்ஸம்ப⁴னகதா².

2484 குட்டி²ங் க³ண்டி³ங் கிலாஸிஞ்ச, ஸோஸிஞ்ச அபமாரிகங்;
ததா² ராஜப⁴டங் சோரங், லிகி²தங் காரபே⁴த³கங்.

2485 கஸாஹதங் நரஞ்சேவ, புரிஸங் லக்க²ணாஹதங்;
இணாயிகஞ்ச தா³ஸஞ்ச, பப்³பா³ஜெந்தஸ்ஸ து³க்கடங்.

2486 ஹத்த²ச்சி²ன்னமளச்சி²ன்னங், பாத³ச்சி²ன்னஞ்ச புக்³க³லங்;
கண்ணனாஸங் கு³லிச்சி²ன்னங், கண்ட³ரச்சி²ன்னமேவ ச.

2487 காணங் குணிஞ்ச கு²ஜ்ஜஞ்ச, வாமனங் ப²ணஹத்த²கங்;
க²ஞ்ஜங் பக்க²ஹதஞ்சேவ, ஸீபதி³ங் பாபரோகி³னங்.

2488 ஜராய து³ப்³ப³லங் அந்த⁴ங், ப³தி⁴ரஞ்சேவ மம்மனங்;
பீட²ஸப்பிங் ததா² மூக³ங், பப்³பா³ஜெந்தஸ்ஸ து³க்கடங்.

2489 அதிதீ³கோ⁴திரஸ்ஸோ வா, அதிகாலோபி வா ததா²;
அச்சோதா³தோபி வா மட்ட²-தம்ப³லோஹனித³ஸ்ஸனோ.

2490 அதிதூ²லோ அதிகிஸ்ஸோ, மஹாஸ்ஸோபி வா ததா²;
அதிசு²த்³த³கஸ்ஸேன, ஸஹிதேன யுத்தோபி வா.

2491.

குடகுடகஸீஸோ வா, ததா² ஸிக²ரஸீஸகோ;
வேளுனாளிஸமானேன, ஸீஸேன ச யுதோ நரோ.

2492 கப்பஸீஸோபி பப்³பா⁴ர-ஸீஸோ வா வணஸீஸகோ;
ததா² கண்ணிககேஸோ வா, தூ²லகேஸோபி வா ததா².

2493 பூதினில்லோமஸீஸோ வா, ஜாதிபண்ட³ரகேஸகோ;
ஜாதியா தம்ப³கேஸோ வா, ததே²வாவட்டஸீஸகோ.

2494 ஸீஸலோமேகப³த்³தே⁴ஹி, ப⁴முகேஹி யுதோபி வா;
ஸம்ப³த்³த⁴ப⁴முகோ வாபி, நில்லோமப⁴முகோபி வா.

2495 மஹந்தகு²த்³த³னெத்தோ வா, ததா² விஸமலோசனோ;
கேகரோ வாபி க³ம்பீ⁴ர-நெத்தோ விஸமசக்கலோ.

2496 ஜதுமுஸிககண்ணோ வா, ஹத்தி²கண்ணோபி வா பன;
சி²த்³த³மத்தககண்ணோ வா, ததே²வாவித்³த⁴கண்ணகோ.

2497 ததா² டங்கிதகண்ணோ வா, பூதிகண்ணோபி வா பன;
யோனகாதி³ப்பபே⁴தோ³பி, நாயங் பரிஸதூ³ஸகோ.

2498 அதிபிங்க³லனெத்தோ வா, ததா² நிப்பகு²மக்கி² வா;
அஸ்ஸுபக்³க⁴ரனெத்தோ வா, பக்கபுப்பி²தலோசனோ.

2499 ததே²வ ச மஹானாஸோ, அதிகு²த்³த³கனாஸிகோ;
ததா² சிபிடனாஸோ வா, நரோ குடிலனாஸிகோ.

2500 நிச்சவிஸ்ஸவனாஸோ வா, யோ வா பன மஹாமுகோ²;
வங்கபி⁴ன்னமுகோ² வாபி, மஹாஒட்டோ²பி வா பன.

2501 ததா² தனுகஒட்டோ² வா, விபலுத்தரஒட்ட²கோ;
ஒட்ட²சி²ன்னோபி உப்பக்க-முகோ² ஏளமுகோ²பி வா.

2502 ஸங்க²துண்டோ³பி து³க்³க³ந்த⁴-முகோ² வா பன புக்³க³லோ;
மஹாத³ந்தோபி அச்சந்தங், ததா² அஸுரத³ந்தகோ.

2503 ஹெட்டா² உபரிதோ வாபி, ப³ஹினிக்க²ந்தத³ந்தகோ;
அத³ந்தோ பூதித³ந்தோ வா, அதிகு²த்³த³கத³ந்தகோ.

2504 யஸ்ஸ த³ந்தந்தரே த³ந்தோ, காளகத³ந்தஸன்னிபோ⁴;
ஸுகு²மோவ டி²தோ, தங் சே, பப்³பா³ஜேதும்பி வட்டதி.

2505 யோ மஹாஹனுகோ போஸோ;
தீ³கே⁴ன ஹனுனா யுதோ;
சிபிடஹனுகோ வாபி;
ரஸ்ஸேன ஹனுனா யுதோ.

2506 நிம்மஸ்ஸுதா³டி²கோ வாபி, அதிதீ³க⁴க³லோபி வா;
அதிரஸ்ஸக³லோபி வா, பி⁴ன்னக³ண்டி²க³லோபி வா.

2507 ததா² ப⁴ட்ட²ங்ஸகூடோ வா, பி⁴ன்னபிட்டி²உரோபி வா;
ஸுதீ³க⁴ரஸ்ஸஹத்தோ² வா, கச்ச²கண்டு³ஸமாயுதோ.

2508 மஹானிஸத³மங்ஸோ வா, உத்³த⁴னக்³கு³பமாயுதோ;
வாதண்டி³கோ மஹாஹரு, ஸங்க⁴ட்டனகஜாணுகோ.

2509 பி⁴ன்னஜாணு மஹாஜாணு, தீ³க⁴ஜங்கோ⁴ விஜங்க⁴கோ;
விகடோ வாபி பண்ஹோ வா, ததா² உப்³புத்³த⁴பிண்டி³கோ.

2510 யட்டி²ஜங்கோ⁴ மஹாஜங்கோ⁴, மஹாபாதோ³பி யோ நரோ;
ததா² பிட்டி²கபாதோ³ வா, மஹாபண்ஹிபி வா பன.

2511 வங்கபாதோ³ நரோ யோ வா, க³ண்டி²கங்கு³லிகோபி வா;
யோ பனந்த⁴னகோ² வாபி, காளபுதினகோ²பி ச.

2512 இச்சேவமாதிகங் கஞ்சி, நரங் பரிஸது³ஸகங்;
பப்³பா³ஜேந்தஸ்ஸ பி⁴க்கு²ஸ்ஸ, ஹோதி ஆபத்தி து³க்கடங்.

பரிஸது³ஸககதா².

2513 “ஸாமணேரஜ்ஜ மா கா²த³, மா பு⁴ஞ்ஜ ச பிவா”தி ச;
நிவாரெந்தஸ்ஸ ஆஹாரங், ஹோதி ஆபத்தி து³க்கடங்.

2514 “நிவாரெஸ்ஸாமி ஆஹார”-மிதி வா பத்தசீவரங்;
அந்தோ நிக்கி²பதோ ஸப்³பு-பயோகே³ஸுபி து³க்கடங்.

2515 து³ப்³புசஸாமணேரஸ்ஸ, அனாசாரஸ்ஸ கேவலங்;

த³ண்ட³கம்மங் ஹவே கத்வா, ஹிதகாமேன பி⁴க்கு²னா.

2516 யாகு³ங் வா பன ப⁴த்தங் வா, த³ஸ்ஸெத்வா கிர பா⁴ஸிதுங்;
“ஆஹடே த³ண்ட³கம்மே த்வங், லச்ச²ஸீத³”ந்தி வட்டதி.

2517 அபராதா⁴னுருபேன , த³ண்ட³கம்மங் து காரயே;
வாலிகாஸலிலாதீ³ன-மாஹராபனமேவ தங்.

2518 ஸீஸே வா நிக்கி²பாபேதுங், பாஸாணாதீ³னி கானிசி;
நிபஜ்ஜாபேதுமுண்ணேஹ வா, பாஸாணே பூ⁴மியாபி வா.

2519 உத³கங் வா பவேஸேதுங், ந ச வட்டதி பி⁴க்கு²னோ;
இதா⁴வரணமத்தங் து, த³ண்ட³கம்மங் பகாஸிதங்.

நிவாரணகதா².

2520 பக்கோ²பக்கமிகாஸித்தா, சதுத்தோ² பனுஸூயகோ;
நபுங்ஸகேன பஞ்சேதே, பண்ட³கா பரிதீ³பிதா.

2521 தேஸு ஆஸித்துஸூயானங், பப்³ப³ஜ்ஜா ந நிவாரிதா;
இதரேஸங் து திண்ணம்பி, பண்ட³கானங் நிவாரிதா.

2522 வாரிதா யஸ்ஸ பப்³ப³ஜ்ஜா, நாலேஸதப்³போ³தி ஸோ மதோ;
திவிதே⁴ பன தே ஞத்வா, பப்³பா³ஜெந்தஸ்ஸ து³க்கடங்.

பண்ட³ககதா².

2523 லிங்க³த்தே²னோ ச ஸங்வாஸ-த்தே²னோ தது³ப⁴யஸ்ஸ ச;
தெ²ய்யஸங்வாஸகோ நாம, திவிதோ⁴பி பவுச்சதி.

2524 ஸயமேவ ச யோ தத்த², பப்³ப³ஜித்வா ந க³ண்ஹதி;
பி⁴க்கு²வஸ்ஸானி வா நேவ, யதா²வுட்³ட⁴ம்பி வந்த³னங்.

2525 லிங்க³த்தே²னோ அயங் லிங்க³-மத்தஸ்ஸ தே²னதோ ஸியா;
யோ ச பப்³ப³ஜிதோ ஹுத்வா, பி⁴க்கு²வஸ்ஸானி க³ண்ஹதி.

2526 ஸங்வாஸங் ஸாதி³யந்தோவ, ஸங்வாஸத்தே²னகோ மதோ;
உப⁴யத்தே²னகோ வுத்த-நயோயேவ, யதா²ஹ ச.

2527“ராஜது³பி⁴க்க²கந்தார-ரோக³வேரிப⁴யேஹி வா;
சீவராஹரணத்த²ங் வா, லிங்க³மாதியதீத⁴ யோ.

2528ஸங்வாஸங் நாதி⁴வாஸேதி, யாவ ஸோ ஸுத்³த⁴மானஸோ;
தெ²ய்யஸங்வாஸகோ நாம, தாவ ஏஸ ந வச்சதி”.

தெ²ய்யஸங்வாஸககதா².

2529“தித்தி²யோஹங் ப⁴விஸ்ஸ”ந்தி, உபஸம்பன்னபி⁴க்கு² சே;
ஸலிங்கே³னேவ யோ யாதி, தித்தி²யானமுபஸ்ஸயங்.

2530க³ச்ச²தோ பத³வாரேன, ஹோதி ஆபத்தி து³க்கடங்;
ஹோதி தித்தி²யபக்கந்தோ, லிங்கே³ தேஸங் து நிஸ்ஸிதே.

2531“தித்தி²யோஹங் ப⁴விஸ்ஸ”ந்தி, குஸசீராதி³கங் பன;
ஸயமேவ நிவாஸேதி, ஸோபி பக்கந்தகோ ஸியா.

2532நக்³கோ³ ஆஜீவகாதீ³னங், க³ந்த்வா தேஸங் உபஸ்ஸயங்;
லுஞ்சாபேதி ஸசே கேஸே, வத்தானாதியதீத⁴ வா.

2533மோரபிஞ்சா²தி³கங் தேஸங், லிங்க³ங் க³ண்ஹாதி வா ஸசே;
ஸாரதோ சேவ வா தேஸங், பப்³பஜ்ஜங் லத்³தி⁴மேவ வா.

2534ஹோதி தித்தி²யபக்கந்தோ, ந பனேஸ விமுச்சதி;
நக்³க³ஸ்ஸ க³ச்ச²தோ வுத்தங், பத³வாரேன து³க்கடங்.

2535வுத்தோ அனுபஸம்பன்ன-வஸேன தெ²ய்யவாஸகோ;
ததா² தித்தி²யபக்கந்தோ, உபஸம்பன்னபி⁴க்கு²னா.

தித்தி²யபக்கந்தகதா².

2536நாகோ³ வாபி ஸுபண்ணோ வா, யக்கோ² ஸக்கோபி வா இத⁴;
திரச்சா²னக³தோ வுத்தோ, பப்³பா³ஜேதுங் ந வட்டதி.

திரச்சா²னகதா².

2537பஞ்சானந்தரிகே போஸே, பப்³பா³ஜேந்தஸ்ஸ து³க்கடங்;
உப⁴தொப்யஞ்ஜனஞ்சேவ, ததா² பி⁴க்கு²னிதூ³ஸகங்.

- 2538 ஏகதோஉபஸம்பன்னங், பி⁴க்கு²னீனங் து ஸந்திகே;
தூ³ஸெத்வா பன ஸோ நேவ, பி⁴க்கு²னீதூ³ஸகோ ஸியா.
- 2539 ஸசே அனுபஸம்பன்ன-தூ³ஸகோ உபஸம்பத³ங்;
லப⁴தேவ ச பப்³புஜ்ஜங், ஸா ச நேவ பராஜிதா.
- ஏகாத³ஸஅப⁴ப்³புக்³லகதா².
- 2540 நூபஸம்பாத³னீயோவ , அனுபஜ்ஜா²யகோ நரோ;
கரோதோ து³க்கடங் ஹோதி, ந குப்பதி ஸசே கதங்.
- 2541 குப்பதீதி வத³ந்தேகே, ந க³ஹேதப்³புமேவ தங்;
ஸேஸேஸுபி அயங் ஞெய்யோ, நயோ ஸப்³புத்த² விஞ்ஞனா.
- 2542 உபஸம்பத³கம்மஸ்ஸ, அப⁴ப்³பா³ பஞ்சவீஸதி;
அஜானித்வா கதோ சாபி, ஓஸாரோ நாஸனாரஹோ.
- 2543 ஹத்த²ச்சி²ன்னாதி³பா³த்திங்ஸ, குட்டி²ஆதி³ ச தேரஸ;
அபத்தோ தேஸமோஸாரோ, கதோ சே பன ஞுஹதி.
- 2544 ஏகபஜ்ஜா²யகோ ஹோதி;
ஹொந்தி ஆசரியா தயோ;
உபஸம்பதா³பெக்கா² ச;
ஹொந்தி த்³வே வா தயோபி வா.
- 2545 தீஹி ஆசரியேஹேவ, ஏகதோ அனுஸாவனங்;
ஓஸாரெத்வா கதங் கம்மங், ந ச குப்பதி கப்பதி.
- 2546 ஏகபஜ்ஜா²யகோ ஹோதி;
ஆசரியோபி ததே²கதோ;
உபஸம்பதா³பெக்கா² ச;
ஹொந்தி த்³வே வா தயோபி வா.
- 2547 அனுபப்³பே³ன ஸாவெத்வா, தேஸங் நாமங் து தேன ச;
ஏகதோ அனுஸாவெத்வா, கதம்பி ச ந குப்பதி.
- 2548 நானுபஜ்ஜா²யகேனாபி, நானாசரியகேன ச;
அஞ்ஞமஞ்ஞானுஸாவெத்வா, கதங் கம்மஞ்ச வட்டதி.

2549 ஸுமனோ திஸ்ஸதே²ரஸ்ஸ, அனுஸாவேதி ஸிஸ்ஸகங்;
திஸ்ஸோ ஸுமனதே²ரஸ்ஸ, அனுஸாவேதி ஸிஸ்ஸகங்.

2550 நானுபஜ்ஜா²யகேனேவ, ஏகாசரியகேனித⁴;
உபஸம்பதா³ படிக்கி²த்தா, பு³த்³தே⁴னாதி³ச்சப³ந்து⁴னா.

மஹாக²ந்த⁴ககதா².

உபோஸத²க்க²ந்த⁴ககதா²

2551 பு³த்தா⁴பு³த்த⁴வஸேனேவ , ஸீமா நாம த்³விதா⁴ மதா;
நிமித்தேன நிமித்தங் து, க⁴டெத்வா பன ஸம்மதா.

2552 அயங் ஸீமாவிபத்தீஹி, ஏகாத்³ஸஹி வஜ்ஜிதா;
பு³த்தா⁴ நாம ஸியா ஸீமா, ஸா திஸம்பத்திஸங்யுதா.

2553 க²ண்ட³ஸமானஸங்வாஸா-விப்பவாஸாதி³பே⁴த்³தோ;
இதி பு³த்தா⁴ திதா⁴ வுத்தா, அபு³த்தா⁴பி திதா⁴ மதா.

2554 கா³மதோ உத³குக்கே²பா, ஸத்தப்³ப⁴ந்தரதோபி ச;
தத்த² கா³மபரிச்சே²தோ³, “கா³மஸீமா”தி வுச்சதி.

2555 ஜாதஸ்ஸரே ஸமுத்³தே³ வா, நதி³யா வா ஸமந்ததோ;
மஜ்ஜி²மஸ்ஸுத³குக்கே²போ, உத³குக்கே²பஸஞ்ஞிதோ.

2556 அகா³மகே அரஞ்ஞே து, ஸத்தேவப்³ப⁴ந்தரா பன;
ஸமந்ததோ அயங் ஸீமா, ஸத்தப்³ப⁴ந்தரநாமிகா.

2557 ஏகங் அப்³ப⁴ந்தரங் வுத்தங், அட்ட²வீஸதிஹத்த²கங்;
கு³ஞுக்கே²பனயேனேவ, உத³குக்கே²பகா மதா.

2558 இமா த்³வே பன ஸீமாயோ, வட்³ட⁴ந்தி பரிஸாவஸா;
அப்³ப⁴ந்தருத³குக்கே²பா, டி²தோகாஸா பரங் ஸியுங்.

2559 டி²தோ அந்தோபரிச்சே²தே³, ஹத்த²பாஸங் விஹாய வா;
தத்தகங் அனதிக்கம்ம, பரிச்சே²த³ம்பி வா பரங்.

2560 டி²தோ கம்மங் விகோபேதி, இதி அட்ட²கதா²னயோ;
தஸ்மா ஸோ ஹத்த²பாஸே வா, காதப்³போ³ பஹி வா பன.

- 2561 ப³த்³த்⁴ஸீமாய ஸண்டா²னங், நிமித்தங் தி³ஸகித்தனங்;
ஞத்வா பமாணங் ஸோதெ⁴த்வா, ஸீமங் ப³ந்தெ⁴ய்ய பண்டி³தோ.
- 2562 திகோணங் சதுரஸ்ஸஞ்ச, வட்டஞ்ச பணவூபமங்;
விதானங் த⁴னுகாகாரங், முதி³ங்க³ஸகடுபமங்.
- 2563 பப்³புதங் வனங் பாஸாணங், ருக்க²ங் மக்³க³ஞ்ச வம்மிகங்;
உத³கஞ்ச நதி³ஞ்சாதி, நிமித்தானட்ட² தீ³பயே.
- 2564 தேஸு தீணி நிமித்தானி, ஆதி³ங் கத்வா ஸமந்ததோ;
நிமித்தானங் ஸதேனாபி, ப³ந்தி⁴துங் பன வட்டதி.
- 2565 தியோஜனபரா ஸீமா, உக்கட்டா²தி பகாஸிதா;
ஏகவீஸதி பி⁴க்க²னங், க³ண்ஹந்தீ ஹெட்டி²மா மதா.
- 2566 உக்கட்டா²யபி உக்கட்டா², ஹெட்டி²மாயபி ஹெட்டி²மா;
ஏதா த்³வேபி அஸீமாதி, வுத்தா ஆதி³ச்சப³ந்து⁴னா.
- 2567 நிமித்தங் பன கித்தெத்வா, ஸப்³புமேவ ஸமந்ததோ;
பச்சா² ஞத்திது³தியேன, ஸீமங் ப³ந்தி⁴துமரஹதி.
- 2568 ப³ந்தி⁴த்வானந்தரங் பச்சா², சீவராவிப்பவாஸகங்;
ஸம்மன்னித்வான ப³த்தா⁴ ஸா-விப்பவாஸாதி வுச்சதி.
- 2569 நதீ³ஸரஸமுத்³தே³ஸு, ஸீமங் ப³ந்த⁴தி சே பன;
ந வொத்த²ரதி தேனேவ, அஸீமாதி ஜினொப்³ரவி.
- ஸீமாகதா².
- 2570 தி³னகாரககத்தப்³பா³-காரானஞ்ச வஸா பன;
நவேவுபோஸதா² வுத்தா, புத்³தே⁴னாதி³ச்சப³ந்து⁴னா.
- 2571 சாதுத்³த³ஸோ பன்னரஸோ, ஸாமக்³கீ³ ச உபோஸதோ²;
தி³வஸேனேவ நித்³தி³ட்டா², தயோபேதே உபோஸதா².
- 2572 ஸங்கே⁴ உபோஸதோ² சேவ, க³ணே புக்³க³லுபோஸதோ²;
காரகானங் வஸேனேவ, தயோ வுத்தா உபோஸதா².

ஸுத்துத்³தே³ஸாபி⁴தா⁴னோ ச, பாரிஸுத்³தி⁴உபோஸதோ²;
அதி⁴ட்டா²னந்தி நித்³தி³ட்டா², தயோ கம்மேனுபோஸதா².

2574 ஸங்க⁴ஸ்ஸ பாதிமொக்கோ² ச, பாரிஸுத்³தி⁴ க³ணஸ்ஸ ச;
அதி⁴ட்டா²னமதே²கஸ்ஸ, நித்³தி³ட்டா²ங் பன ஸத்து²னா.

2575 பாதிமொக்க²ஸ்ஸ உத்³தே³ஸா, பஞ்ச வுத்தா மஹேஸினா;
நிதா³னங் உத்³தி³ஸித்வான, ஸாவேதப்³பா³ங் து ஸேஸகங்.

2576 அயமேவ நயோ ஞெய்யோ, ஸேஸேஸுபி ச விஞ்ஞனா;
சத்தாரோ பி⁴க்கு²னீனஞ்ச, உத்³தே³ஸா நவிமே பன.

2577 பாதிமொக்க²ஸ்ஸ உத்³தே³ஸோ, காதப்³போ³வ உபோஸதே²;
அந்தராயங் வினா சேவ, அனுத்³தே³ஸோ நிவாரிதோ.

2578 தே²ரோ ச இஸ்ஸரோ தஸ்ஸ;
“தே²ராதெ⁴ய்ய”ந்தி பாட²தோ;
அவத்தந்தேன அஜ்ஜி²ட்டோ²;
யஸ்ஸ ஸோ பன வத்ததி.

2579 உத்³தி³ஸந்தே ஸமப்பா வா, ஆக³ச்ச²ந்தி ஸசே பன;
உத்³தி³ட்டா²ங் தங் ஸுஉத்³தி³ட்டா²ங், ஸாவேதப்³பா³ங் து ஸேஸகங்.

2580 உத்³தி³ட்டா²மத்தே பி⁴க்க²னங், பரிஸாயுட்டி²தாய வா;
பாரிஸுத்³தி⁴ து கத்தப்³பா³, மூலே தேஸங், ஸசே ப³ஹு.

2581 ஸம்மஜ்ஜிதுங் பதீ³பேதுங், பஞ்ஞாபேதுங் த³காஸனே;
வினித்³தி³ட்டா²ஸ்ஸ தே²ரேன, அகரொந்தஸ்ஸ து³க்கடங்.

2582 கத்வா ஸம்மஜ்ஜனங் தீ³பங், ட²பெத்வா உத³காஸனங்;
க³ணஞத்திங் ட²பெத்வாவ, கத்தப்³போ³ தீஹுபோஸதோ².

2583 புப்³புகிச்சங் ஸமாபெத்வா, அதி⁴ட்டெ²ய்ய பனேககோ;
நோ சே அதி⁴ட்ட²ஹெய்யஸ்ஸ, ஹோதி ஆபத்தி து³க்கடங்.

2584 அத⁴ம்மேன ச வக்³கே³ன, ஸமக்³கே³ன அத⁴ம்மதோ;
ததா² த⁴ம்மேன வக்³கே³ன, ஸமக்³கே³ன ச த⁴ம்மதோ.

2585.

உபோஸத²ஸ்ஸ ஏதானி, கம்மானீதி ஜினொப்³ரவி;
சதுஸ்வபி பனேதேஸு, சதுத்த²ங் த⁴ம்மிகங் மதங்.

2586 அத⁴ம்மேனித⁴ வக்³கோ³ ஹி, கதமோ செத்து²போஸதோ²?
வஸந்தி ஏகஸ்மாயங், சத்தாரோ யத்த² பி⁴க்கு²னோ.

2587 ஏகஸ்ஸ பாரிஸுத்³தி⁴ங் தே, ஆனயித்வா தயோ ஜனா;
கரொந்தி பாரிஸுத்³தி⁴ங் சே, அத⁴ம்மோ வக்³கு³போஸதோ².

2588 அத⁴ம்மேன ஸமக்³கோ³ ஹி, சத்தாரோ பி⁴க்கு²னேகதோ;
கரொந்தி பாரிஸுத்³தி⁴ங் சே, ஸமக்³கோ³ ஹொத்யத⁴ம்மிகோ.

2589 த⁴ம்மேன பன வக்³கோ³ ஹி, கதமோ ஸோ உபோஸதோ²;
வஸந்தி ஏகஸ்மாயங், சத்தாரோ யத்த² பி⁴க்கு²னோ.

2590 ஏகஸ்ஸ பாரிஸுத்³தி⁴ங் தே, ஆனயித்வா தயோ ஜனா;
பாதிமொக்கு²த்³தி³ஸந்தே சே, வக்³கோ³ த⁴ம்மேனுபோஸதோ².

2591 த⁴ம்மதோ ஹி ஸமக்³கோ³ ஸோ;
சத்தாரோ பி⁴க்கு²னேகதோ;
பாதிமொக்கு²த்³தி³ஸந்தீத⁴;
ஸமக்³கோ³ த⁴ம்மதோ மதோ.

2592 வக்³கே³ ஸமக்³கே³ வக்³கோ³தி, ஸஞ்ஞினோ விமதிஸ்ஸ வா;
உபோஸத²ங் கரொந்தஸ்ஸ, ஹொதி ஆபத்தி து³க்கடங்.

2593 பே⁴தா³தி⁴ப்பாயதோ தஸ்ஸ, ஹொதி து²ல்லச்சயங் பன;
வக்³கே³ ஸமக்³கே³னாபத்தி, ஸமக்³கோ³தி ச ஸஞ்ஞினோ.

2594 உக்கி²த்தேன க³ஹட்டே²ன, ஸேஸேஹி ஸஹத⁴ம்மிஹி;
சுதனிக்கி²த்தஸிக்கே²ஹி, ஏகாத³ஸஹி வா ஸஹ.

2595 உபோஸதோ² ந காதப்³போ³, ஸபா⁴கா³பத்திகேன வா;
ச²ந்தே³ன பாரிவுத்தே²ன, கரோதோ ஹொதி து³க்கடங்.

2596 அதே³ஸெத்வா பனாபத்திங், நாவிகத்வான வேமதிங்;
உபோஸதோ² ந காதப்³போ³, தி³னே வா அனுபோஸதே².

2597.

உபோஸதே² பனாவாஸா, ஸபி⁴க்கு²ம்ஹா ச பி⁴க்கு²னா;
ஆவாஸோ வா அனாவாஸோ, ந க³ந்தப்³போ³ குதா³சனங்.

2598 யஸ்மிங் உபோஸதே² கிச்சங்;
ஆவாஸே பன வத்ததி;
ஸோ சே ஸபி⁴க்கு²கோ நாம;
ஆவாஸோதி பகாஸிதோ.

2599 உபோஸதோ² கிமத்தா²ய, கிமத்தா²ய பவாரணா;
உபோஸதோ² ஸமக்³கத்தோ², விஸுத்³த⁴த்தா² பவாரணா.

2600 கோபேதுங் த⁴ம்மிகங் கம்மங், படிக்கோஸெய்ய து³க்கடங்;
ச²ந்த³ங் வா காயஸாமக்³கிங், அதெ³ந்தஸ்ஸபி து³க்கடங்.

2601 ஹோதி பஞ்சவிதோ⁴ ஸங்கோ⁴, சதுவக்³கா³தி³பே⁴த³தோ;
ஸோ ச கத்தப்³பகம்மஸ்ஸ, வஸேன பரிதீ³பிதோ.

2602 பவாரணங் ததா²ப்³பா⁴னங், கம்மஞ்ச உபஸம்பத³ங்;
ட²பெத்வா சதுவக்³கே³ன, அகத்தப்³பங் ந விஜ்ஜதி.

2603 பஞ்சவக்³கே³ன அப்³பா⁴னங், மஜ்ஜ²தே³ஸூபஸம்பத³ங்;
த³ஸவக்³கே³ன அப்³பா⁴னங், வினா ஸப்³பங் து வட்டதி.

2604 கம்மங் வீஸதிவக்³கே³ன, ந கத்தப்³பங் ந கிஞ்சிபி;
ஊனே தோ³ஸோதி ஞாபேதுங், நாதி⁴கே அதிரேகதா.

2605 சத்தாரோ பகதத்தாவ, கம்மப்பத்தாதி தீ³பிதா;
சதுவக்³கே³ன கத்தப்³பே³, ஸேஸேஸு ச அயங் நயோ.

2606 சதுவக்³கா³தி³கத்தப்³பங், கத்வாஸங்வாஸபுக்³கலங்;
க³ணபூரங் கரொந்தஸ்ஸ, கதங் குப்பதி து³க்கடங்.

2607 பரிவாஸாதி³கம்மேபி , தத்ரட்ட²ங் க³ணபூரகங்;
கத்வா பன கரொந்தானங், ததா², ஸேஸங் து வட்டதி.

உபோஸத²க்க²ந்த⁴ககதா².

வஸ்ஸூபனாயிகக்²ந்த⁴ககதா²

2608 புரிமா பச்சி²மா சாதி, து³வே வஸ்ஸுபனாயிகா;
ஆலயோ வா வசீபே⁴தோ³, கத்தப்³போ³ உபக³ச்ச²தா.

2609 வஸ்ஸுபக³மனங் வாபி, ஜானங் அனுபக³ச்ச²தோ;
தேமாஸமவஸித்வா வா, சரந்தஸ்ஸபி து³க்கடங்.

2610 ரூக்க²ஸ்ஸ ஸுஸிரே ச²த்தே, சாடிச²வகுடீஸு வா;
அஜ்ஜோ²காஸேபி வா வஸ்ஸங், உபக³ந்துங் ந வட்டதி.

2611 வஸ்ஸச்சே²தே³ அனாபத்தி, அந்தராயோ ஸசே ஸியா;
சி²ன்னவஸ்ஸஸ்ஸ பி⁴க்கு²ஸ்ஸ, வாரிதாவ பவாரணா.

2612 மாதாபிதூனங் பன த³ஸ்ஸனத்த²ங்;
பஞ்சன்னமத்தே² ஸஹத⁴ம்மிகானங்;
த³ட்டு²ங் கி³லானங் தது³பட்ட²கானங்;
ப⁴த்தாதி³ நேஸங் பரியேஸனத்த²ங்.

2613 ததா²னபி⁴ரதங் க³ந்த்வா, லுபகாஸெஸ்ஸமுட்டி²தங்;
தி³ட்டி²ங் வா தஸ்ஸ குக்குச்சங், வினோதெ³ஸ்ஸாமஹந்தி வா.

2614 ஏவங் ஸத்தாஹகிச்சேன, பி⁴க்கு²னா வினயஞ்ஞனா;
அபேஸிதேபி க³ந்தப்³பங், பகே³வ பஹிதே பன.

2615 வஸ்ஸங் உபக³தேனெத்த², அனிமந்திதபி⁴க்கு²னா;
த⁴ம்மஸ்ஸ ஸவனத்தா²ய, க³ந்துங் பன ந வட்டதி.

2616 “அஸுகங் நாம தி³வஸங், ஸன்னிபாதோ ப⁴விஸ்ஸதி”;
இச்சேவங் கதிகா புப்³பங், கதா சே பன வட்டதி.

2617 “தோ⁴விஸ்ஸாமி ரஜிஸ்ஸாமி, ப⁴ண்ட³க”ந்தி ந வட்டதி;
ஸசாசரியுபஜ்ஜா²யா, பஹிணந்தி ச வட்டதி.

2618 உத்³தே³ஸாதீ³னமத்தா²ய, க³ந்துங் நேவ ச வட்டதி;
க³ருனங் த³ஸ்ஸனத்தா²ய, க³ந்துங் லப⁴தி புக்³கலோ.

2619 ஸசே ஆசரியோ “அஜ்ஜ, மா க³ச்சா²ஹி”தி பா⁴ஸதி;
ரத்திச்சே²தே³ அனாபத்தி, ஹோதீதி பரிதீ³பிதா.

- 2620 யஸ்ஸ கஸ்ஸசி ஞாதிஸ்ஸ, உபட்டா²ககுலஸ்ஸ வா;
க³ச்ச²தோ த³ஸ்ஸனத்தா²ய, ரத்திச்சே²தே³ ச து³க்கடங்.
- 2621 “ஆக³மிஸ்ஸாமி அஜ்ஜேவ, க³ந்த்வாஹங் கா³மக”ந்தி ச;
ஸசே பாபுணிதுங் க³ச்ச²ங், ந ஸக்கோதேவ வட்டதி.
- 2622 வஜே ஸத்தே²பி நாவாயங், தீஸு டா²னேஸு பி⁴க்கு²னோ;
வஸ்ஸச்சே²தே³ அனாபத்தி, பவாரேதுஞ்ச வட்டதி.
- 2623 ஸதி பச்சயவேகல்லே, ஸரீராபா²ஸுதாய வா;
ஏஸேவ அந்தராயோதி, வஸ்ஸங் செ²த்வாபி பக்கமே.
- 2624 யேன கேனந்தராயேன, வஸ்ஸங் நோபக³தோ ஹி யோ;
து³தியா உபக³ந்தப்³பா³, சி²ன்னவஸ்ஸேன வா பன.
- 2625 வஸ்ஸங் அனுபக³ந்த்வா வா, தத³ஹேவ ச க³ச்ச²தி;
ப³ஹித்³தா⁴ ஏவ ஸத்தாஹங், உபக³ந்த்வாபி வா பன.
- 2626 வீதினாமேதி சே தஸ்ஸ, புரிமாபி ந விஜ்ஜதி;
படிஸ்ஸவே ச பி⁴க்கு²ஸ்ஸ, ஹோதி ஆபத்தி து³க்கடங்.
- 2627 வஸ்ஸங் பனுபக³ந்த்வா ச, உட்டா²பெத்வா ந சாருணங்;
க³ச்ச²தோ பன ஸத்தாஹ-கரணேனேவ பி⁴க்கு²னோ.
- 2628 அந்தோயேவ ச ஸத்தாஹங், நிவத்தந்தஸ்ஸ தஸ்ஸ து;
அனாபத்தீதி கோ வாதோ³, வஸித்வா ப³ஹி க³ச்ச²தோ.
- 2629 “வஸிஸ்ஸாமீத⁴ வஸ்ஸ”ந்தி, ஆலயோ யதி³ விஜ்ஜதி;
நோபேதஸதியா வஸ்ஸங், தேன ஸேனாஸனங் பன.
- 2630 க³ஹிதங் ஸுக்³க³ஹிதங் ஹோதி, சி²ன்னவஸ்ஸோ ந ஹோதி ஸோ;
லப⁴தேவ பவாரேதுங், ந தோ³ஸோ கோசி விஜ்ஜதி.
- 2631 “இமஸ்மிங் விஹாரே தேமாஸங், இமங் வஸ்ஸங் உபேமி”தி;
நிச்சா²ரிதே ச திக்க²த்துங், வஸ்ஸங் உபக³தோ ஸியா.
- 2632 ஆதி³ங் து நவமிங் கத்வா, க³ந்துங் வட்டதி பி⁴க்கு²னோ;
ஆக³ச்ச²து ச பச்சா² ஸோ, மா வா தோ³ஸோ ந விஜ்ஜதி.

வஸ்ஸூபனாயிகக்²ந்த⁴ககதா².

பவாரணக்²ந்த⁴ககதா²

2633 சாதுத்³த³ஸீ பஞ்சத³ஸீ, ஸாமக்³கீ³ ச பவாரணா;
தேவாசீ த்³வேகவாசீ ச, ஸங்கே⁴ ச க³ணபுக்³க³லே.

2634 ஏதா பன முனிந்தே³ன, வுத்தா நவ பவாரணா;
தீணி கம்மானி முஞ்சித்வா, அந்தேனேவ பவாரயே.

2635 புப்³பு³கிச்சங் ஸமாபெத்வா, பத்தகல்லே ஸமானிதே;
ஞத்திங் ட²பெத்வா ஸங்கே⁴ன, கத்தப்³பா³ ஹி பவாரணா.

2636 பவாரெந்தேஸு தே²ரேஸு, நிஸீதெ³ய்ய நவோ பன;
ஸயங் யாவ பவாரெய்ய, தாவ உக்குடிகஞ்ஹி ஸோ.

2637 ஞத்திங் வத்வா பவாரெய்யுங், சத்தாரோ வா தயோபி வா;
புப்³பு³கிச்சங் ஸமாபெத்வா, ஏகாவாஸே வஸந்தி சே.

2638 அஞ்ஞமஞ்ஞங் பவாரெய்யுங், வினா ஞத்திங் து³வே ஜனா;
அதி⁴ட்²டெ²ய்ய பனேகோபி, ஸேஸா ஸங்க⁴பவாரணா.

2639 பவாரிதே ச ஸங்க⁴ஸ்மிங், கரெய்யனாக³தோ பன;
அவுட்டோ² சி²ன்னவஸ்ஸோ வா, பாரிஸுத்³தி⁴உபோஸத²ங்.

2640 பஞ்ச யஸ்மிங் பனாவாஸே, சத்தாரோ வா தயோபி வா;
ஏகேகஸ்ஸ ஹரித்வான, ஸமணா தே பவாரணங்.

2641 அஞ்ஞமஞ்ஞங் பவாரெந்தி, ஸசே ஆபத்தி து³க்கடங்;
ஸேஸங் உபோஸதே² வுத்த-நயேனித⁴ நயே பு³தோ⁴.

2642 பாரிஸுத்³தி⁴ப்பதா³னேன, ஸம்பாதே³தத்தனோ ஸுசிங்;
ச²ந்த³தா³னேன ஸங்க⁴ஸ்ஸ, ஸப்³பு³ங் ஸாதே⁴தி, நத்தனோ.

2643 தஸ்மா பன உபி⁴ன்னம்பி, கிச்சஸித்³த⁴த்த²மேவித⁴;
பாரிஸுத்³தி⁴பி தா³தப்³பா³, ச²ந்த³ங் தெ³ந்தேன பி⁴க்கு²னா.

2644 ச²ந்தே³கேன ப³ஹுனம்பி, ஹாதப்³போ³ பாரிஸுத்³தி⁴பி;
பரம்பராஹடோ ச²ந்தோ³, ந க³ச்ச²தி விஸுத்³தி⁴யா.

2645^சந்த³ங் வா பாரிஸுத்³தி⁴ங் வா, க³ஹெத்வா வா பவாரணங்;
ஸாமணேராதி³பா⁴வங் வா, படிஜானெய்ய ஹாரகோ.

2646^ஸசே ஸோ ஸங்க⁴மப்பத்வா, விப்³ப⁴மெய்ய மரெய்ய வா;
நாஹடஞ்சேவ தங் ஸப்³பங், பத்வா சேவங் ஸியாஹடங்.

2647^ஸங்க⁴ங் பத்வா பமத்தோ வா, ஸுத்தோ வா கி²த்தசித்தகோ;
நாரோசேதி அனாபத்தி, ஹோதி ஸஞ்சிச்ச து³க்கடங்.

2648^{யே} தே விபஸ்ஸனாயுத்தா, ரத்திந்தி³வமதந்தி³தா;
புப்³ப³ரத்தாபரரத்தங், விபஸ்ஸனபராயணா.

2649^லத்³த⁴பா²ஸுவிஹாரானங், ஸியா ந பரிஹானிதி;
பவாரணாய ஸங்கா³ஹோ, வுத்தோ கத்திகமாஸகே.

பவாரணக்க²ந்த⁴ககதா².

சம்மக்க²ந்த⁴ககதா²

2650^ஏளகாஜமிகா³னங் து, சம்மங் வட்டதி பி⁴க்கு²னோ;
ரோஹிதேணிகுரங்கா³னங், பஸத³ங்மிகு³மாதுயா.

2651^டபெத்வா சம்மமேதேஸங், அஞ்ஞங் து³க்கடவத்து²கங்;
த²விகோபாஹனே ஸப்³பங், சம்மங் வட்டத்யமானுஸங்.

2652^வட்டந்தி மஜ்ஜி²மே தே³ஸே, ந கு³ணங்கு³ணுபாஹனா;
வட்டந்தி அந்தோஆராமே, ஸப்³பத்தா²பி ச ரோகி³னோ.

2653^{பு}டக²ல்லகப³த்தா⁴ ச, ததே²வ பாலிகு³ண்டி²மா;
தூலபுண்ணா ந வட்டந்தி, ஸப்³பனீலாத³யோபி ச.

2654^{சி}த்ரா உபாஹனா மெண்ட³-விஸாணாபமவத்³தி⁴கா;
ந ச வட்டந்தி மோரஸ்ஸ, பிஞ்சே²ன பரிஸிப்³பி³தா.

2655^மஜ்ஜாரகாளகோலாக-ஸீஹப்³யக்கு⁴த்³த³தீ³பினங்;
அஜினஸ்ஸ ச சம்மேன, ந வட்டதி பரிக்க²டா.

2656^{பு}டாதி³ங் அபனெத்வா வா, சி²ந்தி³த்வா வாபி ஸப்³பஸோ;
வண்ணபே⁴த³ங் ததா² கத்வா, தா⁴ரேதப்³பா³ உபாஹனா.

2657 ஸப்³பா³பி பன தா⁴ரேதுங், ந ச வட்டந்தி பாது³கா;
ட²பெத்வா தத்த² பஸ்ஸாவ- வச்சாசமனபாது³கா.

2658 ஆஸந்தி³ஞ்சேவ பல்லங்கங், உச்சாஸயனஸஞ்ஞிதங்;
அதிக்கந்தபமாணங் து, ஸேவமானஸ்ஸ து³க்கடங்.

2659 கோ³னகங் குத்தகங் சித்தங், படிகங் படலிகம்பி ச;
ஏகந்தலோமிங் விகதிங், தூலிகங் உத்³த³லோமிகங்.

2660 கட்டிஸ்ஸங் பன கோஸெய்யங், ஹத்தி²அஸ்ஸரத²த்த²ரங்;
கத³லிமிக³பவர-பச்சத்த²ரணகம்பி ச.

2661 ஹெட்டா² ரத்தவிதானஸ்ஸ, த்³விதா⁴ ரத்தூபதா⁴னகங்;
அகப்பியமித³ங் ஸப்³பங், து³க்கடங் பரிபு⁴ஞ்ஜதோ.

2662 ஹெட்டா² அகப்பியே பச்சத்த²ரே ஸதி ந வட்டதி;
உத்³த⁴ங் ஸேதவிதானம்பி, தஸ்மிங் அஸதி வட்டதி.

2663 ஆஸந்தி³ங் பன பல்லங்கங், ட²பெத்வா தூலிகம்பி ச;
ஸேஸங் பன ச ஸப்³பம்பி, லப⁴தே கி³ஹிஸந்தகங்.

2664 த⁴ம்மாஸனே அனாபத்தி, ப⁴த்தக்³கே³பி நிஸீதி³துங்;
பூ⁴மத்த²ரணகே தத்த², ஸயிதும்பி ச வட்டதி.

சம்மக்க²ந்த⁴ககதா².

பே⁴ஸஜ்ஜக்க²ந்த⁴ககதா²

2665 வுத்தா க³ஹபதிஸ்ஸாபி, ஸம்முதுஸ்ஸாவனந்திகா;
கோ³னிஸாதீ³தி கப்பியா, சதஸ்ஸோ ஹொந்தி பூ⁴மியோ.

2666 ஸங்க⁴ஸ்ஸ ஸந்தகங் கே³ஹங், ஸந்தகங் பி⁴க்கு²னோபி வா;
கப்பியங் பன கத்தப்³பங், ஸஹஸெய்யப்பஹோனகங்.

2667 ட²பெத்வா பி⁴க்கு²மஞ்ஞேஹி, தி³ன்னங் கப்பியபூ⁴மியா;
அத்தா²ய ஸந்தகங் தேஸங், கே³ஹங் க³ஹபதேவித³ங்.

2668 ஸா ஹி ஸம்முதிகா நாம, யா ஹி ஸங்கே⁴ன ஸம்மதா;
கம்மவாசமவத்வா வா, வட்டதேவாபலோகனங்.

- 2669 பட²மிட்ட²கபாஸாண-த²ம்பா⁴தி³ட்ட²பனே பன;
“கப்பியகுடிங் கரோமா”தி, வத³ந்தேஹி ஸமந்ததோ.
- 2670 உக்கி²பித்வா ட²பெந்தேஸு, ஆமஸித்வா பரேஸு வா;
ஸயமேவுக்கி²பித்வா வா, ட²பெய்யுஸ்ஸாவனந்திகா.
- 2671 இட்ட²காதி³பதிட்டா²னங் , பி⁴க்கூ²னங் வத³தங் பன;
வாசாய பரியோஸானங், ஸமகாலங் து வட்டதி.
- 2672 ஆராமோ அபரிக்கி²த்தோ, ஸகலோ பு⁴ய்யதோபி வா;
து³விதோ⁴பி ச விஞ்ஞாஹி, கோ³னிஸாதீ³தி வச்சதி.
- 2673 ஏதா பன சதஸ்ஸோபி, ஹொந்தி கப்பியபூ⁴மியோ;
எத்த² பக்கஞ்ச வுத்த²ஞ்ச, ஸப்³புங் வட்டதி ஆமிஸங்.
- 2674 உஸ்ஸாவனந்திகா யா ஸா, த²ம்பா⁴தீ³ஸு அதி⁴ட்டி²தா;
த²ம்பா⁴தீ³ஸ்வபனீதேஸு, தத³ஞ்ஞேஸுபி திட்ட²தி.
- 2675 அபனீதேஸு ஸப்³பே³ஸு, ஸியா ஜஹிதவத்து²கா;
கோ³னிஸாதீ³ பரிக்கி²த்தா, ஸேஸா ச²த³னநாஸதோ.
- 2676 பி⁴க்கு²ங் ட²பெத்வா அஞ்ஞேஸங், ஹத்த²தோ ச படிக்க³ஹோ;
தேஸஞ்ச ஸன்னிதி⁴ அந்தோ- வுத்தங் பி⁴க்கு²ஸ்ஸ வட்டதி.
- 2677 பி⁴க்கு²ஸ்ஸ பி⁴க்கு²னியா வா, ஸந்தகங் ஸங்கி⁴கம்பி வா;
அந்தோவுத்த²ஞ்ச பக்கஞ்ச, உபி⁴ன்னங் ந ச வட்டதி.
- 2678 அகப்பகுடியா வுத்த²ங், ஸப்பிஆதி³விமிஸ்ஸிதங்;
“அந்தோவுத்த²”ந்தி நித்³தி³ட்ட²ங், பட²மங் காலிகத்³வயங்.
- 2679 தேஹேவ ஸப்பிஆதீ³ஹி, பி⁴க்கு²னா யாவஜீவிகங்;
பக்கங் தங் பன ஸத்தாஹங், வட்டதேவ நிராமிஸங்.
- 2680 ஸசே ஆமிஸஸங்ஸட்ட²ங், பக்கங் தங் பரிபு⁴ஞ்ஜதி;
அந்தோவுத்த²ஞ்ச பி⁴ய்யோபி, ஸாமபக்கஞ்ச பு⁴ஞ்ஜதி.
- 2681 யாவகாலிகமாஹாரோ, பானகங் யாமகாலிகங்;
ஸத்தாஹகாலிகங் நாம, ஸப்பிஆதி³கபஞ்சகங்.

- 2682 ஸேஸங் பன ஹலித்³தா³தி³, பே⁴ஸஜ்ஜங் யாவஜீவிகங்;
சதுதா⁴ காலிகா வுத்தா, உத³கங் ஹொத்யகாலிகங்.
- 2683 படிக்க³ஹவஸேனேவ, காலாதீதா திகாலிகா;
ஹொந்தி தோ³ஸகரா பு⁴த்தா, அபு⁴த்தங் ததியம்பி ச.
- 2684 அம்ப³ங் ஜம்பு³ ச சோசஞ்ச, மோசஞ்ச மது⁴ முத்³தி³கா;
ஸாலு பா²ருஸகஞ்சாதி, பானகங் அட்ட²தா⁴ மதங்.
- 2685 பானகத்த²மனுஞ்ஞாதங், ப²லங் பக்கஞ்ச ஆமகங்;
பானஹேது படிக்கி²த்தோ, ஸவத்து²கபடிக்க³ஹொ.
- 2686 அம்ப³பக்கங் ஸுகொட்டெத்வா, மத்³தி³த்வா உத³கே பன;
பச்சா² பரிஸ்ஸவங் கத்வா, பாதுங் வட்டதி பானகங்.
- 2687 வட்டதாதி³ச்சபாகங் து, அக்³கி³பக்கங் ந வட்டதி;
ஏஸேவ ச நயோ ஸேஸ-பானகேஸுபி தீ³பிதோ.
- 2688 புப்ப²பத்தப²லுச்சு²னங், சத்தாரோ பனிமே ரஸா;
அனுஞ்ஞாதா இமானட்ட², பானானி அனுஜானதா.
- 2689 ஸப்³போ³ புப்ப²ரஸோ வுத்தோ, மது⁴கஸ்ஸ ரஸங் வினா;
ஸப்³போ³ பத்தரஸோ வுத்தோ, பக்கடா³கரஸங் வினா.
- 2690 ஸத்தன்னங் ஸானுலோமானங், த⁴ஞ்ஞானங் ப²லஜங் ரஸங்;
ட²பெத்வானுமதோ ஸப்³போ³, விகாலே ப²லஜோ ரஸோ.
- 2691 யாவகாலிகபத்தான-மபி ஸீதுத³கே கதோ;
மத்³தி³த்வாதி³ச்சபாகோபி, விகாலே பன வட்டதி.
- 2692 தாலஞ்ச நாளிகேரஞ்ச, பனஸங் லபு³ஜம்பி ச;
திபுஸாலாபு³கும்ப⁴ண்ட³ங், ததா² புஸ்ஸப²லம்பி ச.
- 2693 ஏவமேளாலுகஞ்சாதி, நவேதானி ப²லானி ஹி;
அபரண்ணஞ்ச ஸப்³பம்பி, ஸத்தத⁴ஞ்ஞானுலோமிகங்.
- 2694 ப³த³ரங் திம்ப³ரு ஸேலு, கோஸம்ப³ங் கரமத்³த³கங்;
மாதுலுங்க³கபித்த²ஞ்ச, வெத்தங் சிஞ்சப²லம்பி ச.

2695^பலானங் ஏவமா^{தீ}னங், கு²த்³த³கானங் ரஸோ பன;
அட்ட²பானானுலோமத்தா, நித்³தி³ட்டோ² அனுலோமிகே.

2696^ஸானுலோமஸ்ஸ த⁴ஞ்ஞஸ்ஸ, ட²பெத்வா ப²லஜங் ரஸங்;
அஞ்ஞோ ப²லரஸோ நத்தி², அயாமகாலிகோ இத⁴.

பே⁴ஸஜ்ஜக்க²ந்த⁴ககதா².

கதி²னக்க²ந்த⁴ககதா²

2697^{பி}ட்க்க²னங் வுட்ட²வஸ்ஸானங், கதி²னத்தா²ரமப்³ரவி;
பஞ்சன்னங் ஆனிஸங்ஸானங், காரணா முனிபுங்க³வோ.

2698^ந உல்லிகி²தமத்தாதி³-சதுவீஸதிவஜ்ஜிதங்;
சீவரங் பி⁴க்கு²னாதா³ய, உத்³த⁴ரித்வா புராணகங்.

2699^நவங் அதி⁴ட்ட²ஹித்வாவ, வத்தப்³ப³ங் வசஸா புன;
“இமினாந்தரவாஸேன, கதி²னங் அத்த²ராமி”தி.

2700^வத்தே திக்க²த்துமிச்சேவங், கதி²னங் ஹோதி அத்த²தங்;
ஸங்க⁴ங் பனுபஸங்கம்ம, ஆதா³ய கதி²னங் இதி.

2701[“]அத்த²தங் கதி²னங் ப⁴ந்தே, ஸங்க⁴ஸ்ஸ அனுமோத³த²;
த⁴ம்மிகோ கதி²னத்தா²ரோ”, வத்தப்³ப³ங் தேன பி⁴க்கு²னா.

2702[“]ஸுஅத்த²தங் தயா ப⁴ந்தே, ஸங்க⁴ஸ்ஸ கதி²னங் புன;
த⁴ம்மிகோ கதி²னத்தா²ரோ, அனுமோதா³மி”தீரயே.

2703^கதி²னஸ்ஸ ச கிங் மூலங், கிங் வத்து² கா ச பூ⁴மியோ;
கதித⁴ம்மவிதோ³ பி⁴க்கு², கதி²னத்தா²ரமரஹதி.

2704^{மூ}லமேகங், ஸியா வத்து², திவித⁴ங், பூ⁴மியோ ச² ச;
அட்ட²த⁴ம்மவிதோ³ பி⁴க்கு², கதி²னத்தா²ரமரஹதி.

2705^ஸங்கோ⁴ மூலந்தி நித்³தி³ட்ட²ங், வத்து² ஹோதி திசீவரங்;
கோ²மா^{தீ}னி ச² வுத்தானி, சீவரானி ச² பூ⁴மியோ.

2706^{பு}ப்³ப³பச்சுத்³த⁴ராதி⁴ட்டா²-நத்தா²ரோ மாதிகாபி ச;
பலிபோ³தோ⁴ ச உத்³தா⁴ரோ, ஆனிஸங்ஸா பனட்டி²மே.

- 2707 தோ⁴வனஞ்ச விசாரோ ச, சே²த³னங் ப³ந்த⁴னம்பி ச;
ஸிப்³ப³னங் ரஜனங் கப்பங், “புப்³ப³கிச்ச”ந்தி வுச்சதி.
- 2708 ஸங்கா⁴டி உத்தராஸங்கோ³, அதோ² அந்தரவாஸகோ;
பச்சுத்³தா⁴ரோ அதி⁴ட்டா²னங், அத்தா²ரோபேஸமேவ து.
- 2709 பக்கமனஞ்ச நிட்டா²னங், ஸன்னிட்டா²னஞ்ச நாஸனங்;
ஸவனாஸா ச ஸீமா ச, ஸஹுப்³பா⁴ரோதி அட்டி²மா.
- 2710 கதசீவரமாதா³ய, ஆவாஸே நிரபெக்க²கோ;
அதிக்கந்தாய ஸீமாய, ஹோதி பக்கமனந்திகா.
- 2711 ஆனிஸங்ஸமதா²தா³ய, விஹாரே அனபெக்க²கோ;
க³ந்த்வா பன விஹாரங் ஸோ, அஞ்ஞங் ஸுக²விஹாரிகங்.
- 2712 தத்த² தங் விஹரந்தோவ, கரோதி யதி³ சீவரங்;
நிட்டி²தே சீவரே தஸ்மிங், நிட்டா²னந்தாதி வுச்சதி.
- 2713 “சீவரங் ந கரிஸ்ஸாமி, ந பச்செஸ்ஸங் தமஸ்ஸமங்”;
ஏவங் து து⁴ரனிக்கே²பே, ஸன்னிட்டா²னந்திகா மதா.
- 2714 கதி²னச்சா²த³னங் லத்³தா⁴, “ந பச்செஸ்ஸ”ந்தி சே க³தோ;
கரொந்தஸ்ஸேவ நட்ட²ங் வா, த³ட்³ட⁴ங் வா நாஸனந்திகா.
- 2715 லத்³தா⁴னிஸங்ஸோ ஸாபெக்கோ², ப³ஹிஸீமங் க³தோ பன;
ஸுணாதி சந்தருப்³பா⁴ரங், ஸா ஹோதி ஸவனந்திகா.
- 2716 சீவராஸாய பக்கந்தோ, ப³ஹிஸீமங் க³தோ பன;
“த³ஸ்ஸாமி சீவரங் துய்ஹங்”, வுத்தோ ஸவதி கேனசி.
- 2717 புன வுத்தே “ந ஸக்கோமி, தா³துந்தி தவ சீவரங்”;
ஆஸாய சி²ன்னமத்தாய, ஆஸாவச்சே²தி³கா மதா.
- 2718 வஸ்ஸங்வுட்ட²விஹாரம்ஹா , விஹாரஞ்ஞங் க³தோ ஸியா;
ஆக³ச்ச²ங் அந்தராமக்³கே³, தது³த்³தா⁴ரமதிக்கமே.
- 2719 தஸ்ஸ ஸோ கதி²னுத்³தா⁴ரோ, ஸீமாதிக்கந்திகோ மதோ;
கதி²னானிஸங்ஸமாதா³ய, ஸாபெக்கோ²வ ஸசே க³தோ.

2720 ஸம்பு⁴ணாதி புனாக³ந்த்வா, கதி²னுத்³தா⁴ரமேவ சே;
தஸ்ஸ ஸோ கதி²னுத்³தா⁴ரோ, “ஸஹு³பா⁴ரோ”தி வுச்சதி.

2721 பக்கமனஞ்ச நிட்டா²னங், ஸன்னிட்டா²னஞ்ச ஸீமதோ;
சத்தாரோ புக்³கலாதீ⁴னா, ஸங்கா⁴தீ⁴னந்தருப்³ப⁴ரோ.

2722 நாஸனங் ஸவனஞ்சேவ, ஆஸாவச்சே²தி³காபி ச;
தயோபி கதி²னுப்³பா⁴ரா, ந து ஸங்கா⁴, ந பி⁴க்கு²தோ.

2723 ஆவாஸபலிபோ³தோ⁴ ச, பலிபோ³தோ⁴ ச சீவரே;
பலிபோ³தா⁴ து³வே வுத்தா, யுத்தமுத்தத்த²வாதி³னா.

2724 அட்ட²ன்னங் மாதிகானங் வா, அந்தருப்³பா⁴ரதோபி வா;
உப்³பா⁴ராபி து³வே வுத்தா, கதி²னஸ்ஸ மஹேஸினா.

2725 அனாமந்தாஸமாதா³னங், க³ணதோ யாவத³த்தி²கங்;
தத்த² யோ சீவருப்பாதோ³, ஆனிஸங்ஸா ச பஞ்சிமே.

கதி²னக்க²ந்த⁴ககதா².

சீவரக்க²ந்த⁴ககதா²

2726 சீவரஸ்ஸ பனுப்பாதா³, அட்ட² சீவரமாதிகா;
ஸீமாய தே³தி, கதிகா, பி⁴க்கா²பஞ்ஞத்தியா, ததா².

2727 ஸங்க⁴ஸ்ஸ, உப⁴தோஸங்கே⁴, வஸ்ஸங்வுட்ட²ஸ்ஸ தே³தி ச;
ஆதி³ஸ்ஸ, புக்³கலஸ்ஸாதி, அட்டி²மா பன மாதிகா.

2728 தத்த² ஸீமாய தே³தீதி, அந்தோஸீமங் க³தேஹி து;
பி⁴க்க²ஹி பா⁴ஜேதப்³ப³ந்தி, வண்ணிதங் வரவண்ணினா.

2729 கதிகாய ச தி³ன்னங் யே, விஹாரா ஏகலாப⁴கா;
எத்த² தி³ன்னஞ்ச ஸப்³பேஹி, பா⁴ஜேதப்³ப³ந்தி வுச்சதி.

2730 ஸங்க⁴ஸ்ஸ து⁴வகாரா ஹி, யத்த² கரீயந்தி தத்த² ச;
பி⁴க்கா²பஞ்ஞத்தியா தி³ன்னங், தி³ன்னங் வுத்தங் மஹேஸினா.

2731 ஸங்க⁴ஸ்ஸ பன யங் தி³ன்னங், உஜுபு⁴தேன சேதஸா;
தஞ்ஹி ஸம்முகி²பு⁴தேன, பா⁴ஜேதப்³ப³ந்தி வுச்சதி.

2732 உப⁴தோஸங்க⁴ முத்³தி³ஸ்ஸ, தே³தி ஸத்³தா⁴ய சீவரங்;
தோ²கா வா ப³ஹு வா பி⁴க்², ஸமபா⁴கோ³வ வட்டதி.

2733 வஸ்ஸங்வுட்ட²ஸ்ஸ ஸங்க⁴ஸ்ஸ, சீவரங் தே³தி யங் பன;
தங் தஸ்மிங் வுட்ட²வஸ்ஸேன, பா⁴ஜேதப்³ப³ந்தி வண்ணிதங்.

2734 யாகு³யா பன ப⁴த்தே வா, தே³திஆதி³ஸ்ஸ சே பன;
சீவரங் தத்த² தத்தே²வ, யோஜேதப்³ப³ங் விஜானதா.

2735 புக³க³லங் பன உத்³தி³ஸ்ஸ, சீவரங் யங் து தீ³யதி;
புக³க³லோதி³ஸ்ஸகங் நாம, தா³னங் தங் து பவுச்சதி.

2736 ஸஹத⁴ம்மிகேஸு யோ கோசி, பஞ்சஸ்வபி “மமச்சயே;
அயங் மய்ஹங் பரிக்கா²ரோ, மாதுயா பிதுனோபி வா.

2737 உபஜ்ஜா²யஸ்ஸ வா ஹோது”, வத்³திச்சேவமேவ சே;
ந ஹோதி பன தங் தேஸங், ஸங்க⁴ஸ்ஸேவ ச ஸந்தகங்.

2738 பஞ்சன்னங் அச்சயே தா³னங், ந ச ரூஹதி கிஞ்சிபி;
ஸங்க⁴ஸ்ஸேவ ச தங் ஹோதி, கி³ஹீனங் பன ரூஹதி.

2739 பி⁴க்கு² வா ஸாமணேரோ வா, காலங் பி⁴க்கு²னுபஸ்ஸயே;
கரொத்யஸ்ஸ பரிக்கா²ரா, பி⁴க்²னங்யேவ ஸந்தகா.

2740 பி⁴க்கு²னீ ஸாமணேரீ வா, விஹாரஸ்மிங் ஸசே மதா;
ஹோந்தி தஸ்ஸா பரிக்கா²ரா, பி⁴க்கு²னீனங் து ஸந்தகா.

2741 “தே³ஹி நெத்வாஸுகஸ்ஸா”தி, தி³ன்னங் தங் புரிமஸ்ஸ து;
“இத³ங் த³ம்மீ”தி தி³ன்னங் தங், பச்சி²மஸ்ஸேவ ஸந்தகங்.

2742 ஏவங் தி³ன்னவிதி⁴ங் ஞத்வா, மதஸ்ஸ வாமதஸ்ஸ வா;
விஸ்ஸாஸங் வாபி க³ண்ஹெய்ய, க³ண்ஹே மதகசீவரங்.

2743 மூலபத்தப²லக்க²ந்த⁴-தசபுப்ப²ப்பபே⁴த³தோ;
ச²ப்³பி³த⁴ங் ரஜனங் வுத்தங், வந்ததோ³ஸேன தாதி³னா.

2744 மூலே ஹலித்³தி³ங், க²ந்தே⁴ஸு, மஞ்ஜெட்ட²ங் துங்க³ஹாரகங்;
பத்தேஸு அல்லியா பத்தங், ததா² பத்தஞ்ச நீலியா.

2745 குஸும்ப⁴ங் கிங்ஸுகங் புப்பே², தசே லொத்³த³ஞ்ச கண்டு³லங்;
ட²பெத்வா ரஜனங் ஸப்³புங், ப²லங் ஸப்³பும்பி வட்டதி.

2746 கிலிட்ட²ஸாடகங் வாபி, து³ப்³புண்ணங் வாபி சீவரங்;
அல்லியா பன பத்தேன, தோ⁴விதுங் பன வட்டதி.

2747 சீவரானங் கதா² ஸேஸா, பட²மே கதி²னே பன;
தத்த² வுத்தனயேனேவ, வேதி³தப்³பா³ விபா⁴வினா.

சீவரக்க²ந்த⁴ககதா².

மஹாவக்³கோ³ நிட்டி²தோ.

சூளவக்³கோ³

பாரிவாஸிகக்²ந்த⁴ககதா²

- 2748 தஜ்ஜனீயங் நியஸ்ஸஞ்ச, பப்³பா³ஜங் படிஸாரணங்;
திவிது⁴க்கே²பனஞ்சாதி, ஸத்த கம்மானி தீ³பயே.
- 2749 தேசத்தாலீஸ வத்தானி, க²ந்த⁴கே கம்மஸஞ்ஞிதே;
நவாதி⁴கானி திங்ஸேவ, க²ந்த⁴கே தத³னந்தரே.
- 2750 ஏவங் ஸப்³பா³னி வத்தானி, த்³வாஸீதேவ மஹேஸினா;
ஹொந்தி க²ந்த⁴கவத்தானி, க³ஹிதாக³ஹணேன து.
- 2751 பாரிவாஸஞ்ச வத்தஞ்ச, ஸமாதி³ன்னஸ்ஸ பி⁴க்கு²னோ;
ரத்திச்சே²தோ³ கத²ங் வத்தோ, வத்தபே⁴தோ³ கத²ங் ப⁴வே?
- 2752 ஸஹவாஸோ வினாவாஸோ, அனாரோசனமேவ ச;
பாரிவாஸிகபி⁴க்கு²ஸ்ஸ, ரத்திச்சே²தோ³ ச து³க்கடங்.
- 2753 ஏகச்ச²ன்னே பனாவாஸே, பகதத்தேன பி⁴க்கு²னா;
நிவாஸோ த³கபாதேன, உக்கி²த்தஸ்ஸ நிவாரிதோ.
- 2754 பாரிவாஸிகபி⁴க்கு²ஸ்ஸ, அந்தோயேவ ந லப்³ப⁴தி;
இச்சேவங் பன நித்³தி³ட்ட²ங், மஹாபச்சரியங் பன.
- 2755 “அவிஸேஸேன நித்³தி³ட்ட²ங், மஹாஅட்ட²கதா²தி³ஸு;
உபி⁴ன்னங் த³கபாதேன, நிவாஸோ வாரிதோ”தி ஹி.
- 2756 அபி⁴க்கு²கே பனாவாஸே, அனாவாஸேபி கத்த²சி;
விப்பவாஸங் வஸந்தஸ்ஸ, ரத்திச்சே²தோ³ ச து³க்கடங்.
- 2757 பாரிவாஸிகபி⁴க்கு²ஸ்ஸ, பி⁴க்கு²ங் தி³ஸ்வான தங்க²ணே;
நாரோசெந்தஸ்ஸ சேதஸ்ஸ, ரத்திச்சே²தோ³ ச து³க்கடங்.
- 2758 பஞ்சேவ ச யதா²வுட்³ட⁴ங், லப⁴தே பாரிவாஸிகோ;
காதுங் தத்தே²வ ச ட²த்வா, உபோஸத²பவாரணங்.
- 2759 வஸ்ஸஸாடிங் யதா²வுட்³ட⁴ங், தெ³ந்தி சே ஸங்க⁴தா³யகா;

ஒணோஜனங் ததா² ப⁴த்தங், லப⁴தே பஞ்சிமே பன.

பாரிவாஸிகக்க²ந்த⁴ககதா².

ஸமத²க்க²ந்த⁴ககதா²

2760 விவாதா³தா⁴ரதா சானு-வாதா³தி⁴கரணம்பி ச;
ஆபத்தாதா⁴ரதா சேவ, கிச்சாதி⁴கரணம்பி ச.

2761 ஏதானி பன சத்தாரி, வுத்தானி ச மஹேஸினா;
பே⁴த³காரசவத்தா²னி, விவாதோ³ தத்த² நிஸ்ஸிதோ.

2762 விபத்தியோ சதஸ்ஸோவ, அனுவாதோ³ உபாக³தோ;
ஆபத்தாதா⁴ரதா நாம, ஸத்த ஆபத்தியோ மதா.

2763 ஸங்க⁴கிச்சானி நிஸ்ஸாய, கிச்சாதி⁴கரணங் ஸியா;
ஏதேஸங் து சதுன்னம்பி, ஸமத்தா ஸமதா² மதா.

2764 ஸம்முகா² ஸதி சாமுள்ளோ, படிஞ்ஞாவினயோபி ச;
தஸ்ஸபாபியஸீ சேவ, ததா² யேபு⁴ய்யஸீபி ச.

2765 திணவத்தா²ரகோ சேவ, ஸத்தமோ வினயோ மதோ;
ஸத்திமே ஸமதா² வுத்தா, பு³த³தே⁴னாதி³ச்சப³ந்து⁴னா.

2766 விவாதோ³ ஸம்மதி த்³வீஹி, அனுவாதோ³ சதூஹி ச;
ஆபத்தி பன தீஹேவ, கிச்சமேகேன ஸம்மதி.

2767 ச²ட்டே²ன பட²மேனாபி, விவாதோ³ எத்த² ஸம்மதி;
ஸம்முகா²வினயாதீ³ஹி, அனுபு³பே³ன தீஹிபி.

2768 ததே²வ பஞ்சமேனாபி, அனுவாதோ³ ஹி ஸம்மதி;
ஸம்முகே²ன படிஞ்ஞாய, திணவத்தா²ரகேன ச.

2769 ஆபத்துபஸமங் யாதி, தீஹேவ ஸமதே²ஹி ஸா;
ஸம்முகா²வினயேனேவ, கிச்சமேகேன ஸம்மதி.

2770 யேபு⁴ய்யஸிககம்மே து, ஸலாகங் கா³ஹயே பு³தோ⁴;
கூ³ள்ளோன விவடேனாபி, கண்ணஜப்பேன வா பன.

- 2771 அலஜ்ஜுஸ்ஸதே³ கூ³ள்ஹேன, விவடேனேவ லஜ்ஜிஸு;
பா³லேஸு கண்ணஜப்பேன, ஸலாகங் கா³ஹயே பு³தோ⁴.
- 2772 லஜ்ஜீ அலஜ்ஜீ பா³லோதி, கேன ஸக்கா விஜானிதுங்?
ஸகேன கம்முனாயேவ, தேன ஸக்கா விஜானிதுங்.
- 2773 ஆபஜ்ஜதி ச ஸஞ்சிச்ச, ஆபத்திங் பரிகூ³ஹதி;
ச²ந்தா³தி³ அக³திங் யாதி, அலஜ்ஜீ ஏதி³ஸோ ஸியா.
- 2774 நாபஜ்ஜதி ச ஸஞ்சிச்ச, ஆபத்திங் ந ச கூ³ஹதி;
ந க³ச்ச²திக³திஞ்சாபி, ஏதி³ஸோ லஜ்ஜி புக்³க³லோ.
- 2775 து³ச்சிந்திதோ ச து³ப்பா⁴ஸீ, ததா² து³க்கடகாரிகோ;
ஏதி³ஸோ பன “பா³லோ”தி, லக்க²ணேனேவ ஞாயதி.
- 2776 திதா⁴ ஸலாககா³ஹேன, ப³ஹுகா த⁴ம்மவாதி³னோ;
யேபு⁴ய்யஸிககம்மேன, கத்தப்³ப³ந்தி ஜினொப்³ரவி.
- 2777 அலஜ்ஜீ ஸானுவாதோ³ ச, அஸுசீ கம்மதோ ச யோ;
தஸ்ஸபாபியஸீகம்ம-யொக்³கோ³ ஸோ ஹோதி புக்³க³லோ.
- 2778 ப⁴ண்ட³னே கலஹே ஜாதே, விவாத³ஸ்மிங் அனப்பகே;
ப³ஹு அஸ்ஸாமணே சிண்ணே, அனக்³கே³பி ச ப⁴ஸ்ஸகே.
- 2779 மூலமூலங் க³வேஸந்தங், ஹோதி வாளஞ்ச கக்க²ளங்;
திணவத்தா²ரகேனேவ, காதப்³ப³ந்தி பகாஸிதங்.
- 2780 யதா² ச திணபண்ணேன, ச²ன்னங் கூ³த²ஞ்ச முத்தகங்;
ந ச வாயதி து³க்³க³ந்த⁴ங், வுபஸம்மதி தங்க²ணே.
- 2781 ட²பெத்வா து²ல்லவஜ்ஜஞ்ச, கி³ஹீஹி படிஸங்யுதங்;
தி³ட்டா²விகம்மிகஞ்சேவ, யோ ச தத்த² ந ஹோதி தங்.
- 2782 ஸேஸாயாபத்தியா யாவ, உபஸம்பத³மாளதோ;
ஸுத்³தோ⁴ ஹோதி நிராபத்தி, திணவத்தா²ரகே ததா².

ஸமத²க்க²ந்த⁴ககதா².

கு²த்³த³கவத்து²க்க²ந்த⁴ககதா²

- 2783 ருக்கே² வா பன குட்டேவா, அட்டானே த²ம்ப⁴கேஸு வா;
ந்ஹாயமானோ ஸகங் காயங், உக்³க⁴ங்ஸெய்யஸ்ஸ து³க்கடங்.
- 2784 காயங் க³ந்த⁴ப³ஹத்தே²ன, குருவிந்த³கஸுத்தியா;
மல்லகேன ந க⁴ங்ஸெய்ய, நாஞ்ஞமஞ்ஞஞ்ச காயதோ.
- 2785 அகதங் மல்லகங் நாம, கி³லானஸ்ஸேவ வட்டதி;
கதங் தங் மல்லகங் நாம, ஸப்³பே³ஸம்பி ந வட்டதி.
- 2786 கபாலிட்ட²கக²ண்டா³னி, ஸப்³ப³ஸ்ஸ புது²பாணிகங்;
கி³லானஸ்ஸாகி³லானஸ்ஸ, வத்த²வட்டி ச வட்டதி.
- 2787 வுத்தா பே²ணகபாஸாண-கத²லா பாத³க⁴ங்ஸனே;
வட்டங் வா சதுரஸ்ஸங் வா, கதகங் ந ச வட்டதி.
- 2788 யங் கிஞ்சிபி அலங்காரங், தா⁴ரெந்தஸ்ஸபி து³க்கடங்;
ஹோதி அந்தமஸோ தால-பண்ணமத்தம்பி பி⁴க்கு²னோ.
- 2789 ஓஸண்ஹெய்ய ஸகே கேஸே, யோ ஹத்த²ப²ணகேன வா;
ப²ணகேனபி கொச்சே²ன, து³க்கடங் தஸ்ஸ நித்³தி³ஸே.
- 2790 ஸித்த²தேலோத³தேலேஹி , மண்ட³னத்த²ங் ந வட்டதி;
அனுலோமனிபாதத்த²ங், உத்³த⁴ங்லோமேன பி⁴க்கு²னா.
- 2791 ஹத்த²ங் தேலேன தேமெத்வா, புஞ்சி²தப்³பா³ ஸிரோருஹா;
வட்டதுண்ஹாபி⁴தத்தஸ்ஸ, அல்லஹத்தே²ன புஞ்சி²துங்.
- 2792 ஆதா³ஸே உத³பத்தே வா, யத்த² கத்த²சி அத்தனோ;
முக²பி³ம்ப³ங் வினா ஹேதுங், ஓலோகெந்தஸ்ஸ து³க்கடங்.
- 2793 “ஸஞ்ச²விங் து முக²ங், நோ”தி, த³ட்டு²மாபா³த⁴பச்சயா;
“ஜிண்ணோ நோ”தாயுஸங்கா²ர-ஜானந்தத்த²ஞ்ச வட்டதி.
- 2794 நச்சங் வா பன கீதங் வா, வாதி³தங் வாபி பி⁴க்கு²னோ;
த³ட்டு²ங் வா பன ஸோதுங் வா, கச்ச²தோ ஹோதி து³க்கடங்.
- 2795 த³ட்டு²மந்தமஸோ மோர-நச்சம்பி ச ந வட்டதி;
ஸோதுமந்தமஸோ த³ந்த-கீதம்பி ச ந வட்டதி.

- 2796 நச்சந்தஸ்ஸ ஸயங் வாபி, நச்சாபெந்தஸ்ஸ து³க்கடங்;
அனாபத்தந்தராராமே, ட²த்வா ஸுணாதி பஸ்ஸதி.
- 2797 “பஸ்ஸிஸ்ஸாமீ”தி நச்சங் வா, கீ³தங் வா பன வாதி³தங்;
விஹாரதோ விஹாரங் வா, க³ச்ச²தோ ஹோதி து³க்கடங்.
- 2798 ஆபத்தந்தோவிஹாரேபி, உட்ட²ஹித்வான க³ச்ச²தோ;
ட²த்வா கீ³வங் பஸாரெத்வா, பஸ்ஸதோபி ச வீதி²யங்.
- 2799 கேஸா தீ³கா⁴ ந தா⁴ரெய்யா, யோ தா⁴ரெய்யஸ்ஸ து³க்கடங்;
த்³வங்கு³லங் வா து³மாஸங் வா, ததோ உத்³த⁴ங் ந வட்டதி.
- 2800 நகே² நாஸிகலோமானி, தீ³கா⁴னி ந து தா⁴ரயே;
ந ச வீஸதிமட்ட²ங் வா, காதுங் வட்டதி பி⁴க்கு²னோ.
- 2801 கப்பாபெய்ய விஸுங் மஸ்ஸுங், தா³டி²கங் வா ட²பெய்ய யோ;
ஸங்ஹராபெய்ய வா லோமங், ஸம்பா³தே⁴ தஸ்ஸ து³க்கடங்.
- 2802 சி²ந்த³தோ து³க்கடங் வுத்தங், கேஸே கத்தரிகாய வா;
அகி³லானஸ்ஸ அஞ்ஞேன, சி²ந்தா³பெந்தஸ்ஸ வா ததா².
- 2803 சி²ந்த³தோ அத்தனோ அங்க³-ஜாதங் து²ல்லச்சயங் ஸியா;
ஸேஸங்க³சே²த³னே அத்த-வதே⁴ ஆபத்தி து³க்கடங்.
- 2804 அஹிகீடாதி³த³ட்ட²ஸ்ஸ, தாதி³ஸாபா³த⁴பச்சயா;
ந தோ³ஸோ சி²ந்த³தோ அங்க³ங், மோசெந்தஸ்ஸ ச லோஹிதங்.
- 2805 அபரிஸ்ஸாவனோ மக்³கங், ஸசே க³ச்ச²தி து³க்கடங்;
யாசமானஸ்ஸ வா மக்³கே³, ததே²வாத³த³தோபி தங்.
- 2806 ந பு⁴ஞ்ஜே ந பிவே நக்³கோ³, ந கா²தே³ ந ச ஸாயயே;
ந த³தே³ ந ச க³ண்ஹெய்ய, ந க³ச்செ²ய்யபி அஞ்ஜஸங்.
- 2807 வந்தி³தப்³பங் ந நக்³கே³ன, வந்தா³பேதப்³பமேவ வா;
பரிகம்மங் ந காதப்³பங், ந நக்³கே³ன ச காரயே.
- 2808 பரிகம்மே படிச்சா²தீ³, திஸ்ஸோ ஜந்தாக⁴ராதி³கா;
வுத்தா, வத்த²படிச்சா²தீ³, ஸப்³புத்த² பன வட்டதி.

- 2809 யத்த² கத்த²சி பேளாயங், பு⁴ஞ்ஜிதுங் ந ச வட்டதி;
ஏகதோ பு⁴ஞ்ஜதோ ஹோதி, து³க்கடங் ஏகபா⁴ஜனே.
- 2810 ஏகபாவுரணா ஏக-த்த²ரணா வா நிபஜ்ஜரே;
ஏகமஞ்சேபி வா தேஸங், ஹோதி ஆபத்தி து³க்கடங்.
- 2811 ந நிஸீதெ³ய்ய ஸங்கா⁴டி-பல்லத்தி²கமுபாக³தோ;
கிஞ்சி கீளங் ந கீளெய்ய, பலிதங் ந ச கா³ஹயே.
- 2812 பு⁴முகாய நலாடே வா, தா³டி²காயபி உக்³தங்;
தாதி³ஸங் பலிதங் சஞ்ஞங், கா³ஹாபேதும்பி வட்டதி.
- 2813 அகி³லானோ ஸசே பி⁴க்கு², ச²த்தங் தா⁴ரெய்ய து³க்கடங்;
அத்தனோ சீவராதி³னங், கு³த்தத்த²ங் பன வட்டதி.
- 2814 ஹத்தி²ஸொண்ட³ங் சதுக்கண்ணங், வஸனங் மச்ச²வாளகங்;
வேல்லியங் தாலவண்டஞ்ச, நிவாஸெந்தஸ்ஸ து³க்கடங்.
- 2815 க³ஹிபாருபனங் வாபி, பாருபந்தஸ்ஸ து³க்கடங்;
நிவாஸனே பாருபனே, பரிமண்ட³லதா மதா.
- 2816 லோகாயதங் ந வாசெய்ய, ந ச தங் பரியாபுணே;
ந திரச்சா²னவிஜ்ஜா வா, வாசேதப்³பா³வ பி⁴க்கு²னா.
- 2817 ந ச வட்டதி தா⁴ரேதுங், ஸப்³பா³ சாமரிபீ³ஜனீ;
ந சாலிம்பெய்ய தா³யங் வா, ந ச லஞ்ஜே முக²ம்பி ச.
- 2818 ந வஹே உப⁴தோகாஜங், வட்டதந்தரகாஜகங்;
ஸீஸக்க²ந்த⁴கடோலம்ப³-பா⁴ரே தோ³ஸோ ந விஜ்ஜதி.
- 2819 அட்ட²ங்கு³லாதி³கங் பி⁴க்கு², பச்சி²மங் சதுரங்கு³லா;
கா²த³தோ த³ந்தகட்ட²ஞ்ச, ஹோதி ஆபத்தி து³க்கடங்.
- 2820 ருக்க²ங் நேவாபி⁴ருஹெய்ய, கிச்சே ஸதிபி போரிஸங்;
ஆபதா³ஸு யதா²காமங், வட்டதேவாபி⁴ருஹிதுங்.
- 2821 லஸுணங் ந ச கா²தெ³ய்ய, ஸசே நாகல்லகோ ஸியா;
நாரோபேதப்³புகங் பு³த்³த⁴-வசனங் அஞ்ஞதா² பன.

2822 கி²பிதேன ச வத்தப்³ப³ங், “ஜீவா”தி, கி³ஹினா புன;
“ஜீவதா²”தி ச வுத்தேன, “சிரங் ஜீவா”தி வட்டதி.

2823 ஸாமணேரங் க³ஹட்ட²ங் வா, ஆகோடெந்தஸ்ஸ து³க்கடங்;
ஸயனே புப்²ஸங்கிண்ணே, ந வட்டதி நிபஜ்ஜிதுங்.

2824 கு²ரப⁴ண்ட³ங் ந க³ண்ஹெய்ய, ஸசே ந்ஹாபிதபுப்³ப³கோ;
ந ச தா⁴ரணியா உண்ஹீ, ஸப்³பா³ பா³ஹிரலோமிகா.

2825 அங்க³ராக³ங் கரொந்தஸ்ஸ, து³க்கடங் ஸமுதீ³ரிதங்;
அகாயப³ந்த⁴னஸ்ஸாபி, கா³மங் பவிஸதோபி ச.

2826 லோஹஜங் தா³ருஜங் ஸப்³ப³ங், கப்பியங் மத்திகாமயங்;
வினா ஸத்த²ஞ்ச பத்தஞ்ச, கதகங் கும்ப⁴காரிகங்.

கு²த³த³கவத்து²க்க²ந்த⁴ககதா².

ஸேனாஸனக்க²ந்த⁴ககதா²

2827 ஆஸந்தி³கோ அதிகந்த-பமாணோபி ச வட்டதி;
ததா² பஞ்சங்க³பீட²ம்பி, ஸத்தங்க³ம்பி ச வட்டதி.

2828 தூலோனத்த³தா⁴ க⁴ரேயேவ, மஞ்சபீடா² நிஸீதி³துங்;
ஸீஸபாதூ³பதா⁴னஞ்ச, அகி³லானஸ்ஸ வட்டதி.

2829 ஸந்த²ரிதவா கி³லானஸ்ஸ, உபதா⁴னானி தத்த² ச;
பச்சத்த²ரணகங் த³த்வா, நிபஜ்ஜந்தஸ்ஸ வட்டதி.

2830 திரியங் முட்டி²ரதனங், ஹோதி பி³ம்போ³ஹனங் மிதங்;
தீ³க⁴தோ ச தி³யட்³ட⁴ங் வா, த்³விஹத்த²ந்தி குருந்தி³யங்.

2831 பூரிதா சோளபண்ணுண்ண-திணவாகேஹி பஞ்சஹி;
பி⁴ஸியோ பா⁴ஸிதா பஞ்ச, தூலானங் க³ணனாவஸா.

2832 பி⁴ஸிதூலானி பஞ்சேவ, ததா² தூலானி தீணிபி;
லோமானி மிக³பக்கீ²னங், க³ப்³பா⁴ பி³ம்போ³ஹனஸ்ஸிமே.

2833 மனுஸ்ஸலோமங் லோமேஸு, புப்பே²ஸு ப³குலாதி³கங்;
ஸுத்³த⁴ங் தமாலபத்தஞ்ச, பண்ணேஸு ந ச வட்டதி.

- 2834 உண்ணாதி³கங் பஞ்சவித⁴ஞ்ச தூலங்;
மஹேஸினா யங் பி⁴ஸியங் பவுத்தங்;
மஸூரகே தங் பன வட்டதீதி;
குருந்தி³யங் அட்ட²கதா²ய வுத்தங்.
- 2835 யதே³தங் திவித⁴ங் தூலங், பி⁴ஸியங் தங் அகப்பியங்;
மிஸ்ஸங் தமாலபத்தங் து, ஸப்³புத்த² பன வட்டதி.
- 2836 ரூபங் து புரிஸித்தீ²னங், திரச்சா²னக³தஸ்ஸ வா;
காரெந்தஸ்ஸ கரோதோ வா, ஹோதி ஆபத்தி து³க்கடங்.
- 2837 ஜாதகங் பன வத்து²ங் வா, காராபேதுங் பரேஹி வா;
மாலாகம்மங் லதாகம்மங், ஸயங் காதும்பி வட்டதி.
- 2838 ஸமானாஸனிகோ நாம, த்³வீஹி வஸ்ஸேஹி யோ பன;
வுட்³டோ⁴ வா த்³ஹரோ வாபி, வஸ்ஸேனேகேன வா பன.
- 2839 ஸமானவஸ்ஸே வத்தப்³புங், கிஞ்ச நாமித⁴ விஜ்ஜதி;
ஸத்தவஸ்ஸதிவஸ்ஸேஹி, பஞ்சவஸ்ஸோ நிஸீத³தி.
- 2840 ஹெட்டா² தீ³கா⁴ஸனங் திண்ணங், யங் பஹோதி நிஸீதி³துங்;
ஏகமஞ்சேபி பீடே² வா, த்³வே நிஸீத³ந்தி வட்டதி.
- 2841 உப⁴தொப்³யஞ்ஜனங் இத்தி²ங், ட²பெத்வா பண்ட³கங் பன;
தீ³கா⁴ஸனே அனுஞ்ஞாதங், ஸப்³பே³ஹிபி நிஸீதி³துங்.
- 2842 புரிமிகோ பச்சி²மிகோ, ததே²வந்தரமுத்தகோ;
தயோ ஸேனாஸனக்³கா³ஹா, ஸம்பு³த்³தே⁴ன பகாஸிதா.
- 2843 புப்³பா³ருணா பாடிபத³ஸ்ஸ யாவ;
புனாருணோ பி⁴ஜ்ஜதி நேவ தாவ;
இத³ஞ்ஹி ஸேனாஸனகா³ஹகஸ்ஸ;
கெ²த்தந்தி வஸ்ஸூபக³மே வத³ந்தி.
- 2844 பாதோவ கா³ஹிதே அஞ்ஞோ, பி⁴க்கு² ஸேனாஸனே பன;
ஸசே யாசதி ஆக³ந்த்வா, வத்தப்³போ³ கா³ஹிதந்தி ஸோ.
- 2845 ஸங்கி⁴கங் அபலோகெத்வா, க³ஹிதங் வஸ்ஸவாஸிகங்;

அந்தோவஸ்ஸேபி விப்³ப⁴ந்தோ, லப⁴தே தத்ரஜங் ஸசே.

2846 வுட்ட²வஸ்ஸோ ஸசே பி⁴க்கு², கிஞ்சி ஆவாஸிஹத்த²தோ;
க³ஹேத்வா கப்பியங் ப⁴ண்ட³ங், த³த்வா தஸ்ஸத்தனோ பன.

2847 “அஸுகஸ்மிங் குலே மய்ஹங், வஸ்ஸாவாஸிகசீவரங்;
கா³ஹிதங் க³ண்ணஹ”இச்சேவங், வத்வா க³ச்ச²தி ஸோ தி³ஸங்.

2848 உப்பப்³ப³ஜதி சே தத்த², க³தட்டா²னே, ந லப்³ப⁴தி;
க³ஹேதுங் தஸ்ஸ ஸம்பத்தங், ஸங்கி⁴கங்யேவ தங் ஸியா.

2849 மனுஸ்ஸே ஸம்முகா² தத்த², படிச்சா²பேதி சே பன;
ஸப்³ப³ங் லப⁴தி ஸம்பத்தங், வஸ்ஸாவாஸிகசீவரங்.

2850 ஆராமோ ச விஹாரோ ச, வத்தூ²னி து³வித⁴ஸ்ஸபி;
பி⁴ஸி பி³ம்போ³ஹனங் மஞ்ச-பீட²ந்தி ததியங் பன.

2851 லோஹகும்பீ⁴ கடாஹஞ்ச, பா⁴ணகோ லோஹவாரகோ;
வாஸி ப²ரஸு குத்³தா³லோ, குடா²ரீ ச நிகா²த³னங்.

2852 வல்லி வேரு திணங் பண்ணங், முஞ்ஜபப்³ப³ஜமேவ ச;
மத்திகா தா³ருப⁴ண்ட³ஞ்ச, பஞ்சமங் து யதா²ஹ ச.

2853 “த்³வீஹி ஸங்க³ஹிதானி த்³வே, ததியங் சதுஸங்க³ஹங்;
சதுத்த²ங் நவகொட்டா²ஸங், பஞ்சமங் அட்ட²தா⁴ மதங்.

2854 இதி பஞ்சஹி ராஸீஹி, பஞ்சனிம்மலலோசனோ;
பஞ்சவீஸவித⁴ங் நாதோ², க³ருப⁴ண்ட³ங் பகாஸயி”.

2855 இத³ஞ்ஹி பன ஸங்க⁴ஸ்ஸ, ஸந்தகங் க³ருப⁴ண்ட³கங்;
விஸ்ஸஜ்ஜெந்தோ விபா⁴ஜெந்தோ, பி⁴க்கு² து²ல்லச்சயங் பு²ஸே.

2856 பி⁴க்கு²னா க³ருப⁴ண்ட³ங் து, ஸங்கே⁴ன ஹி க³ணேன வா;
விஸ்ஸஜ்ஜிதமவிஸ்ஸட்ட²ங், விப⁴த்தமவிபா⁴ஜிதங்.

2857 புரிமேஸு ஹி தீஸ்வெத்த², ந சத்தா²க³ருப⁴ண்ட³கங்;
லோஹகும்பீ⁴ கடாஹோ ச, லோஹபா⁴ணகமேவ ச.

2858.

திவித⁴ங் கு²த³த³கங் வாபி, க³ருப⁴ண்ட³கமேவித³ங்;
பாத³க³ண்ஹனகோ லோஹ-வாரகோ பா⁴ஜியோ மதோ.

2859 உத்³த⁴ங் பன ததோ லோஹ-வாரகோ க³ருப⁴ண்ட³கங்;
பி⁴ங்காராதீ³னி ஸப்³பா³னி, க³ருப⁴ண்ட³னி ஹொந்தி ஹி.

2860 பா⁴ஜேதப்³போ³ அயோபத்தோ;
தம்பா³யோதா²லகாபி ச;
தூ⁴மனெத்தாதி³கங் நேவ;
பா⁴ஜேதப்³பந்தி தீ³பிதங்.

2861 அத்தனா படித³த⁴ங் தங், லோஹப⁴ண்ட³ங் து கிஞ்சிபி;
ந புக்³லிகபோ⁴கேன, பு⁴ஞ்ஜிதப்³புஞ்ஹி பி⁴க்கு²னா.

2862 கங்ஸவட்டகலோஹானங், பா⁴ஜனானிபி ஸப்³பு³ஸோ;
ந புக்³லிகபோ⁴கேன, வட்டந்தி பரிபு⁴ஞ்ஜிதுங்.

2863 திபுப⁴ண்டே³பி ஏஸேவ, நயோ ஞெய்யோ விபா⁴வினா;
ந தோ³ஸோ ஸங்கி⁴கே அத்தி², கி³ஹீனங் ஸந்தகேஸு வா.

2864 கீ²ரபாஸாணஸம்பு⁴தங், க³ருகங் தட்டகாதி³கங்;
பாத³க³ண்ஹனதோ உத்³த⁴ங், க⁴டகோ க³ருப⁴ண்ட³கோ.

2865 ஸிங்கி³ஸஜ்ஜு²மயங் ஹார-கூடஜங் ப²லிகுப்³ப⁴வங்;
பா⁴ஜனானி ந வட்டந்தி, கி³ஹீனங் ஸந்தகானிபி.

2866 வாஸி பா⁴ஜனியா கு²த³தா³, க³ருப⁴ண்ட³ங் மஹத்தரீ;
ததா² ப²ரஸு வேஜ்ஜானங், ஸிராவேத⁴னகம்பி ச.

2867 குடா²ரி வாஸி குத்³தா³லோ, க³ருப⁴ண்ட³ங் நிகா²த³னங்;
ஸிக²ரம்பி ச தேனேவ, க³ஹிதந்தி பகாஸிதங்.

2868 சதுரஸ்ஸமுக²ங் தோ³ணி-முக²ங் வங்கம்பி தத்த² ச;
ஸத³ண்ட³ங் கு²த³த³கங் ஸப்³பு³ங், க³ருப⁴ண்ட³ங் நிகா²த³னங்.

2869 முட்டி²கமதி⁴கரணீ , ஸண்டா³ஸோ வா துலாதி³கங்;
கிஞ்சி ஸங்க⁴ஸ்ஸ தி³ன்னங் சே, தங் ஸப்³பு³ங் க³ருப⁴ண்ட³கங்.

2870.

நஹாபிதஸ்ஸ ச ஸண்டாஸோ, கத்தரீ ச மஹத்தரீ;
மஹாபிப்பலகங் துன்ன-காரானங் கருபுண்டகங்.

2871 வல்லி ஸங்குஸஸ தின்னா வா, தத்தஜாதாபி ரக்கிதா;
அட்டபாஹுப்பமாணாபி, கரு வெத்தலதாதிசா.

2872 ஸுத்தவாகாதினிப்பத்தா, ரஜ்ஜுகா யொத்தகானி வா;
ஸங்குஸஸ தின்னகாலே து, கச்சந்தி கருபுண்டதங்.

2873 நாளிகேரஸ்ஸ ஹீரே வா, வாகே வா பன கேனசி;
வட்டெத்வா ஹி கதா ஏக-வட்டாபி கருபுண்டகங்.

2874 வேளு ஸங்குஸஸ தின்னோ வா, ரக்கிதோ தத்தஜாதகோ;
அட்டங்குலாயதோ ஸுசி-தண்டமத்தோ கருங் ஸியா.

2875 சத்ததண்டஸலாகாயோ, தண்டோ கத்தரயட்டிபி;
பாதகண்ணஹனகா தேல-நாளீ பாஜனியா இமே.

2876 முஞ்ஜாதீஸுபி யங் கிஞ்சி, முட்டிமத்தங் கருங் ஸியா;
தாலபண்ணாதிமேகம்பி, தின்னங் வா தத்தஜாதகங்.

2877 அட்டங்குலப்பமானோபி, கருகங் ரித்தபொத்தகோ;
மத்திகா பகதீ வாபி, பஞ்சவண்ணா ஸுதாபி வா.

2878 ஸிலேஸாதீஸு வா கிஞ்சி, தின்னங் வா தத்தஜாதகங்;
தாலபக்கபமாணங் து, கருபுண்டந்தி தீபிதங்.

2879 வல்லிவேளாதிசங் கிஞ்சி, அரக்கிதமகோபிதங்;
கருபுண்டங் ந ஹோதேவ, கஹேதப்பங் யதாஸுகங்.

2880 ரக்கிதங் கோபிதங் வாபி, கஹேதப்பங் து கண்ணஹதா;
ஸமகங் அதிரேகங் வா, தத்வா பாதிசமேவ வா.

2881 அஞ்ஜனங் ஹரிதாலஞ்ச, ததா ஹிங்கு மனோஸிலா;
பாஜேதப்பந்தி விஞ்ஞெய்யங், விஞ்ஞனா வினயஞ்ஞனா.

2882 தாருபுண்டேபி யோ கோசி, ஸுசிதண்டப்பமாணகோ;
அட்டங்குலாயதோ தாரு-புண்டகோ கருபுண்டகங்.

2883 மஹாஅட்ட²கதா²யங் து, விப⁴ஜித்வாவ த³ஸ்ஸிதங்;
ஆஸந்தி³கோபி ஸத்தங்கோ³, ப⁴த³த³பீட²ஞ்ச பீடி²கா.

2884 பீட²மேளகபாத³ஞ்ச, ததா²மண்ட³கவட்டகங்;
கொச்ச²ங் பலாலபீட²ஞ்ச, தோ⁴வனே ப²லகம்பி ச.

2885 ப⁴ண்டி³கா முக்³க³ரோ சேவ, வத்த²க⁴ட்டனமுக்³க³ரோ;
அம்ப³ணம்பி ச மஞ்ஜூஸா, நாவா ரஜனதோ³ணிகா.

2886 உளுங்கோபி ஸமுக்³கோ³பி, கரண்ட³ம்பி கடச்ச²பி;
ஏவமாதி³ து ஸப்³ப³ம்பி, ஸங்கி⁴கங் க³ருப⁴ண்ட³கங்.

2887 ஸப்³ப³ங் தா³ருமயங் கே³ஹ-ஸம்பா⁴ரங் க³ருகங் மதங்;
பா⁴ஜியங் கப்பியங் சம்மங், அகப்பியமபா⁴ஜியங்.

2888 ஏளசம்மங் க³ருங் வுத்தங், ததே²வோது³க்க²லாதி³கங்;
பேஸகாராதி³ப⁴ண்ட³ஞ்ச, கஸிப⁴ண்ட³ஞ்ச ஸங்கி⁴கங்.

2889 ததே²வாதா⁴ரகோ பத்த-பிதா⁴னங் தாலவண்டகங்;
பீ³ஜனீ பச்சி² சங்கோடங், ஸப்³பா³ ஸம்முஞ்ஜனீ க³ரு.

2890 யங் கிஞ்சி பூ⁴மத்த²ரணங், யோ கோசி கடஸாரகோ;
சக்கயுத்தகயானஞ்ச, ஸப்³ப³ம்பி க³ருப⁴ண்ட³கங்.

2891 ச²த்தஞ்ச முட்டி²பண்ணஞ்ச, விஸாணங்தும்ப³பா⁴ஜனங்;
உபாஹனாரணீத⁴ம்ம-கரணாதி³ லஹுங் இத³ங்.

2892 ஹத்தி²த³ந்தோ விஸாணஞ்ச, யதா²க³தமதச்சி²தங்;
மஞ்சபாதா³தி³ யங் கிஞ்சி, பா⁴ஜனீயமனிட்டி²தங்.

2893 நிட்டி²தோ தச்சி²தோ வாபி, விதோ⁴ ஹிங்கு³கரண்ட³கோ;
அஞ்ஜனீ ச ஸலாகாயோ, பா⁴ஜனீ உத³புஞ்ச²னீ.

2894 ஸப்³ப³ங் குலாலப⁴ண்ட³ம்பி, பரிபோ⁴கா³ரஹங் பன;
பத்தங்கா³ரகடாஹஞ்ச, தூ⁴மதா³னங் கபல்லிகா.

2895 தூ²பிகா தீ³பருக்கோ² ச, சயனச்ச²த³னிட்ட²கா;
ஸங்கி⁴கங் பன ஸப்³ப³ம்பி, க³ருப⁴ண்ட³ந்தி தீ³பிதங்.

2896 பத்தோ கஞ்சனகோ சேவ, தா²லகங் குண்டி³காபி ச;
க⁴டகோ லோஹப⁴ண்டே³பி, குண்டி³காபி ச பா⁴ஜியா.

2897 க³ருனா க³ருப⁴ண்ட³ஞ்ச, தா²வரேன ச தா²வரங்;
ஸங்க⁴ஸ்ஸ பரிவத்தெத்வா, க³ண்ஹிதுங் பன வட்டதி.

2898 அதோ⁴தேன ச பாதே³ன, நக்கமே ஸயனாஸனங்;
அல்லபாதே³ன வா பி⁴க்கு², ததே²வ ஸஉபாஹனோ.

2899 பூ⁴மியா நிட்டு²ப⁴ந்தஸ்ஸ, பரிகம்மகதாய வா;
பரிகம்மகதங் பி⁴த்திங், அபஸ்ஸெந்தஸ்ஸ து³க்கடங்.

2900 பரிகம்மகதங் பூ⁴மிங், ஸங்கி⁴கங் மஞ்சபீட²கங்;
அத்தனோ ஸந்தகேனேவ, பத்த²ரித்வான கேனசி.

2901 நிபஜ்ஜிதப்³பங், ஸஹஸா, தஸ்ஸ நித்³தா³யதோ யதி³;
ஸரீராவயவோ கோசி, மஞ்சங் பு²ஸதி து³க்கடங்.

2902 லோமேஸு பன லோமானங், க³ணனாயேவ து³க்கடங்;
தலேன ஹத்த²பாதா³னங், வட்டதக்கமிதுங் பன.

2903 ஸஹஸ்ஸக்³க⁴னகோ கோசி, பிண்ட³பாதோ ஸசீவரோ;
பத்தோ அவஸ்ஸிகங் பி⁴க்கு²ங், லிகி²த்வா ட²பிதோபி ச.

2904 தாதி³ஸோ பிண்ட³பாதோவ, ஸட்டி²வஸ்ஸானமச்சயே;
உப்பன்னோ ஸட்டி²வஸ்ஸஸ்ஸ, டி²திகாய த³தே³ பு³தோ⁴.

2905 உத்³தே³ஸப⁴த்தங் பு⁴ஞ்ஜித்வா, ஜாதோ சே ஸாமணேரகோ;
க³ஹேதுங் லப⁴தி தங் பச்சா², ஸாமணேரஸ்ஸ பானியா.

2906 ஸம்புண்ணவீஸவஸ்ஸோ யோ, ஸ்வே உத்³தே³ஸங் லபி⁴ஸ்ஸதி;
அஜ்ஜ ஸோ உபஸம்பன்னோ, அதீதா டி²திகா ஸியா.

2907 ஸசே பன ஸலாகா து, லத்³தா⁴ ப⁴த்தங் ந தங்தி³னே;
லத்³த⁴ங், புனதி³னே தஸ்ஸ, கா³ஹேதப்³பங், ந ஸங்ஸயோ.

2908 உத்தருத்தரிப⁴ங்க³ஸ்ஸ, ப⁴த்தஸ்ஸேகசரஸ்ஸ ஹி;
விஸுஞ்ஹி டி²திகா கத்வா, தா³தப்³பா³ து ஸலாகிகா.

2909 ப⁴த்தமேவ ஸசே லத்³த⁴ங், ந பனுத்தரிப⁴ங்க³ங்;
லத்³த⁴முத்தரிப⁴ங்க³ங் வா, ந லத்³த⁴ங் ப⁴த்தமேவ வா.

2910 யேன யேன ஹி யங் யங் து, ந லத்³த⁴ங், தஸ்ஸ தஸ்ஸ ச;
தங் தங் புனதி³னே சாபி, கா³ஹேதப்³ப³ந்தி தீ³பிதங்.

2911 ஸங்கு⁴த்³தே³ஸாதி³கங் ப⁴த்தங், இத³ங் ஸத்தவித⁴ம்பி ச;
ஆக³ந்துகாதி³ப⁴த்தஞ்ச, சதுப்³பி³த⁴முதீ³ரிதங்.

2912 விஹாரவாரப⁴த்தஞ்ச, நிச்சஞ்ச குடிப⁴த்தகங்;
பன்னரஸவித⁴ங் ப⁴த்தங், உத்³தி³ட்ட²ங் ஸப்³ப³மேவித⁴.

2913 பாளிமட்ட²கத²ஞ்சேவ, ஓலோகெத்வா புனப்புனங்;
ஸங்கி⁴கே பச்சயே ஸம்மா, விப⁴ஜெய்ய விசக்க²ணோ.

ஸேனாஸனக்க²ந்த⁴ககதா².

வத்தக்க²ந்த⁴ககதா²

2914 ஆக³ந்துகாவாஸிகபிண்ட³சாரீ-;
ஸேனாஸனாரஞ்ஞனுமோத³னாஸு ;
வத்தானி ப⁴த்தே க³மிகஸ்ஸ ஜந்தா-;
க⁴ரே ததா² வச்சகுடிப்பவேஸே.

2915 ஆசரியபஜ்ஜா²யகஸிஸ்ஸஸத்³தி⁴- ;
விஹாரிவத்தானிபி ஸப்³ப³ஸோவ;
வத்தானி வத்தானி சதுத்³த³ஸேவ;
விஸுத்³த⁴சித்தேன வினாயகேன.

2916 ஆக³ந்துகேன ஆராமங், பவிஸந்தேன பி⁴க்கு²னா;
ச²த்தங் பனாபனேதப்³ப³ங், முஞ்சிதப்³பா³ உபாஹனா.

2917 ஓகு³ண்ட²னங் ந காதப்³ப³ங், ஸீஸே சீவரமேவ வா;
ந ஹி தேன ச தோ⁴தப்³பா³, பாதா³ பானியவாரினா.

2918 வந்தி³தப்³பா³வ புச்சி²த்வா, விஹாரே வுட்³ட⁴பி⁴க்கு²னோ;
காலே ஸேனாஸனங் தேன, புச்சி²தப்³ப³ஞ்ச பி⁴க்கு²னா.

2919 வச்சட்டா²னஞ்ச பஸ்ஸாவ-ட்டா²னங் பானியமேவ ச;

பரிபோ⁴ஜனியங் ஸங்க⁴-கதிகங் கோ³சராதி³கங்.

2920 வுட்³ட்⁴மாக³ந்துகங் தி³ஸ்வா, பி⁴க்கு²னாவாஸிகேனபி;
பத்தங் படிக்க³ஹேதப்³பங், பச்சக்க³ந்த்வான சீவரங்.

2921 ஆஸனங் பஞ்ஞபேதப்³பங், தஸ்ஸ பாதோ³த³கம்பி ச;
உபனிக்கி²பிதப்³பஞ்ச, புச்சி²தப்³பஞ்ச வாரினா.

2922 வந்தெ³ய்யோ பஞ்ஞபேதப்³பங், தஸ்ஸ ஸேனாஸனம்பி ச;
அஜ்ஜா²வுத்த²மவுத்த²ங் வா, கோ³சராகோ³சரம்பி ச.

2923 வச்சட்டா²னஞ்ச பஸ்ஸாவ-ட்டா²னங் ஸெக்க²குலானி ச;
பவேஸே நிக்க²மே காலோ, வத்தப்³போ³ பானியாதி³கங்.

2924 ஸசே ஸோ நவகோ ஹோதி;
ஆக³தாக³ந்துகோ யதா²;
நிஸின்னேனேவ தேனஸ்ஸ;
ஸப்³பமாவாஸிபி⁴க்கு²னா.

2925 “அத்ர பத்தங் ட²பேஹீதி, நிஸீதா³ஹீத³மாஸனங்”;
இச்சேவங் பன வத்தப்³பங், தெ³ய்யங் ஸேனாஸனம்பி ச.

2926 தா³ருமத்திகப⁴ண்டா³னி, க³ந்துகாமேன பி⁴க்கு²னா;
க³ந்தப்³பங் படிஸாமெத்வா, த²கெத்வாவஸத²ம்பி ச.

2927 ஆபுச்சி²த்வாபி க³ந்தப்³பங், பி⁴க்கு²னா ஸயனாஸனங்;
புச்சி²தப்³போ³ அஸந்தேபி, கோ³பெத்வா வாபி ஸாது⁴கங்.

2928 ஸஹஸா பவிஸே நாபி, ஸஹஸா ந ச நிக்க²மே;
நாதிதூ³ரே நச்சாஸன்னே, டா²தப்³பங் பிண்ட³சாரினா.

2929 வாமஹத்தே²ன ஸங்கா⁴டிங், உச்சாரெத்வாத² பா⁴ஜனங்;
த³க்கி²ணேன பணாமெத்வா, பி⁴க்க²ங் க³ண்ஹெய்ய பண்டி³தோ.

2930 ஸஹபங் வா தா³துகாமாதி, ஸல்லக்கெ²ய்ய முஹுத்தகங்;
ஓலோகெய்யந்தரா பி⁴க்கு², ந பி⁴க்கா²தா³யிகாமுக²ங்.

2931 பானியாதி³ பனானெய்யங், பி⁴க்கு²னாரஞ்ஞகேனபி;

நக்க²த்தங் தேன யோகோ³ ச, ஜானிதப்³பா³ தி³ஸாபி ச.

2932 வச்சபஸ்ஸாவதித்தா²னி, ப⁴வந்தி படிபாடியா;
கரொந்தஸ்ஸ யதா²வுட்³ட⁴ங், ஹோதி ஆபத்தி து³க்கடங்.

2933 ஸஹஸா உப்³ப⁴ஜித்வா வா, ந ச வச்சகுடிங் விலே;
உக்காஸித்வா ப³ஹி ட²த்வா, பவிலே ஸணிகங் பன.

2934 வச்சங் ந நித்து²னந்தேன, காதப்³ப³ங் பன பி⁴க்கு²னா;
கா²த³தோ த³ந்தகட்ட²ங் வா, கரோதோ ஹோதி து³க்கடங்.

2935 வச்சங் பன ந காதப்³ப³ங், ப³ஹித்³தா⁴ வச்சதோ³ணியா;
பஸ்ஸாவோபி ந காதப்³போ³, ப³ஹி பஸ்ஸாவதோ³ணியா.

2936 க²ரேன நாவலேகெ²ய்ய, ந கட்ட²ங் வச்சகூபகே;
ச²ட்³டெ³ய்ய ந ச பாதெய்ய, கே²ளங் பஸ்ஸாவதோ³ணியா.

2937 பாது³காஸு டி²தோயேவ, உப்³ப⁴ஜெய்ய விசக்க²ணோ;
படிச்சா²தெ³ய்ய தத்தே²வ, ட²த்வா நிக்க²மனே பன.

2938 நாசமெய்ய ஸசே வச்சங், கத்வா யோ ஸலிலே ஸதி;
தஸ்ஸ து³க்கடமுத்³தி³ட்ட²ங், முனினா மோஹனாஸினா.

2939 ஸஸத்³த³ங் நாசமேதப்³ப³ங், கத்வா சபு சபூதி ச;
ஆசமித்வா ஸராவேபி, ஸேஸேதப்³ப³ங் ந தூத³கங்.

2940 ஊஹதம்பி அதோ⁴வித்வா, நிக்க²மந்தஸ்ஸ து³க்கடங்;
உக்லாபாபி ஸசே ஹொந்தி, ஸோதே⁴தப்³ப³ங் அஸேஸதோ.

2941 அவலேக²னகட்டே²ன, பூரோ சே பீட²ரோ பன;
ச²ட்³டெ³ய்ய கும்பி⁴ ரித்தா சே, கும்பி⁴ங் பூரெய்ய வாரினா.

2942 அனஜ்ஜி²ட்டோ² ஹி வுட்³டே⁴ன, பாதிமொக்க²ங் ந உத்³தி³ஸே;
த⁴ம்மங் ந ச ப⁴ணே, பஞ்ஹங், ந புச்செ²ய்ய ந விஸ்ஸஜே.

2943 ஆபுச்சித்வா கதெ²ந்தஸ்ஸ, வுட்³ட⁴ங் வுட்³ட⁴தராக³மே;
புன ஆபுச்ச²னே கிச்சங், நத்தீ²தி பரிதீ³பிதங்.

2944.

வுட்³டே⁴னேகவிஹாரஸ்மிங், ஸத்³தி⁴ங் விஹரதா பன;
அனாபுச்சா² ஹி ஸஜ்ஜா²யோ, ந காதப்³போ³ கதா³சிபி.

2945 உத்³தே³ஸோபி ந காதப்³போ³, பரிபுச்சா²ய கா கதா²;
ந ச த⁴ம்மோ கதே²தப்³போ³, பி⁴க்கு²னா த⁴ம்மசக்கு²னா.

2946 ந தீ³போ விஜ்ஜா²பேதப்³போ³, காதப்³போ³ வா ந சேவ ஸோ;
வாதபானகவாடானி, த²கெய்ய விவரெய்ய நோ.

2947 சங்கமே சங்கமந்தோ ச, வுட்³டே⁴தோ பரிவத்தயே;
தம்பி சீவரகண்ணேன, காயேன ந ச க⁴ட்டயே.

2948 புரதோ நேவ தே²ரானங், ந்ஹாயெய்ய ந பனுபரி;
உத்தரங் ஓதரந்தானங், த³தே³ மக்³கங், ந க⁴ட்டயே.

2949 வத்தங் அபரிபுரெந்தோ, ந ஸீலங் பரிபுரதி;
அஸுத்³த⁴ஸீலோ து³ப்பஞ்ஞோ, சித்தேகக்³கங் ந விந்த³தி.

2950 விக்கி²த்தசித்தோனேகக்³கோ³, ஸத்³த⁴ம்மங் ந ச பஸ்ஸதி;
அபஸ்ஸமானோ ஸத்³த⁴ம்மங், து³க்கா² ந பரிமுச்சதி.

2951 தஸ்மா ஹி வத்தங் பூரெய்ய, ஜினபுத்தோ விசக்க²ணோ;
ஓவாதங் பு³த்³த⁴ஸெட்ட²ஸ்ஸ, கத்வா நிப்³பா³னமேஹிதி.

வத்தக்க²ந்த⁴ககதா².

பி⁴க்கு²னிக்க²ந்த⁴ககதா²

2952 காயங் ஊருங் த²னங் வாபி, விவரித்வான பி⁴க்கு²னீ;
அத்தனோ அங்கஜாதங் வா, பி⁴க்கு²ஸ்ஸ ந ச த³ஸ்ஸயே.

2953 பி⁴க்கு²னா ஸஹ யங் கிஞ்சி, ஸம்பயோஜெந்தியாபி ச;
ததோ பா⁴ஸந்தியா பி⁴க்கு²ங், ஹோதி ஆபத்தி து³க்கடங்.

2954 ந ச பி⁴க்கு²னியா தீ³க⁴ங், தா⁴ரெய்ய காயப³ந்த⁴னங்;
தேனேவ காயப³ந்தே⁴ன, த²னபட்டேன வா பன.

2955 விலீவேன ச பட்டேன, சம்மபட்டேன வா ததா²;
து³ஸ்ஸபட்டேன வா து³ஸ்ஸ-வேணியா து³ஸ்ஸவட்டியா.

- 2956 ந பா²ஸுகா நமேதப்³பா³, து³க்கடங் து நமெந்தியா;
ந க⁴ங்ஸாபெய்ய ஸமணீ, ஜக⁴னங் அட்டி²காதி³னா.
- 2957 ஹத்த²ங் வா ஹத்த²கொச்ச²ங் வா, பாத³ங் வா முக²முருகங்;
கொட்டாபேதி ஸசே தஸ்ஸா, ஹோதி ஆபத்தி து³க்கடங்.
- 2958 ந முக²ங் லிம்பிதப்³ப³ங் து, ந சுண்ணேதப்³ப³மேவ ச;
மனோஸிலாய வாபத்தி, முக²ங் லஞ்ஜந்தியா ஸியா.
- 2959 அங்க³ராகோ³ ந காதப்³போ³, முக²ராகோ³பி வா ததா²;
அவங்க³ங் ந ச காதப்³ப³ங், ந காதப்³ப³ங் விஸேஸகங்.
- 2960 ஓலோகனகதோ ராகா³, ஓலோகேதுங் ந வட்டதி;
டா²தப்³ப³ங் ந ச ஸாலோகே, ஸனச்சங் ந ச காரயே.
- 2961 து³க்கடங் முனினா வுத்தங், க³ணிகங் வுட்ட²பெந்தியா;
ஸுரங் வா பன மங்ஸங் வா, பண்ணங் வா விக்கிணந்தியா.
- 2962 வட்³டி⁴ங் வாபி வணிஜ்ஜங் வா, பயோஜேதுங் ந வட்டதி;
திரீடங் கஞ்சகங் வாபி, யதி³ தா⁴ரேதி து³க்கடங்.
- 2963 தா³ஸோ வா பன தா³ஸீ வா, ததா² கம்மகரோபி வா;
ந சேவுபட்ட²பேதப்³போ³, திரச்சா²னக³தோபி வா.
- 2964 ந ச பி⁴க்கு²னியா ஸப்³ப³-நீலாதி³ங் பன சீவரங்;
தா⁴ரேதப்³ப³ங், ந தா⁴ரெய்ய, ஸப்³ப³ங் நமதகம்பி ச.
- 2965 படிச்ச²ன்னாபடிச்ச²ன்னங் , சி²ன்னங் வாச்சி²ன்னமேவ வா;
புரிஸப்³யஞ்ஜனங் ஸப்³ப³ங், ஓலோகேதுங் ந வட்டதி.
- 2966 தூ³ரதோவ ச பஸ்ஸித்வா, பி⁴க்கு²ங் பி⁴க்கு²னியா பன;
மக்³கோ³ தஸ்ஸ பதா³தப்³போ³, ஓக்கமித்வான தூ³ரதோ.
- 2967 பி⁴க்கு²ங் பன ச பஸ்ஸித்வா, பத்தங் பி⁴க்க²ங் சரந்தியா;
நீஹரித்வா தமுக்குஜ்ஜங், த³ஸ்ஸேதப்³ப³ங் து பி⁴க்கு²னோ.
- 2968 ஸங்வேல்லிகஞ்ச காதுங் வா, தா⁴ரேதுங் கடிஸுத்தகங்;
உதுகாலே அனுஞ்ஞாதங், உதுனீனங் மஹேஸினா.

- 2969 இத்தி²போஸயுதங் யானங், ஹத்த²வட்டகமேவ வா;
பாடங்கீ ச கி³லானாய, வட்டதேவாபி⁴ருஹிதுங்.
- 2970 க³ருத⁴ம்மே டி²தாயாபி, மானத்தங் து சரந்தியா;
ஸம்மன்னித்வா பதா³தப்³பா³, து³தியா பன பி⁴க்கு²னீ.
- 2971 யஸ்ஸா பப்³புஜ்ஜகாலே து, க³ப்³போ⁴ வட்டா²தி இத்தி²யா;
புத்தோ யதி³ ச தஸ்ஸாபி, தா³தப்³பா³ து³தியா ததா².
- 2972 மாதா லப⁴தி பாயேதுங், போ⁴ஜேதுங் புத்தமத்தனோ;
மண்டே³தும்பி உரே கத்வா, ஸேதுங் லப⁴தி ஸா பன.
- 2973 ட²பெத்வா ஸஹஸெய்யங் து, தஸ்மிங் து³தியிகாய ஹி;
புரிஸேஸு யதா²ஞ்ஞேஸு, வத்திதப்³பங் ததே²வ ச.
- 2974 விப்³ப⁴மேனேவ ஸா ஹோதி, யஸ்மா இத⁴ அபி⁴க்கு²னீ;
தஸ்மா பி⁴க்கு²னியா ஸிக்கா²-பச்சக்கா²னங் ந விஜ்ஜதி.
- 2975 விப்³ப⁴ந்தாய யதா² தஸ்ஸா, புன நத்தூ²பஸம்பதா³;
க³தாய தித்தா²யதனங், ததா² நத்தூ²பஸம்பதா³.
- 2976 சே²த³னங் நக²கேஸானங், புரிஸேஹி ச வந்த³னங்;
வணஸ்ஸ பரிகம்மம்பி, ஸாதி³துங் பன வட்டதி.
- 2977 ந வச்சகுடியா வச்சோ, காதப்³போ³ யாய காயசி;
ஹெட்டா²பி விவடே உத்³த⁴ங், படிச்ச²ன்னேபி வட்டதி.
- 2978 ந ச வட்டதி ஸப்³புத்த², பல்லங்கேன நிஸீதி³துங்;
கி³லானாயட்³ட⁴பல்லங்கங், வட்டதீதி பகாஸிதங்.
- 2979 ந ச பி⁴க்கு²னியாரஞ்ஞே, வத்த²ப்³பங் து கத²ஞ்சன;
அதித்தே² நரதித்தே² வா, ந்ஹாயிதுங் ந ச வட்டதி.
- 2980 ஸமணீ க³ந்த⁴சுண்ணேன, யா ச வாஸிதமத்தியா;
ந்ஹாயெய்ய படிஸோதே வா, தஸ்ஸா ஆபத்தி து³க்கடங்.
- 2981 “த்வங்யேவ பரிபு⁴ஞ்ஜா”தி, பரிபோ⁴க³த்த²மத்தனோ;
தி³ன்னங் அபு⁴த்வா அஞ்ஞஸ்ஸ, தெ³ந்தியா பன து³க்கடங்.

2982 ஸப்³ப³ங் படிக்க³ஹாபெத்வா, பி⁴க்கூ²ஹி பரிபு⁴ஞ்ஜிதுங்;
அஸந்தேனுபஸம்பன்னே, பி⁴க்கு²னீனங் து வட்டதி.

பி⁴க்கு²னிக்க²ந்த⁴ககதா².

இதி வினயவினிச்ச²யே க²ந்த⁴ககதா² நிட்டி²தா.

சதுப்³பி³த⁴கம்மகதா²

2983 சத்தாரிமானி கம்மானி, அபலோகனஸஞ்ஞிதங்;
ஞத்தி ஞத்திது³தியஞ்ச, கம்மங் ஞத்திசதுத்த²கங்.

2984 அபலோகனகம்மங் து, பஞ்ச டா²னானி க³ச்ச²தி;
ஞத்திகம்மங் நவட்டா²னங், து³தியங் ஸத்த க³ச்ச²தி.

2985 ததா² ஞத்திசதுத்த²ம்பி, ஸத்த டா²னானி க³ச்ச²தி;
நிஸ்ஸாரணஞ்ச ஓஸாரோ, ப⁴ண்டு³கங் ப்³ரஹ்மத³ண்ட³கோ.

2986 அபலோகனகம்மஞ்ஹி, கம்மலக்க²ணபஞ்சமங்;
நிஸ்ஸாரணஞ்ச ஓஸாரங், ஸமணுத்³தே³ஸதோ வதே³.

2987 ப⁴ண்டு³கங் பப்³ப³ஜந்தேன, ச²ன்னேன ப்³ரஹ்மத³ண்ட³கங்;
அஞ்ஞஸ்ஸபி ச காதப்³போ³, ததா²ருபஸ்ஸ பி⁴க்கு²னோ.

2988 ஸப்³போ³ ஸன்னிபதித்வான, ஆபுச்சி²த்வான ஸப்³ப³ஸோ;
சீவராதி³பரிக்கா²ரங், ஸங்கோ⁴ யங் தே³தி தஸ்ஸ ஹி.

2989 திக்க²த்துங் அபலோகெத்வா, பி⁴க்கூ²னங் ருசியா பன;
ஏவங் ஸங்க⁴ஸ்ஸ தா³னங் து, ஹோதி தங் கம்மலக்க²ணங்.

2990 நிஸ்ஸாரணமதோ²ஸாரோ , உபோஸத²பவாரணா;
ஸம்முதி சேவ தா³னஞ்ச, படிக்க³கா³ஹோ ச ஸத்தமோ.

2991 பச்சுக்கட்³ட⁴னதா சேவ, அட்ட²மீ பரிகித்திதா;
கம்மஸ்ஸ லக்க²ணஞ்சாதி, நவ டா²னானி ஞத்தியா.

2992 வினிச்ச²யே அஸம்பத்தே, தே²ரஸ்ஸாவினயஞ்ஞனோ;
தஸ்ஸ நிஸ்ஸாரணா வுத்தா, யா ஸா நிஸ்ஸாரணாதி ஹி.

2993 உபஸம்பதா³பெக்க²ஸ்ஸ, ஆக³ச்சோ²ஸாரணாதி ஸா;
உபோஸத²வஸேனாபி, பவாரணவஸேனபி.

2994 ஞுத்தியா ட²பிதத்தா ஹி, ஞுத்திகம்மானிமே து³வே;
“உபஸம்பதா³பெக்க²ஞ்ஹி, அனுஸாஸெய்யஹ”ந்தி ச.

2995 “இத்த²ன்னாமமஹங் பி⁴க்கு²ங், புச்செ²ய்யங் வினய”ந்தி ச;
ஏவமாதி³பவத்தா ஹி, ஏதி³ஸா ஞுத்தி ஸம்முதி.

2996 நிஸ்ஸட்ட²சீவராதி³னங், தா³னங் “தா³ன”ந்தி வுச்சதி;
ஆபத்தீனங் படிக்க³கா³ஹோ, “படிக்க³கா³ஹோ”தி வுச்சதி.

2997 பச்சுக்கட்³ட⁴னதா நாம, பவாருக்கட்³ட⁴னா மதா;
“இமங் உபோஸத²ங் கத்வா, காலே பவாரயாமி”தி.

2998 திணவத்தா²ரகே ஸப்³ப³-பட²மா ஞுத்தி சேதரா;
கம்மலக்க²ணமேதந்தி, நவ டா²னானி ஞுத்தியா.

2999 ஞுத்திது³தியகம்மம்பி, ஸத்த டா²னானி க³ச்ச²தி;
நிஸ்ஸாரணமதோ²ஸாரங், ஸம்முதிங் தா³னமேவ ச.

3000 உத்த³தா⁴ரங் தே³ஸனங் கம்ம-லக்க²ணங் பன ஸத்தமங்;
பத்தனிக்குஜ்ஜனாதி³ து, நிஸ்ஸாரோஸாரணா மதா.

3001 ஸம்முதி நாம ஸீமாதி³, ஸா பஞ்சத³ஸதா⁴ மதா;
தா³னங் கதி²னவத்த²ஸ்ஸ, தா³னங் மதகவாஸஸோ.

3002 கதி²னஸ்ஸந்தருப்³பா⁴ரோ, “உப்³பா⁴ரோ”தி பவுச்சதி;
தே³ஸனா குடிவத்து²ஸ்ஸ, விஹாரஸ்ஸ ச வத்து²னோ.

3003 திணவத்தா²ரகம்மே ச, மோஹாரோபனதாதி³ஸு;
கம்மவாசாவஸேனெத்த², கம்மலக்க²ணதா மதா.

3004 இதி ஞுத்திது³தியஸ்ஸ, இமே ஸத்த பகாஸிதா;
ததா² ஞுத்திசதுத்த²ம்பி, ஸத்த டா²னானி க³ச்ச²தி.

3005 நிஸ்ஸாரணமதோ²ஸாரங், ஸம்முதிங் தா³னநிக்³க³ஹங்;
ஸமனுபா⁴ஸனஞ்சேவ, ஸத்தமங் கம்மலக்க²ணங்.

3006 ஸத்தன்னங் தஜ்ஜனாதீ³னங், கம்மானங் கரணங் பன;
நிஸ்ஸாரணாத² பஸ்ஸத்³தி⁴, தேஸங் ஓஸாரணா மதா.

3007 ஓவாதோ³ பி⁴க்கு²னீனங் து, ஸம்முதீதி பகாஸிதா;
மானத்தபரிவாஸானங், தா³னங் “தா³ன”ந்தி வுச்சதி.

3008 புன மூலாபடிக்கஸ்ஸோ, “நிக்³க³ஹோ”தி பவுச்சதி;
உக்கி²த்தஸ்ஸானுவத்திகா, அட்ட² யாவததீயகா.

3009 அரிட்டோ² சண்ட³காளீ ச, ஏகாத³ஸ ப⁴வந்திமே;
இமேஸங் து வஸா ஞெய்யா, த³ஸேகா ஸமனுபா⁴ஸனா.

3010 உபஸம்பத³கம்மஞ்ச, கம்மமப்³பா⁴னஸஞ்ஞிதங்;
இத³ங் ஞத்திசதுத்தே² து, ஸத்தமங் கம்மலக்க²ணங்.

3011 அபலோகனகம்மஞ்சா-பலோகெத்வாவ காரயே;
ஞத்தியா து³தியேனாபி, சதுத்தே²ன ந காரயே.

3012 ஞத்திது³தியகம்மானி, லஹுகானத்தி² கானிசி;
காதப்³பா³னபலோகெத்வா, ஸப்³பா³ ஸம்முதியோ ஸியுங்.

3013 ஸேஸானி அபலோகெத்வா, காதுங் பன ந வட்டதி;
யதா²வுத்தனயேனேவ, தேன தேனேவ காரயே.

சதுப்³பி³த⁴கம்மகதா².

கம்மவிபத்திகதா²

3014 வத்து²தோ ஞத்திதோ சேவ, அனுஸ்ஸாவனஸீமதோ;
பரிஸதோதி பஞ்சேவ, கம்மதோ³ஸா பகாஸிதா.

3015 ஸம்முகா²கரணியங் யங், தங் கரோதி அஸம்முகா²;
கம்மங் வத்து²விபன்னங் தங், அத⁴ம்மந்தி பவுச்சதி.

3016 அஸம்முகா²கரணியானி, அட்டே²வ ச ப⁴வந்தி ஹி;
பத்தனிக்குஜ்ஜனஞ்சேவ, பத்தஸ்ஸுக்குஜ்ஜனம்பி ச.

3017 பகாஸனியகம்மஞ்ச , ஸெக்க²உம்மத்தஸம்முதி;
அவந்தி³யோ ததா² ப்³ரஹ்ம-த³ண்டோ³ து³தூபஸம்பதா³.

3018 இமானட்² ட²பெத்வான, ஸேஸானி பன ஸப்³ப³ஸோ;
ஸம்முகா²கரணியானி, கம்மானி ஸுக³தொப்³ரவி.

3019 ஞுத்திதோ பன பஞ்சேவ, விபஜ்ஜனநயா மதா;
ந பராமஸதி வத்து²ஞ்ச, ஸங்க⁴ங் புக்³க³லமேவ வா.

3020 ந பராமஸதி ஞுத்திங் வா, பச்சா² ஞுத்திங் ட²பேதி வா;
பஞ்சஹேதேஹி கம்மானி, ஞுத்திதோவ விபஜ்ஜரே.

3021 அனுஸ்ஸாவனதோ பஞ்ச, கம்மதோ³ஸா பகாஸிதா;
ந பராமஸதி வத்து²ங் வா, ஸங்க⁴ங் புக்³க³லமேவ வா.

3022 ஹாபேதி ஸாவனங் வாபி, ஸாவேதஸமயேபி வா;
ஏவங் பன விபஜ்ஜந்தி, அனுஸ்ஸாவனதோபி ச.

3023 ஏகாத³ஸஹி ஸீமாஹி, ஸீமதோ கம்மதோ³ஸதா;
வுத்தா உபோஸதே² தாவ, க²ந்த⁴கே ஸப்³ப³ஸோ மயா.

3024 சதுவக்³கே³ன காதப்³பே³, கம்மப்பத்தா அனாக³தா;
ச²ந்தோ³ ச ந பனானீதோ, படிக்கோஸந்தி ஸம்முகா².

3025 ஏவங் திவங்கி³கோ தோ³ஸோ, பரிஸாய வஸா ஸியா;
ஆக³தா கம்மபத்தா ச, ச²ந்தோ³ ச ந பனாக³தோ.

3026 ஸம்முகா² படிஸெதெ⁴ந்தி, து³தியே சதுவக்³கி³கே;
ஆக³தா கம்மபத்தா ச, ச²ந்தோ³பி ச ஸமாஹடோ.

3027 படிக்கோஸோவ எத்த²த்தி², ததியே சதுவக்³கி³கே;
ஏவங் பஞ்சாதி³வக்³கே³ஸு, ஸங்கே⁴ஸு திவிதே⁴ஸுபி.

3028 சதுத்தி²கா ஸியுங் தோ³ஸா, த³ஸ த³வே பரிஸாவஸா;
ஏவங் த³வாத³ஸதா⁴ எத்த², கம்மானி ஹி விபஜ்ஜரே.

கம்மவிபத்திகதா².

ஸேத³மோசனகதா²

ஸோளஸபரிவாரஸ்ஸ , பரிவாரஸ்ஸ ஸாத³ரா;
ஸுணாத² நிபுணை பஞ்ஹே, கூ³ள்ஹத்தே² ப⁴ணதோ மம.

க².

தி³வாபஜ்ஜதி நோ ரத்திங், ரத்திங்யேவ ச நோ தி³வா;
கத²ஞ்ச படிக்க³ண்ஹந்தோ, ந க³ண்ஹந்தோ கத²ங் பன.

க³.

சி²ந்த³ந்தஸ்ஸ ஸியாபத்தி, ததே²வாசி²ந்த³தோபி ச;
சா²தெ³ந்தஸ்ஸ ததா²பத்தி-ந சா²தெ³ந்தஸ்ஸ பி⁴க்கு²னோ.

க⁴.

கா சாபத்தி ஸமாபத்தி-லாபி⁴னோயேவ பி⁴க்கு²னோ;
அஸமாபத்திலாபி⁴ஸ்ஸ, கா ச நாமஸ்ஸ ஸா ப⁴வே.

ங்.

க³ருகங் ப⁴ணதோ ஸச்சங், அலிகங் ப⁴ணதோ ஸியுங்;
லஹுங் ஸச்சங் ப⁴ணந்தஸ்ஸ, முஸா ச ப⁴ணதோ க³ருங்.

ச.

பவிஸந்தோ ச ஆராமங், ஆபஜ்ஜதி ந நிக்க²மங்;
நிக்க²மந்தோவ ஆபத்தி, ந சேவ பவிஸங் பன;

ச².

ஸமாதி³யந்தோ அஸமாதி³யந்தோ;
அனாதி³யந்தோபி ச ஆதி³யந்தோ;
தெ³ந்தோ அதெ³ந்தோபி ஸியா ஸதோ³ஸோ;
ததா² கரொந்தோபி ச நோ கரொந்தோ.

ஐ.

ஆபஜ்ஜதி ச தா⁴ரெந்தோ, அதா⁴ரெந்தோ ததே²வ ச;
த்³வின்னங் மாதா பிதா ஸாவ, கத²ங் ஹோதி? ப⁴ணாஹி மே.

ஐ².

உப⁴தொப்யஞ்ஜனா இத்தீ², க³ப்ப⁴ங் க³ண்ஹாதி அத்தனா;

க³ண்ஹாபேதி பரங் க³ப³ப⁴ங், தஸ்மா மாதாபிதா ச ஸா.

ஞ.

கா³மே வா யதி³ வாரஞ்ஞே, யங் பரேஸங் மமாயிதங்;
ந ஹரந்தோவ தங் தெ²ய்யா, கத²ங் பாராஜிகோ ப⁴வே;

ட.

தெ²ய்யஸங்வாஸகோ ஏஸோ, லிங்க³ஸங்வாஸதே²னகோ;
பரப⁴ண்ட³ங் அக³ண்ஹந்தோ, தேன ஹோதி பராஜிதோ.

ட².

நாரிங் ரூபவதிங் பி⁴க்கு², ரத்தசித்தோ அஸஞ்ஞதோ;
மேது²னங் தாய கத்வாபி, ந ஸோ பாராஜிகோ கத²ங்;

ட³.

அச்ச²ராஸதி³ஸங் நாரிங், ஸுபினந்தேன பஸ்ஸதி;
தாய மேது²னஸங்யோகே³, கதேபி ந ப⁴விஸ்ஸதி.

ட⁴.

ப³ஹித்த³தா⁴ கே³ஹதோ பி⁴க்கு², இத்தீ² க³ப³ப⁴ந்தரங் க³தா;
சி²த்த³ங் கே³ஹஸ்ஸ நேவத்தி², கத²ங் மேது²னதோ சுதோ;

ண.

அந்தோது³ஸ்ஸகுடிட்டே²ன, மாதுகா³மேன மேது²னங்;
ஸந்த²தாதி³வஸேனேவ, கத்வா ஹோதி பராஜிதோ.

த.

ஸுத்தே ச வினயேயேவ, க²ந்த⁴கே ஸானுலோமிகே;
ஸப்³ப³த்த² நிபுணா தீ⁴ரா, இமே பஞ்ஹே ப⁴ணந்தி தே.

த².

க²ந்த⁴கே பரிவாரே ச, வினயே ஸானுலோமிகே;
ஆத³ரோ கரணீயோவ, படுபா⁴வங் பனிச்சி²தா.

ஸேத³மோசனகதா².

பகிண்ணகவினிச்ச²யகதா²

- 3029 ச²த்தங் பண்ணமயங் கிஞ்சி, ப³ஹி அந்தோ ச ஸப்³புஸோ;
பஞ்சவண்ணேன ஸுத்தேன, ஸிப்³பி³துங் ந ச வட்டதி.
- 3030 சி²ந்தி³துங் அட்³ட⁴சந்த³ங் வா, பண்ணே மகரத³ந்தகங்;
க⁴டகங் வாளருபங் வா, லேகா² த³ண்டே³ ந வட்டதி.
- 3031 ஸிப்³பி³துங் ஏகவண்ணேன, ச²த்தங் ஸுத்தேன வட்டதி;
தி²ரத்த²ங், பஞ்சவண்ணானங், பஞ்ஜரங் வா வினந்தி⁴துங்.
- 3032 க⁴டகங் வாளருபங் வா, லேகா² வா பன கேவலா;
பி⁴ந்தி³த்வா வாபி க⁴ங்ஸித்வா, தா⁴ரேதுங் பன வட்டதி.
- 3033 அஹிச²த்தகஸண்டா²னங், த³ண்ட³பு³ந்த³ம்ஹி வட்டதி;
உக்கிரித்வா கதா லேகா², ப³ந்த⁴னத்தா²ய வட்டதி.
- 3034 நானாவண்ணேஹி ஸுத்தேஹி, மண்ட³னத்தா²ய சீவரங்;
ஸமங் ஸதபதா³தீ³னங், ஸிப்³பி³துங் ந ச வட்டதி.
- 3035 பத்தஸ்ஸ பரியந்தே வா, ததா² பத்தமுகே²பி வா;
வேணிங் ஸங்க²லிகங் வாபி, கரோதோ ஹோதி து³க்கடங்.
- 3036 பட்டம்பி க³ண்டி²பாஸானங், அட்ட²கோணாதி³கங்விதி⁴ங்;
தத்த²க்³கி⁴யக³தா³ருபங், முக்³க³ராதி³ங் கரொந்தி ச.
- 3037 தத்த² கக்கடகக்கீ²னி, உட்டா²பெந்தி ந வட்டதி;
ஸுத்தா ச பிளகா தத்த², து³விஞ்ஞெய்யாவ தீ³பிதா.
- 3038 சதுகோணாவ வட்டந்தி, க³ண்டி²பாஸகபட்டகா;
கண்ணகோணேஸு ஸுத்தானி, ரத்தே சி²ந்தெ³ய்ய சீவரே.
- 3039 ஸூசிகம்மவிகாரங் வா, அஞ்ஞங் வா பன கிஞ்சிபி;
சீவரே பி⁴க்கு²னா காதுங், காராபேதுங் ந வட்டதி.
- 3040 யோ ச பக்கி²பதி பி⁴க்கு² சீவரங்;
கஞ்ஜிபிட்ட²க²லிஅல்லிகாதி³ஸு;
வண்ணமட்ட²மபி⁴பத்த²யங் பரங்;
தஸ்ஸ நத்தி² பன முத்தி து³க்கடா.

- 3041 ஸஹத்த²மலாதீ³னங் , கரணே சீவரஸ்ஸ ச;
ததா² கிலிட்ட²காலே ச, தோ⁴வனத்த²ங் து வட்டதி.
- 3042 ரஜனே பன க³ந்த⁴ங் வா, தேலங் வா லாக²மேவ வா;
கிஞ்சி பக்கி²பிதுங் தத்த², பி⁴க்கு²னோ ந ச வட்டதி.
- 3043 ஸங்கே²ன மணிநா வாபி, அஞ்ஞேனபி ச கேனசி;
சீவரங் ந ச க⁴ட்டெய்ய, க⁴ங்ஸிதப்³பங் ந தோ³ணியா.
- 3044 சீவரங் தோ³ணியங் கத்வா, நாபி க⁴ட்டெய்ய முட்டி²னா;
ரத்தங் பஹரிதுங் கிஞ்சி, ஹத்தே²ஹேவ ச வட்டதி.
- 3045 க³ண்டி²கே பன லேகா² வா, பிளகா வா ந வட்டதி;
கப்பபி³ந்து³விகாரோ வா, பாளிகண்ணிகபே⁴த³தோ.
- 3046 தா²லகஸ்ஸ ச பத்தஸ்ஸ, ப³ஹி அந்தோபி வா பன;
ஆரக்³கே³ன கதா லேகா², ந ச வட்டதி காசிபி.
- 3047 ஆரோபெத்வா ப⁴மங் பத்தங், மஜ்ஜித்வா சே பசந்தி ச;
“மணிவண்ணங் கரிஸ்ஸாம”, இதி காதுங் ந வட்டதி.
- 3048 பத்தமண்ட³லகே கிஞ்சி, பி⁴த்திகம்மங் ந வட்டதி;
ந தோ³ஸோ கோசி தத்த²ஸ்ஸ, காதுங் மகரத³ந்தகங்.
- 3049 ந த⁴ம்மகரணச்ச²த்தே, லேகா² காசிபி வட்டதி;
குச்சி²யங் வா ட²பெத்வா தங், லேக²ங் து முக²வட்டியங்.
- 3050 ஸுத்தங் வா தி³கு³ணங் கத்வா, கொட்டெந்தி ச தஹிங் தஹிங்;
காயப³ந்த⁴னஸோப⁴த்த²ங், தங் ந வட்டதி பி⁴க்கு²னோ.
- 3051 த³ஸாமுகே² த³ஹத்தா²ய, த்³வீஸு அந்தேஸு வட்டதி;
மாலாகம்மலதாகம்ம-சித்திகம்பி ந வட்டதி.
- 3052 அக்கீ²னி தத்த² த³ஸ்ஸெத்வா, கொட்டிதே பன கா கதா²;
கக்கடக்கீ²னி வா தத்த², உட்டா²பேதுங் ந வட்டதி.
- 3053 க⁴டங் தெ³ட்³ப⁴ஸீஸங் வா, மகரஸ்ஸ முக²ம்பி வா;
விகாரருபங் யங் கிஞ்சி, ந வட்டதி த³ஸாமுகே².

3054 உஜுகங் மச்ச²கண்டங் வா, மட்ட²ங் வா பன பட்டிகங்;
க²ஜ்ஜூரிபத்தகாகாரங், கத்வா வட்டதி கொட்டிதங்.

3055 பட்டிகா ஸுகரந்தந்தி, து³வித⁴ங் காயப³ந்த⁴னங்;
ரஜ்ஜுகா து³ஸ்பட்டாதி³, ஸப்³ப³ங் தஸ்ஸானுலோமிகங்.

3056 முரஜங் மத்³த³வீணஞ்ச, தெ³ட்³டு³ப⁴ஞ்ச கலாபுகங்;
ரஜ்ஜுயோ ந ச வட்டந்தி, புரிமா த³வேத³ஸா ஸியுங்.

3057 த³ஸா பாமங்க³ஸண்டா²னா, நித்³தி³ட்டா² காயப³ந்த⁴னே;
ஏகா த³விதிசதஸ்ஸோ வா, வட்டந்தி ந ததோ பரங்.

3058 ஏகரஜ்ஜுமயங் வுத்தங், முனிநா காயப³ந்த⁴னங்;
தஞ்ச பாமங்க³ஸண்டா²னங், ஏகம்பி ச ந வட்டதி.

3059 ரஜ்ஜுகே ஏகதோ கத்வா, ப³ஹூ ஏகாய ரஜ்ஜுயா;
நிரந்தரஞ்ஹி வேடெ²த்வா, கதங் வட்டதி ப³ந்தி⁴துங்.

3060 த³ந்தகட்ட²விஸாண்டி²-லோஹவேருனளப்³ப⁴வா;
ஜதுஸங்க²மயாஸுத்த-ப²லஜா வித⁴கா மதா.

3061 காயப³ந்த⁴னவிதே⁴பி, விகாரோ ந ச வட்டதி;
தத்த² தத்த² பரிச்சே²த³-லேகா²மத்தங் து வட்டதி.

3062 மாலாகம்மலதாகம்ம-நானாருபவிசித்திதா ;
ந ச வட்டதி பி⁴க்கூ²னங், அஞ்ஜனீ ஜனரஞ்ஜனீ.

3063 தாதி³ஸங் பன க⁴ங்ஸித்வா, வேடெ²த்வா ஸுத்தகேன வா;
வளஞ்ஜந்தஸ்ஸ பி⁴க்கு²ஸ்ஸ, ந தோ³ஸோ கோசி விஜ்ஜதி.

3064 வட்டா வா சதுரஸ்ஸா வா, அட்ட²ங்ஸா வாபி அஞ்ஜனீ;
வட்டதேவாதி நித்³தி³ட்டா², வண்ணமட்டா² ந வட்டதி.

3065 ததா²ஞ்ஜனிஸலாகாபி , அஞ்ஜனித²விகாய ச;
நானாவண்ணேஹி ஸுத்தேஹி, சித்தகம்மங் ந வட்டதி.

3066 ஏகவண்ணேன ஸுத்தேன, ஸிபாடிங் யேன கேனசி;
யங் கிஞ்சி பன ஸிப்³பெ³த்வா, வளஞ்ஜந்தஸ்ஸ வட்டதி.

3067 மணிகங் பிளகங் வாபி, பிப்ப²லே ஆரகண்டகே;
ட²பேதுங் பன யங் கிஞ்சி, ந ச வட்டதி பி⁴க்கு²னோ.

3068 த³ண்ட³கேபி பரிச்சே²த³-லேகா²மத்தங் து வட்டதி;
வலித்வா ச நக²ச்சே²த³ங், கரொந்தீதி ஹி வட்டதி.

3069 உத்தராரணியங் வாபி, த⁴னுகே பேல்லத³ண்ட³கே;
மாலாகம்மாதி³ யங் கிஞ்சி, வண்ணமட்ட²ங் ந வட்டதி.

3070 ஸண்டா³ஸே த³ந்தகட்டா²னங், ததா² சே²த³னவாஸியா;
த்³வீஸு பஸ்ஸேஸு லோஹேன, ப³ந்தி⁴துங் பன வட்டதி.

3071 ததா² கத்தரத³ண்டே³பி, சித்தகம்மங் ந வட்டதி;
வட்டலேகா²வ வட்டந்தி, ஏகா வா த³வேபி ஹெட்ட²தோ.

3072 விஸாணே நாளியங் வாபி, ததே²வாமண்ட³ஸாரகே;
தேலபா⁴ஜனகே ஸப்³ப³ங், வண்ணமட்ட²ங் து வட்டதி.

3073 பானியஸ்ஸ உளுங்கேபி, தோ³ணியங் ரஜனஸ்ஸபி;
க⁴டே ப²லகபீடே²பி, வலயாதா⁴ரகாதி³கே.

3074 ததா² பத்தபிதா⁴னே ச, தாலவண்டே ச பீ³ஜனே;
பாத³புஞ்ச²னியங் வாபி, ஸம்முஞ்ஜனியமேவ ச.

3075 மஞ்சே பூ⁴மத்த²ரே பீடே², பி⁴ஸிபி³ம்போ³ஹனேஸு ச;
மாலாகம்மாதி³கங் சித்தங், ஸப்³ப³மேவ ச வட்டதி.

3076 நானாமணிமயத்த²ம்ப⁴-கவாடத்³வாரபி⁴த்திகங் ;
ஸேனாஸனமனுஞ்ஞாதங், கா கதா² வண்ணமட்ட²கே.

3077 ஸோவண்ணியங் த³வாரகவாடப³த்³த⁴ங்;
ஸுவண்ணனானாமணிபி⁴த்திபூ⁴மிங்;
ந கிஞ்சி ஏகம்பி நிஸேத⁴னீயங்;
ஸேனாஸனங் வட்டதி ஸப்³ப³மேவ.

3078 புத்³த⁴ங் த⁴ம்மஞ்ச ஸங்க⁴ஞ்ச, ந உத்³தி³ஸ்ஸ த³வங் கரே;
முக³ப்³ப³தாதி³கங் நேவ, க³ண்ஹெய்ய தித்தி²யப்³ப³தங்.

- 3079 காயங் வா அங்க³ஜாதங் வா, ஊருங் வா ந து த³ஸ்ஸயே;
பி⁴க்கு²னீனங் து தா வாபி, ந ஸிஞ்சே உத³காதி³னா.
- 3080 வஸ்ஸமஞ்ஞத்த² வுட்டோ² சே, பா⁴க³மஞ்ஞத்த² க³ண்ஹதி;
து³க்கடங் புன தா³தப்³பங், கீ³வா நட்²பி ஜஜ்ஜரே.
- 3081 சோதி³தோ ஸோ ஸசே தேஹி, பி⁴க்க²ஹி ந த³தெ³ய்யதங்;
து⁴ரனிக்கே²பனே தேஸங், ப⁴ண்ட³க்³கே⁴னேவ காரயே.
- 3082 அகப்பியஸமாதா³னங், கரோதோ ஹோதி து³க்கடங்;
த³வா ஸிலங் பவிஜ்ஜ²ந்தோ, து³க்கடா ந ச முச்சதி.
- 3083 கி³ஹிகோ³பகதா³னஸ்மிங், ந தோ³ஸோ கோசி க³ண்ஹதோ;
பரிச்சே²த³னயோ வுத்தோ, ஸங்க⁴சேதியஸந்தகே.
- 3084 யானங் புரிஸஸங்யுத்தங், ஹத்த²வட்டகமேவ வா;
பாடங்கிஞ்ச கி³லானஸ்ஸ, வட்டதேவாபி⁴ருஹிதுங்.
- 3085 ந ச பி⁴க்கு²னியா ஸத்³தி⁴ங், ஸம்பயோஜெய்ய கிஞ்சிபி;
து³க்கடங் பி⁴க்கு²னிங் ராகா³, ஓபா⁴ஸெந்தஸ்ஸ பி⁴க்கு²னோ.
- 3086 பி⁴க்கு²னீனங் ஹவே பி⁴க்கு², பாதிமொக்க²ங் ந உத்³தி³ஸே;
ஆபத்திங் வா ஸசே தாஸங், படிக்க³ண்ஹெய்ய து³க்கடங்.
- 3087 அத்தனோ பரிபோ⁴க³த்த²ங், தி³ன்னமஞ்ஞஸ்ஸ கஸ்ஸசி;
பரிபோ⁴க³மகத்வாவ, த³த³தோ பன து³க்கடங்.
- 3088 அஸப்பாயங் ஸசே ஸப்³பங், அபனேதும்பி வட்டதி;
அக்³க³ங் க³ஹெத்வா தா³துங் வா, பத்தாதீ³ஸுப்யயங் நயோ.
- 3089 பஞ்சவக்³க³பஸம்பதா³ , கு³ணங்கு³ணஉபாஹனா;
சம்மத்தா²ரோ து⁴வன்ஹானங், மஜ்ஜ²தே³ஸே ந வட்டதி.
- 3090 ஸம்பா³த⁴ஸ்ஸ ச ஸாமந்தா, ஸத்த²கம்மங் து³வங்கு³லா;
வாரிதங், வத்தி²கம்மம்பி, ஸம்பா³தே⁴யேவ ஸத்து²னா.
- 3091 பண்ணானி அஜ்ஜுகாதீ³னங், லோணங் வா உண்ஹயாகு³யா;
பக்கி²பித்வான பாகத்த²ங், சாலேதுங் ந ச வட்டதி.

- 3092 ஸசே பரிஸமஞ்ஞஸ்ஸ, உபளாலேதி து³க்கடங்;
தத்த² சாதீனவங் தஸ்ஸ, வத்துங் பன ச வட்டதி.
- 3093 “மக்க²னங் கூ³த²முத்தேஹி, க³தேன நஹாயிதுங் விய;
கதங் நிஸ்ஸாய து³ஸ்ஸீலங், தயா விஹரதா”தி ச.
- 3094 ப⁴த்தக்கே³ யாகு³பானே ச, அந்தோகா³மே ச வீதி²யங்;
அந்த⁴காரே அனாவஜ்ஜோ, ஏகாவத்தோ ச ப்யாவடோ.
- 3095 ஸுத்தோ கா²த³ஞ்ச பு⁴ஞ்ஜந்தோ, வச்சங் முத்தம்பி வா கரங்;
வந்த³னா தேரஸன்னங் து, அயுத்தத்தே²ன வாரிதா.
- 3096 நக்கோ³ அனுபஸம்பன்னோ, நானாஸங்வாஸகோபி ச;
யோ பச்சா² உபஸம்பன்னோ, உக்கி²த்தோ மாதுகா³மகோ.
- 3097 ஏகாத³ஸ அப⁴ப்பா³ ச, க³ருகட்டா² ச பஞ்சிமே;
வந்த³தோ து³க்கடங் வுத்தங், பா³வீஸதி ச புக்³கலே.
- 3098 யோ புரே உபஸம்பன்னோ, நானாஸங்வாஸவுட்³ட⁴கோ;
த⁴ம்மவாதீ³ ச ஸம்புத்³தோ⁴, வந்த³னீயா தயோ இமே.
- 3099 தஜ்ஜனாதி³கதே எத்த², சதுரோ பன புக்³கலே;
வந்த³தோபி அனாபத்தி, தேஹி கம்மஞ்ச குப்³ப³தோ.
- 3100 அதி⁴ட்டா²னங் பனேகஸ்ஸ, த்³வின்னங் வா திண்ணமேவ வா;
தி³ட்டா²விகம்மமுத்தி³ட்ட²ங், ததோ உத்³த⁴ங் நிவாரணங்.
- 3101 ஸந்தி³ட்டோ² ஹோதி ஸம்ப⁴த்தோ, ஜீவதாலபிதோபி ச;
க³ஹிதத்தமனோ ஹோதி, விஸ்ஸாஸோ பஞ்சதா⁴ ஸியா.
- 3102 ஸீலதி³ட்டி²விபத்தி ச, ஆசாராஜீவஸம்ப⁴வா;
விபத்தியோ சதஸ்ஸோவ, வுத்தா ஆதி³ச்சப³ந்து⁴னா.
- 3103 தத்த² அப்படிகம்மா ச, யா ச வுட்டா²னகா³மினீ;
ஆபத்தியோ து³வே ஸீல-விபத்தீதி பகாஸிதா.
- 3104 அந்தக்³கா³ஹிகதி³ட்டி² ச, யா தி³ட்டி² த³ஸவத்து²கா;
அயங் தி³ட்டி²விபத்தீதி, து³விதா⁴ தி³ட்டி² தீ³பிதா.

- 3105 தே³ஸனாகா³மினிகா யா ச, பஞ்ச து²ல்லச்சயாதி³கா;
வுத்தாசாரவிபத்தீதி, ஆசாரகுஸலேன ஸா.
- 3106 குஹனாதி³ப்பவத்தோ ஹி, மிச்சா²ஜீவோதி தீ³பிதோ;
ஆஜீவபச்சயாபத்தி, ச²பி³தா⁴தி பகாஸிதா.
- 3107 கம்முனா லத்³தி⁴ஸீமாஹி, நானாஸங்வாஸகா தயோ;
உக்கி²த்தோ திவிதோ⁴ கம்ம-நானாஸங்வாஸகோ மதோ.
- 3108 அத⁴ம்மவாதி³பக்க²ஸ்மிங், நிஸின்னோவ விசிந்தியங்;
“த⁴ம்மவாதீ³ பனேதே”தி, உப்பன்னே பன மானஸே.
- 3109 நானாஸங்வாஸகோ நாம, லத்³தி⁴யாயங் பகாஸிதோ;
தத்ரட்டோ² பன ஸோ த்³வின்னங், கம்மங் கோபேதி ஸங்கி⁴கங்.
- 3110 ப³ஹிஸீமாக³தோ ஸீமா-நானாஸங்வாஸகோ மதோ;
நானாஸங்வாஸகா ஏவங், தயோ வுத்தா மஹேஸினா.
- 3111 சுதோ அனுபஸம்பன்னோ, நானாஸங்வாஸகா தயோ;
பி⁴க்க²னேகாத³ஸாப⁴ப³பா³, அஸங்வாஸா இமே ஸியுங்.
- 3112 அஸங்வாஸஸ்ஸ ஸப்³ப³ஸ்ஸ, ததா² கம்மாரஹஸ்ஸ ச;
ஸங்கே⁴ உம்மத்தகாதீ³னங், படிக்கே²போ ந ரூஹதி.
- 3113 ஸஸங்வாஸேகஸீமட்ட²-பகதத்தஸ்ஸ பி⁴க்கு²னோ;
வசனேன படிக்கே²போ, ரூஹதானந்தரஸ்ஸபி.
- 3114 பி⁴க்கு² ஆபஜ்ஜதாபத்திங், ஆகாரேஹி பனச்ச²ஹி;
வுத்தா ஸமணகப்பா ச, பஞ்ச, பஞ்ச விஸுத்³தி⁴யோ.
- 3115 நிதா³னங் புக்³க³லங் வத்து²ங், விதி⁴ங் பஞ்ஞத்தியா பன;
விபத்தாபத்தனாபத்தி, ஸமுட்டா²னநயம்பி ச.
- 3116 வஜ்ஜகம்மக்ரியாஸஞ்ஞா, சித்தாணத்திவிதி⁴ங் பன;
ததே²வங்க³விதா⁴னஞ்ச, வேத³னா குஸலத்திகங்.
- 3117 ஸத்தரஸவித⁴ங் ஏதங், த³ஸ்ஸெத்வா லக்க²ணங் பு³தோ⁴;
ஸிக்கா²பதே³ஸு யோஜெய்ய, தத்த² தத்த² யதா²ரஹங்.

3118 நிதா³னங் தத்த² வேஸாலீ, ததா² ராஜக³ஹங் புரங்;
ஸாவத்தா²ளவி கோஸம்பீ³, ஸக்கப⁴க்³கா³ பகாஸிதா.

3119 த³ஸ வேஸாலியா வுத்தா, ஏகவீஸங் கி³ரிப்³ப³ஜே;
ஸதானி ஹி ச² ஊனானி, தீணி ஸாவத்தி²யா ஸியுங்.

3120 ச² பனாளவியங் வுத்தா, அட்ட² கோஸம்பி³யங் கதா;
அட்ட² ஸக்கேஸு பஞ்ஞத்தா, தயோ ப⁴க்³கே³ பகாஸிதா.

3121 தேவீஸதிவிதா⁴ வுத்தா, ஸுதி³ன்னத⁴னியாத³யோ;
பி⁴க்³க²னங் பாதிமொக்க²ஸ்மிங், ஆதி³கம்மிகபுக்³க³லா.

3122 பி⁴க்கு²னீனங் ததா² பாதி-மொக்க²ஸ்மிங் ஆதி³கம்மிகா;
து²ல்லனந்தா³த³யோ ஸத்த, ஸப்³பே³ திங்ஸ ப⁴வந்தி தே.

3123 தருங் திமூலங் நவபத்தமேனங்;
த்³வயங்குரங் ஸத்தப²லங் ச²புப்ப²ங்;
ஜானாதி யோ த்³விப்பப⁴வங் த்³விஸாக²ங்;
ஜானாதி பஞ்ஞத்திமஸேஸதோ ஸோ.

3124 இதி பரமமிமங் வினிச்ச²யங்;
மது⁴ரபத³த்த²மனாகுலங் து யோ;
பட²தி ஸுணதி புச்ச²தே ச ஸோ;
ப⁴வதுபாலிஸமோ வினிச்ச²யே.

இதி வினயவினிச்ச²யே பகிண்ணகவினிச்ச²யகதா² ஸமத்தா.

கம்மட்டா²னபா⁴வனாவிதா⁴னகதா²

3125 பாமொக்கே² பாதிமொக்க²ஸ்மிங், முகே² மொக்க²ப்பவேஸனே;
ஸப்³புது³க்க²க்க²யே வுத்தே, வுத்தமேவிதரத்தயங்.

3126 இத³ங் சதுப்³பி³த⁴ங் ஸீலங், ஞத்வா தத்த² பதிட்டி²தோ;
ஸமாதி⁴ங் புன பா⁴வெத்வா, பஞ்ஞாய பரிமுச்சதி.

3127 த³ஸானுஸ்ஸதியோ வுத்தா, கஸிணா ச த³ஸாஸுபா⁴;
சதஸ்ஸோ அப்பமஞ்ஞாயோ, ததா²ருப்பா பரத்³வயங்.

3128 இச்சேவங் பன ஸப்³பி³ம்பி, சத்தாலீஸவித⁴ங் ஸியா;

கம்மட்டா²னங் ஸமுத்³தி³ட்ட²ங், மம்மட்டா²னங் மனோபு⁴னோ.

3129 உபசாரப்பனாதோ ச, ஜா²னபே⁴தா³ அதிக்கமா;
வட்³ட⁴னாவட்³ட⁴னா சாபி, ததா²ரம்மணபு⁴மிதோ.

3130 க³ஹணா பச்சயா பி⁴ய்யோ, ததா² சரியானுகூலதோ;
விஸேஸோ அயமேதேஸு, விஞ்ஞாதப்³போ³ விபா⁴வினா.

3131 அட்டா²னுஸ்ஸதியோ ஸஞ்ஞா-வவத்தா²னஞ்ச தத்தி²மே;
உபசாரவஹா, ஸேஸா, திங்ஸ ஜா²னவஹா மதா.

3132 பட²மஜ்ஜா²னிகா தத்த², அஸுபா⁴ காயக³தாஸதி;
ஆனாபானஞ்ச கஸிணா, சதுக்கஜ்ஜா²னிகா இமே.

3133 திகஜ்ஜா²னானி திஸ்ஸோவ, அப்பமஞ்ஞாத² பச்சி²மா;
சத்தாரோபி ச ஆருப்பா, சதுத்த²ஜ்ஜா²னிகா மதா.

3134 அதிக்கமோ த்³விதா⁴ வுத்தோ, அங்கா³ரம்மணதோபி ச;
சதுக்கதிகஜா²னேஸு, அங்கா³திக்கமதா மதா.

3135 சதுத்தா² அப்பமஞ்ஞாபி, அங்கா³திக்கமதோ ஸியா;
ஆரம்மணமதிக்கம்ம, ஆருப்பா பன ஜாயரே.

3136 கஸிணானி த்³ஸேவெத்த², வட்³டே⁴தப்³பா³னி யோகி³னா;
ஸேஸங் பன ச ஸப்³பி, ந வட்³டே⁴தப்³பமேவ தங்.

3137 நிமித்தாரம்மணா தத்த², கஸிணா ச த்³ஸாஸுபா⁴;
காயே ஸதானாபானஞ்ச, பா³வீஸதி ப⁴வந்திமே.

3138 ஸேஸானுஸ்ஸதியோ அட்ட², ஸஞ்ஞா தா⁴துவவத்த²னங்;
விஞ்ஞாணங் நேவஸஞ்ஞா ச, த்³ஸ த்³வே பா⁴வகோ³சரா.

3139 சதஸ்ஸோ அப்பமஞ்ஞாயோ, த்³வே ச ஆருப்பமானஸா;
இமே த்⁴ம்மா வினித்³தி³ட்டா², ச² நவத்தப்³பகோ³சரா.

3140 த்³ஸாஸுபா⁴ படிக்கூல-ஸஞ்ஞா காயக³தாஸதி;
தே³வேஸு ந பவத்தந்தி, த்³வாத்³ஸேவாதி பூ⁴மிதோ.

3141.

தானி த்³வாத்³ஸ பி⁴ய்யோ ச, ஆனாபானஸதீபி ச;
ஸப்³பு³ஸோ தேரஸ வாபி, ப்³ரஹ்மலோகே ந ஜாயரே.

3142 ட்²பெத்வா சதுராருப்பே, அருபாவசரே கிர;
அஞ்ஞே பன ந ஜாயந்தி, ஸப்³பே³ ஜாயந்தி மானுஸே.

3143 சதுத்த்²ங் கஸிணங் ஹித்வா, கஸிணா ச த்³ஸாஸுபா⁴;
தி³ட்டே²னேவ க்³ஹேதப்³பா³, புப்³பு³பா⁴கே³ ப்⁴வந்தி தே.

3144 ஆனாபானஞ்ச பு²ட்டே²ன, தி³ட்டே²ன தசபஞ்சகங்;
மாலுதோ தி³ட்ட²பு²ட்டே²ன, ஸுதேன செத்த்² ஸேஸகங்.

3145 ஆகாஸகஸிணஞ்செத்த்², ட்²பெத்வா கஸிணா நவ;
பட்²மாருப்பசித்தஸ்ஸ, பச்சயா பன ஜாயரே.

3146 ப்⁴வந்தி ஹி அபி⁴ஞ்ஞாணங், கஸிணானி த்³ஸாபி ச;
திஸ்ஸோபி அப்பமஞ்ஞாயோ, சதுத்த்²ஸ்ஸ து பச்சயா.

3147 ஹெட்டி²மஹெட்டி²மாருப்பங், பரஸ்ஸ ச பரஸ்ஸ ச;
நேவஸஞ்ஞா நிரோத்⁴ஸ்ஸ, பச்சயோதி பகாஸிதா.

3148 ஸப்³பே³ ஸுக²விஹாரஸ்ஸ, ப்⁴வனிஸ்ஸரணஸ்ஸ ச;
ததா² ப்⁴வஸுகா²னஞ்ச, பச்சயாதி ச தீ³பிதா.

3149 அஸுபா⁴ த்³ஸ விஞ்ஞெய்யா, ததா² காயக³தாஸதி;
அனுக்லா இமே ராக³-சரிதஸ்ஸ விஸேஸதோ.

3150 சதஸ்ஸோ அப்பமஞ்ஞாயோ, ஸவண்ணகஸிணா ததா²;
அனுக்லா இமே தோ³ஸ-சரிதஸ்ஸ பகாஸிதா.

3151 விதக்கசரிதஸ்ஸாபி, மோஹப்பகதினோபி ச;
ஆனாபானஸதேகாவ, ஸப்பாயாதி விபா⁴விதா.

3152 ஸஞ்ஞா சேவ வவத்தா²னங், மரணாபஸமே ஸதி;
பஞ்ஞாபகதினோ ஏதே, அனுக்லாதி தீ³பிதா.

3153 ஆதி³அனுஸ்ஸதிச்ச²க்கங், ஸத்³தா⁴சரிதவண்ணிதங்;
ஆருப்பா கஸிணா ஸேஸா, த்³ஸ ஸப்³பா³னுருபகா.

- 3154 ஏவங் பபே⁴த³தோ ஞத்வா, கம்மட்டா²னானி பண்டி³தோ;
சரியாயானுகூலங் து, தேஸு யங் அத்தனோ பன.
- 3155 தங் க³ஹெத்வான மேதா⁴வீ, த³ள்ஹங் கல்யாணமித்தகோ;
உச்சே²த³ங் பலிபோ³தா⁴னங், கத்வா பட²மமேவ ச.
- 3156 அனுருபே வஸந்தேன, விஹாரே தோ³ஸவஜ்ஜிதே;
பா⁴வெத்வா பட²மாதீ³னி, ஜா²னானி பன ஸப்³புஸோ.
- 3157 ததோ வுட்டா²ய ஸப்பஞ்ஞோ, ஜா²னம்ஹா பட²மாதி³தோ;
நாமருபவவத்தா²னங், கத்வா கங்க²ங் விதீரிய.
- 3158 உபக்லேஸே அமக்கோ³தி, த³ஸோபா⁴ஸாத³யோ பன;
மக்கோ³ விபஸ்ஸனாஞாணங், இதி ஜானாதி பண்டி³தோ.
- 3159 திண்ணங் தேஸங் வவத்தா²னே, கதே எத்தாவதா பன;
திண்ணங் பன ச ஸச்சானங், வவத்தா²னங் கதங் ஸியா.
- 3160 உத³யப்³புயப⁴ங்கா³ ச, ப⁴யாதீ³னவனிப்³பி³தா³;
முஞ்சிதுகம்யதாஞாணங், படிஸங்கா²னுபஸ்ஸனா.
- 3161 ஸங்கா²ருபெக்கா²ஞாணஞ்ச, நவமங் ஸச்சானுலோமிகங்;
அயங் “படிபதா³ஞாண-த³ஸ்ஸன”ந்தி பகாஸிதா.
- 3162 ததோ கொ³த்ரபு⁴சித்தஸ்ஸ, ஸமனந்தரமேவ ச;
ஸந்திமாரம்மணங் கத்வா, ஜாயதே ஞாணத³ஸ்ஸனங்.
- 3163 “ஞாணத³ஸ்ஸனஸுத்தீ⁴”தி, இத³ங் ஞாணங் பகாஸிதங்;
பச்சவெக்க²ணபரியந்தங், ப²லங் தஸ்ஸானுஜாயதே.
- 3164 தேனேவ ச உபாயேன, பா⁴வெந்தோ ஸோ புனப்புனங்;
பாபுணாதி யதா² பி⁴க்கு², ஸேஸமக்க³ப²லானி ச.
- 3165 இச்சேவமச்சந்தமவேச்ச த⁴ம்மங்;
வித்³த⁴ங்ஸயித்வாகுஸலங் அஸேஸங்;
விஸோஸயித்வான தயோ ப⁴வே ஸோ;
உபேதி ஸந்திங் நிருபாதி³ஸேஸங்.

3166 விஞ்ஞாஸக்கமதோ வாபி, புப்³பா³பரவஸேன வா;
யதி³ அக்க²ரப³ந்தே⁴ வா, அயுத்தங் விய தி³ஸ்ஸதி.

3167 தங் ததா² ந க³ஹேதப்³பங், க³ஹேதப்³பமதோ³ஸதோ;
மயா உபபரிக்கி²த்வா, கதத்தா பன ஸப்³ப³ஸோ.

3168 ஸெட்ட²ஸ்ஸ சோளரட்ட²ஸ்ஸ, நாபி⁴பூ⁴தே நிராகுலே;
ஸப்³ப³ஸ்ஸ பன லோகஸ்ஸ, கா³மே ஸம்பிண்டி³தே விய.

3169 கத³லீஸாலதாலுச்ச²-நாளிகேரவனாகுலே;
கமலுப்பலஸஞ்ச²ன்ன-ஸலிலாஸயஸோபி⁴தே.

3170 காவேரிஜலஸம்பாத-பரிபூ⁴தமஹீதலே;
இத்³தே⁴ ஸப்³ப³ங்க³ஸம்பன்னே, மங்க³லே பூ⁴தமங்க³லே.

3171 பவராகாரபாகார-பரிகா²பரிவாரிதே;
விஹாரே வெண்ஹுதா³ஸஸ்ஸ, த³ஸ்ஸனீயே மனோரமே.

3172 தீரந்தருஹவாதிர-தருராஜவிராஜிதே;
நானாதி³ஜக³ணாராமே, நானாராமமனோரமே.

3173 சாருபங்கஜஸங்கிண்ண-தளாகஸமலங்கதே;
ஸுரஸோத³கஸம்புண்ண-வரகூபோபஸோபி⁴தே.

3174 விசித்ரவிபுலச்சக்³க³-வரமண்ட³பமண்டி³தே;
ஆவாஸேஹி சனேகேஹி, அச்சந்தமுபஸோபி⁴தே.

3175 உப்பதேன ச தூ²பேன, பெ⁴த்வாவ த⁴ரணீதலங்;
ஜித்வாவாவஹஸந்தேன, கேலாஸஸிக²ரங் க²ரங்.

3176 ஸரத³ம்பு³த³ஸங்காஸே, த³ஸ்ஸனீயே ஸமுஸ்ஸிதே;
பஸாத³ஜனநே ரம்மே, பாஸாதே³ வஸதா மயா.

3177 வுத்தஸ்ஸ பு³த்த⁴ஸீஹேன, வினயஸ்ஸ வினிச்ச²யோ;
பு³த்த⁴ஸீஹங் ஸமுத்த³தி³ஸ்ஸ, மம ஸத³தி⁴விஹாரிகங்.

3178 கதோயங் பன பி⁴க்க²னங், ஹிதத்தா²ய ஸமாஸதோ;
வினயஸ்ஸாவபோ³த⁴த்த²ங், ஸுகே²னேவாசிரேன ச.

3179 அச்சுதச்சுதவிக்கந்தே, கலம்பு³குலனந்த³னே;
மஹிங் ஸமனுஸாஸந்தே, ஆரத்³தோ⁴ ச ஸமாபிதோ.

3180 யதா² ஸித்³தி⁴மயங் பத்தோ, அந்தராயங் வினா ததா²;
ஸப்³பே³ ஸிஜ்ஜ²ந்து ஸங்கப்பா, ஸத்தானங் த⁴ம்மஸங்யதா.

3181 யாவ திட்ட²தி லோகஸ்மிங், மந்தா³ரோ சாருகந்த³ரோ;
தாவ திட்ட²து பு³த்³த⁴ஸ்ஸ, ஸாஸனங் கலிஸாஸனங்.

3182 காலே ஸம்மா பவஸ்ஸந்து, வஸ்ஸங் வஸ்ஸவலாஹகா;
பாலயந்து மஹிபாலா, த⁴ம்மதோ ஸகலங் மஹிங்.

3183 இமங் ஸாரபூ⁴தங் ஹிதங் அத்த²யுத்தங்;
கரொந்தேன பத்தங் மயா யங் து புஞ்ஞங்;
அயங் தேன லோகோ முனிந்த³ப்பயாதங்;
ஸிவங் வீதேஸோகங் புரங் பாபுணாது.

இதி வினயவினிச்ச²யே கம்மட்டா²னபா⁴வனாவிதா⁴னகதா²

ஸமத்தா.

இதி தம்ப³பண்ணியேன பரமவெய்யாகரணேன திபிடகனயவிதி⁴குஸலேன
பரமகவிஜனஹத³யபது³மவனவிகஸனகரேன கவிவரவஸபே⁴ன
பரமரதிகரவரமது⁴ரவசனுக்³கா³ரேன உரக³புரேன பு³த்³த⁴த³த்தேன ரசிதோயங்
வினயவினிச்ச²யோ.

வினயவினிச்ச²யோ ஸமத்தோ.

நமோ தஸ்ஸ ப⁴க³வதோ அரஹதோ ஸம்மாஸம்பு³த்³த⁴ஸ்ஸ

உத்தரவினிச்சயோ

கந்தா²ரம்ப⁴கதா²

1. ஸப்³ஸத்துத்தமங் தீ⁴ரங், வந்தி³த்வா ஸிரஸா ஜினங்;
த⁴ம்மஞ்சாத⁴ம்மவித்³த⁴ங்ஸங், க³ணமங்க³ணனாஸனங்.
2. யோ மயா ரசிதோ ஸாரோ, வினயஸ்ஸ வினிச்ச²யோ;
தஸ்ஸ தா³னி கரிஸ்ஸாமி, ஸப்³பா³னுத்தரமுத்தரங்.
3. ப⁴ணதோ பட²தோ பயுஞ்ஜதோ;
ஸுணதோ சிந்தயதோ பனுத்தரங்;
பரமங் அபு³த்³த⁴ பு³த்³தி⁴வட்³ட⁴னங்;
வத³தோ மே நிரதா நிபோ³த⁴த².

மஹாவிப⁴ங்க³ஸங்க³ஹகதா²

4. மேது²னங் படிஸேவந்தோ, கதி ஆபத்தியோ பு²ஸே;
மேது²னங் படிஸேவந்தோ, திஸ்ஸோ ஆபத்தியோ பு²ஸே.
5. ப⁴வே பாராஜிகங் கெ²த்தே, யேபு⁴ய்யக்கா²யிதே பன;
து²ல்லச்சயங் முகே² வட்ட-கதே வுத்தங் து து³க்கடங்.
6. அதி³ன்னங் ஆதி³யந்தோ யோ;
கதி ஆபத்தியோ பு²ஸே;
அதி³ன்னங் ஆதி³யந்தோ ஸோ;
திஸ்ஸோ ஆபத்தியோ பு²ஸே.
7. பஞ்சமாஸக³க⁴னே வாபி, அதி⁴கே வா பராஜயோ;
மாஸே வா து³க்கடங் ஊனே, மஜ்ஜே² து²ல்லச்சயங் ததோ.
8. மனுஸ்ஸஜாதிங் மாரெந்தோ;
கதி ஆபத்தியோ பு²ஸே;
மனுஸ்ஸஜாதிங் மாரெந்தோ;
திஸ்ஸோ ஆபத்தியோ பு²ஸே.
9. மனுஸ்ஸமுத்³தி³ஸ்ஸோபாதங், க²ணனே து³க்கடங் ஸியா;
து³க்கே² து²ல்லச்சயங் ஜாதே, மதே பாராஜிகங் ஸியா.
10. அஸந்தங் உத்தரிங் த⁴ம்மங், வத³மத்தூபனாயிகங்;
கதி ஆபஜ்ஜதாபத்தீ? திஸ்ஸோ ஆபத்தியோ பு²ஸே.
11. அஸந்தங் உத்தரிங் த⁴ம்மங், ப⁴ணந்தஸ்ஸ பராஜயோ;
து²ல்லச்சயங் பரியாயே, ஞாதே, நோ சே து து³க்கடங்.

பாராஜிககதா².

12. ப⁴ண ஸுக்கங் விமோசெந்தோ;
கதி ஆபத்தியோ பு²ஸே;
ஸுண ஸுக்கங் விமோசெந்தோ;
திஸ்ஸோ ஆபத்தியோ பு²ஸே.
13. க³ருகங் யதி³ சேதேதி, உபக்கமதி முச்சதி;

த³வங்கே³ து²ல்லச்சயங் வுத்தங், பயோகே³ து³க்கடங் ஸியா.

14. இதோ பட்டா²ய முஞ்சித்வா, பஞ்ஹாபுச்ச²னமத்தகங்;
விஸ்ஸஜ்ஜனவஸேனேவ, ஹோதி அத்த²வினிச்ச²யோ.
15. இத்தி²யா காயஸங்ஸக்³கே³, திஸ்ஸோ ஆபத்தியோ பு²ஸே;
ஆமஸந்தஸ்ஸ காயேன, காயங் து க³ருகங் ஸியா.
16. காயேன காயப³த்³த⁴ங் து, பு²ஸங் து²ல்லச்சயங் பு²ஸே;
படிப³த்³தே⁴ன காயேன, படிப³த்³தே⁴ து து³க்கடங்.
17. இத்தி²ங் து³ட்²ல்லவாசாஹி, திஸ்ஸோ ஒபா⁴ஸதோ ஸியுங்;
வண்ணாவண்ணங் வத³ங் த்³வின்னங், மக்³கா³னங் க³ருகங் பு²ஸே.
18. வண்ணாதி³ப⁴ஞ்ஞே ஆதி³ஸ்ஸ, உப்³ப⁴ஜாணுமத⁴க்க²கங்;
ஹோதி து²ல்லச்சயங், காய-படிப³த்³தே⁴ து து³க்கடங்.
19. அத்தகாமசரியாய, வத³தோ வண்ணமித்தி²யா;
ஸந்திகே க³ருகங் ஹோதி, ஸசே ஜானாதி ஸா பன.
20. ஸந்திகே பண்ட³கஸ்ஸாபி, தஸ்ஸ து²ல்லச்சயங் ஸியா;
திரச்சா²னக³தஸ்ஸாபி, ஸந்திகே து³க்கடங் மதங்.
21. படிக்க³ண்ஹனவீமங்ஸா, பச்சாஹரணகத்திகே;
ஸஞ்சரித்தங் ஸமாபன்னே, க³ருகங் நித்³தி³ஸே பு³தோ⁴.
22. தஸ்ஸ த்³வங்க³ஸமாயோகே³, ஹோதி து²ல்லச்சயங் ததா²;
அங்கே³ ஸதி பனேகஸ்மிங், ஹோதி ஆபத்தி து³க்கடங்.
23. ஸங்யாசிகாய ச குடிங்;
விஹாரஞ்ச மஹல்லகங்;
காராபேதி ஸசே பி⁴க்கு²;
திஸ்ஸோ ஆபத்தியோ பு²ஸே.
24. பயோகே³ து³க்கடங் வுத்தங், ஏகபிண்டே³ அனாக³தே;
ஹோதி து²ல்லச்சயங், தஸ்மிங், பிண்டே³ க³ருகமாக³தே.
25. பாராஜிகேன த⁴ம்மேன, பி⁴க்கு²ங் அமூலகேனித⁴;

அனுத்³த⁴ங்ஸேதி யோ தஸ்ஸ, திஸ்ஸோ ஆபத்தியோ ஸியுங்.

26. ஓகாஸங் ந ச காரெத்வா, ஹுத்வா சாவனசேதனோ;
ஸசே சோதே³தி ஸங்கா⁴தி³-ஸேஸேன ஸஹ து³க்கடங்.
27. ஓகாஸங் பன காரெத்வா, ஹுத்வா அக்கோஸசேதனோ;
சோதே³தி ஓமஸவாதே³, பாசித்திங் பரிதீ³பயே.
28. அனந்தரஸமானோவ , நவமே அஞ்ஞபா⁴கி³யே;
ஸப்³போ³ ஆபத்திபே⁴தோ³ ஹி, நத்தி² காசி விஸேஸதா.
29. ஸங்க⁴ஸ்ஸ பே⁴த³கோ பி⁴க்கு², யாவததியகங் பன;
ஸமனுபா⁴ஸனாயேவ, கா³ஹங் ந படினிஸ்ஸஜங்.
30. ஞுத்தியா து³க்கடங், த்³வீஹி, கம்மவாசாஹி து²ல்லதங்;
கம்மவாசாய ஓஸானே, ஆபத்தி க³ருகங் ஸியா.
31. பே⁴தா³னுவத்தகே சேவ, து³ப்³ப³சே குலதூ³ஸகே;
ஸங்க⁴பே⁴த³கதுல்யோவ, ஹோதி ஆபத்தினிச்ச²யோ.

ஸங்கா⁴தி³ஸேஸகதா².

32. அதிக்கமந்தோ அதிரேகசீவரங்;
த³ஸாஹமாபஜ்ஜதி ஏகமேவ;
நிஸ்ஸக்³கி³பாசித்தியமேகரத்திங்;
திசீவரேனாபி வினா வஸந்தோ.
33. மாஸங் அதிக்கமந்தோ ஹி, க³ஹெத்வா காலசீவரங்;
ஏகங் ஆபஜ்ஜதாபத்திங், நிஸ்ஸக்³கி³யமுதீ³ரிதங்.
34. அஞ்ஞாதிகாய யங் கிஞ்சி;
புராணசீவரங் பன;
தோ⁴வாபேதி ஸசே தஸ்ஸ;
ஹொந்தி ஆபத்தியோ து³வே.
35. தோ⁴வாபேதி பயோக³ஸ்மிங், து³க்கடங் ஸமுதா³ஹடங்;
நிஸ்ஸக்³கி³யாவ பாசித்தி, ஹோதி தோ⁴வாபிதே பன.
36. அஞ்ஞாதிகாய ஹத்த²ம்ஹா, சீவரங் படிக³ண்ஹதோ;

க³ஹணே து³க்கடங் வுத்தங், பாசித்தி க³ஹிதே ஸியா.

37. அஞ்ஞாதகங் க³ஹபதிங், க³ஹபதானிமேவ வா;
சீவரங் விஞ்ஞாபெந்தோ த்³வே, பி⁴க்கு² ஆபத்தியோ பு²ஸே.
38. விஞ்ஞாபேதி பயோக³ஸ்மிங், து³க்கடங் பரிகித்திதங்;
விஞ்ஞாபிதே ச நிஸ்ஸக்³கி³, பாசித்தி பரியாபுதா.
39. பி⁴க்கு² சீவரமஞ்ஞாதிங், விஞ்ஞாபெந்தோ தது³த்தரிங்;
பயோகே³ து³க்கடங், விஞ்ஞா-பிதே நிஸ்ஸக்³கி³யங் பு²ஸே.
40. அஞ்ஞாதகங் கஞ்சி உபாஸகங் வா;
உபாஸிகங் வா உபஸங்கமித்வா;
புப்³பே³வ ஹுத்வா பன அப்பவாரிதோ;
வத்தே² விகப்பங் படிபஜ்ஜமானோ.
41. து³வே ஆபஜ்ஜதாபத்தீ, பயோகே³ து³க்கடங் ஸியா;
விகப்பங் பன ஆபன்னே, நிஸ்ஸக்³கி³யமுதீ³ரிதங்.
42. அஞ்ஞாதிங் உபஸங்கம்ம, புப்³பே³யேவப்பவாரிதோ;
விகப்பங் சீவரே பி⁴க்கு², ஆபஜ்ஜந்தோ து³வே பு²ஸே.
43. ததா²திரேகதிக்க²த்துங், சோத³னாய ச பி⁴க்கு² சே;
க³ந்த்வாதிரேகச²க்க²த்துங், டா²னேனபி ச சீவரங்.
44. நிப்பா²தே³தி ஸசே தஸ்ஸ, ஹொந்தி ஆபத்தியோ து³வே;
பயோகே³ து³க்கடங், தஸ்ஸ, லாபே⁴ நிஸ்ஸக்³கி³யங் ஸியா.

கதி²னவக்³கோ³ பட²மோ.

45. தோ³ஸா கோஸியவக்³க³ஸ்ஸ, த்³வெத்³வேஆதீ³ஸு பஞ்சஸு;
பயோகே³ து³க்கடங் வுத்தங், லாபே⁴ நிஸ்ஸக்³கி³யங் ஸியா.
46. க³ஹெத்வேளகலோமானி, தியோஜனமதிக்கமங்;
து³க்கடங் பட²மே பாதே³, நிஸ்ஸக்³கி³ங் து³தியே பு²ஸே.
47. பி⁴க்கு² பி⁴க்கு²னியஞ்ஞாய, தோ⁴வாபேதேளலோமகங்;
பயோகே³ து³க்கடங், தஸ்ஸ, தோ⁴தே நிஸ்ஸக்³கி³யங் ஸியா.

48. ரூபியங் படி³ண்ஹந்தோ, த்³வே பனாபத்தியோ பு²ஸே;
பயோகே³ து³க்கடங் வுத்தங், நிஸ்ஸக்³கி³ க்³ஹிதே ஸியா.
49. நானாகாரங் ஸமாபஜ்ஜங், ஸங்வோஹாரஞ்ச ரூபியே;
ஸமாபன்னே ச நிஸ்ஸக்³கி³ங், பயோகே³ து³க்கடங் பு²ஸே.
50. நானப்பகாரகங் பி⁴க்கு², ஆபஜ்ஜே கயவிக்கயங்;
பயோகே³ து³க்கடங், தஸ்மிங், கதே நிஸ்ஸக்³கி³யங் பு²ஸே.
- கோஸியவக்³கோ³ து³தியோ.
51. பத்தங் அதிக்கமெந்தஸ்ஸ, த்³ஸாஹமதிரேககங்;
தஸ்ஸ நிஸ்ஸக்³கி³யாபத்தி, ஹோதி ஏகாவ பி⁴க்கு²னோ.
52. அபஞ்சப³ந்த⁴னே பத்தே, விஜ்ஜமானேபி பி⁴க்கு²னோ;
அஞ்ஞங் பன நவங் பத்தங், சேதாபேதி ஸசே பன.
53. த்³வே பனாபத்தியோ பி⁴க்கு², ஆபஜ்ஜதி, ந ஸங்ஸயோ;
பயோகே³ து³க்கடங், தஸ்ஸ, லாபே⁴ நிஸ்ஸக்³கி³யங் பு²ஸே.
54. படி³க்³ஹெத்வா பே⁴ஸஜ்ஜங், ஸத்தாஹங் யோ அதிக்கமே;
ஏகங் நிஸ்ஸக்³கி³யாபத்திங், ஆபஜ்ஜதி ஹி ஸோ பன.
55. அகாலே பரியேஸந்தோ, வஸ்ஸஸாடிகசீவரங்;
பயோகே³ து³க்கடங், தஸ்ஸ, லாபே⁴ நிஸ்ஸக்³கி³யங் பு²ஸே.
56. பி⁴க்கு²னோ சீவரங் தத்வா, அச்சி²ந்த³ந்தோ து³வே பு²ஸே;
பயோகே³ து³க்கடங் வுத்தங், ஹடே நிஸ்ஸக்³கி³யங் ஸியா.
57. விஞ்ஞாபெத்வா ஸயங் ஸுத்தங், தந்தவாயேஹி சீவரங்;
வாயாபேதி ஸசே பி⁴க்கு², த்³வே பனாபத்தியோ பு²ஸே.
58. யோ பனஞ்ஞாதகஸ்ஸேவ, தந்தவாயே ஸமேச்ச சே;
விகப்பங் சீவரே பி⁴க்கு², ஆபஜ்ஜங் அப்பவாரிதோ.
59. த்³வே பனாபத்தியோ ஸோ ஹி, ஆபஜ்ஜதி, ந ஸங்ஸயோ;
பயோகே³ து³க்கடங், தஸ்ஸ, லாபே⁴ நிஸ்ஸக்³கி³யங் ஸியா.

படிக்க³ஹெத்வா அச்சேக-ஸஞ்ஞிதங் பன சீவரங்;
காலங் அதிக்கமெந்தோ தங், ஏகங் நிஸ்ஸக்³கியங் பு²ஸே.

61. திண்ணமஞ்ஞதரங் வத்த²ங், நித³ஹித்வா க⁴ரேதி⁴கங்;
சா²ரத்ததோ வினா தேன, வஸங் நிஸ்ஸக்³கியங் பு²ஸே.
62. ஜானங் பரிணதங் லாப⁴ங், ஸங்கி⁴கங் அத்தனோ பன;
பரிணாமேதி சே பி⁴க்கு², த்³வே பனாபத்தியோ பு²ஸே.
63. பயோகே³ து³க்கடங் ஹோதி, நிஸ்ஸக்³கி³ பரிணாமிதே;
ஸப்³புத்த² அப்பனாவார-பரிஹானி கதா மயா.

பத்தவக்³கோ³ ததியோ.

திங்ஸனிஸ்ஸக்³கியகதா².

64. வத³ந்தஸ்ஸ முஸாவாத³ங், பஞ்ச ஆபத்தியோ ஸியுங்;
மனுஸ்ஸுத்தரித⁴ம்மே து, அபு⁴தஸ்மிங் பராஜயோ.
65. சோத³னாய க³ருங் பி⁴க்கு²ங், அமூலந்திமவத்து²னா;
பரியாயவசனே ஞாதே, து²ல்லச்சயமுதீ³ரிதங்.
66. நோ சே படிவிஜானாதி, து³க்கடங் ஸமுதா³ஹடங்;
ஸம்பஜானமுஸாவாதே³, பாசித்தி பரிதீ³பிதா.
67. ஆபத்தியோ து³வே வுத்தா, பி⁴க்கு²ஸ்ஸோமஸதோ பன;
பாசித்தி உபஸம்பன்னங், து³க்கடங் இதரங் ஸியா.
68. பேஸுஞ்ஞஹரணே த்³வேபி, ஹொந்தி, பாசித்தியங் பன;
உபஸம்பன்னபேஸுஞ்ஞே, ஸேஸே ஆபத்தி து³க்கடங்.
69. பத³ஸோனுபஸம்பன்னங் , த⁴ம்மங் வாசேதி சே து³வே;
பயோகே³ து³க்கடங், பாதே³, பாதே³ பாசித்தியங் ஸியா.
70. திரத்தானுபஸம்பன்ன-ஸஹஸெய்யாய உத்தரிங்;
பயோகே³ து³க்கடங் வுத்தங், பன்னே பாசித்தியங் ஸியா.
71. கப்பேதி மாதுகா³மேன, ஸஹஸெய்யங் ஸசே பன;
த்³வே ஸோ ஆபஜ்ஜதாபத்தீ, ரத்தியங் து³க்கடாத³யோ.

72. உத்³த⁴ங் ச²ப்பஞ்சவாசாஹி, த⁴ம்மங் தே³ஸேதி இத்தி²யா;
பயோகே³ து³க்கடங், பாதே³, பாதே³ பாசித்தியங் ஸியா.
73. பூ⁴தங் அனுபஸம்பன்னே, மனுஸ்ஸுத்தரித⁴ம்மகங்;
ஆரோசேதி ஸசே தஸ்ஸ, ஹொந்தி த்³வே து³க்கடாத³யோ.
74. வத³ங் அனுபஸம்பன்னே, து³ட்டு²ல்லாபத்திமஞ்ஞதோ;
பயோகே³ து³க்கடங் தஸ்ஸ, பாசித்தாரோசிதே ஸியா.
75. பத²விங் க²ணதோ தஸ்ஸ, பயோகே³ து³க்கடங் மதங்;
பஹாரே ச பஹாரே ச, பாசித்தி பரியாபுதா.

முஸாவாத³வக்³கோ³ பட²மோ.

76. பூ⁴தகா³மங் து பாதெந்தோ, த்³வே பனாபத்தியோ பு²ஸே;
பயோகே³ து³க்கடங், தஸ்ஸ, பாதே பாசித்தி தீ³பிதா.
77. அஞ்ஞேனஞ்ஞங் வத³ந்தஸ்ஸ, த்³வே ஸியுங் அஞ்ஞவாத³கே;
அரோபிதே து³க்கடங் து, ஹொதி பாசித்தி ரோபிதே.
78. உஜ்ஜா²பெந்தோ பரங் பி⁴க்கு²ங், த்³வே பனாபத்தியோ பு²ஸே;
பயோகே³ து³க்கடங், உஜ்ஜா²-பிதே பாசித்தியங் ஸியா.
79. அஜ்ஜோ²காஸே து மஞ்சாதி³ங், ஸந்த²ரித்வான ஸங்கி⁴கங்;
பக்கமந்தோ அனாபுச்சா², ஆபத்திங் து³வித⁴ங் பு²ஸே.
80. லெட்³பாதே அதிக்ந்தே, பாதே³ன பட²மேன து;
து³க்கடங், து³தியேனாபி, பாசித்தி பரிதீ³பயே.
81. விஹாரே ஸங்கி⁴கே ஸெய்யங், ஸந்த²ரித்வா அனுத்³த⁴ரங்;
அனாபுச்சா² பக்கமந்தோ, து³விதா⁴பத்தியோ பு²ஸே.
82. பரிக்கே²பே அதிக்ந்தே, பாதே³ன பட²மேன து;
து³க்கடங் பன உத்³தி³ட்ட²ங், பாசித்தி து³தியேன து.
83. விஹாரே ஸங்கி⁴கே ஜானங், புப்³பு³பக³தபி⁴க்கு²கங்;
ஸெய்யங் கப்பயதோ ஹொந்தி, பயோகே³ து³க்கடாத³யோ.

ஸங்கி⁴கா குபிதோ பி⁴க்கு²ங், நிக்கட்³ட⁴தி விஹாரதோ;
பயோகே³ து³க்கடங் வுத்தங், ஸேஸங் நிக்கட்³டி⁴தே ஸியா.

85. விஹாரே ஸங்கி⁴கே பி⁴க்கு², வேஹாஸகுடியுபரி;
ஆஹச்சபாத³கே ஸீத³ங், பு²ஸே த்³வே து³க்கடாத³யோ.
86. அதி⁴ட்டி²த்வா த்³வத்திபரியாயே, உத்தரிம்பி அதி⁴ட்ட²தோ;
பயோகே³ து³க்கடங் ஹோதி, பாசித்தி பனதி⁴ட்டி²தே.
87. ஜானங் ஸப்பாணகங் தோயங், திணங் வா ஸிஞ்சதோ பன;
பயோகே³ து³க்கடங் ஹோதி, ஸித்தே பாசித்தியங் ஸியா.

பூ⁴தகா³மவக்³கோ³ து³தியோ.

88. பு²ஸே பி⁴க்கு²னியோ பி⁴க்கு², ஓவத³ந்தோ அஸம்மதோ;
பயோகே³ து³க்கடங், தஸ்ஸ, பாசித்தோவதி³தே ஸியா.
89. து³தியே ததியே சேவ, சதுத்தே²பி ச ஸப்³பு³ஸோ;
பட²மேன ஸமானாவ, ஆபத்தீனங் விபா⁴க³தா.
90. சீவரங் பி⁴க்கு² அஞ்ஞாதி-காய தெ³ந்தோ து³வே பு²ஸே;
பயோகே³ து³க்கடங் வுத்தங், தி³ன்னே பாசித்தியங் ஸியா.
91. அஞ்ஞாதிகபி⁴க்கு²னியா , பி⁴க்கு² ஸிப்³பெ³ய்ய சீவரங்;
பயோகே³ து³க்கடங் தஸ்ஸ, பாசித்தி பன ஸிப்³பி³தே.
92. அத்³தா⁴னஞ்ஞத்ர ஸமயா, பி⁴க்கு² பி⁴க்கு²னியா ஸஹ;
ஸங்விதா⁴ய து க³ச்ச²ந்தோ, பு²ஸே த்³வே து³க்கடாத³யோ.
93. நாவேகங் அபி⁴ருஹந்தோ, பி⁴க்கு² பி⁴க்கு²னியா ஸஹ;
ஸங்விதா⁴ய பு²ஸே த்³வேபி, பயோகே³ து³க்கடாத³யோ.
94. ஜானங் பி⁴க்கு²னியா பிண்ட³-பாதங் து பரிபாசிதங்;
பு⁴ஞ்ஜந்தோ து³விதா⁴பத்தி-மாபஜ்ஜதி, ந ஸங்ஸயோ.
95. “பு⁴ஞ்ஜிஸ்ஸாமீ”தி சே ப⁴த்தங், படிக்க³ண்ஹாதி து³க்கடங்;
அஜ்ஜோ²ஹாரபயோகே³ஸு, பாசித்தி பரிதீ³பிதா.
96. பி⁴க்கு² பி⁴க்கு²னியா ஸத்³தி⁴ங், நிஸஜ்ஜங் து ரஹோ பன;

கப்பெந்தோ ஹி பு²ஸே த்³வேபி, பயோகே³ து³க்கடாத்³யோ.

ஓவாத்³வக்³கோ³ ததியோ.

97. தது³த்தரிங் ஆவஸத²-பிண்ட³ங் து பரிபு⁴ஞ்ஜதோ;
அனந்தரஸ்ஸ வக்³க³ஸ்ஸ, நவமேன ஸமோ நயோ.
98. து³தியே ததியே சாபி, விஸேஸோ நத்தி² கோசிபி;
அனந்தரஸமானாவ, ஆபத்தீனங் விபா⁴க³தா.
99. த்³வத்திபத்தே க³ஹெத்வான, க³ண்ஹதோ ஹி தது³த்தரிங்;
பயோகே³ து³க்கடங் வுத்தங், பாசித்தி க³ஹிதே ஸியா.
100. பஞ்சமே பட²மேனேவ, ஸமோ ஆபத்தினிச்ச²யோ;
ச²ட்டே² அனதிரித்தேன, பு⁴த்தாவிங் து பவாரிதங்.
101. அபி⁴ஹட்டு²ங் பவாரெந்தோ, த்³வே பனாபத்தியோ பு²ஸே;
வசனேன ச தஸ்ஸேவ, “பு⁴ஞ்ஜிஸ்ஸாமீ”தி க³ண்ஹதி.
102. க³ஹணே து³க்கடங் தஸ்ஸ, பிடகே ஸமுதா³ஹடங்;
போ⁴ஜனஸ்ஸ பனோஸானே, பாசித்தி பரியாபுதா.
103. ஸத்தமே அட்ட²மே சேவ, நவமே த்³ஸமேபி ச;
பட²மேன ஸமானாவ, ஆபத்தீனங் விபா⁴க³தா.

போ⁴ஜனவக்³கோ³ சதுத்தோ².

104. அசேலகாதி³னோ தெ³ந்தோ, ஸஹத்தா² போ⁴ஜனாதி³கங்;
பயோகே³ து³க்கடங் பத்தோ, தி³ன்னே பாசித்தியங் பு²ஸே.
105. தா³பெத்வா வா அதா³பெத்வா, உய்யோஜெந்தோ து³வே பு²ஸே;
பயோகே³ து³க்கடங், தஸ்மிங், பாசித்துய்யோஜிதே ஸியா.
106. நிஸஜ்ஜங் பி⁴க்கு² கப்பெந்தோ, குலே பன ஸபோ⁴ஜனே;
ஆபத்தியோ பு²ஸே த்³வேபி, பயோகே³ து³க்கடாத்³யோ.
107. சதுத்தே² பஞ்சமே வாபி, விஸேஸோ நத்தி² கோசிபி;
ததியேன ஸமானாவ, ஆபத்திக³ணனா ஸியா.

108. ஸந்தங் பி⁴க்கு²ங் அனாபுச்சா², ஸப⁴த்தோ ச நிமந்திதோ;
குலேஸு பன சாரித்தங், ஆபஜ்ஜந்தோ து³வே பு²ஸே.
109. பட²மேன ச பாதே³ன, உம்மாராதிக்கமே பன;
து³க்கடங் பிடகே வுத்தங், பாசித்தி து³தியேன து.
110. தது³த்தரிங் து பே⁴ஸஜ்ஜங், விஞ்ஞாபெந்தோ து³வே பு²ஸே;
பயோகே³ து³க்கடங், விஞ்ஞா-பிதே பாசித்தியங் ஸியா.
111. உய்யுத்தங் த³ஸ்ஸனத்தா²ய, க³ச்ச²ந்தோ த்³வே பு²ஸே ப³லங்;
க³ச்ச²ந்தோ து³க்கடங் வுத்தங், ஹோதி பாசித்தி பஸ்ஸதோ.
112. அதிரேகதிரத்தங் து, ஸேனாய வஸதோ து³வே;
பயோகே³ து³க்கடங் வுத்தங், பாசித்தி வஸிதே ஸியா.
113. உய்யோதி⁴கங் து க³ச்ச²ந்தோ, த்³வே பனாபத்தியோ பு²ஸே;
க³ச்ச²ந்தோ து³க்கடங் வுத்தங், ஹோதி பாசித்தி பஸ்ஸதோ.

அசேலகவக்³கோ³ பஞ்சமோ.

114. ஸுரங் வா பன மேரெய்யங், பிவந்தோ த்³வே பு²ஸே முனி;
க³ண்ணதோ து³க்கடங் பாதுங், பீதே பாசித்தியங் ஸியா.
115. பி⁴க்க²ங்கு³லிபதோதே³ன, ஹாஸெந்தோ த்³வே பு²ஸே ஹவே;
பயோகே³ து³க்கடங் தஸ்ஸ, பாசித்தி ஹஸிதே ஸியா.
116. கீளந்தோ உத³கே பி⁴க்கு², த்³வே பனாபத்தியோ பு²ஸே;
து³க்கடங் கொ³ப்ப²கா ஹெட்டா², பாசித்துபரிகொ³ப்ப²கே.
117. யோ பனாத³ரியங் பி⁴க்கு², கரொந்தோ த்³வே பு²ஸே ஹவே;
பயோகே³ து³க்கடங் வுத்தங், கதே பாசித்தியங் ஸியா.
118. பி⁴ங்ஸாபெந்தோ ஹவே பி⁴க்கு², த்³வே பனாபத்தியோ பு²ஸே;
பயோகே³ து³க்கடங், பி⁴ங்ஸா-பிதே பாசித்தியங் ஸியா.
119. ஜோதிங் ஸமாத³ஹித்வான, விஸிப்³பெ³ந்தோ து³வே பு²ஸே;
பயோகே³ து³க்கடங் வுத்தங், பாசித்தியங் விஸீவிதே.

ஓரஸோ அத்³த⁴மாஸஸ்ஸ, ந்ஹாயந்தோ த்³வே பு²ஸே ஹவே;
பயோகே³ து³க்கடங், ந்ஹான-ஸ்ஸோஸானே இதரங் ஸியா.

121. து³ப்³பு³ண்ணகரணானங் து, திண்ணமேகமனாதி³ய;
சீவரங் பரிபு⁴ஞ்ஜந்தோ, த்³வே பு²ஸே து³க்கடாத்³யோ.

122. சீவரங் பி⁴க்கு²ஆதீ³னங், விகப்பெத்வா அனுத்³த⁴ரங்;
த்³வே பு²ஸே பரிபு⁴ஞ்ஜந்தோ, பயோகே³ து³க்கடாத்³யோ.

123. பி⁴க்கு²ஸ்ஸாபனிதெ⁴ந்தோ த்³வே, பு²ஸே பத்தாதி³கங் பன;
பயோகே³ து³க்கடங், தஸ்மிங், ஸேஸாபனிஹிதே ஸியா.

ஸுராபானவக்³கோ³ ச²ட்டோ².

124. ஸஞ்சிச்ச ஜீவிதா பாணங், வோரோபெந்தோ தபோத⁴னோ;
ஆபத்தியோ சதஸ்ஸோவ, ஆபஜ்ஜதி, ந ஸங்ஸயோ.

125. அனோதி³ஸ்ஸகமோபாதங், க²ணதோ ஹோதி து³க்கடங்;
மனுஸ்ஸோ மரதி தஸ்மிங், பதித்வா சே பராஜயோ.

126. யக்கோ² வாபி திரச்சா²ன-க³தோ மனுஸ்ஸவிக்³க³ஹோ;
பதித்வா மரதீ பேதோ, தஸ்ஸ து²ல்லச்சயங் ஸியா.

127. திரச்சா²னக³தே தஸ்மிங், நிபதித்வா மதே பன;
தஸ்ஸ பாசித்தியாபத்தி, பஞ்ஞத்தா படுபு³த்³தி⁴னா.

128. ஜானங் ஸப்பாணகங் தோயங், பரிபு⁴ஞ்ஜங் து³வே பு²ஸே;
பயோகே³ து³க்கடங் தஸ்ஸ, பு⁴த்தே பாசித்தியங் ஸியா.

129. நிறதாதி⁴கரணங் ஜானங், உக்கோடெந்தோ து³வே பு²ஸே;
பயோகே³ து³க்கடங் வுத்தங், பாசித்துக்கோடிதே ஸியா.

130. ஜானங் பி⁴க்கு²ஸ்ஸ து³ட்டு²ல்லங், சா²தெ³ந்தோ பன வஜ்ஜகங்;
ஏகமாபஜ்ஜதாபத்திங், பாசித்திமிதி தீ³பிதங்.

131. ஊனவீஸதிவஸ்ஸங் து, கரொந்தோ உபஸம்பத³ங்;
பயோகே³ து³க்கடங் பத்தோ, ஸேஸா ஸம்பாதி³தே ஸியா.

132. ஜானங் து தெ²ய்யஸத்தே²ன, ஸங்விதா⁴ய ஸஹேவ ச;

ததே²வ மாதுகா³மேன, மக்³க³ங் து படிபஜ்ஜதோ.

133. த்³வே பனாபத்தியோ ஹொந்தி, பயோகே³ து³க்கடங் மதங்;
படிபன்னை பனுத்³தி³ட்ட²ங், பாசித்தியமனந்தரங்.

134. அச்சஜங் பாபிகங் தி³ட்டி²ங், ஞத்தியா து³க்கடங் பு²ஸே;
கம்மவாசாய ஓஸானே, ஹோதி பாசித்தி பி⁴க்கு²னோ.

135. ததா²கடானுத⁴ம்மேன, ஸங்பு⁴ஞ்ஜந்தோ து³வே பு²ஸே;
பயோகே³ து³க்கடங் தஸ்ஸ, பு⁴த்தே பாசித்தியங் ஸியா.

136. நாஸிதங் ஸமணுத்³தே³ஸங்பலாபெந்தோ து³வே பு²ஸே;
பயோகே³ து³க்கடங் வுத்தங், பாசித்தி உபலாபிதே.

ஸப்பாணகவக்³கோ³ ஸத்தமோ.

137. வுச்சமானஸ்ஸ பி⁴க்கு²ஸ்ஸ, பி⁴க்கூ²ஹி ஸஹத⁴ம்மிகங்;
“ந ஸக்கி²ஸ்ஸாமி”இச்சேவங், ப⁴ணதோ து³க்கடாத³யோ.

138. வினயங் து விவண்ணெந்தோ, த்³வே பனாபத்தியோ பு²ஸே;
பயோகே³ து³க்கடங் தஸ்ஸ, பாசித்தேவ விவண்ணிதே.

139. மோஹெந்தோ த்³வே பு²ஸே, மோஹே, து³க்கடங் து அரோபிதே;
ரோபிதே பன மோஹஸ்மிங், பாசித்தியமுதீ³ரிதங்.

140. பஹாரங் குபிதோ தெ³ந்தோ, பி⁴க்கு²ஸ்ஸ த்³வே பு²ஸே ஹவே;
பயோகே³ து³க்கடங் வுத்தங், பாசித்தி பஹடே ஸியா.

141. பி⁴க்கு²ஸ்ஸ குபிதோ பி⁴க்கு², உக்³கி³ரங் தலஸத்திகங்;
த்³வே பு²ஸே து³க்கடங் யோகே³, பாசித்துக்³கி³ரிதே ஸியா.

142. பி⁴க்கு² ஸங்கா⁴தி³ஸேஸேன, அமுலேனேவ சோத³யங்;
த்³வே பு²ஸே து³க்கடங் யோகே³, பாசித்துத்³த⁴ங்ஸிதே ஸியா.

143. பி⁴க்கு² ஸஞ்சிச்ச குக்குச்சங், ஜனயந்தோ ஹி பி⁴க்கு²னோ;
த்³வே பு²ஸே து³க்கடங் யோகே³, பாசித்துப்பாதி³தே ஸியா.

144. திட்ட²ந்துபஸ்ஸுதிங் பி⁴க்கு², த்³வே பனாபத்தியோ பு²ஸே;
கச்ச²தோ து³க்கடங் ஸோதுங், பாசித்தி ஸுணதோ ஸியா.

145. த⁴ம்மிகானங் து கம்மானங், ச²ந்த³ங் த³த்வா ததோ புன;
கீயனத⁴ம்மமாபஜ்ஜங், த்³வே பு²ஸே து³க்கடாத³யோ.
146. ஸங்கே⁴ வினிச்ச²யே நி¹ட்ட²ங், அக³தே ச²ந்த³மத்தனோ;
அத³த்வா க³ச்ச²தோ தஸ்ஸ, த்³வே பனாபத்தியோ ஸியுங்.
147. ஹத்த²பாஸங் து ஸங்க⁴ஸ்ஸ, ஜஹதோ ஹோதி து³க்கடங்;
ஜஹிதே ஹத்த²பாஸஸ்மிங், ஹோதி பாசித்தி பி⁴க்கு²னோ.
148. ஸமக்³கே³ன ச ஸங்கே⁴ன, த³த்வான ஸஹ சீவரங்;
கீயந்தோ த்³வே பு²ஸே பச்சா², பயோகே³ து³க்கடாத³யோ.
149. லாப⁴ங் பரிணதங் ஜானங், ஸங்கி⁴கங் புக்³க³லஸ்ஸ ஹி;
த்³வே பு²ஸே பரிணாமெந்தோ, பயோகே³ து³க்கடாத³யோ.

ஸஹத⁴ம்மிகவக்³கோ³ அட்ட²மோ.

150. புப்³பே³ அவிதி³தோ ஹுத்வா, ரஞ்ஞோ அந்தேபுரங் பன;
பவிஸந்தஸ்ஸ பி⁴க்கு²னோ, த்³வே பனாபத்தியோ ஸியுங்.
151. பட²மேன ச பாதே³ன, உம்மாராதிக்கமே பன;
து³க்கடங் பன உத்³தி³ட்ட²ங், பாசித்தி து³தியேன து.
152. ரதனங் பன க³ண்ஹந்தோ, த்³வே பனாபத்தியோ பு²ஸே;
பயோகே³ து³க்கடங் தஸ்ஸ, பாசித்தி க³ஹிதே ஸியா.
153. ஸந்தங் பி⁴க்கு²ங் அனாபுச்சா², விகாலே கா³மகங் பன;
ஸமணோ பவிஸங் தோ³ஸே, ஆபஜ்ஜதி து³வே பன.
154. பட²மேன ச பாதே³ன, பரிக்கே²பங் அதிக்கமே;
து³க்கடங் தஸ்ஸ நித்³தி³ட்ட²ங், பாசித்தி து³தியேன து.
155. அட்டி²த³ந்தவிஸாணாபி⁴-நிப்³ப³த்தங் ஸூசியா க⁴ரங்;
காராபெந்தோ பு²ஸே த்³வேபி, பயோகே³ து³க்கடாத³யோ.
156. பமாணாதீதமஞ்சாதி³ங் , காராபெந்தோ து³வே பு²ஸே;
பயோகே³ து³க்கடங் வுத்தங், ஸேஸா காராபிதே ஸியா.

தூலோனத்³த⁴ங் து மஞ்சாதி³ங், காராபெந்தோ து³வே பு²ஸே;
பயோகே³ து³க்கடங், தஸ்மிங், ஸேஸா காராபிதே ஸியா.

158. ஸத்தமே அட்ட²மே சேவ, நவமே த³ஸமேபி ச;
அனந்தரஸமோயேவ, ஆபத்தீனங் வினிச்ச²யோ.

ரதனவக்³கோ³ நவமோ.

பாசித்தியகதா².

159. சதூஸு து³விதா⁴பத்தி, பாடிதே³ஸனியேஸுபி;
அவிஸேஸேன நித்³தி³ட்டா², பு³த்³தே⁴னாதி³ச்சப³ந்து⁴னா.

160. “பு⁴ஞ்ஜிஸ்ஸாமீ”தி பி⁴க்கு²ஸ்ஸ, து³க்கடங் படிக³ண்ஹதோ;
அஜ்ஜோ²ஹாரேஸு ஸப்³புத்த², பாடிதே³ஸனியங் ஸியா.

பாடிதே³ஸனீயகதா².

161. ஸேகி²யேஸு ச த⁴ம்மேஸு, ஏகாவாபத்தி தீ³பிதா;
அனாத³ரவஸேனேவ, து³க்கடங் ஸமுதா³ஹடங்.

ஸேகி²யகதா².

162. பஞ்ஞத்தா மேது²னங் த⁴ம்மங், படிஸேவனபச்சயா;
கதி ஆபத்தியோ ஹொந்தி? சதஸ்ஸோவ ப⁴வந்தி ஹி.

163. மேது²னங் படிஸேவந்தோ, அல்லோகாஸப்பவேஸனே;
மதே அக்கா²யிதே வாபி, பி⁴க்கு² பாராஜிகங் பு²ஸே.

164. து²ல்லச்சயங் து யேபு⁴ய்ய-க்கா²யிதே, து³க்கடங் ததா²;
முகே² வட்டகதே வுத்தங், பாசித்தி ஜதுமட்ட²கே.

165. பஞ்ஞத்தா காயஸங்ஸக்³க³ங், ஸமாபஜ்ஜனபச்சயா;
கதி ஆபத்தியோ ஹொந்தி? பஞ்ச ஆபத்தியோ ஸியுங்.

166. அவஸ்ஸுதஸ்ஸ போஸஸ்ஸ, ததா² பி⁴க்கு²னியாபி ச;
பாராஜிகமத⁴க்கா²தி³-க³ஹணங் ஸாதி³யந்தியா.

167. காயேன பு²ஸதோ காயங், பி⁴க்கு²ஸ்ஸ க³ருகங் ஸியா;
காயேன காயப³த்³த⁴ங் து, பு²ஸங் து²ல்லச்சயங் ஸியா.

168. படிப³த்³தே⁴ன காயேன, படிப³த்³த⁴ங் து து³க்கடங்;
பாசித்தியங் பனுத்³தி³ட்ட²ங், தஸ்ஸங்கு³லிபதோத³கே.

169. ஸேஸேஸு ஸேகி²யந்தேஸு, ஆபத்தீனங் வினிச்ச²யோ;
ஹெட்டா² வுத்தனயேனேவ, வேதி³தப்³போ³ விபா⁴வினா.

மஹாவிப⁴ங்க³ஸங்க³ஹோ நிட்டி²தோ.

பி⁴க்கு²னீவிப⁴ங்கோ³

170. பி⁴க்கூ²னங் பாடவத்தா²ய, வினயஸ்ஸ வினிச்ச²யே;
பி⁴க்கு²னீனங் விப⁴ங்கோ³பி, கிஞ்சிமத்தங் ப⁴ணாமஹங்.
171. அவஸ்ஸுதஸ்ஸ போஸஸ்ஸ, பி⁴க்கு²னீபி அவஸ்ஸுதா;
நந்த³ந்தீ காயஸங்ஸக்³ங், கதி ஆபத்தியோ பு²ஸே;
172. திஸ்ஸோ ஆபத்தியோ உப்³ப⁴-ஜாணுஸ்ஸாத⁴க்க²கஸ்ஸ ச;
ஹோதி பாராஜிகங் தஸ்ஸா, க³ஹணங் ஸாதி³யந்தியா.
173. உப்³ப⁴க்க²ங் அதோ⁴ஜாணு-க³ஹணங் ஸாதி³யந்தியா;
து²ல்லச்சயங் ஸியா, காய-படிப³த்³தே⁴ து து³க்கடங்.
174. சா²தெ³ந்தீ பி⁴க்கு²னீ வஜ்ஜங், திஸ்ஸோ ஆபத்தியோ பு²ஸே;
ஜானங் பாராஜிகங் த⁴ம்மங், சா²தெ³ந்தீ ஸா பராஜிகா.
175. து²ல்லச்சயங் வேமதிகா, படிச்சா²தே³தி சே பன;
அதா²சாரவிபத்திங் சே, படிச்சா²தே³தி து³க்கடங்.
176. நிஸ்ஸஜ்ஜந்தீ ந தங் லத்³தி⁴ங், உக்கி²த்தஸ்ஸானுவத்திகா;
ஸமனுபா⁴ஸனாயேவ, திஸ்ஸோ ஆபத்தியோ பு²ஸே.
177. ஞுத்தியா து³க்கடங், த்³வீஹி, கம்மவாசாஹி து²ல்லதா;
கம்மவாசாய ஓஸானே, பாராஜிகமுதீ³ரிதங்.
178. பூரெந்தீ அட்ட²மங் வத்து²ங், திஸ்ஸோ ஆபத்தியோ பு²ஸே;
புரிஸேனிதா⁴க³ச்சா²தி, வுத்தாக³ச்ச²தி து³க்கடங்.
179. து²ல்லச்சயங் து போஸஸ்ஸ, ஹத்த²பாஸப்பவேஸனே;
பூரெந்தீ அட்ட²மங் வத்து²ங், ஸமணீ ஸா பராஜிதா.

பாராஜிககதா².

180. உஸ்ஸயவாதி³கா அட்டங், கரொந்தீ திவித⁴ங் பு²ஸே;
ஏகஸ்ஸாரோசனே தஸ்ஸா, ஹோதி ஆபத்தி து³க்கடங்.
181. து³தியாரோசனே தஸ்ஸா, து²ல்லச்சயமுதீ³ரிதங்;

அட்டஸ்ஸ பரியோஸானே, ஹோதி ஸங்கா⁴தி³ஸேஸதா.

182. சோரிவுட்டா²பிகா வாபி, ஞத்தியா து³க்கடங் பு²ஸே;
து³வீஹி து²ல்லச்சயங் கம்ம-வாசோஸானே க³ருங் ஸியா.
183. ஏகா கா³மந்தரங் க³ச்சே², க³மனே து³க்கடங் ஸியா;
பரிக்கே²பே அதிக்கந்தே, பாதே³ன பட²மேன து.
184. ஹோதி து²ல்லச்சயாபத்தி, தஸ்ஸா ஸமணியா பன;
து³தியேன அதிக்கந்தே, க³ருகே பன திட்ட²தி.
185. சதுத்தே² து³தியே வுத்த-ஸதி³ஸோவ வினிச்ச²யோ;
ஆபத்தீனங் பபே⁴தே³ து, காசி நத்தி² விஸேஸதா.
186. அவஸ்ஸுதா ஸயங் ஹுத்வா, தாதி³ஸஸ்ஸேவ ஹத்த²தோ;
க³ஹெத்வா பன பு⁴ஞ்ஜந்தீ, போ⁴ஜனாதீ³ஸு கிஞ்சிபி.
187. பு²ஸே ஆபத்தியோ திஸ்ஸோ, போ⁴ஜனாதீ³ஸு கிஞ்சிபி;
படிக்³க³ண்ஹந்தியா தஸ்ஸா, ஹோதி து²ல்லச்சயங் பன.
188. அஜ்ஜோ²ஹாரேஸு ஸப்³பே³ஸு, ஹோதி ஸங்கா⁴தி³ஸேஸதா;
உத³கங் த³ந்தபோனங் வா, படிக்³க³ண்ஹாதி து³க்கடங்.
189. “ஸஹத்தே²ன க³ஹெத்வா த்வங், கா²த³ வா பு⁴ஞ்ஜ வா”திபி;
உய்யோஜெந்தீ பனேவங் து, திஸ்ஸோ ஆபத்தியோ பு²ஸே.
190. து³க்கடங் வசனே தஸ்ஸா, “பு⁴ஞ்ஜிஸ்ஸாமீ”தி க³ண்ஹதி;
அஜ்ஜோ²ஹாரேஸு ஸப்³பே³ஸு, தஸ்ஸா து²ல்லச்சயங் ஸியா.
191. போ⁴ஜனஸ்ஸ பனோஸானே, ஹோதி ஸங்கா⁴தி³ஸேஸதா;
உய்யோஜேதி ச யா தஸ்ஸா, இமா திஸ்ஸோதி தீ³பயே.
192. ஸத்தமே அட்ட²மே சாபி, நவமே த³ஸமேபி ச;
சோரிவுட்டா²பனேனேவ, ஸமானோவ வினிச்ச²யோ.

ஸங்கா⁴தி³ஸேஸகதா².

193. பத்தஸன்னிசயங் யிஹ, கரொந்தீ பி⁴க்கு²னீ பன;
ஏகங் நிஸ்ஸக்³கி³யங்யேவ, பு²ஸே பாசித்தியங் து ஸா.

194. அகாலசீவரங் கால-சீவரங் பா⁴ஜாபெந்தியா;
பயோகே³ து³க்கடங் வுத்தங், லாபே⁴ நிஸ்ஸக்³கியங் ஸியா.
195. சீவரங் பரிவத்தெத்வா, அச்சி²ந்த³தி ஸசே பன;
பயோகே³ து³க்கடங், சி²ன்னே, தஸ்ஸா நிஸ்ஸக்³கியங் ஸியா.
196. விஞ்ஞாபெத்வாவ அஞ்ஞங் சே, விஞ்ஞாபேதி ததோ பரங்;
பயோகே³ து³க்கடங், விஞ்ஞா-பிதே நிஸ்ஸக்³கியங் ஸியா.
197. சேதாபெத்வா ஹி அஞ்ஞங் சே, சேதாபேதி ததோ பரங்;
பயோகே³ து³க்கடங், சேதா-பிதே நிஸ்ஸக்³கியங் ஸியா.
198. ஏவமேவ ச ஸேஸேஸு, ச²ட்டா²தீ³ஸு ச ஸத்தஸு;
அனந்தரஸமானோவ, ஆபத்தீனங் வினிச்ச²யோ.

நிஸ்ஸக்³கியகதா².

199. லஸுணங் கா²த³தி த்³வே சே, து³க்கடங் க³ஹணே ஸியா;
அஜ்ஜோ²ஹாரபயோகே³ஸு, பாசித்தி பரியாபுதா.
200. ஸங்ஹராபெந்தியா லோமங், ஸம்பா³தே⁴ த்³வேவ ஹொந்தி ஹி;
பயோகே³ து³க்கடங் வுத்தங், ஹொதி பாசித்தி ஸங்ஹடே.
201. கரொந்தீ தலகா⁴தங் து, த்³வே பனாபத்தியோ பு²ஸே;
பயோகே³ து³க்கடங் ஹொதி, கதே பாசித்தியங் ஸியா.
202. ஜதுனா மட்ட²கங் கிஞ்சி, ஸாதி³யந்தீ து³வே பு²ஸே;
பயோகே³ து³க்கடாதி³ன்னே, தஸ்ஸா பாசித்தியங் ஸியா.
203. பஞ்சமங் து சதுத்தே²ன, ஸமானமிதி தீ³பயே;
ஆபத்தீனங் விபா⁴க³ஸ்மிங், விஸேஸோ நத்தி² கோசிபி.
204. பி⁴க்கு²ஸ்ஸ பு⁴ஞ்ஜமானஸ்ஸ, பானீயேனுபதிட்ட²தி;
ஹத்த²பாஸே து பாசித்தி, ஹித்வா திட்ட²தி து³க்கடங்.
205. விஞ்ஞாபெத்வாமகங் த⁴ஞ்ஞங், “பு⁴ஞ்ஜிஸ்ஸாமீ”தி க³ண்ஹதி;
து³க்கடங் ஹொதி பாசித்தி, அஜ்ஜோ²ஹாரேஸு தீ³பயே.

உச்சாராதி³ங் திரோகுட்டே, ச²ட்³டெ³ந்தீ த்வே பு²ஸே ஹவே;
பயோகே³ து³க்கடங் வுத்தங், பாசித்தி ச²ட்³டி³தே ஸியா.

207. உச்சாராதி³சதுக்கங் து, ச²ட்³டே³தி ஹரிதே ஸசே;
பயோகே³ து³க்கடங் தஸ்ஸா, பாசித்தி ச²ட்³டி³தே ஸியா.

208. நச்சாதி³ங் த்ஸ்ஸனத்தா²ய, ஸசே க³ச்ச²தி து³க்கடங்;
பஸ்ஸந்தியாபி பாசித்தி, ததே²வ ச ஸுணந்தியா.

லஸுணவக்³கோ³ பட²மோ.

209. பட²மே து³தியே சேவ, ததியே ச சதுத்த²கே;
துல்யோ லஸுணவக்³கஸ்ஸ, ச²ட்³டே²னித⁴ வினிச்ச²யோ.

210. குலானி உபஸங்கம்ம, நிஸீதி³த்வா பனாஸனே;
ஸாமிகே து அனாபுச்சா², பக்கமந்தீ து³வே பு²ஸே.

211. பட²மேன ச பாதே³ன, அனோவஸ்ஸமதிக்கமே;
து³க்கடங் ஹோதி, பாசித்தி, து³தியாதிக்கமே ஸியா.

212. ஸாமிகே து அனாபுச்சா², ஆஸனே சே நிஸீதி³தி;
பயோகே³ து³க்கடங் ஹோதி, பாசித்தி ச நிஸீதி³தே.

213. ச²ட்³டே²ன ஸத்தமங் ஸப்³பங், ஸமானங் அட்ட²மே பன;
பயோகே³ து³க்கடங், உஜ்ஜா²-பிதே பாசித்தியங் ஸியா.

214. அத்தானங் சாபி⁴ஸப்பெந்தீ, த்வே பு²ஸே நிரயாதி³னா;
பயோகே³ து³க்கடங் வுத்தங், பாசித்தி அபி⁴ஸப்பிதே.

215. வதி⁴த்வா பன அத்தானங், ரோத³ந்தீ து து³வே பு²ஸே;
வத⁴தி ரோத³தி பாசித்தி, கரோதேகங் து து³க்கடங்.

ரத்தந்த⁴காரவக்³கோ³ து³தியோ.

216. நக்³கா³ நஹாயதி த்வே சேவ, பயோகே³ து³க்கடங் ஸியா;
நஹானஸ்ஸ பரியோஸானே, தஸ்ஸா பாசித்தியங் ஸியா.

217. காராபேதி பமாணாதி-க்கந்தங் உத³கஸாடிகங்;
பயோகே³ து³க்கடங், காரா-பிதே பாசித்தியங் ஸியா.

218. சீவரங் து விஸிப்³பெ³த்வா, விஸிப்³பா³பெத்வ வா பன;
நேவ ஸிப்³பு³ந்தியா வுத்த-மேகங் பாசித்தியங் பன.

219. பஞ்சாஹிகங் து ஸங்கா⁴டி-சாரங் பன அதிக்கமே;
ஏகாவஸ்ஸா பனாபத்தி, பாசித்தி பரிதீ³பிதா.

220. ஸசே ஸங்கமனீயங் து, தா⁴ரேதி பன சீவரங்;
பயோகே³ து³க்கடங் வுத்தங், பாசித்தி பன தா⁴ரிதே.

221. க³ணசீவரலாப⁴ஸ்ஸ, அந்தராயங் கரோதி சே;
பயோகே³ து³க்கடங் ஹோதி, கதே பாசித்தியங் ஸியா.

222. விப⁴ங்க³ங் படிபா³ஹந்தீ, சீவரானங் து த⁴ம்மிகங்;
பயோகே³ து³க்கடங் வுத்தங், பாசித்தி படிபா³ஹிதே.

223. அகா³ரிகாதி³னோ தே³தி, ஸசே ஸமணசீவரங்;
பயோகே³ து³க்கடங், தி³ன்னே, பாசித்தி பரியாபுதா.

224. சீவரே து³ப்³பு³லாஸாய, காலங் சே ஸமதிக்கமே;
பயோகே³ து³க்கடங் வுத்தங், பாசித்தி ஸமதிக்கமே.

225. த⁴ம்மிகங் கதி²னுத்³தா⁴ரங், படிபா³ஹந்தியா து³வே;
பயோகே³ து³க்கடங் ஹோதி, பாசித்தி படிபா³ஹிதே.

ந்ஹானவக்³கோ³ ததியோ.

226. து³வே பி⁴க்கு²னியோ ஏக-மஞ்சஸ்மிங் சே துவட்டெய்யுங்;
பயோகே³ து³க்கடங் தாஸங், நிபன்னே இதரங் ஸியா.

227. து³தியங் பட²மேனேவ, ஸதி³ஸங் ததியே பன;
பயோகே³ து³க்கடங் ஹோதி, கதே பாசித்தியங் ஸியா.

228. நுபட்டா²பெந்தியா வாபி, து³க்கி²தங் ஸஹஜீவினிங்;
ஏகாயேவ பனாபத்தி, பாசித்தி பரிதீ³பிதா.

229. ஸசே உபஸ்ஸயங் த³த்வா, நிக்கட்³ட⁴தி ச பி⁴க்கு²னிங்;
பயோகே³ து³க்கடங் தஸ்ஸா, ஹோதி பாசித்தி கட்³டி⁴தே.

230.

ச²ட்டே² பன ச ஸங்ஸட்டா², ஞுத்தியா து³க்கடங் பு²ஸே;
கம்மவாசாய ஓஸானே, பாசித்தி பரிதீ³பிதா.

231. அந்தோரட்டே² து ஸாஸங்கே, சாரிகங் து சரந்தியா;
பயோகே³ து³க்கடங் வுத்தங், படிபன்னாய ஸேஸகங்.

232. அட்ட²மங் நவமஞ்சேவ, ஸத்தமேன ஸமங் மதங்;
த³ஸமே பன ஏகாவ, பாசித்தி பரிதீ³பிதா.

துவட்டவக்³கோ³ சதுத்தோ².

233. ராஜாகா³ராதி³கங் ஸப்³ப³ங், த³ஸ்ஸனத்தா²ய க³ச்ச²தி;
பயோகே³ து³க்கடங் தஸ்ஸா, பாசித்தி யதி³ பஸ்ஸதி.

234. ஆஸந்திங் வாபி பல்லங்கங், பரிபு்⁴ஞ்ஜந்தியா து³வே;
பயோகே³ து³க்கடங் வுத்தங், பு்⁴த்தே பாசித்தியங் ஸியா.

235. ஸுத்தங் கந்தந்தியா த³வேவ, பயோகே³ து³க்கடங் மதங்;
உஜ்ஜவுஜ்ஜவனே தஸ்ஸா, பாசித்தி ஸமுதா³ஹரே.

236. வெய்யாவச்சங் கி³ஹீனங் து, த³வேவ ஹொந்தி கரொந்தியா;
பயோகே³ து³க்கடங் வுத்தங், கதே பாசித்தியங் ஸியா.

237. பஞ்சமே பன ஏகாவ, பாசித்தி பரிதீ³பிதா;
பயோகே³ து³க்கடங் ச²ட்டே², தி³ன்னே பாசித்தியங் ஸியா.

238. ஸத்தமங் து³தியேனேவ, ஸமாபத்திபபே⁴த³தோ;
அட்ட²மங் து³தியே வக்³கே³, பஞ்சமேன ஸமங் மதங்.

239. திரச்சா²னக³தங் விஜ்ஜங், த³வேவ ஹொந்தி பட²ந்தியா;
பயோகே³ து³க்கடங் ஹொதி, பாசித்தி ஹி பதே³ பதே³.

240. த³ஸமங் நவமேனேவ, ஸமானங் ஸப்³ப³தா² பன;
“பரியாபுணாதி, வாசேதி”, பத³மத்தங் விஸேஸகங்.

சித்தாகா³ரவக்³கோ³ பஞ்சமோ.

241. ஸபி்⁴க்கு²கங் தமாராமங், ஜானந்தீ பன பி்⁴க்கு²னீ;
பவிஸந்தீ அனாபுச்சா², த³வே பனாபத்தியோ பு²ஸே.

242. பட²மேன ச பாதே³ன, பரிக்²பஸ்ஸதிக்கமே;
து³க்கடங் பிடகே வுத்தங், பாசித்தி து³தியேன து.
243. அக்கோஸதி ச யா பி⁴க்கு²ங், பி⁴க்கு²னீ பரிபா⁴ஸதி;
பயோகே³ து³க்கடங் தஸ்ஸா, பாசித்தக்கோஸிதே ஸியா.
244. யா ஹி சண்டி³கபா⁴வேன, க³ணங் து பரிபா⁴ஸதி;
பயோகே³ து³க்கடங் தஸ்ஸா, பரிப⁴ட்டே² பனேதரங்.
245. நிமந்திதா பவாரிதா, கா²த³னங் போ⁴ஜனம்பி வா;
பு⁴ஞ்ஜந்தீ பி⁴க்கு²னீ ஸா ஹி, த்³வே பனாபத்தியோ பு²ஸே.
246. “பு⁴ஞ்ஜிஸ்ஸாமீ”தி யங் கிஞ்சி, படிக்க³ண்ஹாதி து³க்கடங்;
அஜ்ஜோ²ஹாரபயோகே³ஸு, பாசித்தி பரிதீ³பயே.
247. குலங் து மச்ச²ராயந்தீ, த்³வே பனாபத்தியோ பு²ஸே;
பயோகே³ து³க்கடங் வுத்தங், ஸேஸா மச்ச²ரிதே ஸியா.
248. அபி⁴க்கு²கே பனாவாஸே, ப⁴வே வஸ்ஸங் வஸந்தியா;
து³க்கடங் பு³ப³கிச்சேஸு, பாசித்தி அருணுக்க³மே.
249. பி⁴க்கு²னீ உப⁴தோஸங்கே⁴, வஸ்ஸங்வுட்டா² து தீஹிபி;
டா²னேஹி அப்பவாரெந்தீ, ஏகங் பாசித்தியங் பு²ஸே.
250. ஓவாத³த்தா²ய வா பி⁴க்கு²ங், ஸங்வாஸத்தா²ய வா ததா²;
ந க³ச்ச²தி ஸசே தஸ்ஸா, ஏகங் பாசித்தியங் ஸியா.
251. ஓவாத³ம்பி ந யாசந்தீ, ந க³ச்ச²ந்தீ உபோஸத²ங்;
ஏகங் பாசித்தியாபத்தி-மாபஜ்ஜதி, ந ஸங்ஸயோ.
252. அபுச்சி²த்வாவ ஸங்க⁴ங் வா, பே⁴தா³பேதி பஸாக²ஜங்;
பயோகே³ து³க்கடங், பி⁴ன்னே, பாசித்தி பரியாபுதா.

ஆராமவக்கோ³ ச²ட்டோ².

253. க³ப்பி⁴னிங் வுட்ட²பெந்தீ ஹி, த்³வே பனாபத்தியோ பு²ஸே;
பயோகே³ து³க்கடங், வுட்டா²-பிதே பாசித்தியங் ஸியா.

254.

து³தியங் ததியஞ்சேவ, சதுத்த²ங் பஞ்சமம்பி ச;
ச²ட்ட²ஞ்ச ஸத்தமஞ்சேவ, பட²மேன ஸமங் மதங்.

255. பி⁴க்கு²னீ வுட்ட²பெத்வான, பி⁴க்கு²னிங் ஸஹஜீவினிங்;
த்³வேவஸ்ஸங் நானுக்³க³ண்ஹந்தீ, ஏகங் பாசித்தியங் பு²ஸே.

256. நவமங் த³ஸமஞ்சேவ, அட்ட²மேன ஸமங் மதங்;
த்³வீஸு ஆபத்திபே⁴த³ஸ்மிங், நானத்தங் நத்தி² கிஞ்சிபி.

க³பி⁴பி⁴னீவக்³கோ³ ஸத்தமோ.

257. குமாரீபூ⁴தவக்³க³ஸ்ஸ, ஆதி³தோ பன பஞ்சபி;
ஸமானா க³பி⁴பி⁴னீவக்³கே³, பட²மேனேவ ஸப்³பு³ஸோ.

258. “அலங் வுட்டா²பிதேனா”தி, வுச்சமானா ஹி கீ²யதி;
பயோகே³ து³க்கடங், பச்சா², ஹோதி பாசித்தி கீ²யிதே.

259. ஸத்தமே அட்ட²மே சேவ, ஏகங் பாசித்தியங் மதங்;
ஆதி³னாவ ஸமானானி, நவமாதீ³னி பஞ்சபி.

குமாரீபூ⁴தவக்³கோ³ அட்ட²மோ.

260. ஆபத்தியோ பு²ஸே த்³வேபி, தா⁴ரெந்தீ ச²த்துபாஹனங்;
பயோகே³ து³க்கடங் வுத்தங், ஹோதி பாசித்தி தா⁴ரிதே.

261. யானேன பன யாயந்தீ, த்³வே கிராபத்தியோ பு²ஸே;
பயோகே³ து³க்கடங் ஹோதி, பாசித்தி யதி³ யாயிதே.

262. தா⁴ரெந்தியா து ஸங்கா⁴ணிங், பயோகே³ து³க்கடங் ஸியா;
தா⁴ரிதே பன பாசித்தி, சதுத்தே²பி அயங் நயோ.

263. ந்ஹாயந்தீ க³ந்த⁴வண்ணேன, பயோகே³ து³க்கடங் பு²ஸே;
ந்ஹானஸ்ஸ பரியோஸானே, தஸ்ஸா பாசித்தியங் ஸியா.

264. ச²ட்ட²ம்பி பஞ்சமேனேவ, ஸமானங் ஸப்³பு³தா² பன;
ஸத்தமே அட்ட²மே சேவ, நவமே த³ஸமேபி ச.

265. பயோகே³ து³க்கடங் வுத்தங், பாசித்தும்மத்³தி³தே ஸியா;
ஆபத்தீனங் விபா⁴க³ஸ்மிங், நத்தி² காசி விலேஸஸதா.

266. அனாபுச்சா² து பி⁴க்கு²ஸ்ஸ, புரதோ யா நிஸீத³தி;
பயோகே³ து³க்கடங் தஸ்ஸா, பாசித்தி து நிஸீதி³தே.

267. அனோகாஸகதங் பி⁴க்கு²ங், பஞ்ஹங் புச்ச²ந்தியா பன;
பயோகே³ து³க்கடங் ஹோதி, வுத்தா பாசித்தி புச்சி²தே.

268. ஸங்கச்சிகங் வினா கா³மங், பத³ஸா பவிஸந்தியா;
பட²மேனேவ ஆராம-வக்³க்ஸ்ஸ ஸதி³ஸங் வதே³.

ச²த்துபாஹனவக்³கோ³ நவமோ.

பாசித்தியகதா².

269. அட்ட²ஸு து³விதா⁴பத்தி, பாடிதே³ஸனியேஸுபி;
விஞ்ஞாபெத்வா ஸசே ஸப்பிங், “பு⁴ஞ்ஜிஸ்ஸாமீ”தி க³ண்ஹதி.

270. ததோ பி⁴க்கு²னியா தஸ்ஸா, ஹோதி ஆபத்தி து³க்கடங்;
அஜ்ஜோ²ஹாரேஸு ஸப்³பே³ஸு, பாடிதே³ஸனியங் ஸியா.

பாடிதே³ஸனியகதா².

271. இமங் விதி³த்வா பரமங் பனுத்தரங்;
நிருத்தரங் அத்த²வஸேன பி⁴க்கு²;
ஸுகே²ன பஞ்ஞத்தமஹாஸமுத்³த³ங்;
து³ருத்தரங் உத்தரதேவ தீ⁴ரோ.

272. யஸ்மா தஸ்மா அஸ்மிங் யோக³ங்;
உஸ்மாயுத்தோ யுத்தோ காதுங்;
ஸத்தோ ஸத்தோ கங்க²ச்சே²தே³;
ஸத்தே² ஸத்தே² நிச்சங் நிச்சங்.

பி⁴க்கு²னீவிப⁴ங்கோ³ நிட்டி²தோ.

சதுவிபத்திகதா²

273. கதி ஆபத்தியோ ஸீல-விபத்திபச்சயா பன;
சதஸ்ஸோவ ஸியுங் ஸீல-விபத்திபச்சயா பன.

274. ஜானங் பாராஜிகங் த⁴ம்மங், ஸசே சா²தே³தி பி⁴க்கு²னீ;
சுதா, து²ல்லச்சயங் ஹோதி, ஸசே வேமதிகா ஸியா.

275. பாசித்தி பி⁴க்கு² ஸங்கா⁴தி³-ஸேஸங் சா²தே³தி சே பன;
அத்தனோ பன து³ட்டு²ல்லங், சா²தெ³ந்தோ து³க்கடங் பு²ஸே.
276. ஆபத்தியோ கதாசார-விபத்திபச்சயா பன;
ஏகாயேவ ஸியாசார-விபத்திபச்சயா பன.
277. படிச்சா²தே³தி ஆசார-விபத்திங் பன பி⁴க்கு² சே;
ஏகமேவஸஸ பி⁴க்கு²ஸஸ, ஹோதி ஆபத்தி து³க்கடங்.
278. கதி ஆபத்தியோ தி³ட்டி²-விபத்திபச்சயா பன?
த்³வே பனாபத்தியோ தி³ட்டி²-விபத்திபச்சயா ஸியுங்.
279. அச்சஜங் பாபிகங் தி³ட்டி²ங், ஞத்தியா து³க்கடங் பு²ஸே;
கம்மவாசாய ஓஸானே, பாசித்தி பரியாபுதா.
280. ஆபத்தியோ கதாஜீவ-விபத்திபச்சயா பன?
ச²ளேவாபஜ்ஜதாஜீவ-விபத்திபச்சயா பன.
281. ஆஜீவஹேது பாபிச்சோ², அஸந்தங் பன அத்தனி;
மனுஸ்ஸுத்தரித⁴ம்மங் து, வத³ங் பாராஜிகங் பு²ஸே.
282. ஸஞ்சரித்தங் ஸமாபன்னோ, ஹோதி ஸங்கா⁴தி³ஸேஸதா;
பரியாயவசனே ஞாதே, தஸ்ஸ து²ல்லச்சயங் ஸியா.
283. பணீதபோ⁴ஜனங் வத்வா, பாசித்தி பரிபு⁴ஞ்ஜதோ;
பி⁴க்கு²னீ து ஸசே ஹோதி, பாடிதே³ஸனியங் ஸியா.
284. ஆஜீவஹேது ஸூபங் வா, ஓத³னங் வா பனத்தனோ;
அத்தா²ய விஞ்ஞாபெத்வான, து³க்கடங் பரிபு⁴ஞ்ஜதோ.

சதுவிபத்திகதா².

அதி⁴கரணபச்சயகதா²

285. விவாதா³தி⁴கரணம்ஹா, கதி ஆபத்தியோ ஸியுங்?
விவாதா³தி⁴கரணம்ஹா, த்³வே பனாபத்தியோ ஸியுங்.
286. பாசித்தி உபஸம்பன்னங், ஹோதி ஓமஸதோ பன;
பி⁴க்கு²ஸஸானுபஸம்பன்னங், ஓமஸந்தஸ்ஸ து³க்கடங்.

287. அனுவாதா³தி⁴கரண-பச்சயாபத்தியோ கதி?
அனுவாதா³தி⁴கரண-பச்சயா திவிதா⁴ ஸியுங்.
288. அனுத்³த⁴ங்ஸேதி சே பி⁴க்கு²ங், அமூலந்திமவத்து²னா;
ஸங்கா⁴தி³ஸேஸமாபத்தி-மாபஜ்ஜதி, ந ஸங்ஸயோ.
289. ததா² ஸங்கா⁴தி³ஸேஸேன, அனுத்³த⁴ங்ஸேதி சே பன;
பாசித்தி, து³க்கடங் வுத்தங், ததா²சாரவிபத்தியா.
290. ஆபத்திபச்சயா வுத்தா, கதி ஆபத்தியோ பன?
ஆபத்திபச்சயா வுத்தா, சதஸ்ஸோவ மஹேஸினா.
291. ஜானங் பாராஜிகங் த⁴ம்மங், ஸசே சா²தே³தி பி⁴க்கு²னீ;
சுதா, து²ல்லச்சயங் ஹோதி, ஸசே வேமதிகா ஸியா.
292. பாசித்தி பி⁴க்கு² ஸங்கா⁴தி³-ஸேஸங் சா²தே³தி சே பன;
ததா²சாரவிபத்திங் து, ஸசே சா²தே³தி து³க்கடங்.
293. ஆபத்தியோ ஹி கிச்சாதி⁴-கரணபச்சயா கதி?
பஞ்சேவ ஹோந்தி கிச்சாதி⁴-கரணபச்சயா பன.
294. ஸமனுபா⁴ஸனாயேவ, ஞத்தியா து³க்கடங் பு²ஸே;
ஸமணீ அச்சஜந்தீவ, உக்கி²த்தஸ்ஸானுவத்திகா.
295. து²ல்லச்சயங் த்³வயங் த்³வீஹி, கம்மவாசாஹி ஸா பு²ஸே;
கம்மவாசாய ஓஸானே, தஸ்ஸா பாராஜிகங் ஸியா.
296. ஸமனுபா⁴ஸனாயேவ, பே⁴த³கஸ்ஸானுவத்திகா;
ந பரிச்சஜதி தங் லத்³தி⁴ங், ஹோதி ஸங்கா⁴தி³ஸேஸதா.
297. ஸமனுபா⁴ஸனாயேவ, பாபிகாய ச தி³ட்டி²யா;
யாவததியகங் தஸ்ஸா, பாசித்தச்சஜதோபி ச.

அதி⁴கரணபச்சயகதா².

க²ந்த⁴கபுச்சா²கதா²

298. க²ந்த⁴கேஸுபி ஆபத்தி-பபே⁴த³ங் ஆக³தங் பன;
பாடவத்தா²ய பி⁴க்கூ²னங், பவக்கா²மி நிபோ³த⁴த².

299. க²ந்த⁴கே பட²மே தாவ, கதி ஆபத்தியோ ஸியுங்?
க²ந்த⁴கே பட²மே தாவ, த்³வே பனாபத்தியோ ஸியுங்.
300. ஊனவீஸதிவஸ்ஸங் து, கரோதோ உபஸம்பத³ங்;
ஹோதி பாசித்தியங் தஸ்ஸ, ஸேஸேஸு பன து³க்கடங்.
301. கதி ஆபத்தியோ ஹொந்தி;
க²ந்த⁴கே து உபோஸதே²?
திஸ்ஸோ ஆபத்தியோ ஹொந்தி;
க²ந்த⁴கே து உபோஸதே².
302. “நஸ்ஸந்தேதே வினஸ்ஸந்து”, இதி பே⁴த³புரக்க²கா;
உபோஸத²ஸ்ஸ கரணே, து²ல்லச்சயமுதீ³ரிதங்.
303. உக்கி²த்தகேன ஸத்³தி⁴ங் து, கரொந்தஸ்ஸ உபோஸத²ங்;
ஹோதி பாசித்தியங் தஸ்ஸ, ஸேஸேஸு பன து³க்கடங்.
304. கதி ஆபத்தியோ வுத்தா, வத³ வஸ்ஸுபனாயிகே?
ஏகாவ து³க்கடாபத்தி, வுத்தா வஸ்ஸுபனாயிகே.
305. கதி ஆபத்தியோ வுத்தா, க²ந்த⁴கே து பவாரணே?
திஸ்ஸோ ஆபத்தியோ வுத்தா, உபோஸத²ஸமா மதா.
306. கதி ஆபத்தியோ வுத்தா, சம்மே? திஸ்ஸோவ தீ³பிதா;
மாரெந்தானங் து பாசித்தி, க³ஹெத்வா வச்ச²தரிங் பன.
307. அங்க³ஜாதங் சு²பந்தஸ்ஸ, ரத்தேன பன சேதஸா;
தஸ்ஸ து²ல்லச்சயங் வுத்தங், ஸேஸேஸு பன து³க்கடங்.
308. கதி ஆபத்தியோ வுத்தா, பே⁴ஸஜ்ஜக்க²ந்த⁴கே பன?
திஸ்ஸோ ஆபத்தியோ வுத்தா, பே⁴ஸஜ்ஜக்க²ந்த⁴கே பன.
309. ஸமந்தா த்³வங்கு³லே தத்த², து²ல்லச்சயமுதீ³ரிதங்;
போ⁴ஜ்ஜயாகூ³ஸு பாசித்தி, ஸேஸேஸு பன து³க்கடங்.
310. கதி²னே நத்தி² ஆபத்தி, பஞ்ஞத்தங் கேவலங் பன;
கதி சீவரஸங்யுத்தே, வுத்தா ஆபத்தியோ பன?

311. திஸ்ஸோ சீவரஸங்யுத்தே, வுத்தா ஆபத்தியோ பன;
குஸவாகமயே சீரே, து²ல்லச்சயமுதீ³ரிதங்.
312. ஸனிஸ்ஸக்³கா³வ பாசித்தி, அதிரேகே து சீவரே;
ஸேஸேஸு து³க்கடங் வுத்தங், பு³த்³தே⁴னாதி³ச்சப³ந்து⁴னா.
313. சம்பெய்யகே ச கோஸம்பே³, கம்மஸ்மிங் பாரிவாஸிகே;
ததா² ஸமுச்சயே ஏகா, து³க்கடாபத்தி தீ³பிதா.
314. கதி ஆபத்தியோ வுத்தா, ஸமத²க்க²ந்த⁴கே பன?
த்³வேயேவாபத்தியோ வுத்தா, ஸமத²க்க²ந்த⁴கே பன.
315. ச²ந்த³ஸ்ஸ தா³யகோ பி⁴க்கு², பாசித்தி யதி³ கீ²யதி;
ஸேஸேஸு பன ஸப்³ப³த்த², து³க்கடங் ஸமுதா³ஹடங்.
316. கதி கு²த்³த³கவத்து²ஸ்மிங், வுத்தா ஆபத்தியோ பன?
திஸ்ஸோ கு²த்³த³கவத்து²ஸ்மிங், வுத்தா ஆபத்தியோ பன.
317. அத்தனோ அங்க³ஜாதங் து, சி²ந்த³ங் து²ல்லச்சயங் பு²ஸே;
ரோமந்தே² ஹோதி பாசித்தி, ஸேஸே ஆபத்தி து³க்கடங்.
318. ததா² ஸேனாஸனஸ்மிங் து, திஸ்ஸோ ஆபத்தியோ ஸியுங்;
விஸ்ஸஜ்ஜனே ச க³ருனோ, து²ல்லச்சயமுதீ³ரிதங்.
319. நிக்கட்³ட⁴னே ச பாசித்தி, ஸங்கி⁴கம்ஹா விஹாரதோ;
ஸேஸேஸு பன ஸப்³ப³த்த², து³க்கடங் ஸமுதா³ஹடங்.
320. கதி ஆபத்தியோ ஸங்க⁴-பே⁴தே³ வுத்தா மஹேஸினா?
த்³வே பனாபத்தியோ ஸங்க⁴-பே⁴தே³ வுத்தா மஹேஸினா.
321. பே⁴தா³னுவத்தகானங் து, து²ல்லச்சயமுதீ³ரிதங்;
க³ணபோ⁴கே³ து பி⁴க்க²னங், பாசித்தி பரிதீ³பிதா.
322. க²ந்த⁴கே வத்தஸங்யுத்தே, கதி ஆபத்தியோ மதா?
க²ந்த⁴கே வத்தஸங்யுத்தே, து³க்கடாபத்தியேவ ஸா.
323. ட²பனே பாதிமொக்க²ஸ்ஸ, ததா² ஏகாவ தீ³பிதா;
பி⁴க்கு²னிக்க²ந்த⁴கே சாபி, கதி ஆபத்தியோ மதா?

324. பி⁴க்கு²னிக்க²ந்த⁴கே சாபி, த்³வே பனாபத்தியோ மதா;
அபவாரணாய பாசித்தி, ஸேஸேஸு பன து³க்கடங்.

க²ந்த⁴கபுச்சா²கதா² நி²டி²தா.

ஸமுட்டா²னஸீஸகதா²

325. விப⁴ங்கே³ஸு பன த்³வீஸு, பஞ்ஞத்தானி மஹேஸினா;
யானி பாராஜிகாதீ³னி, உத்³தி³ஸந்தி உபோஸதே².

326. தேஸங் தா³னி பவக்கா²மி, ஸமுட்டா²னமிதோ பரங்;
பாடவத்தா²ய பி⁴க்கூ²னங், தங் ஸுணாத² ஸமாஹிதா.

327. காயோ ச வாசாபி ச காயவாசா;
தானேவ சித்தேன யுதானி தீணி;
ஏகங்கி³கங் த்³வங்கி³திவங்கி³கந்தி;
சு²தா⁴ ஸமுட்டா²னவிதி⁴ங் வத³ந்தி.

328. தேஸு ஏகேன வா த்³வீஹி, தீஹி வாத² சதுஹி வா;
சு²ஹி வாபத்தியோ நானா-ஸமுட்டா²னேஹி ஜாயரே.

329. தத்த² பஞ்சஸமுட்டா²னா, கா சாபத்தி ந விஜ்ஜதி;
ஹோதி ஏகஸமுட்டா²னா, பச்சி²மேஹேவ தீஹிபி.

330. ததே²வ த்³விஸமுட்டா²னா, காயதோ காயசித்ததோ;
வாசதோ வாசசித்தம்ஹா, ததியச்ச²ட்ட²தோபி ச.

331. சதுத்த²ச்ச²ட்ட²தோ சேவ, பஞ்சமச்ச²ட்ட²தோபி ச;
ஜாயதே பஞ்சதா⁴வேஸா, ஸமுட்டா²தி ந அஞ்ஞதோ.

332. திஸமுட்டா²னிகா நாம, பட²மேஹி ச தீஹிபி;
பச்சி²மேஹி ச தீஹேவ, ஸமுட்டா²தி ந அஞ்ஞதோ.

333. பட²மா ததியா சேவ, சதுத்த²ச்ச²ட்ட²தோபி ச;
து³தியா ததியா சேவ, பஞ்சமச்ச²ட்ட²தோபி ச.

334. த்³விதா⁴ சதுஸமுட்டா²னா, ஜாயதே ந பனஞ்ஞதோ;
ஏகதா⁴ சு²ஸமுட்டா²னா, ஸமுட்டா²தி சு²ஹேவ ஹி.

ஆஹ ச -

335. “திதா⁴ ஏகஸமுட்டா²னா, பஞ்சதா⁴ த்³விஸமுட்டி²தா;
த்³விதா⁴ திசதுரோ டா²னா, ஏகதா⁴ ச²ஸமுட்டி²தா”.
336. தேரஸேவ ச நாமானி, ஸமுட்டா²னவிஸேஸதோ;
லப⁴ந்தாபத்தியோ ஸப்³பா³, தானி வக்கா²மிதோ பரங்.
337. பட²மந்திமவத்து²ஞ்ச, து³தியங் ஸஞ்சரித்தகங்;
ஸமனுபா⁴ஸனஞ்சேவ, கதி²னௌகலோமகங்.
338. பத³ஸோத⁴ம்மமத்³தா⁴னங், தெ²ய்யஸத்த²ஞ்ச தே³ஸனா;
பூ⁴தாரோசனகஞ்சேவ, சோரிவுட்டா²பனம்பி ச.
339. அனநுஞ்ஞாதகஞ்சாதி, ஸீஸானேதானி தேரஸ;
தேரஸேதே ஸமுட்டா²ன-நயா விஞ்ஞாஹி சிந்திதா.
340. தத்த² யா து சதுத்தே²ன, ஸமுட்டா²னேன ஜாயதே;
ஆதி³பாராஜிகுட்டா²னா, அயந்தி பரிதீ³பிதா.
341. ஸசித்தகேஹி தீஹேவ, ஸமுட்டா²னேஹி யா பன;
ஜாயதே ஸா பனுத்³தி³ட்டா², அதி³ன்னாதா³னபுப்³பா³கா.
342. ஸமுட்டா²னேஹி யாபத்தி, ஜாதுச்ச²ஹிபி ஜாயதே;
ஸஞ்சரித்தஸமுட்டா²னா, நாமாதி பரிதீ³பிதா.
343. ச²ட்டே²னேவ ஸமுட்டா²தி, ஸமுட்டா²னேன யா பன;
ஸமுட்டா²னவஸேனாயங், வுத்தா ஸமனுபா⁴ஸனா.
344. ததியச்ச²ட்ட²தோயேவ, ஸமுட்டா²தி ஹி யா பன;
ஸமுட்டா²னவஸேனாயங், கதி²னுபபதா³ மதா.
345. ஜாயதே யா பனாபத்தி, காயதோ காயசித்ததோ;
அயமௌகலோமாதி³-ஸமுட்டா²னாதி தீ³பிதா.
346. ஜாயதே யா பனாபத்தி, வாசதோ வாசசித்ததோ;
அயங் து பத³ஸோத⁴ம்ம-ஸமுட்டா²னாதி வுச்சதி.
- 347.

காயதோ காயவாசம்ஹா, சதுத்த²ச்ச²ட்ட²தோபி ச;
ஜாயதே ஸா பனத்த³தா⁴ன-ஸமுட்டா²னாதி ஸூசிதா.

348. சதுத்த²ச்ச²ட்ட²தோயேவ, ஸமுட்டா²தி ஹி யா பன;
தெ²ய்யஸத்த²ஸமுட்டா²னா, அயந்தி பரிதீ³பிதா.

349. பஞ்சமேனேவ யா செத்த², ஸமுட்டா²னேன ஜாயதே;
ஸமுட்டா²னவஸேனாயங், த்⁴ம்மதே³ஸனஸஞ்ஞிதா.

350. அசித்தகேஹி தீஹேவ, ஸமுட்டா²னேஹி யா ஸியா;
ஸமுட்டா²னவஸேனாயங், பூ⁴தாரோசனபு³ப³கா.

351. பஞ்சமச்ச²ட்ட²தோயேவ, யா ஸமுட்டா²னதோ ஸியா;
அயங் து படி²தா சோரி-வுட்டா²பனஸமுட்டி²தா.

352. து³தியா ததியம்ஹா ச, பஞ்சமச்ச²ட்ட²தோபி யா;
ஜாயதே அனநுஞ்ஞாத-ஸமுட்டா²னா அயங் ஸியா.

353. பட²மங் து³தியங் தத்த², சதுத்த²ங் நவமம்பி ச;
த³ஸமங் த³வாத³ஸமஞ்சாதி, ஸமுட்டா²னங் ஸசித்தகங்.

354. ஏகேகஸ்மிங் ஸமுட்டா²னே, ஸதி³ஸா இத⁴ தி³ஸ்ஸரே;
ஸுக்கஞ்ச காயஸங்ஸக்ச³கோ³, பட²மானியதோபி ச.

355. பு³ப³பபரிபாகோ ச, ரஹோ பி⁴க்கு²னியா ஸஹ;
ஸபோ⁴ஜனே, ரஹோ த³வே ச, அங்கு³லீ, உத³கே ஹஸங்.

356. பஹாரே, உக்³கி³ரே சேவ, தேபஞ்ஞாஸா ச ஸேகி²யா;
அத⁴க்க²கு³ப⁴ஜாணுஞ்ச, கா³மந்தரமவஸ்ஸுதா.

357. தலமட்டு²த³ஸுத்தி⁴ ச, வஸ்ஸங்வுட்டா² ததே²வ ச;
ஓவாதா³ய ந க³ச்ச²ந்தீ, நானுப³ந்தே⁴ பவத்தினிங்.

358. பஞ்சஸத்ததி நித்த³தி³ட்டா², காயசித்தஸமுட்டி²தா;
இமே ஏகஸமுட்டா²னா, மேது²னேன ஸமா மதா.

பட²மபாராஜிகஸமுட்டா²னங்.

359. விக்³க³ஹங், உத்தரிஞ்சேவ, து³ட்டு²ல்லங், அத்தகாமதா;

து³ட்ட²தோ³ஸா து³வே சேவ, து³தியானியதோபி ச.

360. அச்சி²ந்த³னஞ்ச பரிணாமோ, முஸா, ஓமஸபேஸுணா;
து³ட்டு²ல்லாரோசனஞ்சேவ, பத²விக²ணனம்பி ச.
361. பூ⁴தகா³மஞ்ஞவாதோ³ ச, உஜ்ஜா²பனகமேவ ச;
நிக்கட்³டோ⁴, ஸிஞ்சனஞ்சேவ, ததா² ஆமிஸஹேது ச.
362. பு⁴த்தாவிங், ஏஹனாத³ரிங், பி⁴ங்ஸாபனகமேவ ச;
அபனிதெ⁴ய்ய, ஸஞ்சிச்ச, பாணங், ஸப்பாணகம்பி ச.
363. உக்கோடனங் =00 ததா² ஊனோ, ஸங்வாஸோ, நாஸனேன ச;
ஸஹத⁴ம்மிகங், விலேகா²ய, மோஹனாமூலகேன ச.
364. குக்குச்சங், கீ²யனங் த³த்வா, பரிணாமெய்ய புக³க³லே;
கிங் தே, அகாலங், அச்சி²ந்தே³, து³க³க³ஹா, நிரயேன வா.
365. க³ணஸ்ஸ ச விப⁴ங்க³ஞ்ச, து³ப்³ப³லாஸா ததே²வ ச;
த⁴ம்மிகங் கதி²னுத்தா⁴ரங், ஸஞ்சிச்சாபா²ஸுமேவ ச.
366. ஸயங் உபஸ்ஸயங் த³த்வா, அக்கோஸெய்ய ச சண்டி³கா;
குலமச்ச²ரினீ அஸ்ஸ, க³ப்³பி⁴னிங் வுட்ட²பெய்ய ச.
367. பாயந்திங், த்³வே ச வஸ்ஸானி, ஸங்கே⁴னாஸம்மதம்பி ச;
திஸ்ஸோ கி³ஹிக³தா வுத்தா, திஸ்ஸோயேவ குமாரிகா.
368. ஊனத்³வாத³ஸவஸ்ஸா த்³வே, ததா²லங் தாவ தேதி ச;
ஸோகாவஸ்ஸா ததா² பாரி-வாஸிகச்ச²ந்த³தா³னதோ.
369. அனுவஸ்ஸங் து³வே சாதி, ஸிக்கா² ஏகூனஸத்ததி;
அதி³ன்னாதா³னதுல்யத்தா, திஸமுட்டா²னிகா கதா.

து³தியபாராஜிகஸமுட்டா²னங்.

370. ஸஞ்சரிகுடிமஹல்லகங், தோ⁴வாபனஞ்ச படிக்க³க³ஹோ;
சீவரஸ்ஸ ச விஞ்ஞத்தி, க³ஹணஞ்ச தது³த்தரிங்.
371. உபக்க²டத்³வயஞ்சேவ, ததா² து³தேன சீவரங்;
கோஸியங், ஸுத்த⁴காளானங், த்³வேபா⁴கா³தா³னமேவ ச.

372. ச²ப³ப³ஸ்ஸானி, புராணஸ்ஸ, லோமதோ⁴வாபனம்பி ச;
ருபியஸ்ஸ படிக்கா³ஹோ, உபோ⁴ நானப்பகாரகா.
373. ஊனப³ந்த⁴னபத்தோ ச, வஸ்ஸஸாடிகஸுத்தகங்;
விகப்பாபஜ்ஜனங், யாவ, த³வார, தா³னஞ்ச ஸிப³ப³னங்.
374. பூவேஹி, பச்சயோ ஜோதிங், ரதனங், ஸூசி, மஞ்சகங்;
தூலங், நிஸீத³னங், கண்டு³, வஸ்ஸஸிகா, ஸுக³தஸ்ஸ ச.
375. அஞ்ஞவிஞ்ஞத்திஸிக்கா² ச, அஞ்ஞசேதாபனம்பி ச;
ஸங்கி⁴கேன து³வே வுத்தா, த³வே மஹாஜனிகேன ச.
376. ததா² =01 புக்³க³லிகேனேகங், க³ருபாவுரணங் லஹுங்;
த³வே விகா⁴ஸோத³ஸாடி ச, ததா² ஸமணசீவரங்.
377. இதி ஏகூனபண்ணாஸ, த⁴ம்மா து³க்க²ந்தத³ஸ்ஸினா;
ச²ஸமுட்டா²னிகா ஏதே, ஸஞ்சரித்தஸமா கதா.
- ஸஞ்சரித்தஸமுட்டா²னங்.
378. ஸங்க⁴பே⁴தோ³ ச பே⁴தா³னு-வத்தது³ப³ப³சது³ஸகா;
து³ட்டு²ல்லச்சா²த³னங், தி³ட்டி², ச²ந்த³, உஜ்ஜக்கி⁴கா து³வே.
379. அப்பஸத³தா³ து³வே வுத்தா, ததா² ந ப்யாஹரேதி ச;
ச²மா, நீசாஸனே, டா²னங், பச்ச²தோ, உப்பதே²ன ச.
380. வஜ்ஜச்சா²தா³னுவத்தா ச, க³ஹணங், ஓஸாரெய்ய ச;
பச்சக்கா²மீதி ஸிக்கா² ச, ததா² கிஸ்மிஞ்சிதே³வ ச.
381. ஸங்ஸட்டா² த³வே, வதி⁴த்வா ச, விஸிப³பெ³த்வா ச து³க்கி²தங்;
புனதே³வ ச ஸங்ஸட்டா², நேவ ஓபஸமெய்ய ச.
382. ஜானங் ஸபி⁴க்கு²காராமங், ததே²வ ந பவாரயே;
ததா² அன்வத³த⁴மாஸஞ்ச, ஸஹஜீவினியோ து³வே.
383. ஸசே மே சீவரங் அய்யே, அனுப³ந்தி⁴ஸ்ஸஸீதி ச;
ஸத்ததிங்ஸ இமே த⁴ம்மா, ஸம்பு³த³தே⁴ன பகாஸிதா.
- 384.

ஸப்³பே³ ஏதே ஸமுட்டா²னா, காயவாசாதி³தோ ஸியுங்;
ஸமாஸமஸமேனேவ, கதா ஸமனுபா⁴ஸனா.

ஸமனுபா⁴ஸனஸமுட்டா²னங்.

385. கதி²னானி ச தீணாதி³, பத்தோ, பே⁴ஸஜ்ஜமேவ ச;
அச்சேகம்பி ச ஸாஸங்கங், பக்கமந்தத்³வயம்பி ச.
386. ததா² உபஸ்ஸயங் க³ந்த்வா, போ⁴ஜனஞ்ச பரம்பரங்;
அனதிரித்தங் ஸப⁴த்தோ, விகப்பெத்வா ததே²வ ச.
387. ரஞ்ஞோ, விகாலே, வோஸாஸா-ரஞ்ஞுகுஸ்ஸயவாதி³கா;
பத்தஸன்னிசயஞ்சேவ, புரே, பச்சா², விகாலகே.
388. பஞ்சாஹிகங் =02, ஸங்கமனிங், ததா² ஆவஸதத்³வயங்;
பஸாகே², ஆஸனே சாதி, ஏகூனதிங்ஸிமே பன.
389. த்³விஸமுட்டா²னிகா த⁴ம்மா, நித்³தி³ட்டா² காயவாசதோ;
காயவாசாதி³தோ சேவ, ஸப்³பே³ கதி²னஸம்ப⁴வா.

கதி²னஸமுட்டா²னங்.

390. த்³வே ஸெய்யாஹச்சபாதோ³ ச, பிண்ட³ஞ்ச க³ணபோ⁴ஜனங்;
விகாலே, ஸன்னிதி⁴ஞ்சேவ, த்³ந்தபோனமசேலகங்.
391. உய்யுத்தஞ்ச வஸுய்யோதி⁴ங், ஸுரா, ஓரேன ந்ஹாயனங்;
து³ப³பண்ணகரணஞ்சேவ, பாடிதே³ஸனியத்³வயங்.
392. லஸுணங், உபதிட்டெ²ய்ய, நச்சத³ஸ்ஸனமேவ ச;
நக்³கங், அத்த²ரணங், மஞ்சே, அந்தோரட்டே², ததா² ப³ஹி.
393. அந்தோவஸ்ஸமகா³ரஞ்ச, ஆஸந்தி³ங், ஸுத்தகந்தனங்;
வெய்யாவச்சங், ஸஹத்தா² ச, ஆவாஸே ச அபி⁴க்கு²கே.
394. ச²த்தங், யானஞ்ச ஸங்கா⁴ணிங், அலங்காரங், க³ந்த⁴வாஸிதங்;
பி⁴க்கு²னீ, ஸிக்க²மானா ச, ஸாமணேரீ, கி³ஹீனியா.
395. ததா² ஸங்கச்சிகா சாதி, தேசத்தாலீஸிமே பன;
ஸப்³பே³ ஏளகலோமேன, த்³விஸமுட்டா²னிகா ஸமா.

ஏளகலோமஸமுட்டா²னங்.

396. அஞ்ஞத்ராஸம்மதோ சேவ, ததா² அத்த²ங்க³தேன ச;
திரச்சா²னவிஜ்ஜா த்³வே வுத்தா, அனோகாஸகதம்பி ச.

397. ஸப்³பே³ ச² பனிமே த⁴ம்மா, வாசதோ வாசசித்ததோ;
த்³விஸமுட்டா²னிகா ஹொந்தி, பத்³ஸோத⁴ம்மதுல்யதா.

பத்³ஸோத⁴ம்மஸமுட்டா²னங்.

398. ஏகங் நாவங், பணீதஞ்ச, ஸங்விதா⁴னஞ்ச ஸங்ஹரே;
த⁴ஞ்ஞங், நிமந்திதா சேவ, பாடிதே³ஸனியட்ட²கங்.

399. ஏதா =03 சதுஸமுட்டா²னா, ஸிக்கா² சுத்³த³ஸ ஹொந்தி ஹி;
பஞ்ஞத்தா பு³த்³த⁴ஸெட்டே²ன, அத்³தா⁴னேன ஸமா மதா.

அத்³தா⁴னஸமுட்டா²னங்.

400. ஸுதிங், ஸுபாதி³விஞ்ஞத்திங், அந்த⁴காரே ததே²வ ச;
படிச்ச²ன்னே ச ஓகாஸே, ப்³யூஹே சாதி இமே ச²பி.

401. ஸப்³பே³ து த்³விஸமுட்டா²னா, சதுத்த²ச்ச²ட்ட²தோ ஸியுங்;
தெ²ய்யஸத்த²ஸமுட்டா²னா, தே³ஸிதாதி³ச்சப³ந்து⁴னா.

தெ²ய்யஸத்த²ஸமுட்டா²னங்.

402. ச²த்த, த்³ண்ட³கரஸ்ஸாபி, ஸத்தா²வுத⁴கரஸ்ஸபி;
பாது³கூபாஹனா, யானங், ஸெய்யா, பல்லத்தி²காய ச.

403. வேடி²தோகு³ண்டி²தோ சாதி, ஏகாத³ஸ நித³ஸ்ஸிதா;
ஸப்³பே³ ஏகஸமுட்டா²னா, த⁴ம்மதே³ஸனஸஞ்ஞிதா.

த⁴ம்மதே³ஸனஸமுட்டா²னங்.

404. பூ⁴தாரோசனகஞ்சேவ , சோரிவுட்டா²பனம்பி ச;
அனநுஞ்ஞாதமத்தஞ்ஹி, அஸம்பி⁴ன்னமித³ங் தயங்.

ஸமுட்டா²னஸீஸகதா² நிட்டி²தா.

ஏகுத்தரனயகதா²

405. கதி ஆபத்தியோ ஹொந்தி, ஸமுட்டா²னேன ஆதி³னா?
பஞ்ச ஆபத்தியோ ஹொந்தி, குடிங் ஸங்யாசிகாய து.
406. கரோதோ பன திஸ்ஸோவ, பயோகே³ து³க்கடாத³யோ;
விகாலே பன பாசித்தி, ததா² அஞ்ஞாதிஹத்த²தோ.
407. க³ஹெத்வா பு⁴ஞ்ஜதோ வுத்தங், பாடிதே³ஸனியம்பி ச;
பஞ்சிமாபத்தியோ ஹொந்தி, ஸமுட்டா²னேன ஆதி³னா.
408. கதி =04 ஆபத்தியோ ஹொந்தி, து³தியேன துவங் ப⁴ண?
ஆபத்தியோ சதஸ்ஸோவ, ஹொந்தீதி பரிதீ³பயே.
409. “குடிங் மம கரோதா²”தி, ஸமாதி³ஸதி பி⁴க்கு² சே;
கரொந்தி சே குடிங் தஸ்ஸ, விபன்னங் ஸப்³பதா² பன.
410. திஸ்ஸோ புரிமனித்³தி³ட்டா², பயோகே³ து³க்கடாத³யோ;
பத³ஸோத⁴ம்மமூலேன, சதஸ்ஸோவ ப⁴வந்திமா.
411. ததியேன கதி ஜாயந்தி, ஸமுட்டா²னேன மே ப⁴ண?
ததியேன துவங் ப்³ருமி, பஞ்சதா⁴பத்தியோ ஸியுங்.
412. பி⁴க்கு² ஸங்வித³ஹித்வான;
கரோதி ச குடிங் ஸசே;
திஸ்ஸோ ஆபத்தியோ ஹொந்தி;
பயோகே³ து³க்கடாத³யோ.
413. பணீதபோ⁴ஜனங் வத்வா, ஹொதி பாசித்தி பு⁴ஞ்ஜதோ;
பி⁴க்கு²னிங் ந நிவாரெத்வா, பாடிதே³ஸனியங் ஸியா.
414. ஸியுங் கதி சதுத்தே²ன, ஸமுட்டா²னேன மே ப⁴ண?
ச²ளேவாபத்தியோ ஹொந்தி, மேது²னங் யதி³ ஸேவதி.
415. ஹொதி பாராஜிகங் தஸ்ஸ, குடிங் ஸங்யாசிகாய து;
கரோதோ பன திஸ்ஸோவ, பயோகே³ து³க்கடாத³யோ.
416. விகாலே பன பாசித்தி, ததா² அஞ்ஞாதிஹத்த²தோ;
க³ஹெத்வா பு⁴ஞ்ஜதோ வுத்தங், பாடிதே³ஸனியம்பி ச.

417. கதி ஆபத்தியோ ஹொந்தி, பஞ்சமேன? ச² ஹொந்தி ஹி;
மனுஸ்ஸுத்தரித⁴ம்மங் து, வத³ங் பாராஜிகங் பு²ஸே.
418. “குடிங் மம கரோதா²”தி;
ஸமாதி³ஸதி பி⁴க்கு² சே;
கரொந்தி சே குடிங் திஸ்ஸோ;
ஹொந்தி தா து³க்கடாத³யோ.
419. வாசேதி பத³ஸோ த⁴ம்மங், ஹொதி பாசித்தி பி⁴க்கு²னோ;
த³வகம்யதா வத³ந்தஸ்ஸ, தஸ்ஸ து³ப்பா⁴ஸிதங் ஸியா.
420. ஸமுட்டா²னேன =05 ச²ட்டே²ன, கதி ஆபத்தியோ ஸியுங்?
ச² ச ஸங்வித³ஹித்வான, ப⁴ண்ட³ங் ஹரதி சே சுதோ.
421. “குடிங் மம கரோதா²”தி;
ஸமாதி³ஸதி பி⁴க்கு² சே;
கரொந்தி சே குடிங் திஸ்ஸோ;
ஹொந்தி தா து³க்கடாத³யோ.
422. பணீதபோ⁴ஜனங் வத்வா, ஹொதி பாசித்தி பு⁴ஞ்ஜதோ;
பி⁴க்கு²னிங் ந நிவாரெத்வா, பாடிதே³ஸனியங் ஸியா.
423. இத⁴ யோ விமதூபரமங் பரமங்;
இமமுத்தரமுத்தரதி;
வினயங் ஸுனயங் ஸுனயேன யுதோ;
ஸ ச து³த்தரமுத்தரமுத்தரதி.
- ஆபத்திஸமுட்டா²னகதா².
424. இதோ பரங் பவக்கா²மி, பரமேகுத்தரங் நயங்;
அவிக்கி²த்தேன சித்தேன, தங் ஸுணாத² ஸமாஹிதா.
425. கே ஆபத்திகரா த⁴ம்மா, அனாபத்திகராபி கே?
கா பனாபத்தியோ நாம, லஹுகா க³ருகாபி கா?
426. ஸாவஸேஸா ச காபத்தி, கா நாமானவஸேஸகா?
து³ட்ட²ல்லா நாம காபத்தி, அது³ட்ட²ல்லாபி நாம கா?
- 427.

நியதா நாம காபத்தி, கா பனானியதாபி ச?
தே³ஸனாகா³மினீ கா ச, கா சாதே³ஸனகா³மினீ?

428. ஸமுட்டா²னானி ஆபத்தி-கரா த⁴ம்மாதி தீ³பிதா;
அனாபத்திகரா த⁴ம்மா, ஸமதா² ஸத்த த³ஸ்ஸிதா.

429. பாராஜிகாத³யோ ஸத்த-விதா⁴ ஆபத்தியோ ஸியுங்;
லஹுகா தத்த² பஞ்சேவ, ஹொந்தி து²ல்லச்சயாத³யோ.

430. பாராஜிகங் ட²பெத்வான, ஸாவஸேஸாவஸேஸகா;
ஏகா பாராஜிகாபத்தி, மதா அனவஸேஸகா.

431. “து³ட்டு²ல்லா”தி =06 ச நித்³தி³ட்டா², து³விதா⁴பத்திஆதி³தோ;
ஸேஸா பஞ்சவிதா⁴பத்தி, “அது³ட்டு²ல்லா”தி தீ³பிதா.

432. பஞ்சானந்தரியஸங்யுத்தா, நியதானியதேதரா;
தே³ஸனாகா³மினீ பஞ்ச, த்³வே பனாதே³ஸகா³மிகா.

ஏகககதா².

433. அப⁴ப்³பா³பத்திகோ கோ ச, ப⁴ப்³பா³பத்திகபுக்³கலோ?
உபஸம்பத³கம்மங் து, ஸத்து²னா கஸ்ஸ வாரிதங்?

434. ஆபத்திமாபஜ்ஜிதுங் த்³வேவ லோகே;
பு³த்தா⁴ ச பச்சேகபு³த்தா⁴ அப⁴ப்³பா³;
ஆபத்திமாபஜ்ஜிதுங் த்³வேவ லோகே;
பி⁴க்கூ² ச ப⁴ப்³பா³ அத² பி⁴க்கு²னீ ச.

435. அத்³த⁴விஹீனோ அங்க³விஹீனோ;
வத்து²விபன்னோ து³க்கடகாரீ;
நோ பரிபுண்ணோ யாசதி யோ நோ;
தஸ்ஸுபஸம்பதா³ படிஸித்³தா⁴.

436. அத்தா²பத்தி ஹவே லத்³த⁴-ஸமாபத்திஸ்ஸ பி⁴க்கு²னோ;
அத்தா²பத்தி ஹி நோ லத்³த⁴-ஸமாபத்திஸ்ஸ தீ³பிதா.

437. பூ⁴தஸ்ஸாரோசனங் லத்³த⁴-ஸமாபத்திஸ்ஸ நித்³தி³ஸே;
அபூ⁴தாரோசனாபத்தி, அஸமாபத்திலாபி⁴னோ.

438. அத்தி² ஸத்³த⁴ம்மஸங்யுத்தா, அஸத்³த⁴ம்மயுதாபி ச;
ஸபரிக்கா²ரஸங்யுத்தா, பரஸந்தகஸங்யுதா.
439. பத்³ஸோத⁴ம்மமூலாதீ³, ஸத்³த⁴ம்மபடிஸங்யுதா;
து³ட்²டு²ல்லவாசஸங்யுத்தா, அஸத்³த⁴ம்மயுதா ஸியா.
440. அதிரேகத்³ஸாஹங் து, ட²பனே சீவராதி³னோ;
அனிஸ்ஸஜ்ஜித்வா போ⁴கே³ ச, ஸபரிக்கா²ரஸங்யுதா.
441. ஸங்க⁴ஸ்ஸ மஞ்சபீடா²தி³ங், அஜ்ஜோ²காஸத்த²ரேபி ச;
அனாபுச்சா²வ க³மனே, பரஸந்தகஸங்யுதா.
442. கத்²ஞ்ஹி =07 ப⁴ணதோ ஸச்சங், க³ருகங் ஹோதி பி⁴க்கு²னோ?
கத்²ங் முஸா ப⁴ணந்தஸ்ஸ, லஹுகாபத்தி ஜாயதே?
443. “ஸிக²ரணீ”தி ஸச்சங் து, ப⁴ணதோ க³ருகங் ஸியா;
ஸம்பஜானமுஸாவாதே³, பாசித்தி லஹுகா ப⁴வே.
444. கத்²ங் முஸா ப⁴ணந்தஸ்ஸ, க³ருகங் ஹோதி பி⁴க்கு²னோ?
கத்²ஞ்ச ப⁴ணதோ ஸச்சங், ஆபத்தி லஹுகா ஸியா?
445. அபூ⁴தாரோசனே தஸ்ஸ, க³ருகாபத்தி தீ³பிதா;
பூ⁴தஸ்ஸாரோசனே ஸச்சங், வத்³தோ லஹுகா ஸியா.
446. கத்²ங் பூ⁴மிக³தோ தோ³ஸங், ந வேஹாஸக³தோ பு²ஸே?
கத்²ங் வேஹாஸகோ³ தோ³ஸங், ந ச பூ⁴மிக³தோ பு²ஸே?
447. ஸங்க⁴கம்மங் விகோபேதுங், ஹத்த²பாஸங் ஜஹங் பு²ஸே;
கேஸமத்தம்பி ஆகாஸே, திட்ட²தோ நத்தி² வஜ்ஜதா.
448. ஆஹச்சபாத³கங் மஞ்சங், வேஹாஸகுடியூபரி;
பீட²ங் வாபி⁴னிஸீத்³ந்தோ, ஆபஜ்ஜதி ந பூ⁴மிதோ.
449. பவிஸந்தோ கத்²ங் பி⁴க்கு², ஆபஜ்ஜதி, ந நிக்க²மங்?
பவிஸந்தோ கத்²ங் பி⁴க்கு², பவிஸந்தோ ந சேவ தங்?
450. ஸச²த்துபாஹனோ வத்த-மபூரெத்வான கேவலங்;
பவிஸந்தோ பனாபத்திங், ஆபஜ்ஜதி, ந நிக்க²மங்.

451. க³மிகோ க³மிகவத்தானி, அபூரெத்வான நிக்க²மங்;
நிக்க²மந்தோவ ஆபத்திங், பு²ஸெய்ய, பவிஸங் ந ச.
452. ஆதி³யந்தோ பனாபத்திங், ஆபஜ்ஜதி கத²ங் வத³?
ததே²வானாதி³யந்தோபி, ஆபஜ்ஜதி கத²ங் வத³?
453. பி⁴க்கு²னீ அதிக³ம்பீ⁴ரங், யா காசுத³கஸுத்³தி⁴கங்;
ஆதி³யந்தீ பனாபத்திங், ஆபஜ்ஜதி, ந ஸங்ஸயோ.
454. அனாதி³யித்வா து³ப³பண்ணை-கரணங் பன சீவரங்;
யேவங் அனாதி³யந்தோவ, ஆபஜ்ஜதி ஹி நாம ஸோ.
455. ஸமாதி³யந்தோ ஆபத்திங், ஆபஜ்ஜதி கத²ங் பன?
ததா²ஸமாதி³யந்தோபி, ஆபஜ்ஜதி கத²ங் பன?
456. யோ =08 ஹி மூக³ப³பதாதீ³னி, வதானித⁴ ஸமாதி³யங்;
ஸமாதி³யந்தோ ஆபத்திங், ஆபஜ்ஜதி ஹி நாம ஸோ.
457. யோ ஹி கம்மகதோ பி⁴க்கு², வுத்தங் வத்தங் பனத்தனோ;
தஞ்சாஸமாதி³யந்தோவ, ஆபஜ்ஜதி ஹி நாம ஸோ.
458. கரொந்தோவ பனாபத்திங், கத²மாபஜ்ஜதே நரோ?
ந கரொந்தோ கத²ங் நாம, ஸமணோ தோ³ஸவா ஸியா?
459. ப⁴ண்டா³கா³ரிககம்மஞ்ச, வேஜ்ஜகம்மஞ்ச சீவரங்;
அஞ்ஞாதிகாய ஸிப³பந்தோ, கரங் ஆபஜ்ஜதே நரோ.
460. உபஜ்ஜா²யஸ்ஸ வத்தானி, வத்தானி இதரஸ்ஸ வா;
அகரொந்தோ பனாபத்திங், ஆபஜ்ஜதி ஹி நாம ஸோ.
461. தெ³ந்தோ ஆபஜ்ஜதாபத்திங், ந தெ³ந்தோபி கத²ங் ப⁴ண?
அஞ்ஞாதிகாய யங் கிஞ்சி, பி⁴க்கு² பி⁴க்கு²னியா பன.
462. சீவரங் த³த³மானோ ஹி, தெ³ந்தோ ஆபஜ்ஜதே பன;
தத²ந்தேவாஸிகாதீ³னங், அதெ³ந்தோ சீவராதி³கங்.
463. அத்தஸன்னிஸ்ஸிதா அத்தி², ததே²வ பரனிஸ்ஸிதா;
முது³லம்பா³தி³னோ அத்தா, ஸேஸா ஹி பரனிஸ்ஸிதா.

464. கத²ஞ்ச படி³ண்ஹந்தோ, ஆபஜ்ஜதி ஹி வஜ்ஜதங்?
கத²மப்படி³ண்ஹந்தோ, ஆபஜ்ஜதி ஹி வஜ்ஜதங்?
465. சீவரங் படி³ண்ஹந்தோ, பி⁴க்கு² அஞ்ஞாதிஹத்த²தோ;
ஓவாத³ஞ்ச ந க³ண்ஹந்தோ, ஆபஜ்ஜதி ஹி வஜ்ஜதங்.
466. கத²ஞ்ச பரிபோ⁴கே³ன, ஆபஜ்ஜதி தபோத⁴னோ?
கத²ங் ந பரிபோ⁴கே³ன, ஆபஜ்ஜதி தபோத⁴னோ?
467. யோ ஹி நிஸ்ஸக்³கியங் வத்து²ங், அச்சஜித்வா நிஸேவதி;
அயங் து பரிபோ⁴கே³ன, ஆபஜ்ஜதி, ந ஸங்ஸயோ.
468. அதிக்கமெந்தீ ஸங்கா⁴டி-சாரங் பஞ்சாஹிகங் பன;
அயங் து பரிபோ⁴கே³ன, ஆபஜ்ஜதி ஹி பி⁴க்கு²னீ.
469. தி³வாபஜ்ஜதி நோ ரத்திங், ரத்திமேவ ச நோ தி³வா;
த்³வாரங் அஸங்வரித்வான, ஸெந்தோ ஆபஜ்ஜதே தி³வா.
470. ஸகா³ரஸெய்யகங் =09 ரத்திங், ஆபஜ்ஜதி ஹி நோ தி³வா;
அருணுக்³கே³ பனாபத்தி, கத²ங் ந அருணுக்³க³மே?
471. ஏகசா²ரத்தஸத்தாஹ-த³ஸாஹாதி³அதிக்கமே;
பு²ஸந்தோ வுத்தமாபத்திங், ஆபஜ்ஜத்யருணுக்³க³மே.
472. பவாரெத்வான பு⁴ஞ்ஜந்தோ, பு²ஸே ந அருணுக்³க³மே;
சி²ந்த³ந்தஸ்ஸ ஸியாபத்தி, கத²மச்சி²ந்த³தோ ஸியா?
473. சி²ந்த³ந்தோ பூ⁴தகா³மஞ்ச, அங்க³ஜாதஞ்ச அத்தனோ;
பாராஜிகஞ்ச பாசித்திங், பு²ஸே து²ல்லச்சயம்பி ச.
474. ந சி²ந்த³ந்தோ நகே² கேஸே, ஆபஜ்ஜதி ஹி நாம ஸோ;
சா²தெ³ந்தோபஜ்ஜதாபத்திங், நச்சா²தெ³ந்தோ கத²ங் பன?
475. சா²தெ³ந்தோ பன ஆபத்திங், சா²தெ³ந்தோபஜ்ஜதே நரோ;
ஆபஜ்ஜதி பனச்சி²ன்னோ, நச்சா²தெ³ந்தோ திணாதி³னா.
476. ஆபஜ்ஜதி ஹி தா⁴ரெந்தோ, ந தா⁴ரெந்தோ கத²ங் பன?
தா⁴ரெந்தோ குஸசீராதி³ங், தா⁴ரெந்தோபஜ்ஜதே பன.

477. தி³ன்னங் நிஸ்ஸட்ட²பத்தங் தங், அதா⁴ரெந்தோவ தோ³ஸவா;
ஸசித்தகது³கங் ஸஞ்ஞா-விமொக்க²கது³கங் ப⁴வே.

து³க்கதா².

478. அத்தா²பத்தி ஹி திட்ட²ந்தே, நாதே², நோ பரினிப்³பு³தே;
நிப்³பு³தே ந து திட்ட²ந்தே, அத்தா²பத்துப⁴யத்த²பி.

479. ருஹிருப்பாத³னாபத்தி, டி²தே, நோ பரினிப்³பு³தே;
தே²ரமாவுஸவாதே³ன, வத³தோ பரினிப்³பு³தே.

480. ஆபத்தியோ இமா த்³வேபி, ட²பெத்வா ஸுக³தே பன;
அவஸேஸா த⁴ரந்தேபி, ப⁴வந்தி பரினிப்³பு³தே.

481. காலேயேவ ஸியாபத்தி, விகாலே ந ஸியா கத²ங்?
விகாலே து ஸியாபத்தி, ந காலே, உப⁴யத்த²பி?

482. பு⁴ஞ்ஜதோனதிரித்தங் து, காலஸ்மிங், நோ விகாலகே;
விகாலபோ⁴ஜனாபத்தி, விகாலே, து ந காலகே.

483. அவஸேஸங் =10 பனாபத்திங், ஆபஜ்ஜதி ஹி ஸப்³பு³தா³;
ஸப்³பு³ங் காலே விகாலே ச, நத்தி² தத்த² ச ஸங்ஸயோ.

484. ரத்திமேவ பனாபத்திங், ஆபஜ்ஜதி ச நோ தி³வா;
தி³வாபஜ்ஜதி நோ ரத்திங், ஆபஜ்ஜதுப⁴யத்த²பி.

485. ஸஹஸெய்யா ஸியா ரத்திங், த்³வாராஸங்வரமூலகா;
தி³வா, ஸேஸா பனாபத்தி, ஸியா ரத்திங் தி³வாபி ச.

486. த்³ஸவஸ்ஸோ து நோ ஊன-த்³ஸவஸ்ஸோ ஸியா கத²ங்?
ஹோதூனத்³ஸவஸ்ஸோ, நோ, த்³ஸவஸ்ஸுப⁴யத்த²பி?

487. உபட்டா²பேதி சே பா³லோ, பரிஸங் த்³ஸவஸ்ஸிகோ;
ஆபத்திங் பன அப்³யத்தோ, ஆபஜ்ஜதி, ந ஸங்ஸயோ.

488. ததூ²னத்³ஸவஸ்ஸோ ச, “பண்டி³தோஹ”ந்தி க்³ண்ஹதி;
பரிஸங், த்³ஸவஸ்ஸோ நோ, ஸேஸமாபஜ்ஜதே உபோ⁴.

489.

காளே ஆபஜ்ஜதாபத்திங், ந ஜுண்ஹே ஜுண்ஹகே கத²ங்;
ஆபஜ்ஜதி, ந காளஸ்மிங், ஆபஜ்ஜதூப⁴யத்த²பி?

490. வஸ்ஸங் அனுபக³ச்ச²ந்தோ, காளே, நோ ஜுண்ஹகே பன;
ஆபஜ்ஜதாபவாரெந்தோ, ஜுண்ஹே, ந பன காளகே.

491. அவஸேஸங் து பஞ்ஞத்த-மாபத்திமவிபத்தினா;
காளே சேவ ச ஜுண்ஹே ச, ஆபஜ்ஜதி, ந ஸங்ஸயோ.

492. வஸ்ஸுபக³மனங் காளே, நோ ஜுண்ஹே, து பவாரணா;
ஜுண்ஹே கப்பதி, நோ காளே, ஸேஸங் பனுப⁴யத்த²பி.

493. அத்தா²பத்தி து ஹேமந்தே, ந ஹோதீதருதுத்³வயே;
கி³ம்ஹேயேவ ந ஸேஸேஸு, வஸ்ஸே நோ இதரத்³வயே.

494. தி³னே பாளிபத³க்கா²தே, கத்திகே புண்ணமாஸியா;
ட²பிதங் து விகப்பெத்வா, வஸ்ஸஸாடிகசீவரங்.

495. ஆபஜ்ஜதி ச ஹேமந்தே, நிவாஸேதி ச தங் ஸசே;
புண்ணமாதி³வஸஸ்மிஞ்ஹி, கத்திகஸ்ஸ து பச்சி²மே.

496. தங் அபச்சுத்³த⁴ரித்வாவ, ஹேமந்தேயேவ, நேதரே;
ஆபஜ்ஜதீதி நித்³தி³ட்ட²ங், குருந்த³ட்ட²கதா²ய து.

497. “அதிரேகமாஸோ =11 ஸேஸோ”தி;
பரியேஸந்தோ ச கி³ம்ஹிகே;
கி³ம்ஹே ஆபஜ்ஜதாபத்திங்;
ந த்வேவிதருதுத்³வயே.

498. விஜ்ஜமானே ஸசே நக்³கோ³, வஸ்ஸஸாடிகசீவரே;
ஓவஸ்ஸாபேதி யோ காயங், வஸ்ஸே ஆபஜ்ஜதீத⁴ ஸோ.

499. ஆபஜ்ஜதி ஹி ஸங்கோ⁴வ, ந க³ணோ ந ச புக்³க³லோ;
க³ணோவ ந ச ஸேஸா ஹி, புக்³க³லோவ ந சாபரே.

500. அதி⁴ட்டா²னங் கரொந்தோ வா, பாரிஸுத்³தி⁴உபோஸத²ங்;
ஸங்கோ⁴ வாபஜ்ஜதாபத்திங், ந க³ணோ ந ச புக்³க³லோ.

501.

ஸுத்துத்³தே³ஸமதி⁴ட்டா²னங், கரொந்தோ வா உபோஸத²ங்;
க³ணோ வாபஜ்ஜதாபத்திங், ந ஸங்கோ⁴ ந ச புக்³க³லோ.

502. ஸுத்துத்³தே³ஸங் கரொந்தோ வா, ஏகோ பன உபோஸத²ங்;
புக்³க³லோபஜ்ஜதாபத்திங், ந ச ஸங்கோ⁴ க³ணோ ந ச.

503. ஆபஜ்ஜதி கி³லானோவ, நாகி³லானோ கத²ங் பன;
ஆபஜ்ஜதாகி³லானோவ, நோ கி³லானோ உபோ⁴பி ச?

504. பே⁴ஸஜ்ஜேன பனஞ்ஞேன, அத்தே² ஸதி ச யோ பன;
விஞ்ஞாபேதி தத³ஞ்ஞங் ஸோ, ஆபஜ்ஜதி அகல்லகோ.

505. ந பே⁴ஸஜ்ஜேன அத்தே²பி, பே⁴ஸஜ்ஜங் விஞ்ஞாபேதி சே;
ஆபஜ்ஜதாகி³லானோவ, ஸேஸங் பன உபோ⁴பி ச.

506. அத்தா²பத்தி ஹி அந்தோவ, ந ப³ஹித்³தா⁴, ததா² ப³ஹி;
ஆபஜ்ஜதி, ந சேவந்தோ, அத்தா²பத்துப⁴யத்த²பி.

507. அனுபக²ஜ்ஜ ஸெய்யங் து, கப்பெந்தோ பன கேவலங்;
ஆபஜ்ஜதி பனாபத்திங், அந்தோயேவ ச, நோ ப³ஹி.

508. அஜ்ஜோ²காஸே து மஞ்சாதி³ங், ஸந்த²ரித்வான பக்கமங்;
ப³ஹியேவ ச, நோ அந்தோ, ஸேஸங் பனுப⁴யத்த²பி.

509. அந்தோஸீமாயேவாபத்திங், ப³ஹிஸீமாய நேவ ச;
ப³ஹிஸீமாய, நோ அந்தோ-ஸீமாய, உப⁴யத்த²பி.

510. ஸச²த்துபாஹனோ =12 பி⁴க்கு², பவிஸந்தோ தபோத⁴னோ;
உபசாரஸீமோக்கந்தே, அந்தோ ஆபஜ்ஜதே பன.

511. க³மிகோ தா³ருப⁴ண்டா³தி³ங், படிஸாமனவத்தகங்;
அபுரெத்வான க³ச்ச²ந்தோ, உபசாரஸ்ஸதிக்கமே.

512. ஆபஜ்ஜதி பனாபத்திங், ப³ஹிஸீமாயேவ ஸோ;
ஸேஸமாபஜ்ஜதே அந்தோ-ப³ஹிஸீமாய ஸப்³ப³ஸோ.

திககதா².

513. ஸகவாசாய ஆபன்னோ, பரவாசாய ஸுஜ்ஜ²தி;

பரவாசாய ஆபன்னோ, ஸகவாசாய ஸுஜ்ஜ²தி.

514. ஸகவாசாய ஆபன்னோ, ஸகவாசாய ஸுஜ்ஜ²தி;
பரவாசாய ஆபன்னோ, பரவாசாய ஸுஜ்ஜ²தி.

515. வசீத்³வாரிகமாபத்திங் , ஆபன்னோ ஸகவாசதோ;
திணவத்தா²ரகங் க³ந்த்வா, பரவாசாய ஸுஜ்ஜ²தி.

516. ததா² அப்படினிஸ்ஸக்³கே³, பாபிகாய ஹி தி³ட்டி²யா;
பரஸ்ஸ கம்மவாசாய, ஆபஜ்ஜித்வான வஜ்ஜதங்.

517. தே³ஸெந்தோ பி⁴க்கு²னோ மூலே, ஸகவாசாய ஸுஜ்ஜ²தி;
வசீத்³வாரிகமாபத்திங், ஆபன்னோ பி⁴க்கு²ஸந்திகே.

518. தே³ஸெத்வா தங் விஸுஜ்ஜ²ந்தோ, ஸகவாசாய ஸுஜ்ஜ²தி;
ஸங்கா⁴தி³ஸேஸமாபத்திங், யாவததியகங் பன.

519. பரஸ்ஸ கம்மவாசாய, ஆபஜ்ஜித்வா ததா² புன;
பரஸ்ஸ பரிவாஸாதி³-கம்மவாசாய ஸுஜ்ஜ²தி.

520. காயேனாபஜ்ஜதாபத்திங், வாசாய ச விஸுஜ்ஜ²தி;
வாசாயாபஜ்ஜதாபத்திங், காயேன ச விஸுஜ்ஜ²தி.

521. காயேனாபஜ்ஜதாபத்திங், காயேனேவ விஸுஜ்ஜ²தி;
வாசாயாபஜ்ஜதாபத்திங், வாசாயேவ விஸுஜ்ஜ²தி.

522. காயத்³வாரிகமாபத்திங், காயேனாபஜ்ஜதே, புன;
தே³ஸெந்தோ தங் பனாபத்திங், வாசாயேவ விஸுஜ்ஜ²தி.

523. வசீத்³வாரிகமாபத்திங் =13, ஆபஜ்ஜித்வான வாசதோ;
திணவத்தா²ரகங் க³ந்த்வா, காயேனேவ விஸுஜ்ஜ²தி.

524. காயத்³வாரிகமாபத்திங், ஆபஜ்ஜித்வான காயதோ;
திணவத்தா²ரகங் க³ந்த்வா, காயேனேவ விஸுஜ்ஜ²தி.

525. வசீத்³வாரிகமாபத்திங், ஆபஜ்ஜித்வா தபோத⁴னோ;
தமேவ பன தே³ஸெந்தோ, வாசாயேவ விஸுஜ்ஜ²தி.

526.

ஸுத்தோ ஆபஜ்ஜதாபத்திங், படிபுத்³தோ⁴ விஸுஜ்ஜ²தி;
ஆபன்னோ படிபுத்³தோ⁴வ, ஸுத்தோ ஸுஜ்ஜ²தி ஸோ கத²ங்?

527. ஸுத்தோ ஆபஜ்ஜதாபத்திங், ஸுத்தோயேவ விஸுஜ்ஜ²தி;
படிபுத்³தோ⁴வ ஆபன்னோ, படிபுத்³தோ⁴ விஸுஜ்ஜ²தி?

528. ஸகா³ரஸெய்யகாதி³ங் து, ஸுத்தோ ஆபஜ்ஜதே நரோ;
தே³ஸெந்தோ பன தங் ஞுத்வா, படிபுத்³தோ⁴ விஸுஜ்ஜ²தி.

529. ஆபஜ்ஜித்வான ஜக்³க³ந்தோ, திணவத்தா²ரகே பன;
ஸமதே² து ஸயந்தோவ, ஸுத்தோ வட்டா²தி நாம ஸோ.

530. ஸகா³ரஸெய்யகாதி³ங் து, ஸுத்தோ ஆபஜ்ஜதே நரோ;
ஸயந்தோ திணவத்தா²ரே, ஸுத்தோயேவ விஸுஜ்ஜ²தி.

531. ஆபஜ்ஜித்வா பனாபத்திங், ஜக்³க³ந்தோ பன கேவலங்;
தே³ஸெந்தோ பன தங் பச்சா², படிபுத்³தோ⁴ விஸுஜ்ஜ²தி.

532. ஆபஜ்ஜித்வா அசித்தோவ, ஸசித்தோவ விஸுஜ்ஜ²தி;
ஆபஜ்ஜித்வா ஸசித்தோவ, அசித்தோவ விஸுஜ்ஜ²தி.

533. ஆபஜ்ஜித்வா அசித்தோவ, அசித்தோவ விஸுஜ்ஜ²தி;
ஆபஜ்ஜித்வா ஸசித்தோவ, ஸசித்தோவ விஸுஜ்ஜ²தி.

534. அசித்தோ, சித்தகாபத்திங், ஆபஜ்ஜித்வா தபோத⁴னோ;
பச்சா² தங் பன தே³ஸெந்தோ, ஸசித்தோவ விஸுஜ்ஜ²தி.

535. ததா² ஸசித்தகாபத்திங், ஆபஜ்ஜித்வா ஸசித்தகோ;
ஸயந்தோ திணவத்தா²ரே, அசித்தோவ விஸுஜ்ஜ²தி.

536. ஏவமேவங் அமிஸ்ஸெத்வா, பச்சி²மங் து பத³த்³வயங்;
எத்த² வுத்தானுஸாரேன, வேதி³தப்³ப³ங் விபா⁴வினா.

537. ஆபஜ்ஜதி =14 ச கம்மேன, அகம்மேன விஸுஜ்ஜ²தி;
ஆபஜ்ஜதி அகம்மேன, கம்மேனேவ விஸுஜ்ஜ²தி.

538. கம்மேனாபஜ்ஜதாபத்திங், கம்மேனேவ விஸுஜ்ஜ²தி;
ஆபஜ்ஜதி அகம்மேன, அகம்மேன விஸுஜ்ஜ²தி.

539. அச்சஜங் பாபிகங் தி³ட்டி²ங், ஆபஜ்ஜித்வான கம்மதோ;
தே³ஸெந்தோ பன தங் பச்சா², அகம்மேன விஸுஜ்ஜ²தி.
540. விஸட்டி²ஆதி³காபத்திங் , ஆபஜ்ஜித்வா அகம்மதோ;
பரிஸுஜ்ஜ²தி கம்மேன, பரிவாஸாதி³னா பன.
541. ஸமனுபா⁴ஸனங் பி⁴க்கு², ஆபஜ்ஜதி ச கம்மதோ;
பரிவாஸாதி³னா பச்சா², கம்மேனேவ விஸுஜ்ஜ²தி.
542. அவஸேஸங் பனாபத்திங், ஆபஜ்ஜதி அகம்மதோ;
தே³ஸெந்தோ பன தங் பச்சா², அகம்மேனேவ ஸுஜ்ஜ²தி.
543. ஸம்முகா²பத்திமாபன்னோ, விஸுஜ்ஜ²தி அஸம்முகா²;
அஸம்முகா²பி ஆபன்னோ, ஸம்முகா²வ விஸுஜ்ஜ²தி.
544. ஸம்முகா²பத்திமாபன்னோ, ஸம்முகா²வ விஸுஜ்ஜ²தி;
அஸம்முகா²வ ஆபன்னோ, விஸுஜ்ஜ²தி அஸம்முகா².
545. அச்சஜங் பாபகங் தி³ட்டி²ங், ஆபன்னோ ஸங்க⁴ஸம்முகே²;
வுட்டா²னகாலே ஸங்கே⁴ன, கிஞ்சி கம்மங் ந விஜ்ஜதி.
546. விஸட்டி²ஆதி³காபத்திங், ஆபஜ்ஜித்வா அஸம்முகா²;
ஸங்க⁴ஸம்முக²தோயேவ, விஸுஜ்ஜ²தி ந சஞ்ஞதா².
547. ஸமனுபா⁴ஸனங் ஸங்க⁴-ஸம்முகா²பஜ்ஜதே, புன;
ஸங்க⁴ஸ்ஸ ஸம்முகா²யேவ, விஸுஜ்ஜ²தி, ந சஞ்ஞதா².
548. முஸாவாதா³தி³கங் ஸேஸங், ஆபஜ்ஜதி அஸம்முகா²;
தங் பச்சா² பன தே³ஸெந்தோ, விஸுஜ்ஜ²தி அஸம்முகா².
549. அஜானந்தோவ ஆபன்னோ, ஜானந்தோவ விஸுஜ்ஜ²தி;
ஜானந்தோ பன ஆபன்னோ, அஜானந்தோ விஸுஜ்ஜ²தி.
550. அஜானந்தோவ ஆபன்னோ, அஜானந்தோ விஸுஜ்ஜ²தி;
ஜானந்தோ பன ஆபன்னோ, ஜானந்தோவ விஸுஜ்ஜ²தி.
551. அசித்தகசதுக்கேன =15, ஸதி³ஸங் ஸப்³பதா² இத³ங்;
அஜானந்தசதுக்கந்தி, வேதி³தப்³பங் விபா⁴வினா.

552. ஆக³ந்துகோவ ஆபத்திங், ஆபஜ்ஜதி, ந சேதரோ;
ஆவாஸிகோவ ஆபத்திங், ஆபஜ்ஜதி, ந சேதரோ.
553. ஆக³ந்துகோ ததா²வாஸி-கோபி ஆபஜ்ஜரே உபோ⁴;
அத்தா²பத்தி ச ஸேஸங் து, உபோ⁴ நாபஜ்ஜரே பன.
554. ஸச²த்துபாஹனோ சேவ, ஸஸீஸங் பாருதோபி ச;
விஹாரங் பவிஸந்தோ ச, விசரந்தோபி தத்த² ச.
555. ஆக³ந்துகோவ ஆபத்திங், ஆபஜ்ஜதி, ந சேதரோ;
ஆவாஸவத்தமாவாஸீ, அகரொந்தோவ தோ³ஸவா.
556. ந சேவாக³ந்துகோ, ஸேஸ-மாபஜ்ஜந்தி உபோ⁴பி ச;
அஸாதா⁴ரணமாபத்திங், நாபஜ்ஜந்தி உபோ⁴பி ச.
557. வத்து²னானத்ததா அத்தி², நத்தி² ஆபத்தினானதா;
அத்தி² ஆபத்தினானத்தங், நத்தி² வத்து²ஸ்ஸ நானதா.
558. வத்து²னானத்ததா சேவ, அத்தி² ஆபத்தினானதா;
நேவத்தி² வத்து²னானத்தங், நோ ச ஆபத்தினானதா.
559. பாராஜிகசதுக்கஸ்ஸ, வத்து²னானத்ததா மதா;
ஆபத்தினானதா நத்தி², ஸேஸாபத்தீஸ்வயங் நயோ.
560. ஸமணோ ஸமணீ காய-ஸங்ஸக்³க³ங் து கரொந்தி சே;
ஸங்கா⁴தி³ஸேஸோ பி⁴க்கு²ஸ்ஸ, பி⁴க்கு²னியா பராஜயோ.
561. ஏவங் ஆபத்தினானத்தங், நத்தி² வத்து²ஸ்ஸ நானதா;
காயஸ்ஸ பன ஸங்ஸக்³கோ³, உபி⁴ன்னங் வத்து² ஹோதி ஹி.
562. ததே²வ லஸுணஸ்ஸாபி, கா²த³னே பி⁴க்கு²னீ பன;
ஆபஜ்ஜதி ஹி பாசித்திங், பி⁴க்கு²னோ ஹோதி துக்கடங்.
563. பாராஜிகானங் பன சே சதுன்னங்;
ஸங்கா⁴தி³ஸேஸேஹி ச தேரஸேஹி;
ஹோதேவ வத்து²ஸ்ஸ ச நானபா⁴வோ;
ஆபத்தியா சேவ ஹி நானபா⁴வோ.

564. பாராஜிகானி =16 சத்தாரி, ஆபஜ்ஜந்தானமேகதோ;
பி⁴க்கு²னீஸமணானங் து, உபி⁴ன்னங் பன ஸப்³ப³ஸோ.
565. வத்து²ஸ்ஸ நத்தி² நானத்தங், நத்தி² ஆபத்தினானதா;
விஸுங் பனாபஜ்ஜந்தேஸு, அயமேவ வினிச்ச²யோ.
566. அத்தி² வத்து²ஸபா⁴க³த்தங், நத்தா²பத்திஸபா⁴க³தா;
அத்தா²பத்திஸபா⁴க³தா, நத்தி² வத்து²ஸபா⁴க³தா.
567. அத்தி² வத்து²ஸபா⁴க³த்தங், அத்தா²பத்திஸபா⁴க³தா;
நத்தி² வத்து²ஸபா⁴க³த்தங், நத்தா²பத்திஸபா⁴க³தா.
568. பி⁴க்க²னங் பி⁴க்கு²னீனஞ்ச, காயஸங்ஸக்³க³கே ஸதி;
அத்தி² வத்து²ஸபா⁴க³த்தங், நத்தா²பத்திஸபா⁴க³தா.
569. ஆதி³தோ பன பி⁴க்கு²ஸ்ஸ, சதூஸ்வந்திமவத்து²ஸு;
ஸியாபத்திஸபா⁴க³த்தங், ந ச வத்து²ஸபா⁴க³தா.
570. பி⁴க்க²னங் பி⁴க்கு²னீனஞ்ச, சதூஸ்வந்தி மவத்து²ஸு;
அத்தி² வத்து²ஸபா⁴க³த்தங், அத்தா²பத்திஸபா⁴க³தா.
571. ஸாதா⁴ரணாஸு ஸப்³பா³ஸு, ஆபத்தீஸ்வப்யயங் நயோ;
அஸாதா⁴ரணாஸு நேவத்தி², வத்தா²பத்திஸபா⁴க³தா.
572. அத்தா²பத்தி உபஜ்ஜா²யே, நேவ ஸத்³தி⁴விஹாரிகே;
அத்தி² ஸத்³தி⁴விஹாரஸ்மிங், உபஜ்ஜா²யே ந விஜ்ஜதி.
573. அத்தா²பத்தி உபஜ்ஜா²யே, ததா² ஸத்³தி⁴விஹாரிகே;
நேவாபத்தி உபஜ்ஜா²யே, நேவ ஸத்³தி⁴விஹாரிகே.
574. உபஜ்ஜா²யேன கத்தப்³ப³-வத்தஸ்ஸாகரணே பன;
உபஜ்ஜா²யோ பு²ஸே வஜ்ஜங், ந ச ஸத்³தி⁴விஹாரிகோ.
575. உபஜ்ஜா²யஸ்ஸ கத்தப்³ப³-வத்தஸ்ஸாகரணே பன;
நத்தா²பத்தி உபஜ்ஜா²யே, அத்தி² ஸத்³தி⁴விஹாரிகே.
576. ஸேஸங் பனித⁴ ஆபத்திங், ஆபஜ்ஜந்தி உபோ⁴பி ச;
அஸாதா⁴ரணமாபத்திங், நாபஜ்ஜந்தி உபோ⁴பி ச.

577. ஆதியந்தோ க³ருங் தோ³ஸங், பயோஜெந்தோ லஹுங் பு²ஸே;
ஆதியந்தோ லஹுங் தோ³ஸங், பயோஜெந்தோ க³ருங் பு²ஸே.
578. ஆதியந்தோ =17 பயோஜெந்தோ, க³ருகேயேவ திட்ட²தி;
ஆதியந்தோ பயோஜெந்தோ, லஹுகேயேவ திட்ட²தி.
579. பாத³ங் வாபி ததோ உத்³த⁴ங், ஆதியந்தோ க³ருங் பு²ஸே;
“க³ண்ஹா”தி ஊனகங் பாத³ங், ஆணாபெந்தோ லஹுங் பு²ஸே.
580. ஏதேனேவ உபாயேன, ஸேஸகம்பி பத³த்தயங்;
அத்த²ஸம்ப⁴வதோயேவ, வேதி³தப்³ப³ங் விபா⁴வினா.
581. காலேயேவ பனாபத்தி, நோ விகாலே கத²ங் ஸியா?
விகாலேயேவ ஆபத்தி, ந ச காலே கத²ங் ஸியா?
582. அத்தா²பத்தி ஹி காலே ச, விகாலே ச பகாஸிதா?
நேவ காலே விகாலே ச, அத்தா²பத்தி பகாஸிதா?
583. பவாரெத்வான பு⁴ஞ்ஜந்தோ, காலே அனதிரித்தகங்;
காலே ஆபஜ்ஜதாபத்திங், ந விகாலேதி தீ³பயே.
584. விகாலபோ⁴ஜனாபத்திங், விகாலே ந ச காலகே;
ஸேஸங் காலே விகாலே ச, ஆபஜ்ஜதி, ந ஸங்ஸயோ.
585. அஸாதா⁴ரணமாபத்திங், பி⁴க்கு²னீனங் வஸா பன;
நேவாபஜ்ஜதி காலேபி, நோ விகாலேபி ஸப்³ப³தா³.
586. கிங் படி³க³ஹிதங் காலே, நோ விகாலே து கப்பதி?
விகாலே கிஞ்ச நோ காலே, க³ஹிதங் பன கப்பதி?
587. காலே சேவ விகாலே ச, கிங் நாம வத³ கப்பதி?
நேவ காலே ச கிங் நாம, நோ விகாலே ச கப்பதி?
588. ஆமிஸங் து புரேப⁴த்தங், படி³க³ஹிதகங் பன;
காலேயேவ து பி⁴க்கூ²னங், நோ விகாலே து கப்பதி.
589. பானகங் து விகாலஸ்மிங், படி³க³ஹிதகங் பன;
விகாலேயேவ காலே ச, அபரஜ்ஜு ந கப்பதி.

590. ஸத்தாஹகாலிகஞ்சேவ , சதுத்த²ங் யாவஜீவிகங்;
காலே சேவ விகாலே ச, கப்பதீதி வினித்³தி³ஸே.
591. அத்தனோ அத்தனோ கால-மதீதங் காலிகத்தயங்;
மங்ஸங் அகப்பியஞ்சேவ, ததா² உக்³க்³ஹிதம்பி ச.
592. குலதூ³ஸனகம்மாதி³ங் =18, கத்வா உப்பன்னபோ⁴ஜனங்;
காலே சேவ விகாலே ச, ந ச கப்பதி பி⁴க்கு²னோ.
593. பச்சந்திமேஸு தே³ஸேஸு, ஆபஜ்ஜதி ந மஜ்ஜி²மே;
மஜ்ஜி²மே பன தே³ஸஸ்மிங், ந ச பச்சந்திமேஸு ஹி.
594. பச்சந்திமேஸு தே³ஸேஸு, ஆபஜ்ஜதி ச மஜ்ஜி²மே;
பச்சந்திமேஸு தே³ஸேஸு, நாபஜ்ஜதி ந மஜ்ஜி²மே.
595. ஸீமங் ஸமுத்³தே³ ப³ந்த⁴ந்தோ, பி⁴க்கு² பச்சந்திமேஸு ஹி;
ஆபஜ்ஜதி பனாபத்திங், ந சாபஜ்ஜதி மஜ்ஜி²மே.
596. க³ணேன பஞ்சவக்³கே³ன, கரொந்தோ உபஸம்பத³ங்;
சம்மத்த²ரணங் து⁴வன்ஹானங், ஸகு³ணங்கு³ணுபாஹனங்.
597. தா⁴ரெந்தோ மஜ்ஜி²மே வஜ்ஜங், பு²ஸே பச்சந்திமேஸு நோ;
அவஸேஸங் பனாபத்திங், ஆபஜ்ஜதூப⁴யத்த²பி.
598. அஸாதா⁴ரணஆபத்திங், பி⁴க்கு²னீனங் வஸா பன;
பச்சந்திமேஸு வா பி⁴க்கு², நாபஜ்ஜதி ந மஜ்ஜி²மே.
599. பச்சந்திமேஸு தே³ஸேஸு, கப்பதே ந ச மஜ்ஜி²மே;
கப்பதே, மஜ்ஜி²மே தே³ஸே, நோ ச பச்சந்திமேஸு ஹி.
600. பச்சந்திமேஸு தே³ஸேஸு, கப்பதே, மஜ்ஜி²மேபி கிங்?
பச்சந்திமேஸு சேவாபி, கிங் ந கப்பதி மஜ்ஜி²மே?
601. பச்சந்திமேஸு தே³ஸேஸு, வுத்தங் வத்து² சதுப்³பி³த⁴ங்;
நித்³தி³ஸே கப்பதீ சேவ, ந ச கப்பதி மஜ்ஜி²மே.
602. “இத³ங் சதுப்³பி³த⁴ங் வத்து², தே³ஸஸ்மிங் பன மஜ்ஜி²மே;
ந கப்பதீ”தி வுத்தஞ்ஹி, “மஜ்ஜி²மேயேவ கப்பதி”.

603. பச்சந்திமேஸு தே³ஸேஸு, ஏவங் வுத்தங் ந கப்பதி;
பஞ்சலோணாதி³கங் ஸேஸங், உப⁴யத்த²பி கப்பதி.
604. அகப்பியந்தி யங் நாம, படிக்கி²த்தங் மஹேஸினா;
உப⁴யத்த²பி தங் ஸப்³பங், ந ச கப்பதி பி⁴க்கு²னோ.
605. அந்தோ ஆபஜ்ஜதாபத்திங், ஆபஜ்ஜதி ச, நோ ப³ஹி;
ப³ஹி ஆபஜ்ஜதாபத்திங், ந ச அந்தோ குதா³சனங்.
606. ஆபஜ்ஜதி =19 பனந்தோ ச, ப³ஹி சேவுப⁴யத்த²பி;
நேவ அந்தோ ச ஆபத்திங், ஆபஜ்ஜதி ச, நோ ப³ஹி.
607. அனுபக²ஜ்ஜஸெய்யாதி³ங், அந்தோயேவ ச, நோ ப³ஹி;
ஸங்கி⁴கங் பன மஞ்சாதி³ங், அஜ்ஜோ²காஸே து கிஞ்சிபி.
608. நிக்கி²பித்வான க³ச்ச²ந்தோ, நோ அந்தோ, ப³ஹியேவ ச;
ஸேஸமாபஜ்ஜதாபத்திங், அந்தோ சேவ ததா² ப³ஹி.
609. அஸாதா⁴ரணமாபத்திங், பி⁴க்கு²னீனங் வஸா பன;
நேவாபஜ்ஜதி அந்தோபி, ந ப³ஹித்³தா⁴பி ஸப்³பதா².
610. கா³மே ஆபஜ்ஜதாபத்திங், நோ அரஞ்ஞே கத²ங் வத³?
ஆபஜ்ஜதி அரஞ்ஞஸ்மிங், ந ச கா³மே கத²ங் வத³?
611. ஆபஜ்ஜதி ச கா³மேபி, அரஞ்ஞேபி கத²ங் வத³?
நேவாபஜ்ஜதி கா³மேபி, நோ அரஞ்ஞே கத²ங் வத³?
612. அந்தரக⁴ரஸங்யுத்தா, ஸெக்க²பஞ்ஞத்தியோ பன;
ஆபஜ்ஜதி ஹி தங் பி⁴க்கு², கா³மஸ்மிங், நோ அரஞ்ஞே.
613. அக³ணா அருணங் நாம, உட்டா²பெந்தீ ச பி⁴க்கு²னீ;
ஆபஜ்ஜதி பனாபத்திங், அரஞ்ஞே, நோ ச கா³மகே.
614. முஸாவாதா³தி³மாபத்திங் , ஆபஜ்ஜதாப⁴யத்த²பி;
அஸாதா⁴ரணமாபத்திங், ஆபஜ்ஜதி ந கத்த²சி.
615. ஆபஜ்ஜதி கி³லானோவ, நாகி³லானோ குதா³சனங்;
அகி³லானோவ ஆபத்திங், பு²ஸே, நோ ச கி³லானகோ.

616. அகி³லானோ கி³லானோ ச, ஆபஜ்ஜந்தி உபோ⁴பி ச;
நாபஜ்ஜந்தி கி³லானோ ச, அகி³லானோ உபோ⁴பி ச.
617. பே⁴ஸஜ்ஜேன பனஞ்ஞேன, அத்தே² ஸதி ச யோ பன;
விஞ்ஞாபேதி தத³ஞ்ஞங் ஸோ, ஆபஜ்ஜதி அகல்லகோ.
618. ந பே⁴ஸஜ்ஜேன அத்தே²பி, பே⁴ஸஜ்ஜங் விஞ்ஞாபேதி சே;
ஆபஜ்ஜதாகி³லானோவ, ஆபத்திங் லோலமானஸோ.
619. முஸாவாதா³தி³கங் ஸேஸங், ஆபஜ்ஜந்தி உபோ⁴பி ச;
அஸாதா⁴ரணமாபத்திங், நாபஜ்ஜந்தி உபோ⁴பி ச.

சதுக்ககதா².

620. பஞ்ச =20 ஆபத்தியோ ஹொந்தி, முஸாவாத³ஸ்ஸ காரணா;
பாராஜிகங் க³ருங்து²ல்ல-ச்சயங் பாசித்தி து³க்கடங்.
621. ஆனிஸங்ஸா பனுத்³தி³ட்டா², பஞ்சேவ கதி²னத்த²ரே;
அனாமந்தாஸமாதா³ன-சரணங் க³ணபோ⁴ஜனங்.
622. யோ தத்த² சீவருப்பாதோ³, ஸோ ச நேஸங் ப⁴விஸ்ஸதி;
சீவரங் யாவத³த்த²ஞ்ச, க³ஹேதும்பி ச வட்டதி.
623. தேலங் பஞ்சவித⁴ங் வுத்தங், நிப்பபஞ்சேன ஸத்து²னா;
வஸா மது⁴கஏரண்ட³-திலஸாஸபஸம்ப⁴வங்.
624. அச்ச²மச்ச²வஸா சேவ, ஸுஸுகா ஸுகரஸ்ஸ ச;
க³த்³ரப⁴ஸ்ஸ வஸா சேதி, வஸா பஞ்சவிதா⁴ மதா.
625. மூலக²ந்த⁴க்³க³பீஜானி , ப²ளுபீஜஞ்ச பண்டி³தோ;
பஞ்சமங் பீஜபீஜந்தி, பஞ்ச பீஜானி தீ³பயே.
626. ப²லங் ஸமணகப்பேஹி, பரிபு⁴ஞ்ஜெய்ய பஞ்சஹி;
அக்³கி³ஸத்த²னக²க்கந்தங், அபீ³ஜுப்³பட்டபீ³ஜகங்.
627. பண்ணுண்ணதிணசோளானங், வாகஸ்ஸ ச வஸேனித⁴;
பி⁴ஸியோ பா⁴ஸிதா பஞ்ச, முனிநா மோஹனாஸினா.

628.

பவாரணாபி பஞ்சேவ, ஓத³னாதீ³ஹி பஞ்சஹி;
படிக்கா³ஹாபி பஞ்சேவ, காயாதி³க³ஹணேன ச.

629. பஞ்சானிஸங்ஸா வினயஞ்ஞுகஸ்மிங்;
மஹேஸினா காருணிகேன வுத்தா;
ஸுரக்கி²தங் ஹோதி ஸகஞ்ச ஸீலங்;
குக்குச்சமஞ்ஞுஸ்ஸ நிராகரோதி.

630. விஸாரதோ³ பா்⁴ஸதி ஸங்க்⁴மஜ்ஜே²;
ஸுகே²ன நிக்³க³ண்ஹதி வேரிபி்⁴க்கூ²;
த்⁴ம்மஸ்ஸ சேவ டி²தியா பவத்தோ;
தஸ்மாத³ரங் தத்த² கரெய்ய தீ்⁴ரோ.

பஞ்சககதா².

631. ச²வச்சே²த³னகா =21 வுத்தா, ச²ளபி்⁴ஞ்ஞேன தாதி³னா;
மஞ்சபீட²மதிக்கந்த-பமாணஞ்ச நிஸீத³னங்.

632. ததா² கண்டு³படிச்சா²தீ³, வஸ்ஸஸாடிகசீவரங்;
சீவரங் ஸுக³தஸ்ஸாபி, சீவரேன பமாணகங்.

633. ச²ஹாகாரேஹி ஆபத்திங், ஆபஜ்ஜதி ந அஞ்ஞதா²;
அலஜ்ஜிதாய அஞ்ஞாண-குக்குச்சேஹி ததே²வ ச.

634. விபரிதாய ஸஞ்ஞாய, கப்பியேபி அகப்பியே;
ஸதிஸம்மோஸதோ சேவ, ஆபஜ்ஜதி, ந ஸங்ஸயோ.

635. ச²ஹி அங்கே³ஹி யுத்தேன;
உபஸம்பாத³னா பன;
காதப்³பா³, நிஸ்ஸயோ சேவ;
தா³தப்³போ³, ஸாமணேரகோ.

636. பி்⁴க்கு²னாபட்ட²பேதப்³போ³, ஸததங் த்⁴ம்மசக்கு²னா;
ஆபத்திங் பன ஜானாதி, அனாபத்திங் க³ருங் லஹுங்.

637. பாதிமொக்கா²னி வித்தா²ரா, உப்⁴யானி பனஸ்ஸ ஹி;
ஸ்வாக³தானி ப்⁴வந்தேவ, ஸுவிப்⁴த்தானி அத்த²தோ.

638. அனுப்³யஞ்ஞனஸோ சேவ, ஸுத்தஸோ ஸுவினிச்சி²தா;

த³ஸவஸ்ஸோபி வா ஹோதிதிரேகத³ஸவஸ்ஸிகோ.

ச²க்ககதா².

639. ஸத்த ஸாமீசியோ வுத்தா, ஸத்தேவ ஸமதா²பி ச;
பஞ்ஞத்தாபத்தியோ ஸத்த, ஸத்தபொ³ஜ்ஜ²ங்க³த³ஸ்ஸினா.

ஸத்தககதா².

640. குலானி இத⁴ தூ³ஸேதி, ஆகாரேஹி பனட்ட²ஹி;
புப்பே²ன ச ப²லேனாபி, சுண்ணேனபி ச தூ³ஸகோ.
641. மத்திகாத³ந்தகட்டே²ஹி, வேளுயா வேஜ்ஜிகாயபி;
ஜங்க⁴பேஸனிகேனாபி, ஆஜீவஸ்ஸேவ காரணா.
642. அட்டே²வானதிரித்தாபி , அதிரித்தாபி அட்ட² ச;
அகப்பியகதங் சேவாக³ஹிதுச்சாரிதம்பி ச.
643. கதங் அஹத்த²பாஸேபி, ந ச பு⁴த்தாவினா கதங்;
பவாரிதேன யஞ்சேவ, கதங் பு⁴த்தாவினாபி ச.
644. ஆஸனா வுட்டி²தேனாபி, அதிரித்தகதம்பி ச;
அவுத்தமலமேதந்தி, ந கி³லானாதிரித்தகங்.
645. இமே அட்டே²வ நித்தி³திட்ட²ங், ஞெய்யா அனதிரித்தகா;
அதிரித்தா பனேதேஸங், படிக்கே²பேன தீ³பிதா.
646. ஸஹபுப்³பயோகே³ஸு, து³க்கடங் ஞாதஞத்திஸு;
து³ருபசிண்ணே ஆமாலே, து³க்கடங் படிஸாவனே.
647. அட்ட²மங் பன நித்தி³திட்ட²ங், ததா² வினயது³க்கடங்;
இதி அட்ட²வித⁴ங் ஹோதி, ஸப்³பமேவ ச து³க்கடங்.
648. ஏஹிபி⁴க்கூ²பஸம்பதா³, ஸரணக³மனேன ச;
பஞ்ஹாப்³யாகரணோவாதா³, க³ருத⁴ம்மபடிக்க³ஹோ.
649. ததா² ஞத்திசதுத்தே²ன, கம்மேனேவட்ட²வாசிகா;
தூ³தேன பி⁴க்கு²னீனந்தி, அட்டே²வ உபஸம்பதா³.

650. அஸத்³த⁴ம்மா பனட்டே²வ, நித்³தி³ட்டா² ஸுத்³த⁴தி³ட்டி²னா;
அட்டே²வுபோஸத²ங்கா³னி, வேதி³தப்³பா³னி விஞ்ஞனா.
651. ஸக்காரோ ச அஸக்காரோ;
லாபா⁴லாபோ⁴ யஸாயஸோ;
பாபிச்சா² பாபமித்தத்தங்;
அஸத்³த⁴ம்மா பனட்டி²மே.
652. பாணங் ந ஹனே, ந சாதி³ன்னமாதி³யே;
முஸா ந பா⁴ஸே, ந ச மஜ்ஜபோ ஸியா;
அப்³ரஹ்மசரியா விரமெய்ய மேது²னா;
ரத்திங் ந பு⁴ஞ்ஜெய்ய விகாலபோ⁴ஜனங்.
653. மாலங் ந தா⁴ரே, ந ச க³ந்த⁴மாசரே;
மஞ்சே ச²மாயங்வ ஸயேத² ஸந்த²தே;
ஏதஞ்ஹி அட்ட²ங்கி³கமாஹுபோஸத²ங்;
பு³த்³தே⁴ன து³க்க²ந்தகு³னா பகாஸிதங்.
654. அட்டே²வ பன பானானி, நித்³தி³ட்டா²னி மஹேஸினா;
பி⁴க்கு² அட்ட²ங்க³ஸங்யுத்தோ, பி⁴க்கு²னோவாத³மரஹதி.
- அட்ட²ககதா².
655. போ⁴ஜனானி பணீதானி, நவ வுத்தானி ஸத்து²னா;
து³க்கடங் பன நித்³தி³ட்ட²ங், நவ மங்ஸானி கா²த³தோ.
656. பாதிமொக்க²ஸ்ஸ உத்³தே³ஸா, நவேவ பரிதீ³பிதா;
உபோஸதா² நவேவெத்த², ஸங்கோ⁴ நவஹி பி⁴ஜ்ஜதி.
- நவககதா².
657. த³ஸ அக்கோஸவத்தூ²னி, த³ஸ ஸிக்கா²பதா³னி ச;
அகப்பியானி மங்ஸானி, த³ஸ ஸுக்கானி வே த³ஸ.
658. ஜாதி நாமஞ்ச கொ³த்தஞ்ச, கம்மங் ஸிப்பஞ்ச ரோக³தா;
லிங்கா³பத்தி கிலேஸா ச, அக்கோஸேன த³ஸேவ ஹி.
659. த³ஸ ஆதீ³னவா ரஞ்ஞோ, அந்தேபுரப்பவேஸனே;
த³ஸாகாரேஹி ஸங்கா⁴தி³-ஸேஸோ ச²ன்னோதி தீ³பிதோ.

660. த³ஸ கம்மபதா² புஞ்ஞா, அபுஞ்ஞாபி ததா² த³ஸ;
த³ஸேவ தா³னவத்தா²னி, த³ஸேவ ரதனானி ச.
661. அன்னங் பானஞ்ச வத்த²ஞ்ச, மாலா க³ந்த⁴விலேபனங்;
யானஞ்ச ஸெய்யாவஸத²ங், பதீ³பெய்யந்திமே த³ஸ.
662. அவந்தி³யா முனிந்தே³ன, தீ³பிதா த³ஸ புக்³க³லா;
த³ஸேவ பங்ஸுகூலானி, த³ஸ சீவரதா⁴ரணா.
663. ஸோஸானிகங் பாபணிகங், ததா² உந்து³ரகா²யிதங்;
கோ³கா²யிதக்³கி³னா த³ட்³ட்⁴ங், அஜிகூபசிககா²யிதங்.
664. தூ²பசீவரிகஞ்சேவ, ததே²வ அபி⁴ஸேகியங்;
க³தபச்சா²க³தஞ்சேதி, த³ஸதா⁴ பங்ஸுகூலிகங்.
665. ஸப்³ப³னீலாத³யோ வுத்தா, த³ஸ சீவரதா⁴ரணா;
சீவரானி நவேவெத்த², ஸத்³தி⁴ங் ஸங்கச்சிகாய ச.

த³ஸககதா².

666. ஏகாத³ஸ பனாப⁴ப்³பா³, புக்³க³லா பண்ட³காத³யோ;
ஹொந்தேவானுபஸம்பன்னா, உபஸம்பாதி³தாபி ச.
667. பத்தா அகப்பியா வுத்தா, ஏகாத³ஸ ப⁴வந்தி ஹி;
தா³ருஜேன ச பத்தேன, த³ஸேவ ரதனுப்³ப⁴வா.
668. ஏகாத³ஸ ததா² ஹொந்தி, பாது³காபி அகப்பியா;
ஏகாத³ஸேவ ஸீமாயோ, அஸீமாதி பகாஸிதா.
669. அதிகு²த்³தா³திமஹந்தா, க²ண்ட³ச்சா²யானிமித்தகா;
அனிமித்தா, ப³ஹிட்²ன, ஸம்மதா, நதி³யங் ததா².
670. ஜாதஸ்ஸரே, ஸமுத்³தே³ வா, ஸம்பி⁴ன்னஜ்ஜொ²த்த²டாபி ச;
ஸீமாயபி அஸீமாயோ, ஏகாத³ஸ இமா ஸியுங்.
671. ஏகாத³ஸேவ பத²வீ, கப்பியா ச அகப்பியா;
க³ண்டி²கா கப்பியா வுத்தா, ஏகாத³ஸ ச வீத⁴கா.

672.

ஏகாத³ஸவித⁴ங் வுத்தங், அதி⁴ட்டா²தப்³ப³சீவரங்;
திசீவரங் ததா² கண்டு³-படிச்சா²தீ³, நிஸீத³னங்.

673. பச்சத்த²ரணங், வஸ்ஸிக-ஸாடிகா, முக²புஞ்ச²னங்;
த³கஸாடி, பரிக்கா²ர-சோளங், ஸங்கச்சிகாபி ச.

674. யாவத்தியகா ஸப்³பே³, ஏகாத³ஸ பகாஸிதா;
அரிட்டோ², சண்ட³காளீ ச, உக்கி²த்தஸ்ஸானுவத்திகா.

675. அட்ட² ஸங்கா⁴தி³ஸேஸேஸு, உபி⁴ன்னங் து வஸா பன;
ஏகாத³ஸ இமே யாவ-ததியாதி பகாஸிதா.

676. நிஸ்ஸயஸ்ஸ த³ஸேகாவ, படிப்பஸ்ஸத்த³தி⁴யோ பன;
ச²தா⁴சரியதோ வுத்தா, உபஜ்ஜா²யா து பஞ்சதா⁴.

ஏகாத³ஸககதா².

677. தேரஸேவ து⁴தங்கா³னி, பரமானி ச சுத்³த³ஸ;
ஸோளஸேவ து “ஜான”ந்தி, பஞ்ஞத்தானி மஹேஸினா.

678. ஸஉத்தரங் வினயவினிச்ச²யங் து யோ;
அனுத்தரங் ஸகலமபீத⁴ ஜானதி;
மஹத்தரே வினயனயே அனுத்தரே;
நிருத்தரோ ப⁴வதி ஹி ஸோ, ந ஸங்ஸயோ.

ஏகுத்தரனயோ ஸமத்தோ.

ஸேத³மோசனகதா²

679. இதோ பரங் பவக்கா²மி, பி⁴க்கூ²னங் ஸுணதங் புன;
ஸேத³மோசனகா³தா²யோ, படுபா⁴வகரா வரா.

680. உப்³ப⁴க்க²கங் விவஜ்ஜெத்வா, அதோ⁴னாபி⁴ங் விவஜ்ஜிய;
படிச்ச மேது²னங் த⁴ம்மங், கத²ங் பாராஜிகோ ஸியா?

681. கப³ந்த⁴ஸத்தகாயஸ்ஸ, உரே ஹோதி முக²ங் ஸசே;
முகே²ன மேது²னங் த⁴ம்மங், கத்வா பாராஜிகோ ப⁴வே.

682. ஸுஞ்ஞே நிஸ்ஸத்தகே தீ³பே, ஏகோ பி⁴க்கு² ஸசே வஸே;

மேது²னபச்சயா தஸ்ஸ, கத²ங் பாராஜிகோ ஸியா?

683. லம்பீ³ வா முது³பிட்டி² வா, வச்சமக்³கே³ முகே²பி வா;
அங்க³ஜாதங் பவேஸெந்தோ, ஸகே பாராஜிகோ ப⁴வே.
684. ஸயங் நாதி³யதே கிஞ்சி, பரஞ்ச ந ஸமாத³பே;
ஸங்விதா⁴னஞ்ச நேவத்தி², கத²ங் பாராஜிகோ ஸியா?
685. ஸுங்ககா⁴தே அதிக்கந்தே, நாதி³யந்தோ பரஸ்ஸ து;
ஆணத்திஞ்ச வினாயேவ, ஹோதி பாராஜிகோ யதி.
686. ஹரந்தோ க³ருகங் ப⁴ண்ட³ங், தெ²ய்யசித்தேன பக்³க³லோ;
பரஸ்ஸ து பரிக்கா²ரங், ந ச பாராஜிகோ கத²ங்?
687. திரச்சா²னக³தானங் து, பக்³க³லோ க³ருப⁴ண்ட³கங்;
க³ண்ஹந்தோ தெ²ய்யசித்தேன, ந ச பாராஜிகோ ஸியா.
688. அத்தனோ ஸந்தகங் த³த்வா, பி⁴க்கு² பாராஜிகோ கத²ங்?
“மரது”தி அஸப்பாய-போ⁴ஜனங் தே³தி சே சுதோ.
689. பிதரி பிதுஸஞ்ஞீ ச, மாதுஸஞ்ஞீ ச மாதரி;
ஹந்த்வானந்தரியங் கம்மங், ந பு²ஸெய்ய கத²ங் நரோ?
690. திரச்சா²னக³தா மாதா, திரச்சா²னக³தோ பிதா;
தஸ்மானந்தரியங் நத்தி², மாரிதேஸு உபோ⁴ஸுபி.
691. அனாதி³யந்தோ க³ருகங், பரஞ்ச ந ஸமாத³பே;
க³ச்ச²ங் டி²தோ நிஸின்னோ வா, கத²ங் பாராஜிகோ ப⁴ண?
692. மனுஸ்ஸுத்தரிகே த⁴ம்மே, கத்வான கதிகங் ததோ;
ஸம்பா⁴வனாதி⁴ப்பாயோ ஸோ, அதிக்கமதி சே சுதோ.
693. ஸங்கா⁴தி³ஸேஸா சத்தாரோ, ப⁴வெய்யுங் ஏகவத்து²கா;
கத²ங்? கதே²ஹி மே புட்டோ², வினயே சே விஸாரதோ³.
694. ஸஞ்சரித்தஞ்ச து³ட்டு²ல்லங், ஸங்ஸக்³க³ங் அத்தகாமதங்;
இத்தி²யா படிபஜ்ஜந்தோ, பு²ஸெய்ய சதுரோ இமே.
- 695.

ஸங்கா⁴தி³ஸேஸமாபன்னோ, சா²தெ³த்வா ஸுசிரங் பன;
அசரித்வா யதா²வுத்தங், வத்தங் ஸோ வுட்டி²தோ கத²ங்?

696. ஸுக்கவிஸ்ஸட்டி²மாபன்னோ , பி⁴க்கு²பா⁴வே டி²தோ பன;
பரிவத்தே து லிங்க³ஸ்மிங், நத்தி² ஸங்கா⁴தி³ஸேஸதா.

697. குத்³தோ⁴ ஆராத⁴கோ ஹோதி;
குத்³தோ⁴ ஹோதி ச நிந்தி³தோ;
அத² கோ நாம ஸோ த⁴ம்மோ;
யேன குத்³தோ⁴ பஸங்ஸிதோ?

698. வண்ணஸ்மிங் ப⁴ஞ்ஞமானே யோ, தித்தி²யானங் து குஜ்ஜ²தி;
ஆராத⁴கோ, ஸம்பு³த்³த⁴ஸ்ஸ, யதி³ குஜ்ஜ²தி நிந்தி³தோ.

699. அத்த²ங்க³தே து ஸுரிரியே, போ⁴ஜனங் பி⁴க்கு² பு⁴ஞ்ஜதி;
ந கி²த்தசித்தோனும்மத்தோ, நிராபத்தி கத²ங் ப⁴வே?

700. யோ ச ரோமந்த²யித்வான, ரத்திங் க⁴ஸதி போ⁴ஜனங்;
நத்தி² தஸ்ஸ பனாபத்தி, விகாலபோ⁴ஜனேன ஹி.

701. அத்த²ங்க³தே ச ஸுரிரியே, க³ஹெத்வா பி⁴க்கு² போ⁴ஜனங்;
ஸசே பு⁴ஞ்ஜெய்ய ஆபத்தி, அனாபத்தி கத²ங் ப⁴வே?

702. விகாலுத்தரகுருங் க³ந்த்வா, தத்த² லத்³தா⁴ன போ⁴ஜனங்;
ஆக³ந்த்வா இத⁴ காலேன, நத்தி² ஆபத்தி பு⁴ஞ்ஜதோ.

703. கா³மே வா யதி³ வாரஞ்ஞே, யங் பரேஸங் மமாயிதங்;
ந ஹரந்தோவ தங் தெ²ய்யா, கத²ங் பாராஜிகோ ஸியா?

704. தெ²ய்யஸங்வாஸகோ நாம, லிங்க³ஸங்வாஸதே²னகோ;
பரப⁴ண்ட³ங் அக³ண்ஹந்தோ, ஹோதி ஏஸ பராஜிதோ.

705. நாரீ ரூபவதீ பா³லா, பி⁴க்கு² ரத்தேன சேதஸா;
மேது²னங் தாய கத்வாபி, ஸோ ந பாராஜிகோ கத²ங்?

706. பி⁴க்கு² ரூபவதிங் நாரிங், ஸுபினந்தேன பஸ்ஸதி;
தாய மேது²னஸங்யோகே³, கதேபி ந வினஸ்ஸதி.

707.

ஏகிஸ்ஸா த்வே ஸியுங் புத்தா, ஜாதா இத⁴ பனித்தி²யா;
த்வின்னங் மாதா பிதா ஸாவ, கத²ங் ஹோதி ப⁴ணாஹி மே?

708. உப⁴தொப்யஞ்ஜனா இத்தீ², க³ப்ப⁴ங் க³ண்ஹாதி அத்தனா;
க³ண்ஹாபேதி பரங் க³ப்ப⁴ங், தஸ்மா மாதா பிதா ச ஸா.

709. புரிஸேன ஸஹாகா³ரே, ரஹோ வஸதி பி⁴க்கு²னீ;
பராமஸதி தஸ்ஸங்க³ங், அனாபத்தி கத²ங் ஸியா?

710. ஸஹாகா³ரிகஸெய்யஞ்ச, ஸப்ப³ஞ்ச படிஜக்³க³னங்;
தா³ரகஸ்ஸ ச மாதா ஹி, காதுங் லப⁴தி பி⁴க்கு²னீ.

711. கோ ச பி⁴க்க²ஹி ஸிக்கா²ஸு, அஸாதா⁴ரணதங் க³தோ;
ந பாரிவாஸிகோ ப்³ருஹி, ந உக்கி²த்தாதி³கோபி ச?

712. க³ஹேதுங் கு²ரப⁴ண்ட³ங் து, ஸசே ந்ஹாபிதபு³ப³கோ;
ந ஸோ லப⁴தி அஞ்ஞேஸங், கப்பதீதி ச நித்³தி³ஸே.

713. கதே²தி குஸலங் த⁴ம்மங், பரமங் அத்த²ஸங்ஹிதங்;
கதமோ புக்³க³லோ ப்³ருஹி, ந மதோ ந ச ஜீவதி?

714. கதே²தி குஸலங் த⁴ம்மங், பரமங் அத்த²ஸங்ஹிதங்;
ஹோதி நிம்மிதபு³த்³தோ⁴ ஸோ, ந மதோ ந ச ஜீவதி.

715. ஸங்யாசிகங் கரொந்தஸ்ஸ, குடிங் தே³ஸிதவத்து²கங்;
பமாணிகமனாரம்ப⁴ங், ஆபத்தி ஸபரிக்கமங்.

716. நரோ கரோதி சே குடிங், ஸ ஸப்ப³மத்திகாமயங்;
ந முச்சதேவ வஜ்ஜதோ, ஜினேன வுத்ததோ ததோ.

717. ஸங்யாசிகாய பி⁴க்கு²ஸ்ஸ, அனாபத்தி கத²ங் ஸியா;
ஸப்ப³லக்க²ணஹீனங் து, கரொந்தஸ்ஸ குடிங் பன?

718. ஸங்யாசிகங் கரொந்தஸ்ஸ, திணச்ச²த³னகங் குடிங்;
பி⁴க்கு²னோ ஜினசந்தே³ன, அனாபத்தி பகாஸிதா.

719. ந காயிகங் கஞ்சி பயோக³மாசரே;
ந கிஞ்சி வாசாய பரங் ப⁴ணெய்ய;

பு²ஸே க³ருங் அந்திமவத்து²ஹேதுகங்;
விஸாரதோ³ சே வினயே ப⁴ணாஹி த்வங்?

720. பரஸ்ஸா பன யா வஜ்ஜங், படிச்சா²தே³தி பி⁴க்கு²னீ;
அயங் பாராஜிகாபத்திங், தன்னிமித்தங் க³ருங் பு²ஸே.
721. ந காயிகங் கிஞ்சிபி பாபமாசரே;
ந கிஞ்சி வாசாய சரெய்ய பாபகங்;
ஸுனாஸிதோயேவ ச நாஸிதோ ஸியா;
கத²ங் துவங் ப்³ருஹி மயாஸி புச்சி²தோ?
722. அப⁴ப்³பா³ பன யே வுத்தா, புக்³க³லா பண்ட³காத³யோ;
ஏகாத³ஸ முனிந்தே³ன, நாஸிதா தே ஸுனாஸிதா.
723. அனுக்³கிரங் கிரங் கிஞ்சி, ஸுப⁴ங் வா யதி³ வாஸுப⁴ங்;
பு²ஸே வாசஸிகங் வஜ்ஜங், கத²ங் மே புச்சி²தோ ப⁴ண?
724. ஸந்திமேவ பனாபத்திங், பி⁴க்கு² நாவிகரெய்ய யோ;
ஸம்பஜானமுஸாவாதே³, து³க்கடங் தஸ்ஸ வண்ணிதங்.
725. ஏகதோஉபஸம்பன்னா, உபோ⁴ தாஸங் து ஹத்த²தோ;
சீவரங் க³ண்ஹதோ ஹொந்தி, நானாஆபத்தியோ கத²ங்?
726. ஏகதோஉபஸம்பன்னா , பி⁴க்க²னங் து வஸேன யா;
சீவரங் ஹத்த²தோ தஸ்ஸா, பாசித்தி படிக³ண்ஹதோ.
727. ஏகதோஉபஸம்பன்னா, பி⁴க்கு²னீனங் வஸேன யா;
சீவரங் ஹத்த²தோ தஸ்ஸா, து³க்கடங் படிக³ண்ஹதோ.
728. ஸங்விதா⁴ய ச சத்தாரோ, க³ருங் தே²னிங்ஸு ப⁴ண்ட³கங்;
தே²ரோ து²ல்லச்சயங் தேஸு, பத்தோ, ஸேஸா பராஜயங்.
729. கத²ங் ? ச²மாஸகங் ப⁴ண்ட³ங், தத்த² ஸாஹத்தி²கா தயோ;
ஹடா தே²ரேன மாஸா து, தயோ ஆணத்தியாபி ச.
730. தீஹி ஸாஹத்தி²கோகேகோ;
பஞ்ச ஆணத்தியா ஹடா;
தஸ்மா து²ல்லச்சயங் தே²ரோ;

பத்தோ, ஸேஸா பராஜயங்.

731. ப³ஹித்³தா⁴ கே³ஹதோ பி⁴க்கு², இத்தீ² க³ப்³ப⁴ந்தரங் க³தா;
சி²த்³த³ங் கே³ஹஸ்ஸ நோ அத்தி², மேது²னபச்சயா சுதோ.
732. அந்தோது³ஸ்ஸகுடிட்டே²ன, மாதுகா³மேன மேது²னங்;
ஸந்த²தாதி³வஸேனேவ, கத்வா ஹோதி பராஜிதோ.
733. ஸப்பிஆதி³ங் து பே⁴ஸஜ்ஜங், க³ஹெத்வா ஸாமமேவ தங்;
அவீதிவத்தே ஸத்தாஹே, கத²ங் ஆபத்தி ஸேவதோ?
734. பரிவத்திதலிங்க³ஸ்ஸ, பி⁴க்கு²னோ இதராய வா;
அவீதிவத்தே ஸத்தாஹே, ஹோதி ஆபத்தி ஸேவதோ.
735. நிஸ்ஸக்³கி³யேன பாசித்தி, ஸுத்³த⁴பாசித்தியம்பி ச;
ஏகதோவ கத²ங் பி⁴க்கு², ஆபஜ்ஜெய்ய ப⁴ணாஹி மே?
736. ஸங்கே⁴ பரிணதங் லாப⁴ங், அத்தனோ ச பரஸ்ஸ ச;
ஏகதோ பரிணாமெந்தோ, பயோகே³ன த்³வயங் பு²ஸே.
737. பி⁴க்கூ² ஸமாக³ம்ம ஸமக்³க³ஸஞ்ஞா;
ஸப்³பே³ கரெய்யுங் பன ஸங்க⁴கம்மங்;
பி⁴க்கு²ட்டி²தோ த்³வாத³ஸயோஜனஸ்மிங்;
கத²ங் கதங் குப்பதி வக்³க³ஹேது?
738. அத்தி² ஸசே பன பி⁴க்கு² நிஸின்னோ;
த்³வாத³ஸயோஜனிகே நக³ரே து;
தத்த² கதங் பன கம்மமகம்மங்;
நத்தி² விஹாரக³தா யதி³ ஸீமா.
739. ஸங்கா⁴டி பாருதா காயே, நிவத்தொ²ந்தரவாஸகோ;
நிஸ்ஸக்³கி³யானி ஸப்³பா³னி, கத²ங் ஹொந்தி கதே²ஹி மே?
740. கண்ணங் க³ஹெத்வா தத்தே²வ, கத்³த³மங் யதி³ தோ⁴வதி;
பி⁴க்கு²னீ காயங்கா³னேவ, தானி நிஸ்ஸக்³கி³யானி ஹி.
741. புரிஸங் அபிதரங் ஹந்த்வா, இத்தி²ங் ஹந்த்வா அமாதரங்;
ஆனந்தரியகங் கம்மங், ஆபஜ்ஜதி கத²ங் நரோ?

742. பரிவத்தே து லிங்க³ஸ்மிங், பிதரங் இத்தி²தங் க³தங்;
மாதரங் புரிஸத்தங் து, க³தங் ஹந்த்வா க³ருங் பு²ஸே.
743. மாதரங் பன மாரெத்வா, மாரெத்வா பிதரம்பி ச;
ஆனந்தரியகங் கம்மங், நாபஜ்ஜெய்ய கத²ங் நரோ?
744. திரச்சா²னக³தா மாதா, திரச்சா²னக³தோ பிதா;
மாதரங் பிதரங் ஹந்த்வா, நானந்தரியகங் பு²ஸே.
745. சோதெ³த்வா ஸம்முகீ²பூ⁴தங், ஸங்கோ⁴ கம்மங் கரெய்ய சே;
கத²ங் கம்மங் அகம்மங் தங், ஸங்கோ⁴ ஸாபத்திகோ ஸியா?
746. வுத்தங் து பண்ட³காதீ³னங், ஸந்தா⁴ய உபஸம்பத³ங்;
அனாபத்திஸ்ஸ கம்மங் து, ஸந்தா⁴யாதி குருந்தி³யங்.
747. கப்பபி³ந்து³கதங் ரத்தங், சீவரங் து அதி⁴ட்டி²தங்;
கத²மஸ்ஸ ஸியாபத்தி, ஸேவமானஸ்ஸ து³க்கடங்?
748. ஸகங் அனிஸ்ஸஜித்வான, யோ நிஸ்ஸக்³கி³யசீவரங்;
பரிபு⁴ஞ்ஜதி தஸ்ஸாய-மாபத்தி பரிதீ³பிதா.
749. பஞ்ச பாசித்தியானேவ, நானாவத்து²கதானி ஹி;
அபுப்³ப³ங் அசரிமங் ஏக-க்க²ணே ஆபஜ்ஜதே கத²ங்?
750. பே⁴ஸஜ்ஜானி ஹி பஞ்சேவ, க³ஹெத்வா பா⁴ஜனே விஸுங்;
ட²பிதேஸு ச ஸத்தாஹா-திக்கமே ஹொந்தி பஞ்சபி.
751. ந ரத்தசித்தோ ந ச தெ²ய்யசித்தோ;
ந சாபி சித்தங் மரணாய தஸ்ஸ;
தெ³ந்தஸ்ஸ பாராஜிகமாஹ ஸத்தா²;
து²ல்லச்சயங் தங் படிக³ண்ஹதோபி.
752. ஸலாகங் ஸங்க⁴பே⁴தா³ய, பதெ³ந்தஸ்ஸ பராஜயோ;
ஹொதி து²ல்லச்சயங் தஸ்ஸ, ஸலாகங் படிக³ண்ஹதோ.
753. ஏகத்த² நிக்கி²பித்வான, சீவரங் அத்³த⁴யோஜனே;
அருணங் உட்டா²பெந்தஸ்ஸ, அனாபத்தி கத²ங் ஸியா?

754. ஸுப்பதிட்டி²தனிக்³ரோத⁴-ஸதி³ஸே ருக்க²மூலகே;
அனாபத்தி ஹி ஸோ ருக்கோ², ஹோதி ஏககுலஸ்ஸ சே.
755. கத²ங் ஆபத்தியோ நானா-;
வத்து²காயோ ஹி காயிகா;
அபுப்³பங் அசரிமங் ஏக-;
க்க²ணே ஸம்ப³ஹுலா பு²ஸே?
756. நானித்தீ²னங் து கேஸே வா, தாஸங் அங்கு³லியோபி வா;
ஏகதோ க³ஹணே தஸ்ஸ, ஹோந்தி ஸம்ப³ஹுலா பன.
757. கத²ங் வாசஸிகா நானா-வத்து²காயோ ந காயிகா;
அபுப்³பங் அசரிமங் ஏக-க்க²ணே ஆபத்தியோ பு²ஸே?
758. து³ட்டு²ல்லங் யோ வத³தி ச வாசங்;
“ஸப்³பா³ தும்ஹே ஸிக²ரணியோ”தி;
வுத்தா தோ³ஸா வினயனஸத்தே²;
தஸ்ஸித்தீ²னங் க³ணனவஸேன.
759. இத்தி²யா புரிஸேனாபி, பண்ட³கேன நிமித்தகே;
மேது²னங் ந ச ஸேவந்தோ, மேது²னப்பச்சயா சுதோ?
760. மேது²னே புப்³பா³பா⁴கங் து, காயஸங்ஸக்³க³தங் க³தா;
மேது²னப்பச்சயா சே²ஜ்ஜங், ஆபன்னா அட்ட²வத்து²கங்.
761. மாதரங் சீவரங் யாசே, ஸங்கே⁴ பரிணதங் ந ச;
கேனஸ்ஸ ஹோதி ஆபத்தி, அனாபத்தி ச ஞாதகே?
762. வஸ்ஸஸாடிகலாப⁴த்த²ங் , ஸமயே பிட்டி²ஸஞ்ஞிதே;
ஸியாபத்தி ஸதுப்பாத³ங், கரோதோ மாதரம்பி ச.
763. ஸங்கா⁴தி³ஸேஸமாபத்திங், பாசித்திங் து³க்கடங் கத²ங்;
பாடிதே³ஸனியங் து²ல்ல-ச்சயங் ஏகக்க²ணே பு²ஸே?
764. அவஸ்ஸுதாவஸ்ஸுதஹத்த²தோ ஹி;
பிண்ட³ங் க³ஹேத்வா லஸுணங் பணீதங்;
மனுஸ்ஸமங்ஸஞ்ச அகப்பமஞ்ஞங்;
ஸப்³பே³கதோ கா²த³தி, ஹோந்தி தஸ்ஸா.

765. ஏகோ உபஜ்ஜா²யகபுக்³க³லேகோ;
ஆசரியகோ த்³வேபி ச புண்ணவஸ்ஸா;
ஏகாவ தேஸங் பன கம்மவாசா;
ஏகஸ்ஸ கம்மங் து ந ரூஹதே கிங்?
766. கேஸக்³க³மத்தம்பி மஹித்³தி⁴கேஸு;
ஆகாஸகோ³ ஹோதி ஸசே பனேகோ;
கதம்பி தங் ரூஹதி நேவ கம்மங்;
ஆகாஸக³ஸ்ஸேவ, ந பூ⁴மிக³ஸ்ஸ.
767. ஸங்கே⁴னபி ஹி ஆகாஸே, டி²தேன பன இத்³தி⁴யா;
பூ⁴மிக³ஸ்ஸ ந காதப்³பங், கரோதி யதி³ குப்பதி.
768. ந ச கப்பகதங் வத்த²ங், ந ச ரத்தங் அகப்பியங்;
நிவத்த²ஸ்ஸ பனாபத்தி, அனாபத்தி கத²ங் ஸியா?
769. அச்சி²ன்னசீவரஸ்ஸெத்த², பி⁴க்கு²ஸ்ஸ பன கிஞ்சிபி;
ந சஸ்ஸாகப்பியங் நாம, சீவரங் பன விஜ்ஜதி.
770. ந குதோபி ச க³ண்ஹதி கிஞ்சி ஹவே;
ந து தே³தி ச கிஞ்சிபி போ⁴ஜனதோ;
க³ருகங் பன வஜ்ஜமுபேதி கத²ங்;
வத³ மே வினயே குஸலோஸி யதி³?
771. ஆதா³ய யங் கிஞ்சி அவஸ்ஸுதம்ஹா;
உய்யோஜிதா பு⁴ஞ்ஜதி போ⁴ஜனஞ்சே;
உய்யோஜிதா யா பன யாய தஸ்ஸா;
ஸங்கா⁴தி³ஸேஸங் கத²யந்தி தீ⁴ரா.
772. கஸ்ஸசி கிஞ்சி ந தே³தி ஸஹத்தா²;
நேவ ச க³ண்ஹதி கிஞ்சி குதோசி;
வஜ்ஜமுபேதி லஹுங், ந க³ருங் து;
ப்³ருஹி கத²ங் யதி³ பு³ஜ்ஜ²ஸி ஸாது⁴?
773. த³ந்தபோனோத³கானங் து, க³ஹணே பன பி⁴க்கு²னீ;
உய்யோஜெந்தீ லஹுங் வஜ்ஜங், ஆபஜ்ஜதி நிஸேவிதே.
774. ஆபஜ்ஜதி பனாபத்திங், க³ருகங் ஸாவஸேஸகங்;

சா²தே³தி, ந பு²ஸே வஜ்ஜங், கத²ங் ஜானாஸி மே வத³?

775. ஸங்கா⁴தி³ஸேஸமாபத்திங், ஆபஜ்ஜித்வா அனாத³ரோ;
சா²தே³ந்தோபி தமாபத்திங், நாஞ்ஞங் உக்கி²த்தகோ பு²ஸே.

776. ஸப்பாணப்பாணஜங் நேவ, ஜங்க³மங் ந விஹங்க³மங்;
த்³விஜங் கந்தமகந்தஞ்ச, ஸசே ஜானாஸி மே வத³?

777. ஸப்பாணப்பாணஜோ வுத்தோ;
சித்தஜோ உதுஜோபி ச;
த்³வீஹேவ பன ஜாதத்தா;
மதோ ஸத்³தோ³ த்³விஜோதி ஹி.

778. வினயே அனயூபரமே பரமே;
ஸுஜனஸ்ஸ ஸுகா²னயனே நயனே;
படு ஹோதி பதா⁴னரதோ ந ரதோ;
இத⁴ யோ பன ஸாரமதே ரமதே.

ஸேத³மோசனகா³தா²யோ ஸமத்தா.

ஸாதா⁴ரணாஸாதா⁴ரணகதா²

779. ஸப்³ப³ஸிக்கா²பதா³னாஹங் , நிதா³னங் க³ணனம்பி ச;
பி⁴க்கூ²ஹி பி⁴க்கு²னீனஞ்ச, பி⁴க்கூ²னங் பி⁴க்கு²னீஹி ச.

780. அஸாதா⁴ரணபஞ்ஞத்தங், ததா² ஸாதா⁴ரணம்பி ச;
பவக்கா²மி ஸமாளேஸன, தங் ஸுணாத² ஸமாஹிதா.

781. நிதா³னங் நாம வேஸாலீ, ததா² ராஜக³ஹங் புரங்;
ஸாவத்தா²ளவி கோஸம்பீ³, ஸக்கப⁴க்³கா³ பகாஸிதா.

782. கதி வேஸாலியா வுத்தா, கதி ராஜக³ஹே கதா?
கதி ஸாவத்தி²பஞ்ஞத்தா, கதி ஆளவியங் கதா?

783. கதி கோஸம்பி³பஞ்ஞத்தா, கதி ஸக்கேஸு பா⁴ஸிதா?
கதி ப⁴க்³கே³ஸு பஞ்ஞத்தா, தங் மே அக்கா²ஹி புச்சி²தோ?

784. த³ஸ வேஸாலியா வுத்தா, ஏகவீஸ கி³ரிப்³ப³ஜே;
ச²ஊனானி ஸதானேவ, தீணி ஸாவத்தி²யங் கதா.

785. ச² பனாளவியங் வுத்தா, அட்ட² கோஸம்பி³யங் கதா;
அட்ட² ஸக்கேஸு பஞ்ஞத்தா, தயோ ப⁴க்³கே³ஸு தீ³பிதா.
786. மேது²னங் விக்³க³ஹோ சேவ, சதுத்த²ந்திமவத்து²கங்;
அதிரேகசீவரங் ஸுத்³த⁴-காளகேளகலோமகங்.
787. பூ⁴தங் பரம்பரஞ்சேவ, முக²த்³வாரமசேலகோ;
பி⁴க்கு²னீஸு ச அக்கோஸோ, த³ஸ வேஸாலியங் கதா.
788. து³தியந்திமவத்து²ஞ்ச, த்³வே அனுத்³த⁴ங்ஸனானி ச;
ஸங்க⁴பே⁴தா³ து³வே சேவ, சீவரஸ்ஸ படிக்க³க³ஹோ.
789. ரூபியங் ஸுத்தவிஞ்ஞத்தி, ததா² உஜ்ஜா²பனம்பி ச;
பரிபாசிதபிண்டோ³ ச, ததே²வ க³ணபோ⁴ஜனங்.
790. விகாலபோ⁴ஜனஞ்சேவ, சாரித்தங் ந்ஹானமேவ ச;
ஊனவீஸதிவஸ்ஸஞ்ச, த்³த்வா ஸங்கே⁴ன சீவரங்.
791. வோஸாஸந்தீ ச நச்சங் வா, கீ³தங் வா சாரிகத்³வயங்;
ச²ந்த³தா³னேனிமே ராஜ-க³ஹஸ்மிங் ஏகவீஸதி.
792. குடி கோஸியஸெய்யஞ்ச, பத²வீபூ⁴தகா³மகங்;
ஸப்பாணகஞ்ச ஸிஞ்சந்தி, ஏதே சா²ளவியங் கதா.
793. மஹல்லகவிஹாரோ ச, தோ³வசஸ்ஸங் ததே²வ ச;
அஞ்ஞேனஞ்ஞங் ததா² த்³வார-கோஸா மஜ்ஜ²ஞ்ச பஞ்சமங்.
794. அனாத³ரியங் ஸஹத⁴ம்மோ, பயோபானஞ்ச ஸேகி²யே;
கோஸம்பி³யங் து பஞ்ஞத்தா, அட்டி²மே ஸுத்³த⁴தி³ட்டி²னா.
795. தோ⁴வனேளகலோமானி, பத்தோ ச து³தியோ பன;
ஓவாதோ³பி ச பே⁴ஸஜ்ஜங், ஸூசி ஆரஞ்ஞகேஸு ச.
796. உத³கஸுத்³தி⁴கஞ்சேவ, ஓவாதா³க³மனம்பி ச;
புரே கபிலவத்து²ஸ்மிங், பஞ்ஞத்தா பன அட்டி²மே.
797. ஜோதிங் ஸமாத³ஹித்வான, ஸாமிஸேன ஸஸித்த²கங்;
இமே ப⁴க்³கே³ஸு பஞ்ஞத்தா, தயோ ஆதி³ச்சப³ந்து⁴னா.

798. பாராஜிகானி சத்தாரி, க³ருகா ஸோளஸா, து³வே;
அனியதா, சதுத்திங்ஸ, ஹொந்தி நிஸ்ஸக்³கியானி ஹி.
799. ச²ப்பண்ணாஸஸதஞ்சேவ , கு²த்³த³கானி ப⁴வந்தி ஹி;
த³வேஸவ பன கா³ர்யஹா, த்³வேஸத்ததி ச ஸேகி²யா.
800. ச²ஊனானி ச தீணேவ, ஸதானி ஸமசேதஸா;
இமே வுத்தாவஸேஸா ஹி, ஸப்³பே³ ஸாவத்தி²யங் கதா.
801. பாராஜிகானி சத்தாரி, ஸத்த ஸங்கா⁴தி³வேஸஸகா;
நிஸ்ஸக்³கியானி அட்டே²வ, த்³வத்திங்ஸேவ ச கு²த்³த³கா.
802. த்³வே கா³ர்யஹா, தயோ ஸேகா², ச²ப்பஞ்ஞாஸேவ ஸப்³ப³ஸோ;
ப⁴வந்தி ச²ஸு பஞ்ஞத்தா, நக³ரேஸு ச பிண்டி³தா.
803. ஸப்³பா³னேவ பனேதானி, நக³ரேஸு ச ஸத்தஸு;
அட்³டு⁴ட்³டா⁴னி ஸதானேவ, பஞ்ஞத்தானி ப⁴வந்தி ஹி.
804. ஸிக்கா²பதா³னி பி⁴க்²கூ²னங், வீஸஞ்ச த்³வே ஸதானி ச;
பி⁴க்²கு²னீனங் து சத்தாரி, ததா² தீணி ஸதானி ச.
805. பாராஜிகானி சத்தாரி, க³ருகா பன தேரஸ;
அனியதா து³வே வுத்தா, திங்ஸ நிஸ்ஸக்³கியானி ச.
806. கு²த்³த³கா நவுதி த்³வே ச, சத்தாரோ பாடிதே³ஸனா;
நிப்பபஞ்சேன நித்³தி³ட்டா², பஞ்சஸத்ததி ஸேகி²யா.
807. த்³வே ஸதானி ச வீஸஞ்ச, வஸா பி⁴க்²கூ²னமேவ ச;
ஸிக்கா²பதா³னி உத்³தே³ஸமாக³ச்ச²ந்தி உபோஸதே².
808. பாராஜிகானி அட்டே²வ, க³ருகா த³ஸ ஸத்த ச;
நிஸ்ஸக்³கியானி திங்ஸேவ, ச²ஸட்டி² ச ஸதம்பி ச.
809. கு²த்³த³கானட்ட² கா³ர்யஹா, பஞ்சஸத்ததி ஸேகி²யா;
ஸப்³பா³னி பன சத்தாரி, ததா² தீணி ஸதானி ச.
810. ப⁴வந்தி பன ஏதானி, பி⁴க்²கு²னீனங் வஸா பன;
ஸிக்கா²பதா³னி உத்³தே³ஸமாக³ச்ச²ந்தி உபோஸதே².

811. ச²சத்தாலீஸ ஹொந்தேவ, பி⁴க்க²னங் பி⁴க்கு²னீஹி து;
அஸாதா⁴ரணபா⁴வங் து, க³மிதானி மஹேஸினா.
812. ச² ச ஸங்கா⁴தி³ஸேஸா ச, ததா² அனியதா து³வே;
த்³வாத³ஸேவ ச நிஸ்ஸக்³கா³, த்³வாவீஸதி ச கு²த்³த³கா.
813. சத்தாரோபி ச கா³ரய்ஹா, ச²சத்தாலீஸ ஹொந்திமே;
பி⁴க்க²னங்யேவ பஞ்ஞத்தா, கோ³தமேன யஸஸ்ஸினா.
814. விஸட்டி² காயஸங்ஸக்³கோ³, து³ட்டு²ல்லங் அத்தகாமதா;
குடி சேவ விஹாரோ ச, ச²ளேதே க³ருகா ஸியுங்.
815. நிஸ்ஸக்³கியாதி³வக்³க³ஸ்மிங், தோ⁴வனஞ்ச படிக்க³க³ஹொ;
ஏளகலோமவக்³கே³பி, ஆதி³தோ பன ஸத்த ச.
816. ததியேபி ச வக்³க³ஸ்மிங், பத்தோ ச பட²மோ ததா²;
வஸ்ஸஸாடிகமாரஞ்ஞ-மிதி த்³வாத³ஸ தீ³பிதா.
817. பாசித்தியானி வுத்தானி, ஸப்³பா³னி க³ணனாவஸா;
பி⁴க்க²னங் பி⁴க்கு²னீனஞ்ச, அட்டா²ஸீதிஸதங், ததோ.
818. ஸப்³போ³ பி⁴க்கு²னிவக்³கோ³பி, ஸபரம்பரபோ⁴ஜனோ;
ததா² அனதிரித்தோ ச, அபி⁴ஹட்டு²ங் பவாரணா.
819. பணீதபோ⁴ஜனவிஞ்ஞத்தி, ததே²வாசேலகோபி ச;
நிமந்திதோ ஸப⁴த்தோ ச, து³ட்டு²ல்லச்சா²த³னம்பி ச.
820. ஊனவீஸதிவஸ்ஸங் து, மாதுகா³மேன ஸத்³தி⁴பி;
அந்தேபுரப்பவேஸோ ச, வஸ்ஸஸாடி நிஸீத³னங்.
821. கு²த்³த³கானி பனேதானி, த்³வாவீஸதி ப⁴வந்தி ஹி;
சத்தாரோ பன கா³ரய்ஹா, பி⁴க்க²னங் பாதிமொக்க²கே.
822. ஏகதோ பன பஞ்ஞத்தா, ச²சத்தாலீஸ ஹொந்திமே;
பி⁴க்கு²னீஹி து பி⁴க்க²னங், அஸாதா⁴ரணதங் க³தா.
823. பி⁴க்க²ஹி பி⁴க்கு²னீனஞ்ச, ஸதங் திங்ஸ ப⁴வந்தி ஹி;
அஸாதா⁴ரணபா⁴வங் து, க³மிதானி மஹேஸினா.

824. பாராஜிகானி சத்தாரி, த³ஸ ஸங்கா⁴தி³ஸேஸகா;
த³வாத³ஸேவ ச நிஸ்ஸக்³கா³, கு²த³த³கா நவுதிச்ச² ச.
825. அட்டே²வ பன கா³ரய்ஹா, ஸதங் திங்ஸ ப⁴வந்திமே;
பி⁴க்கு²னீனஞ்ச பி⁴க்கூ²ஹி, அஸாதா⁴ரணதங் க³தா.
826. பி⁴க்கு²னீனங் து ஸங்கா⁴தி³-ஸேஸேஹி ச² பனாதி³தோ;
யாவத்தியகா சேவ, சத்தாரோதி இமே த³ஸ.
827. அகாலசீவரஞ்சேவ, ததா² அச்சி²ன்னசீவரங்;
ஸத்தஞ்சுத³த்தி²காதீ³னி, பத்தோ சேவ க³ருங் லஹுங்.
828. த³வாத³ஸேவ பனேதானி, பி⁴க்கு²னீனங் வஸேனித⁴;
நிஸ்ஸக்³கியானி ஸத்தா²ரா, பஞ்சுத்தானி பனேகதோ.
829. அஸாதா⁴ரணபஞ்சுத்தா, கு²த³த³கா நவுதிச்ச² ச;
கா³ரய்ஹா ச பனட்டா²தி, ஸப்³பே³வ க³ணனாவஸா.
830. பி⁴க்கு²னீனங் து பி⁴க்கூ²ஹி, அஸாதா⁴ரணதங் க³தா;
ஏகதோயேவ பஞ்சுத்தா, ஸதங் திங்ஸ ப⁴வந்தி ஹி.
831. அஸாதா⁴ரணுபி⁴ன்னம்பி, ஸதங் ஸத்ததி சச்ச² ச;
பாராஜிகானி சத்தாரி, க³ருகா ச த³ஸச்ச² ச.
832. அனியதா து³வே சேவ, நிஸ்ஸக்³கா³ சதுவீஸதி;
ஸதங் அட்டா²ரஸேவெத்த², கு²த³த³கா பரிதீ³பிதா.
833. த³வாத³ஸேவ ச கா³ரய்ஹா, ஸதங் ஸத்ததி சச்ச² ச;
அஸாதா⁴ரணுபி⁴ன்னம்பி, இமேதி பரிதீ³பிதா.
834. ஸாதா⁴ரணா உபி⁴ன்னம்பி, பஞ்சுத்தா பன ஸத்து²னா;
ஸதங் ஸத்ததி சத்தாரி, ப⁴வந்தீதி பகாஸிதா.
835. பாராஜிகானி சத்தாரி, ஸத்த ஸங்கா⁴தி³ஸேஸகா;
அட்டா²ரஸ ச நிஸ்ஸக்³கா³, ஸமஸத்ததி கு²த³த³கா.
836. பஞ்சஸத்ததி பஞ்சுத்தா, ஸேகி²யாபி ச ஸப்³ப³ஸோ;
ஸதங் ஸத்ததி சத்தாரி, உபி⁴ன்னங் ஸமஸிக்க²தா.

ஸாதா⁴ரணாஸாதா⁴ரணகதா².

லக்க²ணகதா²

837. இதோ பரங் பவக்கா²மி, லக்க²ணங் பன ஸப்³பு³க³ங்;
ஸவனே ஸாத³ரங் கத்வா, வத³தோ மே நிபோ³த⁴த².
838. நிதா³னங் புக்³க³லோ வத்து², பஞ்ஞத்திவிதி⁴மேவ ச;
விபத்தாபத்தனாபத்தி, ஆணத்தங்க³கிரியாபி ச.
839. ஸஞ்ஞாசித்தஸமுட்டா²னங், வஜ்ஜகம்மபபே⁴த³கங்;
திகத்³வயந்தி ஸப்³பு³த்த², யோஜேதப்³பு³மித³ங் பன.
840. புப்³பே³ வுத்தனயங் யஞ்ச, யஞ்ச உத்தானமேவித⁴;
தங் ஸப்³பு³ங் பன வஜ்ஜெத்வா, கரிஸ்ஸாமத்த²ஜோதனங்.
841. புக்³க³லோ நாம யங் யங் து, பி⁴க்கு²மாரப்³ப⁴ பி⁴க்கு²னிங்;
ஸிக்கா²பத³ங் து பஞ்ஞத்தங், அயங் வுச்சதி புக்³க³லோ.
842. தேவீஸதிவிதா⁴ தே ச, ஸுதி³ன்னத⁴னியாத³யோ;
பி⁴க்க²னங் பாதிமொக்க²ஸ்மிங், ஆதி³கம்மிகபுக்³க³லா.
843. பி⁴க்கு²னீனங் ததா² பாதி-மொக்க²ஸ்மிங் ஆதி³கம்மிகா;
து²ல்லனந்தா³த³யோ ஸத்த, ஸப்³பே³ திங்ஸ ப⁴வந்தி ஹி.
844. வத்து²தி புக்³க³லஸ்ஸேவ, தஸ்ஸ தஸ்ஸ ச ஸப்³பு³ஸோ;
வத்து²னோ தஸ்ஸ தஸ்ஸேவ, அஜ்ஜா²சாரோ பவுச்சதி.
845. கேவலா பன பஞ்ஞத்தி, மூலபூ⁴தா ததே²வ ஸா;
அன்வனுப்பன்னஸப்³பு³த்த²-பதே³ஸபத³புப்³பி³கா.
846. ஸாதா⁴ரணா ச பஞ்ஞத்தி, ததா²ஸாதா⁴ரணாபி ச;
ஏகதோ²ப⁴தோபுப்³பா³, ஏவங் நவவிதா⁴ ஸியா.
847. தத்த² “யோ மேது²னங் த⁴ம்மங், படிஸேவெய்ய பி⁴க்கு²”தி;
“அதி³ன்னங் ஆதி³யெய்யா”தி, பஞ்ஞத்திச்சேவமாதி³கா.
848. ஹோதி “அந்தமஸோ பி⁴க்கு², திரச்சா²னக³தாயபி”;
இச்சேவமாதி³கா ஸப்³பா³, அனுபஞ்ஞத்தி தீ³பிதா.

849. ததா²நுப்பன்னபஞ்ஞத்தி, அனுப்பன்னே து வஜ்ஜகே;
அட்ட²ன்னங் க³ருத⁴ம்மானங், வஸேனேவாக³தா ஹி ஸா.
850. சம்மத்த²ரணகஞ்சேவ, ஸகு³ணங்கு³ணுபாஹனங்;
ததே²வ ச து⁴வன்ஹானங், பஞ்சவக்³கூ³பஸம்பதா³.
851. ஏஸா பதே³ஸபஞ்ஞத்தி, நாமாதி ஹி சதுப்³பி³தா⁴;
வுத்தா மஜ்ஜி²மதே³ஸஸ்மிங்-யேவ ஹோதி, ந அஞ்ஞதோ.
852. இதோ ஸேஸா ஹி ஸப்³பத்த²-பஞ்ஞத்தீதி பகாஸிதா;
அத்த²தோ ஏகமேவெத்த², ஸாதா⁴ரணது³காதி³கங்.
853. ஸாணத்திகா பனாபத்தி, ஹோதி நாணத்திகாபி ச;
ஆணத்தீதி ச நாமேஸா, ஞெய்யா ஆணாபனா பன.
854. ஆபத்தீனங் து ஸப்³பா³ஸங், ஸப்³பஸிக்கா²பதே³ஸுபி;
ஸப்³போ³ பனங்க³பே⁴தோ³ ஹி, விஞ்ஞாதப்³போ³ விபா⁴வினா.
855. காயேனபி ச வாசாய, யா கரொந்தஸ்ஸ ஜாயதே;
அயங் க்ரியஸமுட்டா²னா, நாம பாராஜிகா விய.
856. காயவாசாஹி கத்தப்³பங், அகரொந்தஸ்ஸ ஹோதி யா;
ஸா சாக்ரியஸமுட்டா²னா, பட²மே கதி²னே விய.
857. கரொந்தஸ்ஸாகரொந்தஸ்ஸ, பி⁴க்கு²னோ ஹோதி யா பன;
ஸா க்ரியாக்ரியதோ ஹோதி, சீவரக்³க³ஹணே விய.
858. ஸியா பன கரொந்தஸ்ஸ, அகரொந்தஸ்ஸ யா ஸியா;
ஸா க்ரியாக்ரியதோ ஹோதி, ரூபியுக்³க³ஹணே விய.
859. ததா² ஸியா கரொந்தஸ்ஸ;
யா கரோதோ அகுப்³பதோ;
ஸியா கிரியதோ சேவ;
ஸா க்ரியாக்ரியதோபி ச.
860. ஸப்³பா³ சாபத்தியோ ஸஞ்ஞா-;
வஸேன து³விதா⁴ ஸியுங்;
ஸஞ்ஞாவிமொக்கா² நோஸஞ்ஞா-;

விமொக்கா²தி பகாஸிதா.

861. வீதிக்கமனஸஞ்ஞாய, அபா⁴வேன யதோ பன;
விமுச்சதி அயங் ஸஞ்ஞா-விமொக்கா²தி பகாஸிதா.
862. இதரா பன நோஸஞ்ஞா-விமொக்கா²தி பகாஸிதா;
புன ஸப்³பா³வ சித்தஸ்ஸ, வஸேன து³விதா⁴ ஸியுங்.
863. ஸசித்தகா அசித்தாதி, ஸுசித்தேன பகாஸிதா;
ஸசித்தகஸமுட்டா²ன-வஸேன பன யா ஸியா.
864. அயங் ஸசித்தகா நாம, ஆபத்தி பரிதீ³பிதா;
ஸசித்தகேஹி வா மிஸ்ஸ-வஸேனாயமசித்தகா.
865. ஸப்³பா³ சாபத்தியோ வஜ்ஜ-வஸேன து³விதா⁴ ருதா;
ஸுவிஜ்ஜேனானவஜ்ஜேன, லோகபண்ணத்திவஜ்ஜதோ.
866. யஸ்ஸா ஸசித்தகே பக்கே², சித்தங் அகுஸலங் ஸியா;
லோகவஜ்ஜாதி நாமாயங், ஸேஸா பண்ணத்திவஜ்ஜகா.
867. ஸப்³பா³ சாபத்தியோ கம்ம-வஸேன திவிதா⁴ ஸியுங்;
காயகம்மங் வசீகம்மங், ததா² தது³ப⁴யம்பி ச.
868. திகத்³வயந்தி நாமேதங், குஸலாதி³திகத்³வயங்;
குஸலாகுஸலசித்தோ வா, ததா²ப்யாகதமானஸோ.
869. ஹுத்வா ஆபஜ்ஜதாபத்திங், ஆபஜ்ஜந்தோ ந அஞ்ஞதா²;
ஸுக²வேத³னாஸமங்கீ³ வா, ததா² து³க்கா²தி³ஸங்யுதோ.
870. இத³ங் து லக்க²ணங் வுத்தங், ஸப்³பு³ஸிக்கா²பதே³ஸுபி;
யோஜெத்வா பன த³ஸ்ஸெய்ய, வினயஸ்மிங் விஸாரதோ³.
871. தருங் திமூலங் நவபத்தமேனங்;
சதுஸ்ஸிக²ங் ஸத்தப²லங் ச²புப்ப²ங்;
ஜானாதி யோ த்³விப்பப⁴வங் த்³விஸாக²ங்;
ஜானாதி பஞ்ஞத்திமஸேஸதோ ஸோ.
872. இமமுத்தரங் க³தமனுத்தரதங்;

பரியாபுணாதி பரிபுச்ச²தி யோ;
உபயாதனுத்தரதமுத்தரதோ;
ஸ ச காயவாசவினயே வினயே.

லக்க²ணகதா².

873. ஸோளஸபரிவாரஸ்ஸ, பரிவாரஸ்ஸ ஸப்³ப³ஸோ;
இதோ பரங் பவக்கா²மி, ஸப்³ப³ஸங்கலனங் நயங்.
874. கதி ஆபத்தியோ வுத்தா;
காயிகா, வாசஸிகா கதி?
சா²தெ³ந்தஸ்ஸ கதாபத்தீ;
கதி ஸங்ஸக்³க³பச்சயா?
875. காயிகா ச²ப்³பி³தா⁴பத்தி, ததா² வாசஸிகாபி ச;
சா²தெ³ந்தஸ்ஸ ச திஸ்ஸோவ, பஞ்ச ஸங்ஸக்³க³பச்சயா.
876. கதி ஆபத்திமூலானி, பஞ்ஞத்தானி மஹேஸினா?
கதி ஆபத்தியோ வுத்தா, து³ட்²ல்²ச்சா²த³னே பன?
877. த³வே பனாபத்திமூலானி, காயோ வாசா ப⁴வந்தி ஹி;
பாராஜிகா ச பாசித்தி, து³ட்²ல்²ச்சா²த³னே ஸியுங்.
878. கதி கா³மந்தரே வுத்தா, நதீ³பாரே ததா² கதி?
கதி து²ல்²ச்சயங் மங்ஸே, கதி மங்ஸேஸு து³க்கடங்?
879. கா³மந்தரே சதஸ்ஸோவ, நதீ³பாரேபி தத்தகா;
து²ல்²ச்சயங் மனுஸ்ஸானங், மங்ஸே, நவஸு து³க்கடங்.
880. பி⁴க்கு² பி⁴க்கு²னியா ஸத்³தி⁴ங், ஸங்விதா⁴தி ச து³க்கடங்;
பாசித்தஞ்ஞஸ்ஸ கா³மஸ்ஸ, உபசாரோக்கமே ஸியா.
881. து²ல்²ச்சயங் பரிக்கி²த்தே, கா³மஸ்மிங் பட²மே பதே³;
க³ருகங் து³தியே தஸ்ஸா, கா³மந்தரங் வஜந்தியா.
882. ததா² பி⁴க்கு²னியா ஸத்³தி⁴ங், ஸங்விதா⁴னே து து³க்கடங்;
அபி⁴ருஹதி நாவங் சே, ஹோதி பாசித்தி பி⁴க்கு²னோ.
883. நதி³யுத்தரணே காலே, பாதே³ து²ல்²ச்சயங் பு²ஸே;

பட²மே, து³தியே தஸ்ஸா, ஹோதி பி⁴க்கு²னியா க³ருங்.

884. கதி வாசஸிகா ரத்திங், கதி வாசஸிகா தி³வா?
து³வே வாசஸிகா ரத்திங், து³வே வாசஸிகா தி³வா.
885. ரத்தந்த⁴காரே புரிஸேன ஸத்³தி⁴ங்;
டி²தா அதி³பே பன ஹத்த²பாளே;
பாசித்தி தஸ்ஸா யதி³ ஸல்லபெய்ய;
வதெ³ய்ய சே து³க்கடமேவ து³ரே.
886. ச²ன்னே தி³வா யா புரிஸேன ஸத்³தி⁴ங்;
டி²தா வதெ³ய்யஸ்ஸ ச ஹத்த²பாளே;
பாசித்தி, ஹித்வா பன ஹத்த²பாஸங்;
வதெ³ய்ய சே து³க்கடமேவ தஸ்ஸா.
887. கதி வா த³த³மானஸ்ஸ, கதி வா படிக³ண்ஹதோ?
த³த³மானஸ்ஸ திஸ்ஸோவ, சதஸ்ஸோவ படிக்³க³ஹே.
888. மனுஸ்ஸஸ்ஸ விஸங் தே³தி, ஸசே மரதி தேன ஸோ;
ஹோதி பாராஜிகங், யக்கே², பேதே து²ல்லச்சயங் மதங்.
889. திரச்சா²னக³தே தேன, மதே பாசித்தியங் ஸியா;
ததா² பாசித்தி அஞ்ஞாதி-காய சே தே³தி சீவரங்.
890. ஹத்த²கா³ஹே ததா² வேணி-கா³ஹே ஸங்கா⁴தி³ஸேஸதா;
முகே²ன அங்க³ஜாதஸ்ஸ, க³ஹணே து பராஜயோ.
891. அஞ்ஞாதிகாய ஹத்த²ம்ஹா, சீவரஸ்ஸ படிக்³க³ஹே;
ஸனிஸ்ஸக்³கா³ ச பாசித்தி, ஹோதீதி பரியாபுதா.
892. அவஸ்ஸுதஸ்ஸ ஹத்த²ம்ஹா, ஸயங் வாபி அவஸ்ஸுதா;
ஹோதி து²ல்லச்சயங் தஸ்ஸா, போ⁴ஜனங் படிக்³ண்ஹதோ.
893. கதி குத்திசதுத்தே²ன, வுத்தா ஸம்முதியோ இத⁴?
ஏகா ஏவ பனுத்³தி³ட்டா², பி⁴க்கு²னோவாத³ஸம்முதி.
894. கதி த⁴ஞ்ஞரஸா வுத்தா, விகாலே கப்பியா பன?
லோணஸோவீரகங் ஏகங், விகாலே கப்பியங் மதங்.

895. கதி பாராஜிகா காயா, கதி ஸங்வாஸபூ⁴மியோ?
ரத்திச்சே²தோ³ கதீனங் து, பஞ்ஞத்தா த்³வங்கு³லா கதி?
896. பாராஜிகானி காயம்ஹா, த்³வே த்³வே ஸங்வாஸபூ⁴மியோ;
ரத்திச்சே²தோ³ து³வின்னங் து, பஞ்ஞத்தா த்³வங்கு³லா து³வே.
897. பட²மந்திமவத்து²ஞ்ச, காயஸங்ஸக்³ஜம்பி ச;
பாராஜிகானி காயம்ஹா, இமே த்³வே பன ஜாயரே.
898. ஸமானஸங்வாஸகபூ⁴மி ஏகா;
ததே²வ நானாபத³பு³பி³கா ச;
த்³வே ஏவ ஸங்வாஸகபூ⁴மியோ ஹி;
மஹேஸினா காருணிகேன வுத்தா.
899. பாரிவாஸிகபி⁴க்கு²ஸ்ஸ , ததா² மானத்தசாரினோ;
ரத்திச்சே²தோ³ து³வின்னங் து, த்³வயாதீதேன தீ³பிதோ.
900. த்³வங்கு³லபப்³பரமங், ஆதா³தப்³பங், ததே²வ ச;
த்³வங்கு³லங் வா து³மாஸங் வா, பஞ்ஞத்தா த்³வங்கு³லா து³வே.
901. கதி பாணாதிபாதஸ்மிங், வாசா பாராஜிகா கதி?
கதி ஓபா⁴ஸனே வுத்தா, ஸஞ்சரித்தே ததா² கதி?
902. திஸ்ஸோ பாணாதிபாதஸ்மிங்;
வாசா பாராஜிகா தயோ;
ஓபா⁴ஸனே தயோ வுத்தா;
ஸஞ்சரித்தே ததா² தயோ.
903. அனோதி³ஸ்ஸகமோபாதே, க²தே மரதி மானுஸோ;
பாராஜிகங் ஸியா, யக்கே², பேதே து²ல்லச்சயங் மதே.
904. திரச்சா²னக³தே தத்த², மதே பாசித்தியங் வதே³;
இமா பாணாதிபாதஸ்மிங், திஸ்ஸோ ஆபத்தியோ ஸியுங்.
905. மனுஸ்ஸமாரணாதி³ன்னா-தா³னமாணத்தியாபி ச;
மனுஸ்ஸுத்தரித⁴ம்மஞ்ச, வத³தோ வாசிகா தயோ.
906. மக்³க³த்³வயங் பனோதி³ஸ்ஸ, வண்ணாதி³ப⁴ணனே க³ருங்;

து²ல்லச்சயங் பனோதி³ஸ்ஸ, உப்³ப⁴ஜாணுமத⁴க்க²கங்.

907. உப்³ப⁴க்க²கமதோ⁴ஜாணு-மாதி³ஸ்ஸ ப⁴ணதோ பன;
து³க்கடங் பன நித்³தி³ட்ட²ங், திஸ்ஸோ ஓபா⁴ஸனா யிமா.
908. படிக்க³ண்ஹனதாதீ³ஹி, தீஹி ஸங்கா⁴தி³ஸேஸதா;
த்³வீஹி து²ல்லச்சயங் வுத்தங், ஏகேன பன து³க்கடங்.
909. சி²ந்த³தோ கதி ஆபத்தி, ச²ட்³டி³தப்பச்சயா கதி?
சி²ந்த³ந்தஸ்ஸ து திஸ்ஸோவ, பஞ்ச ச²ட்³டி³தப்பச்சயா.
910. ஹோதி பாராஜிகங் தஸ்ஸ, சி²ந்த³ந்தஸ்ஸ வனப்பதிங்;
பூ⁴தகா³மங் து பாசித்தி, அங்க³ஜாதங் து து²ல்லதா.
911. விஸங் ச²ட்³டெ³த்யனோதி³ஸ்ஸ, மனுஸ்ஸோ மரதி தேன சே;
பாராஜிகங், மதே யக்கே², பேதே து²ல்லச்சயங் ஸியா.
912. திரச்சா²னே து பாசித்தி, விஸட்டி²ச²ட்³ட³னே க³ருங்;
ஹரிதுச்சாரபஸ்ஸாவ-ச²ட்³ட³னே து³க்கடங் மதங்.
913. க³ச்ச²தோ கதிதா⁴பத்தி, டி²தஸ்ஸ கதி மே வத³?
கதி ஹொந்தி நிஸின்னஸ்ஸ, நிபன்னஸ்ஸாபி கித்தகா?
914. க³ச்ச²ந்தஸ்ஸ சதஸ்ஸோவ, டி²தஸ்ஸாபி ச தத்தகா;
நிஸின்னஸ்ஸ சதஸ்ஸோவ, நிபன்னஸ்ஸாபி தத்தகா.
915. பி⁴க்கு² பி⁴க்கு²னியா ஸத்³தி⁴ங், ஸங்விதா⁴னே து து³க்கடங்;
பாசித்தஞ்ஞஸ்ஸ கா³மஸ்ஸ, உபசாரோக்கமே ஸியா.
916. து²ல்லச்சயங் பரிக்கி²த்தே, கா³மஸ்மிங் பட²மே பதே³;
க³ருகங் து³தியே ஹோதி, கா³மந்தரங் வஜந்தியா.
917. படிச்ச²ன்னே பனோகாஸே, பி⁴க்கு²னீ மித்தஸந்த²வா;
போஸஸ்ஸ ஹத்த²பாஸே து, பாசித்தி யதி³ திட்ட²தி.
918. ஹத்த²பாஸங் ஜஹித்வான, ஸசே திட்ட²தி து³க்கடங்;
அருணுக்க³மனே காலே, து³தியா ஹத்த²பாஸகங்.

919.

ஹித்வா திட்ட²ந்தியா தஸ்ஸா, து²ல்லச்சயமுதீ³ரிதங்;
ஹித்வா திட்ட²தி சே தஸ்ஸா, ஹோதி ஸங்கா⁴தி³ஸேஸதா.

920. நிஸின்னாய சதஸ்ஸோவ, நிபன்னாயாபி தத்தகா;
ஹோந்தி வுத்தப்பகாராவ, விஞ்ஞெய்யா வினயஞ்ஞனா.
921. யாவததியகே வுத்தா, கதி ஆபத்தியோ வத³?
யாவததியகே வுத்தா, திஸ்ஸோ ஆபத்தியோ ஸுண.
922. பு²ஸே பாராஜிகாபத்திங், உக்கி²த்தஸ்ஸானுவத்திகா;
ஸங்கா⁴தி³ஸேஸதா ஸங்க⁴-பே⁴த³கஸ்ஸானுவத்தினோ.
923. அனிஸ்ஸக்³கே³ து பாசித்தி, பாபிகாய ச தி³ட்டி²யா;
யாவததியகே திஸ்ஸோ, ஹோந்தி ஆபத்தியோ இமா.
924. கா²த³தோ கதி நித்³தி³ட்டா², போ⁴ஜனப்பச்சயா கதி?
கா²த³தோ பன திஸ்ஸோவ, பஞ்ச போ⁴ஜனகாரணா.
925. து²ல்லச்சயங் மனுஸ்ஸானங், மங்ஸங் கா²த³தி, து³க்கடங்;
ஸேஸகானங் து, பாசித்தி, லஸுணங் ப⁴க்க²யந்தியா.
926. அவஸ்ஸுதஸ்ஸ போஸஸ்ஸ, ஹத்த²தோ ஹி அவஸ்ஸுதா;
க³ஹெத்வா போ⁴ஜனங் கிஞ்சி, ஸப்³ப³ங் மங்ஸங் அகப்பியங்.
927. விஞ்ஞாபெத்வான அத்தத்த²ங், க³ஹெத்வா போ⁴ஜனம்பி ச;
லஸுணம்பி ச மிஸ்ஸெத்வா, ஏகதஜ்ஜோ²ஹரந்தியா.
928. து²ல்லச்சயஞ்ச பாசித்தி, பாடிதே³ஸனியம்பி ச;
து³க்கடங் க³ருகஞ்சாதி, பஞ்ச ஆபத்தியோ ஸியுங்.
929. ஓலோகெந்தஸ்ஸ நித்³தி³ட்டா², கதி ஆபத்தியோ வத³?
ஓலோகெந்தஸ்ஸ நித்³தி³ட்டா², ஏகாபத்தி மஹேஸினா.
930. து³க்கடங் ரத்தசித்தேன, அங்க³ஜாதங் பனித்தி²யா;
ஓலோகெந்தஸ்ஸ வா வுத்தங், முக²ங் பி⁴க்க²ங் த³த³ந்தியா.
931. கதி உக்கி²த்தகா வுத்தா, ஸம்மாவத்தனகா கதி?
தயோ உக்கி²த்தகா வுத்தா, தேசத்தாலீஸ வத்தனா.

932. அத³ஸ்ஸனப்பபகம்மே, ஆபன்னாபத்தியா து³வே;
ஏகோ அப்படினிஸ்ஸக்³கே³, பாபிகாய ச தி³ட்டி²யா.
933. கதி நாஸிதகா வுத்தா, கதீனங் ஏகவாசிகா?
தயோ நாஸிதகா வுத்தா, திண்ணன்னங் ஏகவாசிகா.
934. மெத்தியா து³ஸகோ சேவ, கண்டகோதி தயோ இமே;
லிங்க³ஸங்வாஸத³ண்டே³ஹி, நாஸிதா ஹி யதா²க்கமங்.
935. ஏகுபஜ்ஜா²யகேனேவ, ஏகேனாசரியேன ச;
த்³வே தயோ அனுஸாவேதுங், வட்டதீதி ச நித்³தி³ஸே.
936. ஞுத்தியா கப்பனா சேவ, ததா² விப்பகதம்பி ச;
அதீதகரணஞ்சேதி, தயோ கம்மஸ்ஸ ஸங்க³ஹா.
937. ஞுத்தியா கப்பனா நாம, “த³தெ³ய்ய”ச்சேவமாதி³கா;
“தே³தி ஸங்கோ⁴, கரோதீ”தி, ஆதி³ விப்பகதங் ஸியா.
938. “தி³ன்னங், கதங்” பனிச்சாதி³, அதீதகரணங் ஸியா;
ஸங்க³ய்ஹந்தி ஹி ஸப்³பா³னி, கம்மானேதேஹி தீஹிபி.
939. ஸங்கே⁴ ஸலாககா³ஹேன, கம்மேனபி ச கேவலங்;
காரணேஹி பன த்³வீஹி, ஸங்கோ⁴ பி⁴ஜ்ஜதி, நஞ்ஞதா².
940. ஸங்க⁴பே⁴த³கபி⁴க்கு²ஸ்ஸ, தஸ்ஸ பாராஜிகங் ஸியா;
அனுவத்தகபி⁴க்கூ²னங், து²ல்லச்சயமுதீ³ரிதங்.
941. பயுத்தாயுத்தவாசாய, கதி ஆபத்தியோ பு²ஸே?
பயுத்தாயுத்தவாசாய, ச² பனாபத்தியோ பு²ஸே.
942. ஆஜீவஹேது பாபிச்சோ², இச்சா²பகதமானஸோ;
அஸந்தங் உத்தரிங் த⁴ம்மங், உல்லபந்தோ பராஜிதோ.
943. ஸஞ்சரித்தங் ஸமாபன்னே, ததா² ஸங்கா⁴தி³ஸேஸதா;
யோ தே வஸதி ஆராமே, வத³ங் து²ல்லச்சயங் பு²ஸே.
944. விஞ்ஞாபெத்வா பணீதங் து, போ⁴ஜனங் பி⁴க்கு² பு⁴ஞ்ஜதி;
பாசித்தி பி⁴க்கு²னியா சே, பாடிதே³ஸனியங் ஸியா.

945. விஞ்ஞாபெத்வான ஸூபங் வா, ஓத³னங் வா அனாமயோ;
பி⁴க்கு² பு⁴ஞ்ஜதி சே தஸ்ஸ, ஹோதி ஆபத்தி து³க்கடங்.
946. த³ஸஸதானி ரத்தீனங், சா²தெ³த்வாபத்தியோ பன;
த³ஸ ரத்தியோ வஸித்வான, முச்செய்ய பாரிவாஸிகோ.
947. பாராஜிகானி அட்டே²வ, தேவீஸ க³ருகா பன;
த்³வேயேவானியதா வுத்தா, பு³த்³தே⁴னாதி³ச்சப³ந்து⁴னா.
948. நிஸ்ஸக்³கியானி வுத்தானி, த்³வேசத்தாலீஸ ஹொந்தி ஹி;
ஹொந்தி பாசித்தியா ஸப்³பா³, அட்டா²ஸீதிஸதங் பன.
949. பாடிதே³ஸனியா வுத்தா, த்³வாத³ஸேவ மஹேஸினா;
வுத்தா பன ஸுஸிக்கே²ன, பஞ்சஸத்ததி ஸேகி²யா.
950. பஞ்ஞுத்தானி ஸுபஞ்ஞேன, கோ³தமேன யஸஸ்ஸினா;
ப⁴வந்தி பன ஸப்³பா³னி, அட்³டு⁴ட்³டா⁴னி ஸதானி ஹி.
951. யோ பனேதேஸு வத்தப்³போ³;
ஸாரபு⁴தோ வினிச்ச²யோ;
ஸோ மயா ஸகலோ வுத்தோ;
ஸமாஸேனேவ ஸப்³பு³தா².
952. மயா ஸுட்டு² விசாரெத்வா, பானிஅட்ட²கதா²னயங்;
கதத்தா ஆத³ரங் கத்வா, உக்³க³ஹேதப்³பு³மேவித³ங்.
953. அத்தே² அக்க²ரப³ந்தே⁴வா, விஞ்ஞாஸஸ்ஸ கமேபி வா;
கங்கா² தஸ்மா ந காதப்³பா³, காதப்³பா³ ப³ஹுமானதா.
954. ஸஉத்தரங் யோ ஜானாதி;
வினயஸ்ஸ வினிச்ச²யங்;
நிஸ்ஸயங் ஸோ விமுஞ்சித்வா;
யதா²காமங்க³மோ ஸியா.
955. நிஸ்ஸயங் தா³துகாமேன, ஸவிப⁴ங்க³ங் ஸமாதிகங்;
ஸுட்டு² வாசக்³க³தங் கத்வா, ஞுத்வா தா³தப்³பு³மேவித³ங்.
956. இமங் பட²தி சிந்தேதி, ஸுணாதி பரிபுச்ச²தி;

வாசேதி ச பரங் நிச்சங், அத்த²ங் உபபரிக்க²தி.

957. யோ தஸ்ஸ பன பி⁴க்கு²ஸ்ஸ, அத்தா² வினயனிஸ்ஸிதா;
உபட்ட²ஹந்தி ஸப்³பே³வ, ஹத்தே² ஆமலகங் விய.

958. இமங் பரமமுத்தரங் உத்தரங்;
நரோ ஹமதஸாக³ரங் ஸாக³ரங்;
அபுத்தி⁴ஜனஸாரத³ங் ஸாரத³ங்;
ஸியா வினயபாரகோ³ பாரகோ³.

959. அதோ ஹி நிச்சங் இமமுத்தமங் தமங்;
விதூ⁴ய ஸிக்கே² கு³ணஸங்ஹிதங் ஹிதங்;
நரோ ஹி ஸக்கச்சவபூரதோ ரதோ;
ஸுக²ஸ்ஸ ஸப்³புங்க³ணகம்மத³ங் பத³ங்.

960. வினயே படுபா⁴வகரே பரமே;
பிடகே படுதங் அபி⁴பத்த²யதா;
விதி⁴னா படுனா படுனா யதினா;
பரியாபுணிதப்³புமித³ங் ஸததங்.

நிக³மனகதா²

961. ரசிதோ புத்த⁴தத்தேன, ஸுத்த⁴சித்தேன தீ⁴மதா;
ஸுசிரட்டி²திகாமேன, ஸாஸனஸ்ஸ மஹேஸினோ.

962. அந்தரேனந்தராயங் து, யதா² ஸித்தி⁴முபாக³தோ;
அத்த²தோ கந்த²தோ சேவ, உத்தரோயமனுத்தரோ.

963. ததா² ஸிஜ்ஜ²ந்து ஸங்கப்பா, ஸத்தானங் த⁴ம்மஸங்யதா;
ராஜா பாது மஹிங் ஸம்மா, காலே தே³வோ பவஸ்ஸது.

964. யாவ திட்ட²தி ஸேலிந்தோ³, யாவ சந்தோ³ விரோசதி;
தாவ திட்ட²து ஸத்த⁴ம்மோ, கோ³தமஸ்ஸ மஹேஸினோ.

965. கந்திஸோரச்சஸோஸீல்ய-புத்தி⁴ஸத்தா⁴தயாத³யோ;
பதிட்டி²தா கு³ணா யஸ்மிங், ரதனானீவ ஸாக³ரே.

966. வினயாசாரயுத்தேன, தேன ஸக்கச்ச ஸாத³ரங்;
யாசிதோ ஸங்க⁴பாலேன, தே²ரேன தி²ரசேதஸா.

967. ஸுசிரட்டி²திகாமேன , வினயஸ்ஸ மஹேஸினோ;
பி⁴க்கூ²னங் பாடவத்தா²ய, வினயஸ்ஸ வினிச்ச²யே.

968. அகாஸிங் பரமங் ஏதங், உத்தரங் நாம நாமதோ;
ஸவனே ஸாத³ரங் கத்வா, ஸிக்கி²தப்³போ³ ததோ அயங்.

969. பஞ்ஞாஸாதி⁴கஸங்க²யானி, நவகா³தா²ஸதானி ஹி;
க³ணனா உத்தரஸ்ஸாயங், ச²ந்த³ஸானுட்டு²பே⁴ன து.

970. கா³தா² சதுஸஹஸ்ஸானி, ஸதஞ்ச ஊனவீஸதி;
பமாணதோ இமா வுத்தா, வினயஸ்ஸ வினிச்ச²யேதி.

இதி தம்ப³பண்ணியேன பரமவெய்யாகரணேன திபிடகனயவிதி⁴குஸலேன
பரமகவிஜனஹத³யபது³மவனவிகஸனகரேன கவிவரவஸபே⁴ன
பரமரதிகரவரமது⁴ரவசனுக்³கா³ரேன உரக³புரேன பு³த்³த⁴த³த்தேன ரசிதோ
உத்தரவினிச்ச²யோ ஸமத்தோதி.

உத்தரவினிச்ச²யோ நிட்டி²தோ.